

## MITI MÂNEC

MITI MÂNEC papia qizec i Judañic Babilonia mârenkonec risierâ juwefumbiñ jañere Gae â Nunumu Papia eweczi ekac jaha. Psalm zâñe i dânâñecko bătikiépene zĩñuc ekac: Gae.

Nugini ñic nâñâcnao Gae Mânec fowec wâc. Gae i gae fârine jâmbân erâ wâc runehec. I zĩñucte hefuambiñ: Ñic e me e wiac busâqocnehuc me bubiañnehec moc fuacneme mañticnezi weniñuc manawec irec fuñe mufuaocte gae hefuahuc mufuawec hâcne. Eme Miti Mânec irec fuñe honepene ijaha fokac. Ñic gae wiac i hefuambiñ jañe mañjenicte fuñe â dân i gaeo hâcne râehuc mufuambiñ. Eme irec papia qizec irec zâñe MITI MÂNEC muenğopeneñ.

Judañic jañe gae wiac hefuambiñ sâc i papia irec mañnao mi râe-fârekicne. Jañe gâcne sâko sawa hone wosâc ehuc Miti Mânec 150 iñuc gâzuckerâ râemiñ.

MITI MÂNEC papia qizec i bâfâuckepene dâkâne sâko 5 fuakac, ine kecziñuc:

*Dâkâne 1 i Mi Mâ 1—41.*

*Dâkâne 2 i Mi Mâ 42—72.*

*Dâkâne 3 i Mi Mâ 73—89.*

*Dâkâne 4 i Mi Mâ 90—106.*

*Dâkâne 5 i Mi Mâ 107—150.*

Miti Mânec i dân â hawarine fuñe fuñe hefuambiñ, kecziñuc: Danje gae, mumutenj gae, makuc gae, mañ bâbârisie gae, kiñ bebehe gae, okac babazu gae, nunumu gae, binañ gae,

sâcmutâc dânte gae, manqârânheç juju irec gae, erâ gâcne gâcne.

Miti Mânec hefuambin̄ njic i janere zâne mocwâc mi mana-fâren̄gopenen̄. Mâc Dawidi â gae hehe njicfâc-ticne jaje bocjaha hefuambin̄, in̄uc honen̄gopenen̄. Erâ zin̄uc honen̄gopenen̄ wâc: Miti Mânec bocjaha i Israe njic kâpâcwâru bacjoparâ Babilonia mâren̄ko mi bacjopa rakic-nao hefuakicne, â moc moc ine kâpâcwâruonec risierâ hefuakicne.

Miti Mânec i wemocte hefuambin̄ erâ wenin̄uc ehuc hefuambin̄? I zin̄uc manan̄: Israe njic jaje Wofun̄ Anutu mucne bacnehuc hefuambin̄. Anutu mai ecnehuc dan̄ge mumuten̄ ecnenin̄te hefuambin̄. Juju â eebapa-jen̄jicko wiac fuawec irec manasuhuc gae wiac gâcne hefuambin̄ wâc. Jaje taha mumutiri irec homban̄ njehuc gae hembin̄, taha bapa gie bahuc gae hembin̄, sabata homban̄ njehuc gae hembin̄, zoan̄ sâc furic bâzi rikehuc gae hembin̄, aakic homban̄te gae wiac hefuambin̄, erâ zoan̄ gie bapa gâcne irec gae wiac buc buc hefuambin̄ wâc. Jaje in̄uc ehuc juhapie gae wiac gâcne i nunumu-jen̄jic ewec, â gâcne i naren̄ garen̄ gae wiac-jen̄jic ewec.

Jaje qanan̄ in̄uc ehuc gae wiac-jen̄jic hefuarâ mimin̄zi qâric micko hejumbien̄. Izi juku zâhec ine qâzuckepie Miti Mânec papia qizec fuawec hâcne.

## **DÂKÂNE NAMBA 1**

### **1**

*Hata jajahec*

- <sup>1</sup> Njic keczinuc ere manape zerine ekac:  
 E njic hehesicne jaņere tutumaņko mi juekac,  
 me sindaņne jaņere hata mi âteekac,  
 me mu âke sisicne jaņere ņondenko mi  
 ņeekac.
- <sup>2</sup> Inuc ehuc Wofuņte sâcmutâc dâņ ine mana aņac  
 eekac,  
 â sâcmutâc-ticne ņafe zoaņ sâc manatâc  
 qâtâc eekac.
- <sup>3</sup> E jâc moc opâmecko sarakicne inucne,  
 fârine i damaņkoa fuaekac â rehacne mi  
 qaņækac;  
 eme gie wiac baocmu i fua biaņ efâreocmu.
- <sup>4</sup> Njic hehesicne jaņe ine inucne mâcne,  
 jaņe padi jawa mânâņzi bawiseekac inucne.
- <sup>5</sup> Irec hehesicne jaņe dâņgieo qin herâ mi do-  
 maniņmu,  
 â sindaņne jaņe tiņne jaņere tutumaņko mi  
 sanaņkeniņmu.
- <sup>6</sup> Wiac Wofuņzi tiņne juju jaņere hata maname  
 fokac i.  
 Â hehesicne jaņere hata ine raku sifucke  
 sanaņkeekac.

## 2

### *Qâpuc njicwofuņ jaņe pepeç mi enzepien*

- <sup>1</sup> Qâpuc jaņe wemocte jufâfânâņ eeņgopien,  
 â njicne njicne jaņe dâņ racne mana biric  
 eeņgopien?
- <sup>2</sup> Wofuņ â Mesia-ticne râsi ejacteniņte,  
 mâreņ njicwofuņ jaņe meo roroc eeņgopien,

â ñicbomboj jañe ââte sanaj ehuc  
muenjgopienj:

<sup>3</sup> “Kâpâcwâru-jekic hezupene wahaoc,  
niñgiñ-jekic hetâcnepene rârieoc.”

<sup>4</sup> Sambânko ñeekaczi gâwiekac,  
Wofuñzi honec-jopahuc mu âke sisic eja-  
reekac.

<sup>5</sup> Erâ ine mana gâpâre-jarehuc jazaocmu,  
kimbenko hâhâwic hejarehuc ziñuc muocmu:

<sup>6</sup> “Noni hâcne ñicwofuñ-nane âkendâñnepo,  
Zionko, nahacne tiri tikio.”

<sup>7</sup> Wofuñte mumupañ musokape.  
E ziñuc nazawec: “Go ñokâ-nane,  
go hâcne miñecgac bâfuacgukopac.

<sup>8</sup> Numu-naretec ñicne ñicne biñe qagarepe,  
mâreñ qañeñne rauckecmurâ  
qikiñne-garepe.

<sup>9</sup> Goki aej qaruczi qazuc-jopazemec,  
afezi kuzi bakicne inucne qanzañ-jopaze-  
mec.”

<sup>10</sup> Irec ñicwofuñ ñoñe manñânñhec enzeñienj,  
mâreñte guriñ bapa, uñdâñ mananzeñienj.

<sup>11</sup> Wofuñ arañ bacnehuc kiñañ qacnenzeñienj,  
jâjâwâckehuc kikene muduckenzeñienj.

<sup>12</sup> E kimbeñ qañareme hatao sipirickenziñienj,  
kimbeñ-ticne afecnea bâruñkeocmu.

Ere dapeñko soñkeniñmu sasawa jañere man-  
apene zeri bubian  
eekac.

### 3

#### *Anutu go babafic-nane*

- <sup>1</sup> O Wofuŋ, guguriŋfâc-nane jaŋe guru sâko;  
 bocjahazi fahare râsi enareŋgopieŋ.
- <sup>2</sup> Bocjahazi nore kecziŋuc muenŋgopieŋ;  
 “E Anutuzi sâcne mi bafickeocmu.”
- <sup>3</sup> Wofuŋ go ine rârec rârec sabecnuekic,  
 â keteŋ-nane juhuc hâbi-nane henareekic.
- <sup>4</sup> No hahaŋne bahuc Wofuŋ wiracneekopac,  
 eme tiri tiki- ticnao domahuc micnaneo  
 roekac.
- <sup>5</sup> No waha fope guŋzi qâmâcnujec.  
 Eme Wofuŋzi dopecnuekacte qârepac.
- <sup>6</sup> Niç teŋ tausenŋ jaŋe râsi enarehuc orâŋnuhapie,  
 no jaŋere sifu mi hâwicnuocmu.
- <sup>7</sup> O Wofuŋ go faharec! Anutu-nane, bataracnuc!  
 Go râsifâc-nane mauc-jeŋicko jopaekic,  
 ŋic hehesicne micsiec-jeŋic qazuekic.
- <sup>8</sup> Sisipirickonec babatara i Wofuŋtao fokac.  
 Jambuŋgezi gurufâcge qârufa-jarezejec.

### 4

#### *Guŋdameŋte nunumu*

- <sup>1</sup> Sacfozic Anutu-nane, go wira-garepe mana-  
 narec.  
 No gâŋgâŋko fohape sawane  
 bâfua-nareekiczi  
 aki anonoc enarehuc nunumu-nane manac.
- <sup>2</sup> Niçbureŋ, zâŋe biŋe-nane ro waha âte eku

wezimucko beheniņmu?  
 Dâņ jawanere aņac â burecte wosaņeņ gie,  
 i mo damaņko hetaraniņmu?

<sup>3</sup> No Wofuņte biņe epemurâ ro sakac enarewec,  
 i ņoņe hone taranzapiņ me.  
 No wira wâwâsic ecnepe Wofuņzi manaekac.

<sup>4</sup> Kimbeņ qazo qaniņ, mâc sindaņ ine mi eniņ.  
 Fofu-ņeņicko fohuc maņzi mana wosâeniņ,  
 ehuc niniņkeniņ.

<sup>5</sup> Taha fâri biaņ râeniņ,  
 â mamac-ņeņic Wofuņtao fooc.

<sup>6</sup> Bocjahazi muenņgopiņ,  
 “Wemocko wiac biaņ moc honenzapeņ!”  
 Wofuņ, go zâņe maige bâfeņnetec tamae-  
 nâreoc.

<sup>7</sup> Go nore maņko aņac zeri fekicne bâfuameņ;  
 nânâ mâriri dameņ-jeņicko bubiaņ mamana i  
 wahakac.

<sup>8</sup> Maņbahac fâsâc waha fohape guņzi  
 qâmâcnuzejec;  
 Wofuņ gore michte hâcne wamao ņec juc  
 eekopac.

## 5

### *Mitiņiczi furicko taha rârâere numukac*

<sup>1</sup> O Wofuņ, go dâņnanere hazec râec,  
 huhuse-nane mi mana takirec.

<sup>2</sup> Manahaņ owa-nanezi hazecgao qaqazuoc,  
 Wofuņ Sâko â Anutu-nane,

nunumu-nane gorao hâcne hefakac.

<sup>3</sup> O Wofuŋ, go furickoa marac fânân-nane manae-kic,  
uupictea taha bâmocke-garerâ gore zâŋe fiekopac.

<sup>4</sup> Eebapa repicne hohonebâc i Anutu gorao mi fokac,  
sâqocnezi gore maŋfuŋko jufofo i arictac.

<sup>5</sup> Penaroŋ eengopieŋ jaŋe gore maio mi domaniŋmu,  
sâqocne bapa sasawa jaŋere takicguekac.

<sup>6</sup> Burecdân eengopieŋ jaŋe bâsirowec-jopaekic,  
sochâro â eeatuc ŋic jaŋere takicguekac.

<sup>7</sup> No ine miriŋge sâc tâmiric fokacte,  
ufuŋgao razizo mukopac.

No tiri ufuŋge maickehuctecne,  
araŋ bagarehuc dape-garepemu.

<sup>8</sup> O Wofuŋ, go râsifâc-nane jaŋere erâ,  
gahacne tiŋne hatao jowacnuzemec;  
hatage mai-naneo bâwâneŋkezemec.

<sup>9</sup> Jaŋere micko jâmbomac dâŋ moc mi fuaekac,  
sisipiric ine maŋkerâ juengopieŋ;  
marac-jeŋic i hâmoc qâŋqâŋ bâbâfua,  
namaŋ-jeŋic i wokemaŋ ruraa.

<sup>10</sup> Anutu, go mutec kinjeŋiczi kimuŋ-jopazejec,  
ehame jaŋacne bitiŋko kinzepieŋ.  
Sindaŋ boc eengopieŋte tunjopazemec,  
go hâcne fegarembiŋ i.

- 11 Dapeŋgao soŋkeenɣopieŋ jaŋe ine zeri efârenzepieŋ,  
jaŋe bubiaŋ gae hehuc jaha domanzeɣpieŋ.  
Â goki ine sacfozic ejarezemec,  
eme zâŋegere aŋac-jopaekac jaŋe kiwae-  
garenzepieŋ.
- 12 O Wofuŋ, go hâcne ɳic tiŋne jambuŋkeekomec,  
go aki anonocge maruku iŋucnezi rufac-  
neekomec.

## 6

### *Zâicmaŋko fohuc Wofuŋ wâwâsicke*

- 1 O Wofuŋ, go kimbeŋko mi hanecnuzemec,  
erâ aaricko ɣa bâtiŋ mi enarezemec.
- 2 O Wofuŋ, no weaŋkekopacte wiac urucko  
enarec,  
me kike-nane jâjâwâckekacte basanaŋnuc.
- 3 Maŋ ɣâqâtâc-nane wâc mâretec jâjâwâckekac  
Wofuŋ go muc, mo dameŋko taraocmu?
- 4 Wofuŋ go fotikiec, juju-nane asao roc.  
Aki anonogere erâ sisipirickonec batarac-  
nuc.
- 5 Hâmocko gore mamasasu mi fokac i.  
Me hâmoc haeo mozi muga bagareocmu?
- 6 No husehuc foku rokawekopac;  
ɳafe sâc zâŋeuc-nanezi fofo- nane  
bânâŋke-fâreekac,  
kiokupe bilaŋke-nane bânɣumuŋke-fâreekac.
- 7 Busâqoc manakupe zâŋe-nane kitutuckekac,  
kisâfâc-nane jaŋe enarekupie zâŋe-nane  
bâniniŋkekac.



- 8 Sâqocne bapa, ñoñe behecnu-fâreniñ,  
Wofuñzi kifânâñ-nane manajec;  
9 Wofuñzi kio wâwâsic-nane manajec,  
Wofuñzi nunumu-nane ro sakac ejec.  
10 Kisâfâc-nane sasawa jañe qurutuarâ  
weañkeniñmu,  
qenñfâfâc jaha risiehuc mimi-jeñic man-  
aniñmu.

## 7

### *Anutu e mumutiñte jâcne*

- 1 O Wofuñ Anutu-nane, no gore dapeñko  
soñkekopac;  
guriñnuñgopieñ sasawa jañeraonec bafic-  
nurâ bataracnuc.  
2 Râsi e laioñ iñucne kisucnuzackohec,  
ehuc moczi mi ñezicnuha omaecnuzackohec.  
3 Wofuñ Anutu-nane, no keci jâmbomac epoo,  
eebapa repicne menaneo bohatakacko,  
4 no âgo moc wamane juha wiac gâgâpâcne ec-  
nepoo,  
me moczi râsi enareme nânâ mafa jâoc  
ropoo,  
5 ine râsi e manacnehañ jâpecnuku bâfuacnuzejec,  
erâ âtefacnume mâreñko qarâ fozepac,  
ehame zâñe biñe-nane rufemañko duckezec.  
6 O Wofuñ, go kimbeñgehec faharec,  
go râsifâc-nane zonzoñ maickehuc fejarec,  
go okac babazure dâñ mumenzi nore erâ  
mana qâqârec!

- 7 Njicne njicne jaņe tumaņnehuc rârecgunzepieņ,  
eme jowaru- fârerâ faic ocna ņeņegao  
ņezemec.
- 8 Wofuņ go njicne njicne dâņ mutara-jareekic.  
No tiņne-nanere sâcko mutara-narec, Wofuņ;  
noraio maņtaniņ fokac, irec sâcko hâcne.
- 9 Njic sindaņne jaņere sâqocne omaeoc me!  
Njic tiņne ine goki kime dopec ecnezemec,  
maņ â mamasu ba esâic ecneekiczi,  
Anutu tiņne rune go hâcne.
- 10 Anutuzi maro-nane jukac,  
eki hâcne njic maņhumuc ņezic-jopaekac.
- 11 Anutu e mumutara tiņne,  
erâ e zoaņne zoaņne bune gâpâreekac.
- 12 Njic moc e maņne mi bârisieme,  
Anutuzi sâqe-ticne zâmuekac.  
Tepe-ticnao gurutuc âteme hujec.
- 13 Žikare wiac hâmoc bâbâfuanehec bâmockewec,  
tepe qâtâcneme zocbâruņnehec ra  
kicjopaekac.
- 14 Manakic, njic moc e maņticnao sâqocne râe  
qâzuc eekac,  
eme sindaņ kiweckehuc juku gibioc roekac.
- 15 E nombâņ rorâ ba akic eekac,  
erâ nombâņ bâmockewecko e jahac huekac.
- 16 Sisipiric bâfuawec izi ņerisierâ runere sahacko  
kiekac,  
e jahacne sindaņzi waha utu maine  
hefâuckeekac.

- 17 Wofuŋ mumutiŋ- ticnere erâ danĝe  
 âzâcnezepac,  
 Wofuŋ, Femicne sâko, zâŋe-ticne mumutenĝ  
 gae hecnezepac.

## 8

*“Nĝic e wemomac-ticnere manasucneekic?”*

- 1 O Wofuŋ, Wofuŋ-nâŋec, zâŋegere miczonzonĝ  
 mâreŋ sâc râreckehuc mo inĝucne fua rakac;  
 go hâcne quŋ qasaŋĝe sambânĝko  
 musokaŋgopieŋ.
- 2 Gegecne â susuonec jaŋere mickonec hâcne.  
 Kisâfâcĝe jaŋere erâ sacsanaŋ  
 âkendânĝnemeŋ,  
 râsi â okac babazu ŋic dânĝ fâsâe-jareocte.
- 3 Sambânĝko zâŋe fihuc meqâreŋĝe honekopac,  
 mosa â bâpiŋ basarickehuc râe rameŋ.
- 4 Go ŋic e wemomac-ticnere manasucneekic,  
 â ŋicte qâric wemo-ticnere hone mainĝ ecnee-  
 kic?
- 5 Sifu bafahare gahacne wahamicnao râemeŋ,  
 zâŋe biŋe bâfuacnehuc tatamaczi erickemeŋ.
- 6 Meqâreŋĝere gurinĝ baocte mutaracnemeŋ,  
 wiac zeŋgoma kike- ticnere rurumaŋko  
 râemeŋ,
- 7 Iama bulimakao sasawa,  
 kâte qowi wâc inĝuc jaha.
- 8 Erâ wâc sawa wipe â hâwec qowi,  
 hâwecte hatagânĝko rac warec juekac,  
 wiac i mâmâc sasawa.
- 9 O Wofuŋ, Wofuŋ-nâŋec, zâŋegere miczonzonĝ

mâreᅇ sâc râreckehuc mo iᅇucne fua rakac!

## 9

### *Wofuᅇte mumutiᅇ dâᅇ mumbiankezo*

- 1 Maᅇ hâcbuc jaha Wofuᅇ go danᅇe gazape,  
eebapage wawarecnehec sasawa musokape.
- 2 Bubianᅇ manahuc kiwae-garepe,  
Femicne sâko go zâᅇge mumuteᅇ gae hec-  
nepe.
- 3 Râsifâc-nane jaᅇe rârâpe wisehuc,  
fâfâc-jopame maigao sipirickembiᅇ.
- 4 Goki hâcne dâᅇ nane qaqaᅇcne i mu fâreteᅇ emeᅇ,  
go mumutara tiᅇzezi eri ᅇᅇᅇgao ᅇemeᅇ  
hâcne.
- 5 Go ᅇicne ᅇicne hanec- jopahuc sindaᅇᅇic  
bâsirowec-jopameᅇ,  
ehuc zâᅇe-ᅇeᅇic bâtâmiretec omatac fuawec.
- 6 Râsi omae-fâreᅇie sesuctac fofo sanaᅇ fuawec,  
hae sâko-ᅇeᅇic ᅇerawec i wâtuᅇᅇe qârisiemeᅇ,  
eme biᅇe-ᅇeᅇicte ninikec sanaᅇ fuawec.
- 7 Wofuᅇ e ine guriᅇ bapa-ticne dameᅇ tâmiric  
foocmu,  
mumutara ᅇeᅇe-ticne hesanaᅇkeweczi qin  
herâ ᅇeocmu.
- 8 Mâreᅇte faio mumutara gie bâtiᅇnehuc baocmu,  
ᅇicne ᅇicne jaᅇere dâᅇ sâcᅇeᅇicco  
mutiᅇneocmu.
- 9 Wofuᅇ e keke suec suec ejarekicne jaᅇere huec  
sanaᅇ,

ro waha âte ejarehapie huec ejareekac.

- 10 Wofuñ, zâñege mana mañ eenngopienzi gorao roweckeenngopien,  
go wira basac egareenngopien jañe mi behec-jopaekic.
- 11 Wofuñ Zionko ñec juc eekac e mumutenñ gae hecneniñ,  
gie baekac i ñicne ñicne jañerao musokaniñ.
- 12 E socte kiñ bataraekaczi manasuc-jopaekac,  
qarâ suriñne jañere wiwirare mi nikeck-eekac.
- 13 O Wofuñ, go aki anonoc enarec,  
qaisocnuenngopien jañere meo zâic bâfuaekopac honec;  
hâmocte motâckonec bafaharecnuekic hâcne.
- 14 Eme wiac embiankeekic irec binanñ bafârezepac,  
ehuc Zionte otâ ere hae zonño,  
hone baficgere zeri bari ezepac.
- 15 Qâpuc guru jañe jañac nombânñ bâmockembiñko hutâmirembiñ,  
wiwitic sonñonko râembiñzi kike-jeñicko kiwec.
- 16 Wofuñ e okacne dân mujarehuc fuñne-ticne bataniñkewec,  
ñic sindañne eebapa-jeñiczi ufic ejareme jowambiñ.
- 17 Ñic sindañne jañe hâmoc haeo hunzepienñ,

ņicguru Anuture ninikec juņgopieņ sasawa  
jaņe hâcne.

<sup>18</sup> Ņic hapetac jaņere ninikec sanaņ mi fuaocmu,  
tac qararacne jaņere woworic fârimâc mi  
fohuc juocmu.

<sup>19</sup> O Wofuņ, go faharec! Ņiczi pepec sâko mi  
ezejec.

Ņic gurune gurune gore maio dâņgie  
banzepieņ.

<sup>20</sup> O Wofuņ, go bipic tatara bâfua-jaretec,  
qâpuc guru jaņe munzepieņ, “Nâņe Ņic  
sawa.”

## 10

*Sindaņņic repicne e Wofuņte tâpirizi bawa-  
haocmu*

<sup>1</sup> O Wofuņ, go wemocte taicko domahuc jukomec?  
Žârâ hâriņ damenķo wemocte soņkeekic?

<sup>2</sup> Sindaņņic jaņe pepec ehuc hapetac fific guguriņ  
ejareņgopieņ;  
jaņac dâņbitiņ râeņgopieņ ira kicjopazejec.

<sup>3</sup> Sindaņņic e maņticnere aņac irec penaron  
eekac,  
monenķ mafare andac eekaczi Wofuņ mu-  
sorinķerâ râpeckeekac.

<sup>4</sup> E sâke bâbâc ehuc Wofuņte moc mi muekac,  
ziņuc sawa manasuekac: “Anutu e mi jukac.”

<sup>5</sup> Damenķ sâc wiac ebac eme mâriri fuacneekac;  
gore okacdâņ faic fokac, mi mamana-ticne;  
kisâfâcne sasawa ine fura-jareekac.

- 6 Maņzezi manasuekac: “Mi rândiņkepemu,  
dameņne dameņne zârâ hâriņ moc mi maic-  
nuocmu.”
- 7 Micticnao mumusoriņ â eeatuc â ima bapa  
fuserâ fokac,  
nameņnere rurumaņko bâbâsifuc â hehesic  
soņkerâ fokac.
- 8 E hae sâc somâ barâ foekac,  
soņkerâ ņeku ņic bahacmâc qâhâmoekac,  
ņic mamakucne honeocte zâņenezi ruc  
baekac.
- 9 Laioņzi uupicko foekac iņuc soņkerâ ņeekac,  
ņic mamakucne hâpoocte ruc bahuc ņeekac  
hâcne,  
eku hâporâ repa-ticnezi basanaņkeekac.
- 10 Huacbucne qakume betaņkeekac,  
tâpiri wânzâņ-ticnere rândiņke qaekac.
- 11 ņic sindaņne e maņzezi muekac, “Anutu e  
nikeckejec,  
zâņe maine bâsâockejec, moc mi honeocmu.”
- 12 O Wofuņ, go faharec; o Anutu go baficnuc!  
ņic qarâ suriņne jaņere mi nikecguoc!
- 13 ņic sindaņhec e wemocte Anutu musoriņkeekac?  
Wemocte maņzezi mukac, “Dâņgie mi nare-  
ocmu?”
- 14 Go honeekic. Zâic serereņ fuame qâoma mi  
eekic.  
Giene bacmurâ mamananagao râetec foekac.  
Huacbucnezi gore mamananac juekac,  
â goki bekâ mâsiņ mamac rau ecneekic.

- 15 Go sindaŋŋic â sâqocne bapa meombân-ticne gazuzemec;  
 eebapa-ticne repicne irec bâbâtiŋ gie bazemec;  
 bakutecne omae-fârezejec.
- 16 Wofuŋ e Wofuŋ Sâko jurazihuc juocmu sanaŋ,  
 qâpuc guru jaŋe mâreŋ-ticnaonec ratâmirenzepieŋ.
- 17 Wofuŋ, go maŋhuhuŋ jaŋere wira wâwâsic dâŋ manaekic,  
 go maŋjeŋic hutuŋkeekic â hazec râe-jareekic;
- 18 ehuc bekâ mâsiŋ â ro waha âte ejarekicne,  
 jaŋe ŋezic-jopahuc dâŋjeŋic mutiŋneekic;  
 eme mâreŋŋic moczi wiac gâgâpâcne mocwâc mi bâfuazejec.

## 11

### *Wofuŋ e jukacte wemocte wisezo?*

- 1 No Wofuŋte dapeŋko soŋkekopac.  
 Eme weniŋucte ziŋuc nazaŋgopieŋ?  
 “Ŋoŋe wipe iŋucne tiki mâreŋ-ŋeŋicko wiseniŋ;
- 2 manaŋgopieŋ, sindaŋŋic jaŋe tepeo gurutuc âtepie hukac,  
 erâ motecne tikocko heŋgopieŋ,  
 dapâcko ŋic maŋhumuc muruc-jopaniŋte.
- 3 Eme wiac ŋesiŋne qatarahapie,  
 ŋic tiŋnezi wemo wiac moc eocmu?”
- 4 Wofuŋ e tiri ufuŋ-ticnao jukac,  
 Wofuŋte eri ŋeŋe sambânko ŋekac.



- Ira ñehuc zâñe fikac,  
 mâreññic ñokac hone qârâwiñ ejarekac.
- <sup>5</sup> Wofuñ e tiñne â hehesicne ba esâic ejareekac,  
 moc e zikare añackeme ere takicke-  
 jâmbâñkeekac.
- <sup>6</sup> Sindaññic jañere faio zoc â kâmbâc sâqocne  
 mume waha heocmu;  
 mânâñ sanañ zoc fâroroc-ticnehec kâdoc qa-  
 jareocmu.
- <sup>7</sup> Wofuñ e tiñne hâcne, eebapa tiñnere  
 añackeekac;  
 ñic mañhumuc jañe zâñe maine honeniñmu.

## 12

### *Wofuñte tâpirizi burecte tâpiri sirickekac*

- <sup>1</sup> O Wofuñ, kuku! Ñic mitihec arictac embiñ,  
 mâreññic nâñere ñondenjo dânfârio qoqo-  
 hota omaemiñ.
- <sup>2</sup> Mâmâc sasawa eeatuc eec eenñopien,  
 maññenicko râsidân foha micbipic-  
 jeñiczi âgodân eenñopien.
- <sup>3</sup> Micbipic wokemañ rua-jareekac,  
 â namañ penaronj dân muekac,  
 i Wofuñzi hetâcne-jarezac me!
- <sup>4</sup> Jañe ziñuc muenñopien: “Nameñ- nâñeczi  
 sanañkenañmu,  
 micbipiczi bafic- nâpoha mozi bawahac-  
 nâpooocmu?”
- <sup>5</sup> Qarâ suriñne jañere zârâ hâriñte erâ,  
 â tac qararacne jañere kio wâwâsicte erâ

Wofuŋzi mukac, “No zijuŋzia faharerâ  
manjhâhâŋ ejarekac jaŋe juju bian  
jarepemu.”

<sup>6</sup> Wofuŋte mumupaŋ dâŋ i dâŋsaric,  
siliwa uucne kuzio arec <sup>7</sup> rikekupie opâ  
eekac,  
ehuc qaqaŋ taenŋe fuaekac iŋucne hâcne.

<sup>7</sup> O Wofuŋ, go dâŋ i basanaŋkehuc sabec-  
nâpozemec,  
eme ŋicguru zi jaŋe wiac moc mi  
enârenzepienŋ,

<sup>8</sup> sindaŋŋic jaŋe ŋifec gafac masu wânzâŋ juip-  
iehapie,  
â mârenŋic ŋonden-ŋâŋecko juju bapa repic-  
nezi qârâŋke-bipiehame.

## 13

### *Ninickec i mo damenŋko taraocmu?*

<sup>1</sup> Wofuŋ, go nore nikecgu sanaŋkekac i wez-  
imucko taraocmu?

Go zâŋe maige bâsonŋke-nareekic i mo  
damenŋko taraocmu?

<sup>2</sup> Buzâic manahuc jukopac i wezimucko  
mâtenŋkeocmu?

Zoanŋ sâc busâqoc bajukopac i mo damenŋko  
omaeocmu?

Kisâ- nanezi nifepupu enareekac i  
wezimucko beheocmu?

<sup>3</sup> O Wofuŋ Anutu-nane, go fitec wareoc, micnaneo  
roc.

- 3Âņe-nane batamaec, hâmocte guņzi  
 qâmâcnuzacte,  
 4 kisâ-nanezi docke-narekac muzacte,  
 râsifâc-nane jaņe rândiņkepe zeri enziņiņte.  
 5 No ine aki anonogere mamanaç jukopac,  
 bâbâpiaņgere erâ maņzi zeri ekopac.  
 6 No Wofuņ gae hecnepe,  
 e âgo jaun enarekac hâcne.

## 14

### *Wofuņzi mâreņņic jaņere sindaņ honeekac (Mi Mâ 53:1–6)*

- 1 Mutucne jaņe maņņiczi muenņopieņ:  
 “Anutu moc mi jukac.”  
 Jaņe repicne, eebapa-jeņic mamakâcne,  
 moczi moc wiac biaņne mi eekac.  
 2 Wofuņ e sambâņkonec fime wahaekac,  
 ehuc mâreņņic ņonden-jeņicko mamanahec  
 moc juhuc,  
 Anutu wira basac ecneenņopieņ me mâcne i  
 honeekac.  
 3 Jaņe qâsoriekicne sasawa,  
 zeņgoma repirembiņ;  
 moczi moc wiac biaņne mi eekac,  
 arictac jâmbâņ.  
 4 Sâqocne bapa, ņicfâc-nane ki sipiric  
 ejareenņopieņ,  
 jaņe qicqucne jufâreņņopieņ me?  
 Jaņe Wofuņ noraonec nânâ nâipiehuc,  
 sifu no mi wâsicnuenņopieņ.  
 5 Dameņ mocko bipic tatara embiņ,

ine Anutuzi tiņne guru qâtec-jopawecko.  
 6 Nոյոյե դիւ գարâ suriņne hata-ticne hesifuckezo  
 muhapie,  
 eki Wofuņte dapeņko soņkeme qurutu-  
 aniņmu.  
 7 Zionkonec Israerao bâbâpiaņ fuazac me!  
 Wofuņzi դիւfâcne jaņere juju hata herisieoc-  
 muo  
 ine Jakobozi zeri eocmu,  
 â Israezi bubiaņ manaocmu.

## 15

*Nic weniņucnezi sâcne Wofuņte maņfuņko  
 juocmu?*

1 O Wofuņ, mozi qoruc bozegao դիւc foc eocmu?  
 Mozi tiri tikigao juocmu?

2 Bahacmâc juhuc wiac-ticne ebac eekac,  
 â maņticnaonec dâņ fârinea utuekac eki.

3 Erâ nameņnezi micko âkec dâņ mi eekac,  
 me âgo-ticne sâqocne moc mi ecneekac,  
 me qomâ-ticne mi musoriņkeekac դիւc iņucne  
 hâcne.

4 Erâ դիւc tuņjopakicne jaņere maname wahaekac,  
 â Wofuņ araņ bacneņgopieņ jaņe ine  
 sâsec-jopaekac;  
 erâ wâc Anuture maio dâņ moc mupaņkerâ,  
 zâhec honeme դեմâckeme sifu fârine  
 bâfuaekac.

5 Moc ine moneņ-ticne դիւc qikiņne-jareekac,  
 i okacne fehuc risiecneocte manasuhuc mi  
 eekac;  
 erâ wâc դիւc bahacmâc ere dâņ muhasickeocte

monerj râneco mupie qikiñneekac.  
Wiac injucne eocmu e qiñ herâ domaocmu.

## 16

### *Wofuñ e ñicfâcne jañere mañboreñ fârine*

- <sup>1</sup> O Anutu, go hone kitan enarec,  
no gore dapeñko soñkekopac.
- <sup>2</sup> No Wofuñ âzâcnekopac, “Go Wofuñ-nane,  
go mañboreñ-nane mocjaha junarekic.”
- <sup>3</sup> Â mâreñ zira mitiñic juñgopieñ jañere mukopac,  
jañe furi sâkofâc-nane, jañerao añac-nane  
fokac.
- <sup>4</sup> Nemu mocte wowosâe jañe mañzârâ bocjaha  
fua-jareekac.  
No soczi taha bapa gie-jeñicte takicnukac,  
â nemu zâñe-jeñic mu bâuac mi epemu.
- <sup>5</sup> Hesarac mâreñ â nânâ kâdoc-nane i Wofuñzi  
ekac,  
go hâcne mâreñ biñe-nane basanañkekic.
- <sup>6</sup> Gañrukec mâreñ biañnao râe-narekicne,  
merâfâc-nane honepe añacne ekac.
- <sup>7</sup> Wofuñ, dân mu henunuc enareekac, e muafeck-  
ekopac,  
ñafeo buhândân-nanezi wâc mu qâmoc ena-  
reekac.
- <sup>8</sup> No Wofuñ mañzi fârepe mai-naneo domahuc  
juekac,  
e fâre-naneo domaha biric boroc mi epemu.
- <sup>9</sup> Irec bunane biañkeme mañzi mu zeri ekopac,

erâ sahad-nanezi wâc sâcne ñec foc eocmu.

<sup>10</sup> Go qaisocnutec hâmoc haec mi zâzinkepemu,  
â tirinjege behetec gârecke zañ mi eocmu.

<sup>11</sup> Go jujure hata nowatuekomec;  
go hâcne juekico bubianñ guru fufusuc fokac,  
mefâregao añac bajukic i mi tatarane.

## 17

### *Nic tinjere wira wâwâsic*

<sup>1</sup> O Wofuñ, dânñ tinje manac! Wâwâsic-nanezi  
bâfuacguoc!

Eatuc tâmiric numu-garekopac, hazec râec!

<sup>2</sup> Goki dânñane mutarazemec,  
gore zâñezi wiac hone jañgeñkeocmu.

<sup>3</sup> Go maññane esâickecme me ñafeo iqicnucmu,  
me ba esâic enarecmuo, ine mamasu  
sâqocne mi bâfuacmu.

Micnanezi aka mi qambarañkeekac.

<sup>4</sup> Ñic jañe wiac kosa ehapie, no gore mic reñkehuc,  
zika qaqa jañere hata mi âtepo.

<sup>5</sup> No gore itiroc bâjâpehuc jupo,  
hatage mi âte sifuckepo.

<sup>6</sup> No wâsicgukopac, Anutu, go micnane sâcne  
rocme;  
hazec râerâ dânñane manac.

<sup>7</sup> Mâsi bahuc aki anonocgere fuñne bataniñkec;  
râsi wise- jarehuc mefâregao dapeñ  
bâfuaengopieñ,  
ñic i jañere bâbâpiañ juekic.

<sup>8</sup> Zâñe hândânge injucne bajucnuzemec,

- fakec rurumaŋgao hefacnuzemec,  
 9 ɲic sindaŋne jaŋe sipiricnuzo eŋgopieŋ,  
 râsifâc-nane jaŋe hâmoc bâfua-nareninŋte  
 somâ râe-nareŋgopieŋ hâcne.
- 10 Wokemaŋ dânjeniczi busâqoc mamana  
 bâniniŋke-jarewec,  
 micjenicko penaroŋ dân fuaekac.
- 11 Jaŋe bâjâpecnu wareku orâŋnuŋgopieŋ,  
 hetapaicnupie mâreŋko qarâ fopere  
 ejarekac.
- 12 Laioŋzi qowi kiocte zawieekac inuc eŋgopieŋ,  
 laioŋ motecne uupicko ruc barâ foekac irec  
 sâc.
- 13 O Wofuŋ, go fahare maic-joparâ herândiŋ-  
 jopac!  
 Zikazi juju-nane sindaŋɲic jaŋere meonec  
 batarac.
- 14 O Wofuŋ go megezi ɲic jaŋeraonec bataracnuc,  
 juju kâdoc-jenic mâreŋte wiacko fokac  
 jaŋeraonec hâcne.
- Wiac bâmocke-jaremeŋ izi hobu-jenic fusucmaze-  
 jec,  
 naru motecfâc-jenic jaŋe wâc sâcŋopame  
 jaŋere qiefâc jaŋe tiwâne ronzeŋieŋ.
- 15 No ine tiŋke biaŋ ekicnezi gore zâŋe mai  
 honezepak,  
 mana qâqârehuc hawarige honerâ gapec-  
 nuzejec.

# 18

## *Wofuñ bafic-ticnere danje mumuteñ dân* (*Sam II 22:1–51*)

- <sup>1</sup> O Wofuñ, tâpiri-nane, no mañzi jaungukopac.
- <sup>2</sup> Wofuñ e qânâ tiki-nane â huec-nane â babatara-nane.  
Anutu- nane e nore jâc, dapeñ- ticnao sonjekopac.  
E maro-nane â bâbâpiañte wâtuñ-nane â hae sanañ-nane.
- <sup>3</sup> No Wofuñ, mumuteñte hozi, e wira wâwâsic ecneekopac,  
eme râsifâc-nane jañeraonec bataracnuekac.
- <sup>4</sup> Hâmocte repazi hariñnuwec,  
sisipiricte rumizi bârârâñnuwec;
- <sup>5</sup> hâmoc haere niñgiñ qâfisecnuwec,  
hâmocte bitin bâmbeñkepo.
- <sup>6</sup> Bipic tara-nareme Wofuñ wâsickepo,  
Anutu-nanezi baficnuocte ki owa epo.  
Ufuñ-ticnao marac fânâñ-nane manawec,  
ki owa-nanezi hazec-ticnao qaqazuwec.
- <sup>7</sup> Eme mâreñzi qiqiteckerâ suriñkewec;  
tikire hobeteñne wâc qarac qarac qawec;  
i ere kimbeñte inuc fuawec.
- <sup>8</sup> Sâke hawec-ticnaonec hosâc wahawec,  
micticnaonec zocbâruiñ wefuwec,  
zoc kine iinñerâ râwiñnewec.
- <sup>9</sup> E sambâñ bârâriehuc tara wahawec,  
kike rurumañ-ticnao duñdapâc fowec;
- <sup>10</sup> kerubim fainao ñehuc sawao warewec,  
mânâñte faio acmâc jaha wahawec.



- 11 Dapâczi fonkehuc ŋaqi ecnewec,  
karorac opâneheczi orânkehuc ficboze ec-  
newec.
- 12 Mai-ticnao tatamac fowec irecnec  
hoe sanaŋ hândâŋne â zoc uucne,  
karorac-ticne hemârânkerâ wahawec.
- 13 Wofuŋzi wâc sambânko quŋ hewec,  
Femicne Sâkozi dâŋfânâŋ ewec,  
hoe sanaŋ hândâŋne â zoc uucnehec.
- 14 E tepe- ticne qâtâcneme râwiŋnerâ rame  
tâtiembiŋ,  
bâbâric-ticne wicke- jareme hâwic-jopame  
wisembiŋ.
- 15 Eme hâwec zâkân fâhâŋne tâtâc fuawec,  
â mârenŋe hobetenzi fua taniŋkewec.  
O Wofuŋ, hahanec dâŋgere iŋuc ewec,  
kimbenŋere micrombân hâcne.
- 16 E faic juhuc meticne sicnerâ rocnuwec,  
zâkân sâkoonec fârecnume wefupo.
- 17 Râsi wânzân-nanere meonec bataracnuwec,  
â qaisocnumbiŋ jaŋere tâpirizi siricnuha  
sifu mejenickonec bâhocnuwec.
- 18 Dameŋ gâgâpâcne maicnume quruŋ herâ fisi-  
narembiŋ,  
ehame Wofuŋzi ine sacfozic enarewec.
- 19 E unucnurâ toma sâkoo râecnuwec,  
nore aŋackewecte bataracnuwec.
- 20 Wofuŋ e tiŋne jupo irec furine narewec,  
menane qaqaacne honehuc okacne bazu-  
narewec.
- 21 No Wofuŋte hata paŋzâic bâjâpepo,

- â sindaņ ehuc Anutu-nane mi râpeckepo.
- 22 Tiņne juju-ticnere dâņ i damaņ sâc hone den-  
denneekopac,  
â dâņsanaņ-ticne moc mi bâsuepe raekac.
- 23 No ere maio bahacmâc jupo,  
â kiņhec ezipore bâec bahuc jupo.
- 24 Irec Wofuņzi tiņne juju-nanere sâcko okacne  
narewec,  
menane qaqaacne fome zâņenezi honewec  
irec sâcko.
- 25 Niç maņuruchec e maņuruc hawari fuacneekic,  
ņic siocmâc e siocmâc hawari fuacneekic.
- 26 Niç maņqaqaac e maņqaqaac hawari fuacneekic,  
ņic bâbâņoricne e bâbâņoricne hawari fuac-  
neekic.
- 27 Ine hâcne, ñic waha qaqaane bafic-jopaekic,  
â maņfefe zâņe fiņgopieņ jaņe ine bawahac-  
jopaekic.
- 28 Jâmbomac, goki lambe qaze-nareekic,  
go Wofuņ Anutu-nanezi dapâc-nane bata-  
maeekic.
- 29 Jâmbomac, gohec râsi guru sâcne  
qâtâtiec-jopapemu,  
no Anutu-nane gohec qânâsac sâcne qam-  
baraņkepemu.
- 30 Anuture hata i qarâ biaņ,  
Wofuņte dâņ i fâri fideteņ,  
ere dapeņko soņkeņgopieņ jaņe zeņgoma  
sabec-jopaekac.
- 31 Wiac Wofuņtao zuhuckehuc mo Anutu mo  
jukac?

- Me Anutu-nâñectao zuhuckehuc mo qânâ  
sanañ mo domakac?
- 32 Anutu eki hâcne tâpiri joma-narewec,  
erâ wâc hata-naneo zârâ zâpâ bârâriewec.
- 33 Kike râe-narewec i kâte bulimakao jañere kike  
iñucne,  
erâ tikitonko âkendânñuwec.
- 34 E menane zika gie qazucnewec,  
eme aej tepe neñgoc sâcne fârehuc juekopac.
- 35 Goki sâsâoc maro biange tahacnumeñ,  
â mefâregezi âkesiñnumeñ,  
erâ hone maiñ enarehañ sokapo.
- 36 Go âte sanañkepemurâ mâreñ sawane  
bâfua-naremeñ,  
eme kike-nanezi biric borocne mi ewec.
- 37 No râsifâc-nane jâpec-jopa raku siric-jopapo,  
erâ omaec-jopaku jaha risiepo.
- 38 Henzañ-jopakupe fahareninje eipiemiñ,  
kike-nanere rurumañko rândiñkerâ fomiñ.
- 39 Zika qaquare tâpiri joma-naremeñ,  
ehuc râsifâc-nane bârokawec-jopatec docke-  
naremiñ.
- 40 Go râsifâc-nane ejarekotec râpecnurâ wisem-  
biñ,  
eme qaisocnumbiñ jañe imac-jopapo.
- 41 Jañe kio wâwâsic embiñ, eme ñeñezic moc mi  
fuawec;  
i Wofunñtao embiñ, eme dân okacne mi  
risiewec.
- 42 Henzañ-jopakupe mânânzi rufe ficne sueekac  
iñucne embiñ,  
hae zoñañonec jawa sânzân beheñgopeneñ  
irec sâc beheç-jopapo.

- 43 Njicne njicne jaņehec zika qawefuhape baficnumeņ,  
qâpuc guru jaņere micne râecnumeņ,  
ņicguru kâuc bacjopapo jaņe kiņaņ qanarem-  
biņ.
- 44 Biņe-nane manarâ izia micnane reņkemiņ,  
ņic furunezi fisirâ dape-naremiņ.
- 45 Njic furune jaņe hâbi-jeņic goronkewec,  
eme qarac qarac qahuc huec-jeņickonec wa-  
hambiņ.
- 46 Wofuņ e jukac. Qânâ sanaņ-nane e mutenkezo,  
bâbâpiaņ Anutu-nane e mucne bacnezo.
- 47 Anutu eki hâcne mana-nareha okacne bazu-  
jarepo,  
e hâcne njicguru bâuruņ-jopame nore ruru-  
maņko razimbiņ.
- 48 E hâcne râsifâc-nane jaņeraonec bataracnuwec.  
Jâmbomac, goki bafaharecnutec râsifâc-nane  
sirc-jopapo,  
jâmbomac, goki zika qaqa jaņeraonec  
bataracnumeņ.
- 49 Wofuņ, go iņuc emențe qâpuc jaņere guruo  
muafecgupe,  
â zâņege mumuteņ gae hecnepe.
- 50 Go njicwofuņge aņac zeri tahackekic,  
â wokemaņ ruacnemeņ aki anonoc  
bâfuacnekic,  
Dawidi â qâricfâcne tatara tâmiric.

## 19

*Anutu meqâreņ-ticne â micdâņ-ticnere biņe  
rara*

- 1 Sambân jaŋe Anuture eri tatamac  
mufuaenḡopien,  
meḡâreŋ-ticne ḡânikiŋzi musokaekac.
- 2 Zoan moczi zoan âgone dân ḡâmockecneekac,  
ḡafe moczi ḡafe âgone biŋe âzâcneekac.
- 3 I mumac ḡamanac eene mâcne, me nazaŋ gazaŋ  
wâc arictac,  
marac fânâŋ hazeczi mi mamanane;
- 4 eha sifu micfânâŋ-jeŋiczi mâreŋ sâcke-fâreekac,  
â dânjeŋiczi mâreŋ ḡaŋeŋnao fisiekac.  
Ira hâcne Anutuzi zoan boze bacnewec.
- 5 Eme eki socḡâri moczi ficticnaonec fahareekac  
irec sâc wefuekac,  
ehuc momori ḡic iŋucne hata-ticne âteocte  
aŋackeekac.
- 6 Wewefu-ticne sambân ḡaŋeŋnao wefuekac,  
â huhu-ticne sambân dowanḡnao huekac,  
â fâroroc-ticnezi wiac moc mi bâtiriekac.
- 7 Wofuŋte sâcmutâc dân i qarâ bian,  
maŋ ḡâḡâtâc âke ḡâreekac;  
Wofuŋte mumutaniŋ dân i fârine,  
ḡic maŋtac maŋḡârâŋ bacjopaekac;
- 8 Wofuŋte muḡâmoc dân i fâretinŋ,  
zeri bubian bâfuaekac;  
Wofuŋte sâcmutâc sanaŋ i nanaŋ zurec zurecne,  
ḡiczâŋe batamaeekac;
- 9 Wofuŋ araŋ babacne i ḡaḡacne,  
dameŋ sâc fohuc juocmu;  
Wofuŋte mumutâc dân i fâri fideteŋhec,  
erâ tiŋne sasawa.
- 10 Erâ i gol sirickehuc furi sâko ekac,  
gol emataucke-hâmokicne mâmâc sirickekac;

erâ wâc banacte aṅac qâhucke-fârekac,  
â bore wâc iṅuc jaḥa.

- 11 Dâṅ i sasawazi kiṅaṅṅicge nore uṅsawaṅ eekac  
wâc;  
moczi reṅkeocmu e furine fekiecne roocmu.
- 12 Erâ mozi bâbâsifuc-ticne hone taraocmu?  
Bahac soṅne mutâmire-narec.
- 13 Maṅfefe bahac irec wâc sabecnuzemec,  
izi ṅicbomboṅ mi enarezejec.
- Eme no ṅicsaric juhuc,  
bahac ṅemâcne mi bâfuapemu.
- 14 Go micbipic-nanere dâṅ â maṅnanere ma-  
manasû,  
i hone manac etec sâckezejec,  
o Wofuṅ, jâcnane â bâbâpiaṅ-nane.

## 20

### *Nicwofuṅte nunumu gae hembij*

- 1 Wofuṅ e zârâ zâpâ dameṅko dâṅge manazezejec,  
Jakobore Anutuzi sabecguzejec.
- 2 E tiri ufuṅko juhuc baficguzejec,  
â Zionkonec dope bâfua-garezejec.
- 3 Go taha bacnehuc juekic irec manasuzezejec,  
â bâzi rikecnehuc juekic i mana biankezejec.
- 4 Aṅacgezi wiac fâreekac i tahacguzejec,  
â mamana birige fokac irec fârine  
bâfua-garezejec.
- 5 Eme zikao sananṅetec saoreṅ qanzepieṅ,  
â Anuture zâṅeo filac-nâṅec fârepene fezejec.  
Wofuṅzi nunumuge mana-fârezejec.

- 6 Miņecne manakopac, Wofuņzi ņicwofuņ woke-  
maņ ruacnewec e bafickekac;  
tiri sambâņ-ticnao juhuc manacnekac.  
ehuc mefâre-ticnezi bafickekac.
- 7 ņic gâcne jaņe keretacko me becâsicko roweck-  
eenņopieņ,  
nâņac ine Wofuņ Anutu-nâņec ere zâņeo  
roweckenņopeneņ.
- 8 Jaņe rândiņkerâ waha jopaekac,  
nâņac ine qiņ herâ domanaņmu.
- 9 O Wofuņ, go ņicwofuņ zikao sasanaņ tahackec.  
Wiwira-nâņec manazemec.

## 21

### *ņicwofuņte danņe gae hembin*

- 1 O Wofuņ, ņicwofuņzi gore tâpirio bubiaņ man-  
akac,  
â bafickemeņte wemo afecne kiwaekac!
- 2 Goki maņticnere aņac tahackemeņ,  
â nunumu-ticne mi qatarameņ.
- 3 Gore jambuņzi wiac biaņ bâfuacnemeņ,  
â ņicwofuņ du golzi bakicne qizecnao hemeņ.
- 4 Jujure numu-garewec, eme juju tahackemeņ,  
jarane jarane, tatara tâmiric.
- 5 Goki baficketec zâņe biņe-ticne faharewec,  
eri tatamac â quņqasaņ bâfuacnemeņ.
- 6 Jambuņ sâkohec jusanaņkerâ juocte mucnemeņ,  
gore maio bubiaņ manahuc jusarickeocte  
râemeņ.
- 7 ņicwofuņ e Wofuņte roweckekac hâcne,

eme Femicnere aki anonoczi dopeckeme qin  
herâ domaocmu.

<sup>8</sup> Megezi râsifâcge sasawa bâfuac-jopaocmu,  
mefâregezi gore takic- jopaekac jaņe  
bâfuac-jopaocmu.

<sup>9</sup> Goki zoc inucne fua tâcnehuc  
zâmiziec-jopacmu.

Wofuņ e kimbeņ-ticnezi qâcjopaocmu,  
â zocbârūzi zâseņ-jopaocmu.

<sup>10</sup> Go qâricfâc-jeņic mâreņkonec  
bâsirowec-jopacmu,  
qiefâc-jeņic jaņe mâreņņic jaņere ņondenko  
omaeniņmu.

<sup>11</sup> Jaņe eatuc ehuc wiac sâqocne egareniņte man-  
asueņgopieņ,  
sifu fârine mi bâfuanिंmu.

<sup>12</sup> Tepegezi zâņe mai-jeņicko ma bacmu,  
ehuc qa jâpec ejaretec wiseniņmu.

<sup>13</sup> O Wofuņ, go tâpirigehec faharec!  
Qicwânzâņge gae hehuc muafeckenaņmu.

## 22

*Sahac zâic â buzâic hâtâne manahuc Wofuņ  
heme hariņ eecne*

<sup>1</sup> Anutu- nane, Anutu- nane, wemocte behe-  
nukomec?

Wemocte mi babaficnu â ki owa-nane mi  
mamana taic jukic?

<sup>2</sup> O Anutu-nane, no zoaņko ki owa epe dâņ mi  
bârisiekic,  
erâ ņafeo wâc epe bâbâmiriņ mi fua-narekac.

<sup>3</sup> Erâ sifu manakopac, go tiri jukomec,



- â Israe Țic jaȚere mumutenȚi gore eri ȚeȚe ekac.
- <sup>4</sup> MimiȚnefâc-nâȚec jaȚe gorao roweckembiȚ, roweckepie goki batarac-jopameȚ.
- <sup>5</sup> Wira wâwâsic egarepie asao rocjopameȚ; gorao roweckembiȚte mi qurutuambiȚ.
- <sup>6</sup> No ine qâsu, no Țic mâcne; Țiczi nifepupu enareȚgopieȚ, Țic Țokac jaȚe mana wahacnuȚgopieȚ.
- <sup>7</sup> HonecnuȚgopieȚ jaȚe mururuc enarefâreȚgopieȚ, mecpiroc enarehuc qizec fofotaric enarerâ muenȚgopieȚ;
- <sup>8</sup> “E mamasinȚ-ticne WofuȚtao râeme fowecte eki batarao, â ere ecnekacte asa feferanȚko rooc me!”
- <sup>9</sup> Goki hâcne neȚgoc bumanȚkonec enaretec fuapo, goki moȚ nâhuc fohape ȚezicnumeȚ.
- <sup>10</sup> FuapoonecteaȚ gorao fosinȚerâ foekopac, neȚgoczi rocnuweckonecteaȚ Anutu-nane erâ juekic.
- <sup>11</sup> Irec Ți zârâ zâpâzi bâmbeȚnukacko, â babafic-nane moc mi jume honekopacko, goki taicko mi mac junarec.
- <sup>12</sup> Râsi bocjahazi bulimakao inȚucne somâcnuȚgopieȚ, BasanȚkonec bulimakao momori jaȚe orânȚgopieȚ;
- <sup>13</sup> no maicnuhuc micȚeȚic anȚeȚgopieȚ, laioȚ wânzân inȚucnezi owacke-nareȚgopieȚ.
- <sup>14</sup> Opâ inȚucne hoȚnupie Țeratierâ fokopac,

- me kike bibiric-nane ɲetara-fârejec;  
 buhândân-nane sâfâ inucne ejec,  
 bumaɲ-naneo oopâne fuahuctecne.
- 15 Tâpiri-nanezi hahanjerâ kuzi dâkâ inucne ejec,  
 namaɲ-nanezi ɲaɲarac-naneo bohatakac,  
 hâmocte meo râecnukomec hâcne.
- 16 Ojai, sâqocne bapa guruzi orâɲnuɲgopieɲ,  
 qâto inucne rârec bârârec doma raɲgopieɲ,  
 me kike-nane âke mârâɲkemieɲ.
- 17 Siec-nane tâtâc fuame sâcne wowosene ekac,  
 râsifâc-nane jaɲe fiɲie wareme honecnuhuc  
 kiwaenɲopieɲ.
- 18 Jaɲe ɲaqi-nane qâsâi qahuc rusâc enɲopieɲ,  
 â rurufa-nane rune âke fuaocte qâsâi  
 qaɲgopieɲ.
- 19 Erâ Wofuɲ go ine taicko mi juc!  
 Tâpiri-nane, go zocnehec ware baficnuc!
- 20 Juju-nane zikaonec batarac,  
 mocjaha-mae qâto jaɲere meonec batarac.
- 21 Laioɲ jaɲere michaweckonec rocnuç,  
 kâte bulimakao jaɲere zuɲeonec bataracnuç.
- 22 No zâɲe biɲeɲe qomâfâc-nane mu-  
 taniɲke-jarepe,  
 kikefuɲ guruo zeri mumuteɲ egarepe:
- 23 “Wofuɲ araɲ bacneenɲopieɲ ɲoɲe e  
 mumbiankeniɲ,  
 Jakobore qâricfâc sasawa, ɲoɲe e sâseniɲ,  
 Israere gurufâc sasawa, ɲoɲe dapecneniɲ.
- 24 Njic qarâ suriɲne e zârâ hâriɲ fuacneme,  
 mi mana wahacnewec â ere mi takickewec.

Erâ zâñe maine mi bâsonkecnehuc,  
ki owa ecneme manawec.”

- 25 Tutumañ sâkoo eebapagere mumbianḡupemu,  
go araḡ bagareḡḡopieḡ jaḡere maio mumu-  
paḡ-nanere tofa bazupemu.
- 26 Qarâ suriḡne jaḡe nâku gapec-jopazejec;  
wira basac ecneḡḡopieḡ jaḡe Wofuḡ  
mutenkenzeḡieḡ;  
maḡḡeḡic firieha jurahuc junzeḡieḡ!
- 27 Niḡne niḡne jaḡe Wofuḡte manasurâ  
mâreḡ qaḡeḡnaonec erao fisiniḡmu,  
qâpuc gurune gurune jaḡe  
mai-ticnao fodapeniḡmu.
- 28 Guriḡ bapa i Wofuḡte gie biḡe,  
e niḡne niḡne jaḡere femicne.
- 29 Mâreḡte fekiḡne sasawa jaḡe eraoa dieḡzi  
heniḡmu,  
rufeo huhune jaḡe ere maio dape-fâreneḡmu,  
erâ juju-jeḡic sakareniḡte eipieniḡmu jaḡe  
wâc mâmâc.
- 30 Zâheḡ jujune jaḡe kiḡaḡ qaḡcneniḡmu;  
niḡzi zâheḡ fufua jaḡe Wofuḡte biḡe  
jazaniḡmu.
- 31 Ehuc bâbâpiaḡ gie bakicne irec biḡe  
niḡguru zâheḡ fufuane jaḡe jaza qazuc  
eniḡmu.

## 23

### *Wofuḡte jaḡuḡ bian*

- 1 Wofuḡ e lama-ticne nore soḡaḡ,  
no wiac moc mi basapemu.

- <sup>2</sup> Kecqan geunao enareme waha fomanaekopac,  
opâ heririñ toma bianao jowacnuekac.
- <sup>3</sup> E mañ qâqâtâc-nane gumeqiñneekac.  
E zâñe biñe-ticnere erâ,  
tiñne hatao jowacnu raekac.
- <sup>4</sup> Wâc tucduñ fotâcnehape duñdapâczi foñnume,  
sifu sisipiricte mi hâwicnuocmu;  
wiac go nohec jukic i,  
qarucge â gunuge jahe hemiriñnukopirec.
- <sup>5</sup> Go tiwâ zepec bâmocke-nareekic,  
kisâfâc-nane jañere maio.  
Go qizec-nane tokic ruacneekic,  
â kâdoc-nane hefuseekic.
- <sup>6</sup> Mâreñko jufehuc jupemu sâc,  
juju bian â miriñ qâtecunicmu,  
â Wofuñte ufuñko ñec domac ehape,  
juju damenñ-nane tarazokac.

## 24

### *Wofuñ mu zeri ecnehapene fisi-nârezejec*

- <sup>1</sup> Mâreñ â tagi-ticne i Wofuñzi rune jukac,  
mâreñ sâko mâreñ â ñecjuçfâc-ticne.
- <sup>2</sup> Hâwecko ñesiñ-ticne qandañkewec,  
opâ sâkoo qasanañ-ticne râewec.
- <sup>3</sup> Mozi Wofuñte tikio feocmu?  
Mozi tiri hae-ticnao domaocmu?
- <sup>4</sup> Meticne qaçacne â mañticne taniñne,  
erâ eeatuc giere mi manasuekac,  
â mumupañ burecne mi eekac e hâcne.
- <sup>5</sup> Ñic iñucnezi Wofuñtaonec jambuñ roocmu,  
â Anutu bâbâpiañzi dâncticne mufâsâeocmu.

- 6 Ine ere ejareekac guru i hâcne,  
Jakobore Anutu maickezo muŋgopien jaŋe.
- 7 Haesac motâc sâko, aŋkeniŋ!  
Motâc mimiŋ, ŋeindaŋke-hâmoniŋ!  
Eme zâŋe rara Wofuŋ Sâko e wefuoc.
- 8 Zâŋe rara Wofuŋ Sâko e mo?  
E Wofuŋ, tâpiri sanaŋ,  
e Wofuŋ, momori wânzâŋ.
- 9 Haesac motâc sâko, aŋkeniŋ!  
Motâc mimiŋ, ŋeindaŋke-hâmoniŋ!  
Eme zâŋe rara Wofuŋ Sâko e wefuoc.
- 10 Zâŋe rara Wofuŋ Sâko e mo?  
E sambâŋ momori jaŋere Wofuŋ,  
e hâcne zâŋe rara Wofuŋ Sâko.

## 25

### *Wofuŋtao qohotaniŋmu jaŋe kinjenjic behehuc ŋezic-jopaocmu*

- 1 No maŋ qâqâtâc-nane Wofuŋ gorao sâsepe  
hefakac.
- 2 O Anutu-nane, go manasingukopac, irec mana-  
haŋ mi qurutuazepac,  
kisâfâc-nane jaŋe nifepupu mi  
enarenzepienj.
- 3 Jâmbomac, gore mamananac juŋgopienzi mi quru-  
tuanzepienj,  
otec qeticne jaŋe ine bawahac- jopatec  
mimienzepienj.
- 4 Eebapage nowatutec hone manac ezepac, Wo-  
fuŋ;  
hatage forakac i qazu-narezemec.

- 5 Dâñfârige mañnao jowacnuhuc qazu-nareze-  
mec,  
go hâcne bâbâpiañ Anutu-nane,  
3oañ zora gore mamanao juekopac.
- 6 Wofuñ, buuruc â aki anonogere manasuzemec,  
i hâcne fufuñke tâmiric fowarehuc juwec.
- 7 Socqâri juhuc sindañ â qaqtara epo i mi mana-  
suzemec,  
aki anonogere sâcko ine manasu-nareze-  
mec,  
i gahacne biante erâ ezemec, Wofuñ.
- 8 Wofuñ e mañuruc â tiñne rune,  
irec ñic sindañne tiñne hata jowatuekac.
- 9 Mañhuhuñ juengopien jañe eebapa tiñnao  
jowac-jopaekac,  
ehuc jahacne hata qazu-jareekac.
- 10 Wofuñte hata sasawa i aki anonoc â erâ-  
eesanañ,  
zâzâfic â sâcmutâc-ticne basanañkeengopien,  
jañe ira jowac-jopaekac.
- 11 O Wofuñ, zâñe biñegere erâ kiñnane beheze-  
mec,  
kiñnane i ñemâcne.
- 12 Ñic wenizi Wofuñ arañ bacneekac,  
e hâcne hata âteocte mucnekicne i  
jâutuocmu.
- 13 Eme e jahacne sâcne juhâmoocmu,  
â qiefâcne jañe mâreñ rauckeninñmu.
- 14 Arañ bacneengopien jañe Wofuñzi âgo eja-  
reekac,  
erâ zâzâfic-ticne mutaniñke-jareekac.
- 15 No Wofuñtaopec jaha zâñe fihuc juekopac,

eki kike-nane wiwitickonec qâunuckeocmu.

- 16 Wofuŋ, goki maicnurâ âgo enarec me,  
no bebekâne juhuc huacbuc ekopac.
- 17 Buzâiczi qârâŋkehuc maŋnane kidapekac,  
irec zârâ hârîŋkonec bataracnuc.
- 18 Qarâ suriŋne â buzâichec jukopac i honec me,  
ehuc sâqocne bâtâmire-nare-fârec.
- 19 Kisâfâc-nane guru mo iŋucnezi  
rerepic qaisocnuŋgopieŋ i honec.
- 20 Juju-nane ŋezickehuc bataracnuc,  
dapenŋao soŋkekopacte mi qurutuazepac.
- 21 No Wofuŋ gore mamanaç jukopacte,  
bahac fâsâc â siocmâc jujuzi sabecnuzejec.
- 22 O Anutu, go zârâ hârîŋ sasawaonec  
Israe batarazemec.

## 26

### *Mitiŋic e Wofuŋte ecneha mu wâwâsic ecnekac*

- 1 O Wofuŋ, go dânane mufâsâezemec,  
no maŋ humuc hata-mae juekopac,  
â Wofuŋ go paŋnea manasiŋguekopac.
- 2 Wofuŋ, go esâicnurâ fuŋne-nane bajaŋŋeŋkec,  
maŋnane â mamanasu-nane hone wosâec.
- 3 Aki anonocge hone dendeŋneekopac,  
gorao qohotahuc hata-nane juekopac.
- 4 Eeatuc ŋic jaŋehec ŋec domac mi eekopac,  
gibioc-jeŋichec jaŋere guruo mi juekopac.
- 5 Sâqocne bapa jaŋehec jujure takicnuekac,  
â sindaŋne jaŋehec ŋeŋe wirec mi ŋepemu.

- 6 Menane zurekupe qaqačkeme,  
Wofuŋ, alatage râreckeekopac.
- 7 Ehuc daŋge gae hesokarâ heekopac,  
â mâsige sasawa mutaniŋkeekopac.
- 8 O Wofuŋ, no fic haegere aŋacnukac,  
zâŋe rarage fokac hae mâreŋ i hâcne.
- 9 Nïc sindaŋne jaŋehac mi bâsirowecnuzemec,  
soc nânâ jaŋehac juju-nane mi hetâcnezemec.
- 10 Jaŋe hâcne wiac hehesicne manasu biric  
eeŋgopieŋ,  
â bâbâmiriŋ moneŋzi mefâre-jeŋic fusuc-  
makac.
- 11 No ine maŋ humuc hata-mae juekopac,  
firuecnuhuc anonocnuzemec.
- 12 Kike-nanezi mâreŋ wâwâneŋko âte zakiekopac;  
ŋic tutumaŋ sâkoo Wofuŋ mucne  
bacnepemu.

## 27

### *Zâpâo fepene Wofuŋzi ŋezic-nâpoekac*

- 1 Wofuŋ e tatamac-nane â bâbâpiaŋ-nane,  
no more hâwicnuocmu?  
Wofuŋ e juju-nanere sâsâoc,  
no more mezarepemu?
- 2 Nïc sindaŋnezi musoriŋnuhuc,  
guruŋ herâ fisiniŋmu,  
kisâfâc-nane hâcne,  
jaŋe fâfâc-jopame rândiŋkeniŋmu.
- 3 Momori guru jaŋe toma âterâ fopie,  
bipic tatara mi epemu;



zika sâko moc fisi maicnume,  
sifu hâbi hâro jupemu.

4 Wiac mocjahare Wofuņ numucneekopac,  
irec maņhâhâņ enareekac:

Wofuņte fickoa ņec juc ehape  
juju dameņ-nane tarazejec;

â Wofuņte jauņ bian hone aņac ehuc,  
ufuņ-ticnao mu wioc ehuc ņezepac.

5 Eki hâcne dameņ sâqocnao,  
boze-ticnao soņnuocmu,  
qoruc boze-ticnao sabecnuocmu,  
â qânâ tikio bafecnuocmu.

6 Eme zi qizec-nane bâfeņneme fehuc,  
râsifâc-nane rârec bârârec jowarupemu,  
ehuc qoruc boze-ticnao taha bacnepemu,  
â zeri bari ehuc bâzi rikecņepemu;  
Wofuņ gae hecnehuc musi bacnepemu.

7 O Wofuņ, hahaņne bahuc wirape manac,  
aki anonoc enarehuc micnaneo roc!

8 Goki mumeņ, “Zâņe mai-nane basarâ bâfuaniņ.”  
Irec maņnanezi ziņuc gazakac:  
“Wofuņ gore zâņe mai bâfuapemurâ  
basakopac hâcne.”

9 Zâņe maige mi bâsoņke-narec,  
kiņaņņicge no kimbeņko mi bâsuecņuc.

Baficņuhuc juekiczi mi behecņuc,  
go bâbâpiaņte Anutu-nane.

10 Neņgoc mamac jahe behecņupic,  
Wofuņzi ine hefârocņukac.

11 Wofuņ, go hatagere fuņne qazu-narec,

- râsifâc-nane jaŋere erâ hata jaŋgeŋnao  
jowacnuc.
- 12 Guriŋnuniŋte harac engopieŋ jaŋerao mi  
gikiŋnuc;  
micko âkec ŋiczi dâŋnane muŋgopieŋ hâcne,  
maŋzoc-jeŋiczi gâmâc gâfâŋ wefukac.
- 13 No Wofuŋte uruc jaun honepemu i manakopac,  
jujune jaŋere mâreŋko hâcne.
- 14 Wofuŋte woŋec juzemec;  
sasaŋaŋ bâfuarâ hâbige rozemec;  
jâmbomac Wofuŋte woŋec juzemec.

## 28

### *Wâwâsic â mumuteŋ dâŋ*

- 1 Wofuŋ, jâcnane, go wira-garekopac,  
gepoŋ hawari mi enarec.  
Go dâŋemâc etec no nombâŋko humbiŋ  
jaŋere sâc ezipohec.
- 2 No baficnucmurâ wira-garepe;  
marac fânâŋ-nane manazemec.  
No tiri ufuŋgaopec  
mejahec-nane bafaharec-jofakopac.
- 3 Go sindaŋŋic jaŋehac mi bârâriecnuzemec,  
sâqocne bapa jaŋerao mi zuhucnuzemec;  
jaŋe âgofâc-jeŋic jaŋehac wamadâŋ i  
muŋgopieŋ,  
ehuc maŋjeŋicko ine wiac hehesicne manasu  
biric eeŋgopieŋ.
- 4 Go gie-jeŋicte sâcko okacne bâtikie-jarezemec,  
eebapa-jeŋic sâqocne irec sâcko;

- wiac ebac embinj i manahuc ejarezemec,  
 fârine bâfuambinj irec furine ronzepeinj.
- <sup>5</sup> Jane Wofunje meqâreñ mi zânjitaengopieñte,  
 â eebapa-ticne mi hone taraengopieñte,  
 eki qafarac-joparâ mocwâc mi bafaharec-  
 jopaocmu.
- <sup>6</sup> Wofunj mutenkezo!  
 Eki hâcne wira wâwâsic ecnekupe mana-  
 narejec.
- <sup>7</sup> Wofunj e tâpiri-nane â maro-nane;  
 mañnane erao roweckeekac;  
 irec baficnume mañnanezi kiwaeekac,  
 eme gae hecnehuc danje âzâcneekopac.
- <sup>8</sup> Wofunj e ñicfâcne tâpiri bâfua-jareekac,  
 â ñicwofunj wokemañ ruacnewec e zikao huec  
 sanañ ecneekac.
- <sup>9</sup> Ñicfâcge asao rocjopazemec,  
 merâfâfâcge jambuñ-jopazemec.  
 Goki lama soñañ ejarehuc,  
 bacjopa jurahuc juzemec.

## 29

### *Anuture eri tatamac quñ parandanjo fuaekac*

- <sup>1</sup> Sambânje añelo, Wofunj mutenkeninj,  
 Wofunje tatamac â tâpiri musokaninj.
- <sup>2</sup> Ajoc, Wofunje zânje biñe muac baafec ecneninj,  
 tiri eri qonañkerâ Wofunj dapecneninj.
- <sup>3</sup> Wofunje marac fânâñ hâwec faicnao fuakac,  
 Anutu tatamac runezi quñ hekac,  
 hâwec sâko faicnao Wofunji jukac.

- 4 Wofunṭe marac fânânḡ i qicwânzânḡnehec,  
Wofunṭe marac fânânḡ i qeḡ bipinehec.
- 5 Wofunṭe marac fânânḡzi jâmâzâc qazukac,  
Lebanonṭe jâmâzâc Wofunḡzi qanzaḡnekac.
- 6 Lebanonḡ tiki ecneme bulimakao motec tinac  
kiwaekac,  
Sirionḡ tikizi kâte bulimakao sâckekac.
- 7 Wofunṭe marac fânânḡzi zocbârḡ inḡucne fuakac.
- 8 Wofunṭe marac fânânḡzi tuhu mâreḡ itiriḡkekac,  
Wofunḡzi Kadesi tuhu mâreḡ itiriḡkekac.
- 9 Wofunṭe marac fânânḡzi borinḡjâc zâkiriḡkekac,  
erâ kâtene kâtene imackekac;  
eme ufuḡ-ticnao zeḡgoma ziḡuc wiranḡgopiḡ:  
“Anutu mutenḡkezo!”
- 10 Wofunḡ e eri neḡe-ticnao rumi faicnao neḡac,  
Wofunḡ e guriḡ bapa gie-ticne barâ barahuc  
juzokac.
- 11 Wofunḡ e neḡfâcne tâpiri tahac-jopazejec!  
Wofunḡ e neḡfâcne wamazi jambunḡ-jopazejec!

## 30

### *Hâmockonec batarakicne ere danḡe gae*

- 1 Wofunḡ, go bafaharecnumenṭe muafecḡupe;  
go râsifâc-nane mana-jaretec pepecne mi  
enarembinḡ.
- 2 O Wofunḡ Anutu-nane, no kuku qagarepo,  
eme goki qiḡicne bacnumenḡ.
- 3 O Wofunḡ, go qâqâtâc-nane hâmoc haeonec bae-  
fumeḡ,

nombânțe bițe jaņeraonec jujuo  
bârisiecnumeņ.

<sup>4</sup> Mitijicfâc-ticne ņoņe Wofuņ mumuteņ gae hec-  
neniņ,

â tiri zâņe-ticnere daņge âzâcneniņ.

<sup>5</sup> Kimbeņ-ticne dameņ bembene mac fuaekac,  
aki anonoc-ticne ine fohuc juha juju dameņ  
taraekac.

Ņafeo ki mamakuc iqic-nâpoekac,  
hae fureme ine zeri bubiaņ fuaekac.

<sup>6</sup> No ine manape fâsâeha kecziņuc mupo:  
“No biric boroc moc mi epemu.”

<sup>7</sup> Wofuņ, go maņuruc qanarehuc,  
tiki sanaņ tinac râecnumeņ.

Erâ ine zâņe maige bâsonke-naretec,  
bipic tatara enarewec.

<sup>8</sup> Eme Wofuņ, go kio wâwâsic egarepo,  
ziņuc muhuc numu-garepo:

<sup>9</sup> “No nombânko hupemu,  
hâmoc-nanezi wemo fârine bâfuaocmu?

Rufezi sâcne mumbiaņguocmu?

Erâ-eesanaņge sâcne muromackeocmu?

<sup>10</sup> Wofuņ, go manarâ aki anonoc enarec!  
O Wofuņ, go baficnuc!”

<sup>11</sup> Eme go kinane hetikietec gae wowo fuawec,  
go busâqocte mateņ hetara-naremeņ,  
ehuc zeri bubiaņte eri hendiņ henaretec  
huwec.

<sup>12</sup> Ine maņ qâqâtâc-nanezi

dâñemâc mi juhuc mumbianguocte.  
 O Wofuñ, Anutu-nane,  
 no dañge gazarâ gaza ehuc juzepac.

## 31

*Zârâ hârîñ mañko Wofuñtao roweckehuc nu-  
 mucnezo*

- <sup>1</sup> O Wofuñ, no gore dapeñko soñkekopac;  
 qurutuapemurâ moc mi mana-narezemec,  
 tiñnegere erâ bataracnuzemec.
- <sup>2</sup> Noraopac hazec râec, tarec jaha bataracnuc!  
 Qânâuñ enarehuc sabecnuc!  
 Huec sanañ enarehuc ñezicnuc!
- <sup>3</sup> Ine hâcne, qânâuñ â huec-nane domakomec;  
 zâñe biñegere erâ jowa qatañ enarec.
- <sup>4</sup> Bitiñ soñsoñko râe-narembiñkonec unucnuc,  
 go hâcne dapeñ-nane jukomec.
- <sup>5</sup> Megao mañ qâqâtâc-nane râekopac,  
 goki furi-nane bameñ, o Wofuñ, erâ-eesanañ  
 Anutu.
- <sup>6</sup> Nemuqâñ jabane bajuengopien jañere  
 takicguekac,  
 no ine Wofuñ gorao qohotaekopac.
- <sup>7</sup> No aki anonogere añacnuha bubian man-  
 akopac,  
 goki huacbuc-nane zâñjitañte,  
 â mañzârâ fua-nareha hone jauñ enare-  
 meñte.
- <sup>8</sup> Erâ râsifâc-nane jañere meo mi râecnuhuc,  
 kike-nane tomao râetec âte sanañkepo.

- 9 O Wofuŋ, no bugâpâcko jukopacte aki anonoc enarec;  
 ki busâqoc ekupe zâŋe-nane kitutuckekac,  
 erâ maŋ qâqâtâc â sahaç-nane betankekac.
- 10 Busâqocko juhape juju-nane omaezo ekac,  
 husehuc juhape jara-nane tarazo ekac.  
 Qarâ suriŋne jukuhape tâpiri-nane wahakac,  
 â me kike-nane hâmo qançac ekac.
- 11 Kisâfâc-nane sasawa nifepupu enarengopieŋ,  
 qomâfâc-nane jaŋe bâec bacnuengopieŋ;  
 manacnuŋgopieŋ jaŋe hâhâwic banarengopieŋ,  
 hae zoŋao honecnuengopieŋzi wise-  
 narengopieŋ.
- 12 Hâmokicne jaŋere nikec-jopaekac inuc nore  
 ninikec fuakac,  
 kuzi qançanekicne tinac ekopac.
- 13 Bocjahazi saŋuc ziŋuc qapie manaekopac:  
 “Wiac hâhâwicne.”  
 Ehuc juju-nane nowac roninçte turerâ  
 dâŋ nazaŋ gazaŋ eeŋgopieŋ.
- 14 No ine Wofuŋ go manasiŋguhuc ziŋuc  
 muekopac:  
 “Go nore Anutu.”
- 15 Dameŋ-nane gore meo fokac;  
 râsi enarehuc guriŋnuengopieŋ,  
 jaŋere meonec bataracnuzemec.
- 16 Zâŋe maigezi kiŋaŋicge no tamae-narezejec;  
 aki anonocgezi baficnuzemec.
- 17 O Wofuŋ, go wâsicgukopacte,  
 qurutuapemurâ moc mi mana-narezemec.  
 Nïc sindaŋne jaŋe qurutuahuc,

dân fâsâe-jareha hâmoc haeo hunzepien.

- 18 Burecņiczi penaronġ â saħac fefe ehuc,  
 ŋic tiņne juekac e musoriņķeenġopien,  
 jaņe nâņġuņ enzepien.
- 19 Buurucġe i araņ bagareenġopien jaņe  
 bâmocķe-jaremeņ,  
 erâ buuruc hâcne ŋicmaio gore dapeņko  
 soņķeenġopien jaņe bâfua-jaremeņ,  
 buuruc i mo iņucne sâko!
- 20 Go zâņe maigere sâsâoczi  
 ŋic jaņere zikadâņte sabec-jopaekic.  
 Go bozegao soņjopatec,  
 râsidâņzi mi sipiric-jopaekac.
- 21 No Wofuņ mumbianķepe!  
 E hae sananķo juhape mâsi bahuc,  
 aki anonoc-ticne bâfua-narewec.
- 22 No jâmbomac hâwicnume mupo,  
 “Zâņe maigaonec bârâriecnurâ taicko  
 râecnukicne.”  
 Eme baficnucmurâ kuku qagarepe,  
 sifu ki owa-nane manameņ.
- 23 Mitinġicfâc-ticne sasawa, ŋoņe Wofuņ maņzi  
 jaunķeniņ!  
 Ŋic siocmâc jaņe Wofuņzi hone kitanġ eja-  
 reekac,  
 maņfefe jaņe ine okacne bafehuc jareekac.
- 24 Wofuņte woņec juņġopien sasawa,  
 ŋoņe hâbi-ņeņic ronzepien â maņņeņic mi  
 wahazejec.



## 32

### *Sâqocne bâbâtâmire i wiac furi sâko*

- 1 Njic moc bahac-ticne behehicne,  
â sâqocne-ticne bâbâtîmirekicne,  
ere manape zerine ekac.
- 2 Njic moc Wofuŋzi manacneme kiŋhec mi eekac,  
â maŋticnao eatuc mi fokac,  
ere manape zerine ekac.
- 3 No sâqocne-nane hesoŋkezo mupe sahad-nane  
wahawec,  
zoaŋ zora husehuc jupo Irec.
- 4 Njafe zoaŋ sâc megezi badapecnumeŋ,  
eme maŋwamboŋ-nane kereŋkewec,  
zoaŋ sanaŋ qakume wiac hahankeekac irec  
sâc.
- 5 No sâqocne-nane mufua-garepo,  
â hehesic-nane mi hefackepo;  
no mupo, “Bahac-nane Wofuŋ mufuacnepe.”  
Eme sâqocne-nanere kiŋtofa behemeŋ.
- 6 Irec mitihac juekaczi zârâ hârîŋ damenko numu-  
garezejec;  
eme opâ rumi sâko fisiocmu,  
izi siwiŋne fehuc e mi heuaocmu.
- 7 Go maro enarehuc zârâ zâpâre sabecnuekic,  
ehuc rârec rârec sisipiricte erâ ŋezicnuekic.
- 8 Wofuŋzi mukac: Hata âtecmurâ mugarekicne,  
i qazu-garehuc gowatupe,  
no zâŋe-nanezi hone soŋaŋ egarepe.

<sup>9</sup> Becâsic me dongi, mamana tâmiric,  
jahere sâc mi ezemec.  
Jahe micko kikizi bâmâteŋ-jofazo,  
i tâmiric mi bâjâpec-nâponicmu.

<sup>10</sup> Njic sindaŋne e maŋzârâ bocjaha fuacneekac;  
Wofuŋtao qohotaekac e ine aki anonoczi  
bârârânkeocmu.

<sup>11</sup> Njic tiŋne ŋoŋe Wofuŋ bubiaŋ manacnehuc zeri  
eniŋ;  
maŋsioc tâmiric juŋgopieŋ ŋoŋe kiwae-  
fâreniŋ.

### 33

*Anutu bapafâre â aki anonoc-ticnere mumuteŋ  
gae*

<sup>1</sup> Njic tiŋne ŋoŋe Wofuŋ bubiaŋ manacneniŋ!  
Siocmâc jujuzi mumuteŋ gae hepie  
sâckeocmu.

<sup>2</sup> Musi bahuc Wofuŋ mumbiaŋkeniŋ,  
gita mucne teŋzi musi bacneniŋ.

<sup>3</sup> Gae qâricne moc hefuacneniŋ,  
musi basarickehuc gae marac sâko heniŋ.

<sup>4</sup> Wofuŋte dâŋ i dâŋfâri hâcne,  
â gie-ticne sasawa eeatuc tâmiric baekac.

<sup>5</sup> E tiŋne juju â mumutiŋ dâŋte aŋackeekac;  
Wofuŋte aki anonoczi mâreŋ fuserâ fokac.

<sup>6</sup> Wofuŋte dâŋzi sambâŋne sambâŋne bâfuawec,  
erâ mosa zoaŋ â bâpiŋfâc-jeniŋ  
micrombâŋ-ticnere fuambiŋ.

<sup>7</sup> E hâwec sâko i kiruŋko tinac qoŋgiŋkeme huwec,  
zâkâŋ zora i kânoŋko tinac ŋjewec.

- 8 Mâreñ sâko mâreñ e Wofuñ aran bacnezejec,  
 ñecjuçfâcne sasawa mai-ticnao qarac qarac  
 qahuc domanzepien.
- 9 Wiac eki muha izia fuawec i!  
 Wiraha izia fahare domawec i!
- 10 Wofuñzi qâpuc jañere mumupañ qame wa-  
 haekac,  
 ñicne ñicne jañere dânbiri hetâtieekac.
- 11 Wofuñte mumupañ i fofu sanañ,  
 mañticnere mamana biri,  
 i ñic gañne gañne jañerao fârio qaekac.
- 12 Ñicguru Wofuñzi Anutu ejarekac jañere man-  
 ape zerine ekac,  
 eki rauc-jopaocte bâwosâec-jopawec jañe  
 hâcne.
- 13 Wofuñ e sambânkonec fime wahame,  
 mâreññic sasawa honec-nâpoekac.
- 14 Eri ñeñe-ticnao ñeha zâñenezi  
 mâreñte ñecjuçfâc qâuc-jopa-fâreekac.
- 15 Eki hâcne mañjenic ba akic efârewec,  
 erâ wâc eebapa-jenic hone râwiñne-fâreekac.
- 16 Ñicwofuñ moc e momori gurufâcne  
 jañe sâcne mi ñezickeniñmu;  
 â momori moc e tâpiri sâko-ticnezi  
 sâcne mi baficke-hâmoocmu.
- 17 Zikare becâsic ere erâ  
 râsi sâcne mi sanañke-jarezo,  
 e tâpiri sâko-ticnezi  
 rune sâcne mi bafickeocmu.
- 18 Manañgopien, Wofuñ aran bacneençopien,

- â aki anonoc-ticnere mamananac juengopien,  
jane zâne-ticnezi hone main ejareekac,  
19 juju-jeñic hâmockonec bataraocte,  
eme roroc damenko qâricne juniñte inuc  
eekac.
- 20 Man qâqâtâc-nâñeczi Wofunte wonec juekac,  
e babafic-nâñec â maro-nâñec.
- 21 Jâmbomac, nâñe tiri zâne-ticnao roweck-  
eenngopenenñte  
ere bubian manaengopenenñ.
- 22 O Wofun, gore mamananac juengopenenñte,  
aki anonocgezi nâñerao fosanañkezejec.

## 34

### *Anutuzi funfunfâcne bafic-jopaekac*

- 1 No Wofun dameñ sâc mumbiankezepac;  
mumuten- ticnezi micnaneo zuzuhuc jaha  
fozejec.
- 2 Wofunte qâqin qahuc juzepac,  
eme zârâ zâpâo juñgopien jane manarâ  
añac-jopazejec.
- 3 Nohec mâmâc Wofun musokanzepenenñ,  
babafic ehuc zâne-ticne muafeckenzezenenñ.
- 4 No Wofun wira basac ecnepo sâc micnaneo  
rowec,  
ehuc hâhâwic-nane qamase-fârewec.
- 5 Erao zâne fihuc firic qâric eninñ,  
eme zâne mai-ñenñic mimižu qâžužu mi eze-  
jec.
- 6 Nñic huachucne zizi wirame Wofunzi manawec,  
ehuc zârâ zâpâ-ticne jâoc rofârewec.

- 7 Wofuŋ araŋ bacneŋgopieŋ jaŋe  
aŋelo-ticnezi heririŋ-jeŋicko ju fofo ehuc  
batarac-jopaekac.
- 8 Oi, esâicke honerâ mananiŋ: Wofuŋ e buu-  
ruchec!  
Njic moczi ere dapeŋko soŋkeocmu ere man-  
ape zerine ekac.
- 9 O mitiŋicfâc-ticne, ŋoŋe Wofuŋ araŋ bac-  
nenzepieŋ;  
e araŋ bacneniŋmu jaŋe wiac moc mi  
basaniŋmu.
- 10 Laioŋ motecne jaŋe nânâ wiacte  
hâmoeŋgopieŋ;  
â Wofuŋ wira basac ecneŋgopieŋ,  
ŋic i jaŋe wiac biaŋne moc mi basaŋgopieŋ.
- 11 O motecfâc-mae, ware hazec râehapie  
no Wofuŋ araŋ babacne irec fuŋne ŋazape.
- 12 Mo ŋic mozi dameŋ zora juocte manasukac,  
â zoaŋ bocjaha jufehuc wiac biaŋne nâ bac  
eocte ecnekac?
- 13 Namengezi sâqocne bazacte soŋaŋkezemec,  
â michipicgezi eeatuc gie bazacte aka hec-  
nezemec.
- 14 Sâqocne râpeckerâ eehâmo gie bazemec;  
wama bâfuarâ irec hata bâjâpezemec.
- 15 Wofuŋ e tiŋne juŋgopieŋ jaŋeraopec zâŋe  
fiekac,  
â wira wâwâsic ecneŋgopieŋ jaŋerao hazec  
râeekac.
- 16 Wofuŋ e zâŋe mainezi sâqocne bapa maic-  
jopaekac,

- ine zâne biņe-jeņic mâreņkonec bârârieocte.
- 17 Tiņne juju jaņe kuku qapie Wofuņzi manaekac,  
ehuc zârâ hâriņ fua- jareekac sâc jowac  
roekac.
- 18 Wofuņzi bu heheric ejareekac jaņe  
qâtec-jopaekac,  
â manjeņic ima qakicne jaņe bafic-jopaekac.
- 19 Tiņne juju e zârâ hâriņ bocjaha fuacneekac;  
Wofuņzi ine wiac iņucne sasawaonec  
batareaekac.
- 20 E me kikene sasawa hone maiņ eekac,  
irec mocjaha mac moczi mi herickecneocmu.
- 21 Sâqocnezi sindaņņic qâhâmoocmu;  
â tiņne juju qaisockenijmu jaņe kiņhec  
eniņmu.
- 22 Wofuņzi kiņaņņicfâc-ticne firuec-jopaekac;  
ere dapeņko soņkeņgopieņ jaņeraonec  
moczi kiņhec mi eocmu.

## 35

### *Ñic moc e huacbuc ehuc Wofuņ numucnekac*

- 1 O Wofuņ, goki no râsi enareņgopieņ jaņe râsi  
ejarec,  
nohec juju gie baņgopieņ jaņehec juju gie  
bac!
- 2 Maruku maņne saħacne hetec hume fahare  
ņezicnuc!
- 3 Sându zika rorâ, jâpecnuņgopieņ jaņe maic-  
jopac!  
Maņ qâqâtâc-nane âzâcnec: “No gore  
ņeņezic.”

- 4 Juju-nane omaeocte munġopien,  
 ȋic i jaŋe mimi busâqoc bâfua-jarec!  
 Sipiricnuniŋte manasunġopien,  
 jaŋe emâmânkerâ weanġenzepien.
- 5 Wofunġe aŋelozi hetapaic-jopame,  
 padi jawa inġucne tâtienzepien.
- 6 Wofunġe aŋelozi jâpec-jopa rame,  
 dapâcko âte sowarierâ jopazejec.
- 7 Jaŋe funġe tâmiricko bitin râe-narembin,  
 funġe tâmiricko omaepemurâ nombân  
 ronarembin.
- 8 Sisipiric acmâc jaha fisi-jarezejec,  
 bitin râe-narembin izi jaŋacne kicjopazejec,  
 nombân-jeŋicko hurâ omaenzepien.
- 9 Eme Wofun bubian manacnepemu,  
 e baficnukacte kiwac qawac epemu.
- 10 Me kikefâc-nane muniŋmu,  
 “O Wofun, mozi gore sâc jukac?  
 Go qarâ suriŋne e ȋic qac momorihec ere meonec  
 bataraekic,  
 â hapetac huac bucne e fiuc rorore meonec  
 bataraekic.”
- 11 Burec micko âkec ȋiczi maicnuenġopien,  
 erâ wiac kâuc bakopac irec wio-  
 nareenġopien.
- 12 Jaŋe wiac bianġnere okacne sâqocne  
 bâतिकie-nareenġopien,  
 enarekupie bekâ mâsin inġucne jukopac.
- 13 No ine huc bacjopame busâqoc ŋaqi rojupo,  
 sowa juhuc saħac-nane qapo,

qizeczi dunduŋ hurâ numuhuc jupo.

14 Âgo qomâ moc hâmome eenŋgopieŋ irec sâc epo,  
me nenŋoc-nane hâmome ezapo,  
irec sâc dunduŋ dadape rac warec jupo.

15 No dânzi fâfâcnume ine aŋac-jopaha  
tureŋgopieŋ,  
no wiac enareniŋte manasuhuc  
tumaŋnenŋgopieŋ;

ŋic pâpârâcne, zâŋe furu-nane,  
iŋucnezi musoriŋnuhuc domaŋgopieŋ.

16 Jaŋe sâke kiki dân muhuc muhuc,  
noraopec mic kikiaric kiŋgopieŋ.

17 Wofuŋ, go hone qâoma eku mo damaŋko be-  
hecmu?  
Zika-jeŋickonec bataracnuc,  
juju-nane laioŋ mickonec batarac.

18 Eme no tutumaŋ sâkoo danŋe gazapemu,  
ŋic guru dindiŋko mumbianŋupemu.

19 Maŋgâŋ râsi enareenŋgopieŋ jaŋe mana-jaretec,  
sowine wiac fuacnekac muhuc mi  
aŋac-jopazejec;

â fuŋne tâmiric qaisocnuenŋgopieŋ  
jaŋe zâŋe bazuc mi enarenzeŋpieŋ.

20 Jaŋe wamadâŋ mi muenŋgopieŋ;  
erâ ŋic wamane juraŋgopieŋ  
jaŋe ine eatuc- jopaniŋte mamasasu gie  
baenŋgopieŋ.

21 Jaŋe noraopec mâretec aŋkehuc ziŋuc  
muŋgopieŋ:  
“Jeï, zâŋe fâri-nâŋeczi qame honembeneŋ i!”



- 22 Wofuņ, go i honemec i! Irec dâņemâc mi juc!  
O Wofuņ, behecnurâ taicko mi juc!
- 23 O Anutu, Wofuņ-nane, ģiriņ ģarâ ģârec,  
erâ dâņnane dopeckehuc mutiņnec.
- 24 Wofuņ, Anutu-nane, tiņnegere sâcko ņezicnuc,  
jaņe nore erâ aņac mananzipiņte.
- 25 Jaņe maņzi ziņuc mi munzepiņ:  
“Sowine, iņuc hâcne fuacneocte  
muenġopeneņ,  
nâņâc sanaņkekupene juju-ticne omaekac.”
- 26 No zârâ zâpâ fua-nareme aņac-jopakac,  
jaņe eġaretec ģurutuarâ mimiņzepiņ.  
No pepecne enareenġopiņ,  
jaņe mimizi ņecġopakume weaņkenzepiņ.
- 27 Â nore dâņzi fârine fua taniņkeocte  
muenġopiņ,  
jaņe ine bubiaņ manahuc zeri bari enzepiņ;  
ehuc munzepiņ, “Wofuņ e kâcġene sâko,  
e kiņaņņic-ticne juhâmoocte aņackekac.”
- 28 Eme nameņ-nanezi tiņnege mutaniņkezeġec,  
â dameņ sâc mugac bagarezeġec.

## 36

### *Sindaņņic jaņere fuņne â Anuture aki anonoc*

- 1 Sindaņņic e maņfâhâņ-ticnao sâġocnezi  
ġafenġdâņ râehuc juekac;  
zâņe mai-ticnao Anuture hâhâwic mi fokac.
- 2 E jahacne maņ eatuckehuc muekac,  
“Hehesic-nane i mi fua taniņkeocmu,  
â irec mamana sâġoc mi fuaocmu.”

- 3 Micdân-ticne i mumusifuc â eeatuc;  
mana tarahuc wiac bianje ee i behewec.
- 4 Fofot-nao wiac repicne manasu biric eekac,  
bibianje hata mi âteekac â sâqocne mi  
qikiñneekac.
- 5 O Wofuñ, aki anonocgezi feku sambân heuakac,  
erâ-eesanajezi feku karoracko fisikac.
- 6 Tinjegezi Anuture tiki injucne qinj herâ ñekac,  
mumutinge hâwec zâkân sâko injucne,  
Wofuñ, go ñic â qowi bafic-nâpoekic.
- 7 Anutu gore aki anonoc furi sâko-ticne mo  
injucne!  
Mâreñjic jañe fakec rurumañgao  
sonkeengopienj;
- 8 ehuc figaonec mâriri sâko nâ bac eenjopienj,  
â anajgere opâ fifisine gumec-jopaekic.
- 9 Gorao hâcne jujure opâ zâñe fokac,  
â gore tatamacko tatamac honeengopenenj.
- 10 Go manacguenjopienj jañe aki anonocge  
zuhucke-jarehuc juzemec,  
â mañsioc tâmiric jañe bâbâpianje tahac-  
jopazemec.
- 11 Ñic penaronhec ere kikezi mi âtecnuzejec,  
â sindañjicte mezi mi jâpecnuzejec.
- 12 Dameñ mocko sâqocne bapa jañe rañe  
foraniñmu,  
herândiñ-jopakicne, sâcne mocwâc mi fa-  
hareninmu.

## 37

*Sindañjic jaņere jujuhâmo i jabane, izi mitinjic  
nâņâc mutuc mi bacnâpozejec*

- <sup>1</sup> Njic repicne jaņere erâ maņge mi sâqorezejec,  
sâqocne bapa jaņere erâ buge mi faharezejec.
- <sup>2</sup> Jaņe kecqaņ iņucne biac ururuckenijmu,  
â qinzij ârâņ qâqâri iņucne biac qaņaniņmu.
- <sup>3</sup> Wofuņtao roweckehuc eehâmo gie bazemec,  
eme mâreņgao juhuc nânâ mi basacmu.
- <sup>4</sup> Wofuņte aņac manahuc juzemec,  
eme maņgezi wiac muocmu i tahacguocmu.
- <sup>5</sup> Jujuge Wofuņte meo râezemec,  
erao rowecketec guriņ bagareocmu.
- <sup>6</sup> Eme e bibiaņge tatamac iņucne bararuņkeocmu,  
â tiņne jujuge zoaņ gereņ gereņ iņucne.
- <sup>7</sup> Wofuņte maio ninijkerâ woņec-ticne juzemec;  
moc e gie repicne manasu biric eku baocmu,  
eme gie-ticne fârine fuame buge mi fahareze-  
jec.
- <sup>8</sup> Aaric geņkezemec, kimbeņ bâec bacnezemec!  
Maņge mi fârorockezejec, izi sâqocne  
bâfuacmu.
- <sup>9</sup> Sâqocne bapa jaņe hâcne juju-jeņic hetâcnezo,  
Wofuņte woņec juniņmu jaņe ine mâreņ  
rauckenijmu.
- <sup>10</sup> Sindañjic e piticne sawa juferâ omaeocmu,  
go ņeņe hae-ticnao fisi zâņe firâ e basacmu.

- 11 Zâic mana-bipiehuc juenḡopieḡ jaḡe ine mâreḡ  
rauckeniḡmu,  
ehuc mazuc mâriri bâfuarâ aḡac faio ju-  
niḡmu.
- 12 Niḡ repicnezi ḡic tiḡne dâḡ ḡacneekac,  
ehuc mic kikiaric kicneekac;
- 13 Wofuḡzi ine ḡic repicne ḡâwiecneekac,  
dameḡ-ticne bembekeme honeekacte.
- 14 Sindaḡḡic jaḡe sâḡe unuckeḡḡopieḡ â tepe  
âpâreḡḡopieḡ,  
ḡic hapetac â ḡarâ suriḡne jopaniḡte,  
â tiḡne juju sipiric-jopaniḡte;
- 15 sâḡe-jeḡiczi jaḡacne bu âke mârâḡkeocmu,  
â tepe-jeḡic bazuzo.
- 16 Niḡ tiḡne juekac e wiac afecne rauckeocmu izi  
fekac,  
â sindaḡḡic bocjaha mazuc mâriri fojare-  
ocmu izi wahakac.
- 17 Wemocte? Sindaḡḡic e mene ḡazuzo;  
â ḡic tiḡne juekac e ine Wofuḡzi dope hutuḡ  
ecneocmu.
- 18 Wofuḡ e bahacmâc jaḡere dameḡ mana-  
fârekac,  
â wiac rauckembiḡ i fosanaḡkerâ foocmu.
- 19 Jaḡe dameḡ sâḡocnao mimi ḡaḡa mi fua-jare-  
ocmu,  
â roroc dameḡko sifu nâ ḡapec ehuc juniḡmu.
- 20 Sindaḡḡic jaḡe ine sipirickeniḡmu;  
Wofuḡte râsifâc jaḡe zariḡ âri bianḡ iḡucne  
omaeniḡmu,  
hosâc iḡucne ḡazueniḡmu hâcne.

- 21 Sindaŋɲic e wiac jaba roku okacne sâcne mi  
bâtikiëekac,  
ɲic tiŋne e ine bokifac ehuc ɲic wiac tahac-  
jopaekac.
- 22 Wemocte? Wofunɲe jambuŋ rokičnezi mâreŋ  
rauckeniŋmu,  
â sâwec-jopawec jaŋe ine arictac eniŋmu.
- 23 Ɗiczi hata âte sanaŋkerâ juju i Wofunɲtaonec  
fuaekac,  
ine ɲic moc eebapa-ticnere mana biankerâ  
iŋuc ecneekac.
- 24 Iŋucnezi rânɲiŋkehuc sifu mâreŋko mi qaekac,  
i Wofunɲzi menao rorâ basanaŋkeekacte.
- 25 No socqâri jupozɲi juku ɲicqizec ekopac,  
ehuc honehape ɲic tiŋnezi qarâ suriŋne moc  
mi ewec,  
â qiefâcne jaŋe nânâre mu huacbuc ee i wâc  
arictac.
- 26 E dameŋ sâc bokifac juekac â wiac buafec  
beheekac,  
â qâricfâcne jaŋe mâririre rowaŋ wâc  
eeŋgopieŋ.
- 27 Go sâqocne geŋkecnehuc eehâmo gie bazemec,  
iŋuc erâ sâcne jurazihuc jucmu.
- 28 Wofuŋ e tiŋne jujure mana aŋac eekac,  
e mitiŋicfâc-ticne mi behec-jopaekac.  
Tiŋne jaŋe hone maiŋ ejareme jurazihuc ju-  
niŋmu,  
sindaŋne jaŋere qâricfâc ine  
bâsirowec-jopaocmu.

- 29 Nîc tiņne jaņe mâreņ rune eniņmu,  
ehuc mâreņ fainao hati jurahuc juniņmu.
- 30 Nîc tiņne ere mickonec dân fâri bian wa-  
haocmu,  
namen-ticnezi gie bame bâbâtiņ fuaocmu.
- 31 Anutu-ticnere sâcmutâc dân maņticnao fokac,  
irec hata-ticne biric boroc mi âteekac.
- 32 Nîc sindaņnezi tiņne ruc bacneekac,  
â juju-ticne sipirickeocte maņkehuc juekac.
- 33 Meticnao feocte ine Wofuņzi mi manaekac,  
dâņgieo dânticne sâqorezacte aka wâc  
heekac.
- 34 Wofuņte woņec juhuc ere hatao ninipezemec,  
eki bafaharecgume mâreņ rune ezokic,  
â sindaņne jaņe sirowepie hone aņac ejare-  
zokic.
- 35 Nîc sindaņne moc pepec sâko eme honehuc  
jupo,  
e zamana jâc iņucne mâreņ sâockerâ do-  
mawec.
- 36 Damerj mocko fotâcnehuc dodoma tacne  
honepo,  
fârinere zâņe fipo, erâ basa-bipiepo.
- 37 Nîc bahacmâc e zâņitazemec, â siocmâc e hone  
tarazemec;  
wamare gie baekac e hâcne qâric fuacne  
raniņmu.
- 38 Sâcmutâc dân qâqâsua ine sisipiriczî qanzaņ-  
jopaocmu,

â sindaņne jaņere qâricfâc zikazi omaec-  
jopaocmu.

<sup>39</sup> Tiņne jaņere babafic Wofuņtaonec wareocmu,  
zârâ hârîņ damenķo ere dapeņko  
soņkeniņmu.

<sup>40</sup> Wofuņzi ņezic-jopahuc batarac-jopaocmu,  
sindaņne jaņeraonec batarac- jopahuc  
bâpiaņ-jopaocmu,  
ere dapeņko soņkeņgopieņte iņuc ejareocmu.

## 38

*Mitiņic kiņ bahac â huc zâicte erâ Wofuņ  
wâsickekac*

<sup>1</sup> O Wofuņ, go aaric mana-narehuc mi hanecnuze-  
mec,  
â kimbeņ qanarehuc qa bâtiņ mi enareze-  
mec.

<sup>2</sup> Gore tepe moteczi kimârâņnumbieņ,  
â megezi badapecnukac.

<sup>3</sup> Mamana sâqocgere erâ mesahac-nane qiқicne  
moc mi fokac,  
sâqocne-nanere erâ me kike-nane furu moc  
mi fokac.

<sup>4</sup> Hehesic-nanezi nowaru ferâ qâurucnukac,  
tagi sâko iņucne erâ kihâmocnukac.

<sup>5</sup> Wicnane gâreckehuc âsu fikac,  
mutuc-nanere erâ risimbiņne qakopac.

<sup>6</sup> No miņgeņkerâ dunduņ dadape jukopac,  
zoaņ zora ki mamakuc ehuc jukopac.

<sup>7</sup> Zâiczi hoqaneņ-nane fusucmarâ isirickekac,

- sahac biuc-nane dâkâne qiçicne moc mi fokac.
- 8 No dockerâ betanke sâqorekopac,  
bunaneo zâic serereņ fokacte owackehuc jukopac.
- 9 Wofuņ, go harac huacbuc-nanere kâuc mi bakomec,  
â husehuc jukopac i mana-fârekic.
- 10 Buhândân-nane zocnehec âtekac, tâpiri-nanezi behecnukac,  
â zâņe-nanere tatamac i wâc hâpokac.
- 11 Âgo qomâfâc-nane jaņe huc zâic-nanere bâec bacnuņgopieņ,  
â soctofafâc-nane jaņe taic jaha juņgopieņ.
- 12 Juju nowac rozo muņgopieņ jaņe bitieņ râe-nareņgopieņ,  
â zârâ zâpâ bâfua-narezo maņkeņgopieņ jaņe ine  
doc bacnuniņte zoaņ zora dâņ manasu biric ehuc juņgopieņ.
- 13 No ine qepon tinac ehuc dâņ mi manaekopac,  
erâ nâņguņ tinac ehuc micnane mi aņkeekopac.
- 14 Jâmbomac, no ņic moc dâņ mi manaekac iņucne,  
â micticnao okacne mumu mi fokac ere sâc jukopac.
- 15 Erâ Wofuņ, no gore woņec jukopac;



- Wofuŋ Anutu- nane, goki dân  
bâtikie-narecmu.
- 16 Zinuc mukopac: “Jaŋe âke sisic enarehuc mi  
zeri enzepieŋ,  
â kike-nanezi biric boroc eha penaroŋ dân mi  
enzepieŋ.”
- 17 No rânđinkezo ekopac hâcne,  
â zâic-nanezi moc mi behecnucac.
- 18 No hehesic-nane mufuakopac,  
â sâqocne-nanere busâqoc manakopac.
- 19 Erâ no maŋgâŋ râsi enareŋgopieŋ jaŋe  
tâpiriheç,  
â fuŋne tâmiric qaisocnuenŋgopieŋ jaŋe guru  
sâko.
- 20 Â biaŋnere okacne sâqocne enareŋgopieŋ,  
ŋic í jaŋe kisâfâc-nane juŋgopieŋ;  
îne biaŋnao qohotaekopacte inuc eenŋgopieŋ.
- 21 O Wofuŋ, go mi behecnuc!  
Anutu-nane, go mi behecnuc!
- 22 Go fâro barâ baficnuc,  
o Wofuŋ, go hâcne bâbâpiaŋ-nane.

## 39

### *Juju bembente mu mamakuc*

- 1 No mupo, “Nameŋ-nanezi sipiricnuzacte  
eebapa-nane soŋaŋkehuc juzepac;  
â sindaŋŋic jaŋe qâtecnuhuc juniŋmu sâc,  
micbipic-nane micko kiki râecnezepac.”
- 2 No nâŋguŋ erâ dânemâc jupo;  
eme izi jauŋ mi bacnuwec,

manzâic-nane qârâŋkewec.

- <sup>3</sup> Maŋnaneo hâhâwic fusucmarâ fome  
manatâc qâtâc epe zocsâko zacnuwec.  
Ehame dân zîŋuc mupo:
- <sup>4</sup> “Wofuŋ, dameŋ tatara-nanere manasupe,  
â dameŋ-nane sâcticne hone jaŋgeŋkepe,  
juju-nane ratâmirekac i mana tarape.
- <sup>5</sup> Manakic, go jara dameŋ-nane bemberŋe mac  
bâfuameŋ,  
â juju dameŋ-nane i honetec arictac tinac  
eekac,  
ine hâcne ŋic sasawa juju-nâŋec i nokafere  
sâc.
- <sup>6</sup> Jâmbomac, ŋiczi nâkumuc tinac rac warec eekac,  
wemo wiac mo fârinere ojowa sâko fuaekac?  
Ŋiczi wiac hure hemârec eekac i mozi rauck-  
eocmu?
- <sup>7</sup> “Eme, Wofuŋ, zi wemo wiacte woŋec jukopac?  
Mamanac-nane gorao fokac.
- <sup>8</sup> Kiŋ bahac-naneonec bataracnuc,  
eme mutucne jaŋe mu ruruc mi  
enarenzepieŋ.
- <sup>9</sup> No dânemâc jukopac, micnane mi aŋkekopac.  
Wemocte? Goki iŋuc fua-nareocte mumeŋ i!
- <sup>10</sup> Go tagi râe-naremeŋ i nowac roc;  
megere tâpiri wânzâŋzi omaecnukac.
- <sup>11</sup> Goki ŋic moc sâqocnere haneckehuc  
bâtîŋnecmu,  
eme eri- ticne i bobojacte eri iŋucne  
omaeocmu;  
jâmbomac, ŋic e nokafe sawa.

- 12 “O Wofuŋ, nunumu-nane manac, wiwirananere hazec râec,  
zâŋeuc-nane honehuc qâoma mi ec!  
No gorao ŋicmanac fisihuc gowarukopac,  
kâcqenefâc-nane sasawa jaŋere sâc mafa  
jukopac.
- 13 No behecnuhuc zâŋe mocko fitec rame friepe,  
erâ jufeku hae zi beherâ ratâmirezepac.”

## 40

*Danŋe â mu wâwâsic nunumu*  
(Mi Mâ 70:1–5)

- 1 No maŋuruc jaha Wofuŋte woŋec jupo,  
eme noraopec fohorehuc wiwira-nane manawec.
- 2 E sisipiricte nombânkonec baefucnuwec,  
sohoŋ râqâcnaonec unucnuwec;  
erâ kike-nane qânâ faio râeme âte zakiepo.
- 3 E gae qâricne moc micnaneo râewec,  
Anutu-nâŋecte mumuteŋ gae.  
I ŋic bocjahazi manarâ araŋ bacneniŋmu,  
erâ Wofuŋtao roweckeniŋmu.
- 4 Ŋic moc maŋnezi Wofuŋtao roweckeocmu,  
â maŋfefe jaŋerao mi fohoreocmu,  
me burecŋic qac qâsoricne mi bâjâpec-jopaocmu,  
ŋic iŋucnere manape zerine ekac.
- 5 O Wofuŋ Anutu-nane, go nâŋere manasuhuc  
mâsi â gie fuŋne fuŋne baekic i zarene fekac;  
ŋic me wiac moczi gohec sâc hehene mi ekac.  
No i muiŋ musawec ehuc binaŋne bazo mupe,  
sâcne mumufârene mi eocmu.

- 6 Taha bâzi fuṅne fuṅnere mi egareekac,  
hazeczi dâṅ mamana ine bâfua-naremeṅ;  
qowi hâcbuc ririke me sâqocnere taha bapa,  
i fua-gareocte mi muekic.
- 7 Eme mupo, “Manakic, no fisikopac,  
miti papiao nore dâṅ qâreṅkekiecne fokac:
- 8 Anutu-nane, no micge reṅkepere aṅacnukac,  
â sâcmutâc dâṅge maṅnaneoc fokac.”
- 9 Bâbâpiaṅte biṅedâṅ tutumaṅ sâkoo mufuapo,  
no micbipic-nane aka mi hecnepo,  
i Wofuṅ, go gahac manakic.
- 10 No bâbâpiaṅ giegere dâṅ i maṅnaneoc mi hefack-  
epo,  
erâ- eesanaṅgere â aki anonocgere biṅe  
mupo;  
no tutumaṅ sâkore maio  
buurucge â dâṅfârige mi hesoṅkepo.
- 11 O Wofuṅ, go buurucge mi sakare-narec,  
aki anonoc â jaunfârige izi zimicnu basanaṅ  
ezejec.
- 12 Zâic fâro fuṅne fuṅnezi bârârâṅnuṅgopieṅ,  
hehesic- nane mi wowose- fârenezi  
qâurucnuṅgopieṅ;  
jaje qizec susuc-nanere zare jâuruṅgopieṅ,  
eme maṅnane wahakac.
- 13 O Wofuṅ, manatec sâckeha bataracnuzemec,  
o Wofuṅ, fâro barâ ware baficnu.
- 14 Juju-nane hetâcnezo muṅgopieṅ,  
jaje mâmâc sasawa qurutuarâ  
mimienzepieṅ;  
no sisipiric fua-nareocte ejarekac,

jañe gorao qâwiwickerâ mamakucne  
enzepeñ.

15 No “sowine, sowine” munareñgopieñ,  
jañe mimi- jeñic manarâ sañac- jeñic  
gâgâmârâzejec.

16 Â go wira basac egareñgopieñ,  
jañe ine zeri ehuc bubiañ mana-garenzepeñ;  
gore bâbâpiañte ejareekac,  
jañe dameñ sâc munzepeñ, “Wofuñ e  
kâcçene.”

17 No jâmbomac ñic hapetac â qarâ suriñne,  
irec Wofuñ goki hone maiñ enarec.  
Go hâcne babafic-nane â ñeñezic-nane,  
o Anutu-nane, ñeñec zezepec mi ezemec!

## 41

### *Hucko fohuc Wofuñ numucnewec*

1 Hapetac hone maiñ ejareekac ñic ere manape  
zerine ekac;

dameñ sâqocnao Wofuñzi e ñezickeocmu.

2 Wofuñzi e hone soñañ ecneme jufehuc juocmu,  
eme mâreñ irec ñic jañe mu zeri ecneniñmu;  
â râsifâcne jañe wiac moc ecnezo mupie mi  
qikiñne-jareocmu.

3 Huc fohame Wofuñzi dope hutuñ ecneocmu,  
â zâic wiac-ticne bâmâteñkecne-fâreocmu.

4 No ine mupo, “Wofuñ go aki anonoc enarec;  
bâpiañnuc, no sâqocne bahuc bugao bapo  
hâcne.”

- 5 Râsifâc-nane jaņe qaisocnuhuc ziņuc  
muņgopieņ:  
“E wezimucko hâmome zâņe-ticne  
omaeocmu?”
- 6 Moc e iqicnuocte fisiekac e eatuc dâņ muekac,  
ehuc maņņezi wiac repicne mana biric eekac;  
izi hae zoņao hurâ muiņ musawec eekac.
- 7 Qaisocnuēņgopieņ sasawa jaņe saņucko dâņ  
muc manac eēņgopieņ;  
wiac gâgâpâcne fua-nareocte mamasasu gie  
baēņgopieņ.
- 8 Ehuc ziņuc muenņgopieņ: “Wiac repicne moczi  
sahacnao bohotaļec,  
irec fokackonec mocwâc mi fahareocmu.”
- 9 Erâ wâc âgo fâri-nane, maņzi zâfickehuc jupo,  
erâ nânâ wirec nâ juperec, eki wâc bunaneo  
bakac.
- 10 O Wofuņ, go ine aki anonoc enarezemec,  
ehuc mocwâc qiņicne bacnutec okacne  
bâtikie-jarezepac.
- 11 Râsi-nanezi bawahacnurâ saoreņ mi qaocmuo,  
ine ziņuc mupemu: Go nore mana  
bianķekomec.
- 12 Go ine maņtaniņ juekopacte dopecnuhuc  
jumeņ,  
erâ âkendâņnutec maigao domahuc jaha  
juekopac.
- 13 Wofuņ, Israere Anutu, e dameņ tâmiric  
mutenķehuc juzo.  
Jâmbomac jâmbâņ.

## DÂKÂNE NAMBA 2

### 42

*Anutu â tiri ufuŋ-ticnere maŋhâhâ ee*

- <sup>1</sup> Kâte bulimakaozi opâ basahuc hâmoekac,  
iŋuc hâcne maŋ qâqâtâc-nanezi Anutu gore  
hâmokac.
- <sup>2</sup> Maŋnanezi Anutu jujune gore boc hâmokac:  
Mo damenŋko fisirâ Anutu zâŋe maige  
honepemu?
- <sup>3</sup> Nafe zoaŋ sâc zâŋeuc-nanezi nânâ-nane eekac,  
zoaŋ zora ziŋuc nazahuc juŋgopienŋe: “Anu-  
tuge wena?”
- <sup>4</sup> No zâic manahuc wiac manasukopac  
i mufuape maŋnane urueoc:  
Njic guru dindiŋ biri zora jaŋere ŋondenŋko,  
Anutуре ufuŋko rajumbeneŋ;  
ehuc hombaŋte zeri gae bafehuc hepene  
irec miczonzonzi baafec-nâpowec.
- <sup>5</sup> Maŋnane go wemocte boc gâpârekic?  
Â wemocte boc hâhâŋkekic?  
Anutуре woŋec juc! E zâŋe mai-nanere babafic  
â Anutu-nane jukacte daŋge âzâcnepemu.
- <sup>6</sup> No Jordaŋ â Herimoŋ mârenŋko â Mi3a tikio  
juhuc,  
maŋnane wahakacte Anutуре manasukopac.
- <sup>7</sup> Opâ sâro-ticnezi rucneme zâkânzi zâkân wirac-  
nekac;  
jei, siri sâkogezi qâurucnu-fârekac.

- 8 Зоањ сâc wiraekopac, “Wofuњ aki anonoc-ticne fuaoc!”  
 Њafe сâc gae-ticnezi micnaneo foekac,  
 â juju-nanere Anutu e numucneekopac.
- 9 Anutu qânâ-nane âzâcneekopac, “Nore wemocte nikecguwec?  
 No râsizi bâuruњnume wemocte maku ehuc jukopac?”
- 10 Râsifâc-nane jaњe mu ruruc enarepie zâic fâro repicne manaekopac,  
 dameњ sâc ziњuc nazahuc juengopieњ hâcne:  
 “Anutuge wena?”
- 11 Maњnane go wemocte boc gâpârekic?  
 Â wemocte boc hâhâњkekic?  
 Anutуре woњec juc! E zâњe mai-nanere babafic  
 â Anutu-nane jukacte daњge âzâcnepemу.

## 43

### *Mitiњic e maњhâhâњ jaha ecnekac*

- 1 O Anutu, miti tâmiric jaњere њezicnuhuc dâњnane dopeckec,  
 њic eeatucne â hehesine jaњeraonec batarac-nuc!
- 2 Dapeњ- nane Anutu go hâcne; no ira soњkeekopac;  
 irec wemocte behecnukomec?  
 No râsizi bâuruњnume wemocte maku erâ jukopac?
- 3 Tatamacge â zâzirinњ dâњge râetec wareoc, izi jowacnuzejec.



Jowacnu fâkume tiri tikigao â ñeñe jujukao  
fisizepac.

<sup>4</sup> Eme Anutu gore alata bâqinkepemu,  
joroc Anutu-nane go maicgupemu,  
erâ musi bahuc mumutenj gae hegarepemu,  
o Anutu, nore Anutu.

<sup>5</sup> Mañnane go wemocte boc gâpârekic?  
Â wemocte boc hâhâñkekic?  
Anuturre wonjec juc! E zâñe mai-nanere babafic  
â Anutu-nane jukacte danje âzâcñepemu.

## 44

*Sâcmutâc dânrerenj jañe râsizi imac-jopakupie  
Anutu wâsickenjgopienj*

<sup>1</sup> O Anutu, go mârâc jaha, mimiñne jañere  
dameñko,  
gie fâri basarickehuc bameñ,  
i kâcçenefâc-nâñec jañe binañne banârepie,  
hazec fâri-nâñeczi manambeñ.  
<sup>2</sup> Go gahacne mezi qâpuc guru jâpec-jopameñ,  
ehuc ñicfâcge sarac-jopameñ;  
go ñic gurune gurune bâsirowec-jopameñ,  
ehuc jañe basawec-jopameñ.  
<sup>3</sup> Jañe jañacne zikazi mâreñ i mi rombiñ,  
â jañacne mezi sasanaj mi bâfuambiñ;  
aricne, go jañere añacguwecte  
mefâregezi â zâñe maigere tatamaczi  
bâfua-jaremeñ.

<sup>4</sup> Go Wofuñ Sâko â Anutu-nane jukomec,  
goki mutec Jakobozzi sasanaj bâfuaekac.

- 5 Gore tâpirire râsifâc-nâñec  
bâsuec-jopaenğopenenğ,  
zâñegere erâ âtemac-jopaenğopenenğ.
- 6 No tepe-nanere mamanac mi juekopac,  
â zika sâqe-nanezi wâc sâcne mi baficnuekac.
- 7 Goki ine râsifâc-nâñec jopanañte bafic-nâpoekic,  
â qaisoc- nâpoenğopienğ jañe  
bâtâtiiec-jopaekic.
- 8 Anutu gore mu qâqinğ zuzuhuc jaha eenğopenenğ,  
erâ tofamâc danğe mumutenğ egarehuc ju-  
nañmu.
- 9 Eme go sifu suñginğ- nâpohuc mimi faio  
râec-nâpomenğ,  
â momorifâc-nâñec mi qâtec-jopamenğ.
- 10 Goki manahañ râsifâc-nâñec wise-jarembenğ,  
eme jañe mafa wiac-nâñec nâwoc rombinğ.
- 11 Goki enâretec lama hehezure binğe jañere sâc  
embenğ,  
â qâpuc gurune gurune jañerao  
bâtâtiiec-nâpomenğ.
- 12 Go ñicfâcge wiac afecnere qikinğ-jopamenğ,  
furine ñemâcne bazu-gareninğte mi mumenğ.
- 13 Goki manahañ mendânğ-nâñecko juñgopienğzi  
âke sisic enâreenğopienğ,  
ñicguru rârec rârec mu ruruc enârehuc  
gâwie-nâreenğopienğ.
- 14 Goki enâretec qâpuc ñicne ñicne jañere mu  
qâqinğ embenğ,  
â ñicne ñicne jañe mana wahac-nâpohuc  
gâwie-nâreenğopienğ.
- 15 Njafe zoañ sâc mimizi ñecnukume,

- zâŋe mai-nane bâsonkehuc dunduŋ dadape  
juekopac,  
16 i âke sisic â mumusoriŋ ɲic dâŋjenic manahuc  
juekopacte,  
â râsi â qaqaïsoc ɲic honec- jopahuc  
juekopacte iŋuc eekopac.
- 17 Nâŋe gore mi nïkec-nâpoha,  
â zâzâficge mi hetâcnehuc eatucguhapene,  
wïac sasawa i sifu fai-nâŋecko fewec.
- 18 Maŋnâŋeczi go mi râpecguhame,  
â kike-nâŋeczi hatage mi kizuhame,
- 19 go sifu kâte qâto jaŋere hae mârenko qanzan-  
nâpohuc  
duŋdapâc maŋnao râec-nâpomeŋ.
- 20 Anutu zâŋegere nïkec-nâpozacko,  
me nemuqâŋ jabane numu hefârec  
ejarenzapeŋko,
- 21 Anutu goki mi hone tarac-nâponzan me?  
Go ɲicmaŋko dâŋ soŋne mana jaŋgenkeekic i!
- 22 Aricne, gore erâ zoaŋne zoaŋne qa imac  
enâreenɲopien,  
â lama qa hezuc eejarene jaŋere sâcko  
râec-nâponɲopien.
- 23 Wofuŋ, qiriŋ qac! Wemocte guŋ fokomec?  
Mana qâqârec! Bebehe sanan mi behec-  
nâpoc!
- 24 Wemocte zâŋe maige bâsonkekomec,  
ehuc imac-nâpokicne â bâuruŋ-nâpokicne irec  
nïkecgukac?

- 25 Jei, maŋ qâqâtâc-nâŋec i rufeo bâutuckekicne;  
 sahaç-nâŋec i mâreŋko bohotaŋâ fokac.
- 26 Fahare bafic-nâpoc!  
 Aki anonogere erâ batarac-nâpoc!

## 45

### *Nicwofuŋzi ŋokac rokac irec hombanŋe gae*

- 1 Biŋedâŋ biaŋnezi maŋnane fusucmarâ  
 qâmbâriŋkekac;  
 gae-nanere dâŋ ŋicwofuŋ mufuacnepe;  
 nameŋ-nanezi qâqâreŋ ŋicsaric moc ere kirifi  
 iŋucne.
- 2 Hawari biaŋge mâreŋŋic gâcne jaŋere siricke-  
 fârekac;  
 michipicge kereŋ bareŋne,  
 Anutuŋi jambuŋgu sanaŋkekacte iŋuc ekac.
- 3 Qac momori, go zika sâqege becsahachec  
 ombâŋgao jomac,  
 eri qaraweŋ quŋqasaŋgehec go!
- 4 Zai zonzonŋehec zikare keretacko qicwânzâŋ  
 jaha rac!  
 Zâziriŋ dâŋ dopeckezemec, tiŋne juju  
 ŋezickezemec!  
 Mefâregezi wiac hâhâwicne bâfuame honeze-  
 mec.
- 5 Tepe motecge mictara,  
 râsifâcge buhândâŋ-jeŋicko kizejec,  
 ŋicne ŋicne maigao rândiŋkerâ jopazejec.
- 6 Niçwofuŋ ŋeŋege Anuturaonec, ŋeŋe sanaŋ  
 ŋeocmu,

- 7 ȋicwofuȋ gunuge i b b tiȋ gunu.  
 7 Go tiȋne jauȋkehuc sindaȋ ȋaisockeekic.  
 Irec Anutu, gore Anutu h cne, eki wokemaȋ  
 rua-garewec,  
 zerire wokemaȋ i  gof cȋge ruaengopieȋ irec  
 s c j urukac,  
 8 Ȋaqigere  su mumundaȋ i zineȋ saȋkarac    
 tokic  su;  
 erificȋge i elefaȋte micsieczi bakicne,  
 maȋnao musi bapie mana aȋac eekic.  
 9 ȋiȋaȋ naruf cȋge jaȋere guruo  
 ȋicwofuȋ g cne jaȋere ot f c w c juȋgopieȋ,  
 mef regao ȋon ȋge Ofiri m reȋkonec gol  
 ȋonaȋke domakac.  
 10 Ot -mae manac, z ȋe fitec wareme hazec r ec:  
 Mame s kof cȋge   mamacgere ficte  
 nikecguzeȋec.  
 11 Ȋicwofuȋ e hawari biaȋgere ecneocmu,  
 er  e k cȋenege jukacte dapecnezemec.  
 12 Tiro hae rune jaȋe taha bar  fisiniȋmu,  
 mafa s koheczi  go bacguniȋte wiac amecke  
 wareniȋmu.  
 13 Ficmaȋko ȋicwofuȋte ot  erickeȋicne ȋekac,  
 ȋaȋi-ticne golzi basarickeȋicne.  
 14 Ȋaȋi ȋ reȋ biaȋ rojuha ȋicwofuȋtao jowa  
 wareȋgopieȋ,  
 naru zeȋoȋ  gof c-ticne eraoa jowac-jopa  
 fisiniȋgopieȋ.  
 15 Ȋeri bari ehuc bubiaȋhec jowac-jopa fisipie  
 ȋicwofuȋ erific-ticnao feȋgopieȋ.

- 16 O ɲicwofuɲ, ɲokâfâcge jaɲe  
 kâcɣenefâcge jaɲere jujutacko juniɲmu;  
 goki hâcne mâreɲ sâc ɲicbomboɲ  
 âkendâɲ-jopacmu.
- 17 No zâɲe biɲege ɲic gaɲne gaɲne jaɲerao bafa-  
 harepemu;  
 irec ɲicne ɲicne jaɲe tatara tâmiric  
 mutenɲguhuc juniɲmu.

## 46

### *Mamanasiɲte gae mimiɲ*

- 1 Anutu e dapeɲ sâko-nâɲec â tâpiri-nâɲec,  
 zârâ zâpâo mi hetiric- nâpohuc bafic-  
 nâpoekac.
- 2 Irec mâreɲ e hetikieme bipic tatara mi enaɲmu,  
 tiki jaɲe hâwecmaɲko huzo murâ huniɲ.
- 3 Siri jaɲe fânâɲ ehuc wânzâɲnehec qaniɲ,  
 tiki mâreɲkopec hewiwickekupie qiriɲ qaoc.
- 4 Rowaɲkonec opâ zâɲene zâɲene fisihuc  
 Anutire haeo aɲac zeri bâfuaɲgopieɲ;  
 hae i Femicne sâkore ɲeɲe hae hâcne.
- 5 Anutu e maɲnao jukacte qiriɲ mi qaocmu,  
 Anutu e furic uupictea ɲezickeocmu.
- 6 ɲic gurune gurune jaɲe iima sâko ɲɲgopieɲ,  
 ɲicwofuɲ ɲeɲe qiɣitecke rakac,  
 Anutire marac fânâɲte mâreɲ tâpirine  
 goroɲkekac:
- 7 Anutu Tâpiri Qunɣasaɲ Wofuɲzi nâɲâcnehec  
 jukac,  
 Jakobore Anutuzi huec sanaɲ-nâɲec ekac.

- 8 Wofuñzi gie baekac i moc ware honeniñ,  
mâreñko ima sâko bâfuaekac hâcne.
- 9 Mâreñ qañeñnao zikane zikane bâniniñkeekac,  
tepe bazuekac, damu âte zuekac,  
â zikare keretac zoczi rikeekac.
- 10 “Niniñkerâ, no Anutu jukopac i mana taraniñ,  
ñicne ñicne jañe sâsecnupie fekopac,  
mâreñte faio sâsecnupie fekopac hâcne.”
- 11 Anutu Tâpiri Qunqasañ Wofuñzi nânâcnehec  
jukac,  
Jakobore Anutuzi huec sanañ-nâñec ekac.

## 47

### *Anutu e ñicne ñicne jañere Wofuñ Sâko*

- 1 Ñicne ñicne, me qahuc añara heniñ!  
Anutu fânâñkecnehuc zeri gae heniñ!
- 2 Wofuñ, Femicne sâko, e qeñ bipinehec,  
e mâreñ sâko mâreñ irec Wofuñ Sâko jukac.
- 3 E ñicne ñicne bawahac-jopame dape-nârembiñ,  
qâpuc guru jañe nânâcne kiñañ qaqa embiñ.
- 4 E merafâc mâreñ qizec-nâñec bâwosâe-nârewec,  
Jakobore ecnewecte furi sâko i râcnewec.
- 5 Anutu e añara faio hân jaha fewec,  
qeñfânâñ fuahame Wofuñ e fewec.
- 6 Anutu mumuteñ gae hecneniñ, hecneniñ!  
Wofuñ Sâko-nâñec mumuteñ gae hecneniñ,  
hecneniñ!
- 7 Anutu e mâreñ sâko mâreñ irec Wofuñ Sâko  
jukac,  
mumuteñ gae hesarickerâ hecneniñ!

- <sup>8</sup> Anutu e ñicne ñicne guriñ bajarekac,  
Anutu e tiri ñeñe-ticnao ñekac.
- <sup>9</sup> Ñicne ñicne fekicnefâc-jeñic jañe turehuc  
Abrahamte Anuture ñicfâc engopien.  
Mâreñ sâc maro-jeñic Anutuzi rauckekac,  
eki jowaru-fârerâ fekac.

## 48

### *Zion tikire mumuten gae*

- <sup>1</sup> Wofuñ e kâcqene, e Anutu-nâñecte hae sâkoo  
samarierâ mumbiankenzepeneñ.
- <sup>2</sup> Tiri tiki-ticne hawari bian fejec ñekac,  
mâreñ sâc ñic jañe hone añac eengopien.  
Zion tiki faic mâreñkopec ñekac, Wofuñ  
Sâkore hae.
- <sup>3</sup> Erific-ticne Anutuzi aimuñ sabeckeekac,  
i hone manac ehuc jukicne.
- <sup>4</sup> Manangopien, ñicwofuñ jañe hehenusuc erâ  
mâmâc quruñ herâ fisimbiñ.
- <sup>5</sup> Izi honerâ warecke sâqorembiñ;  
erâ bipic tara-jareme wisembiñ.
- <sup>6</sup> Mâreñ ira qarac qarac qambin hâcne,  
ñokac moczi motec roocte gozi kiekac inuc  
embiñ.
- <sup>7</sup> Zoañ wewefuonec mâñân mutec fisirâ  
Tarasisi haeonec woke qanzañ-jopawec.
- <sup>8</sup> Biñene manamben irec sâc jaha zâñezi honem-  
ben,  
Tâpiri Quñqasañ Wofunte haeo,  
Anutu-nâñecte hae sâkoo hâcne;



hae i Anutuzi ñeje sanaj ñeocte mucnewec.

- <sup>9</sup> O Anutu, nâje taha ufungere mañnao  
aki anonogere manasumben.
- <sup>10</sup> O Anutu, zâje binjegezi mârenj qañenja  
rawecte  
mumumbianjezi inuc jaha raekac;  
mefâregao bâbâpianj fusucmawec fokac.
- <sup>11</sup> Zion tiki e irec bubianj manakac;  
Juda otâfâcne jañe mumutingere erâ  
zeri bari eenjopienj.
- <sup>12</sup> Zion orânkehuc bârâreckenzepienj,  
ehuc rucbapa ficne ficne wosenzepienj.
- <sup>13</sup> Qânâsac-ticne hone qârâwinj enzepienj,  
ficsâko mañne jufârenzepienj,  
ehuc zâhec fuaniñmu jañe ziñuc jazanzepienj:
- <sup>14</sup> “Anutu, nânâcne Anutu, e jurâ jurazihuc  
juocmu,  
ehuc tatara tâmiric jowa qatañ enâreocmu.”

## 49

### *Sindaññic jañere juju bianj omaeocmu*

- <sup>1</sup> Ñicne ñicne ñoñe dânj zi mananiñ,  
mârenje ñecjucfâc sasawa, hazec râeniñ!
- <sup>2</sup> Ñic omane mecne, ñicbomboñ mecne,  
mafahec â hapetac mâmâc sasawa.
- <sup>3</sup> Micbipic-nanezi mañqârânj dânj mufuaocmu,  
mañzi mana wosâehuc dânj hukicne  
bâwirickepemu.
- <sup>4</sup> Mu qâqinj dânje hazec râepemu,

musi fânâŋ manahuc kesaic dâŋnane mutaniŋkepemu.

- 5 Zârâ hârîŋ damenŋko râsifâc-nane jaŋe qaisocnuhuc  
jâpe orân enarepie wemocko hâwicnuocmu?
- 6 Njic i jaŋe mâriri-jeŋicte mamananac juenŋgopien,  
â mafa sâko-jeŋicte penaroŋ eenŋgopien.
- 7 Njic moczi e jahacne kiwiric sâcne mi roocmu i!  
Â juju-ticnere furi Anutu wâc mi bazucneocmu.
- 8 Jujure furi i fekiecne sâko,  
roipiehuc juha damenŋ omaeocmu.
- 9 Irec juju sanaŋ sâcne mi juocmu,  
â nombânŋ geŋkeocte eipieocmu.
- 10 Mamanahec jaŋe wâc hâmpie honeocmu,  
mutucne â kâpâne jaŋe mâmâc siroweniŋmu,  
ehuc monenŋ mafa-jeŋic gâcne behejareniŋmu.
- 11 Jaŋacne zâŋezi mârenŋ sâko gâcne wase bambiŋ  
ŋic iŋucne jaŋe wâc zâŋeruŋzi ŋeŋe hae  
sanaŋ-jeŋic eocmu,  
eme ira damenŋne damenŋne fohuc juniŋmu.
- 12 Njiczi juju saricko mi jurahuc juocmu,  
e qowi siroweenŋgopien jaŋere sâc.
- 13 Ine mutuc erâ jaŋacne mamananac juenŋgopien,  
jaŋere hata i hâcne;  
â wiac fojarekac irec mana bianŋkeenŋgopien,  
jaŋe iŋucko tara-jarezokac.
- 14 Jaŋe lama iŋucne hâmoc haeo râec-jopazo,  
eme hâmoczi soŋaŋ-jeŋic eocmu.  
Zâŋeruŋko hupie sahaç hawari-jeŋic zaŋkeocmu,

- hâmoc haezi ñeñe juju-jeñic eocmu.
- 15 Anutuzi ine mañ qâqâtâc-nanere kiwiric roocmu,  
ehuc hâmoc haere tâpirionec bataracn-uocmu,  
eki hâcne no rocnuocmu.
- 16 Irec ñic moc e mafa sâkohec eocmuo,  
â gorewac-ticnere zâñe biñe feocmuo,  
go irec mi mezacguzejec.
- 17 E hâmohuc wiac moc mi amecke raocmu,  
â zâñe biñe-ticnezi mi bâjâpeocmu.
- 18 Moc e qâricne juhuc juju-ticnere mana añac eocmu,  
â qiçicne jume gâcnezi wâc muafeckeninmu,
- 19 eme sifu kâcçenefâc-ticne jañere guruo raocmu,  
erâ qâtec-jopahuc tatamac basahuc jaha juocmu.
- 20 Ñiczi juju saricko mi jurahuc juocmu,  
e çowî siroweengopieñ jañere sâc.

## 50

### *Weninuc ehuc Anutu kinjañ bianañe çacnezo?*

- 1 Çac momori, Wofuñ Anutu, e dânehuc mâren wiracnekac,  
wiwira-ticne çoañ wewefuonec raku huhu-nao fisikac.
- 2 Zion, hawari bianañe fâri wâmbuñ,  
irecnec Anutuzi tamaehuc fua tâcnekac.
- 3 Anutu-nâñec e fisikac, erâ dânemâc mi jukac,  
çocbâruiçi za zâtâc ehuc bâniecnekac,

mânân qicwânzânneheczî râreckehuc  
bâjâpekac.

4 E wirame faic sambânko fekac â mârenko wa-  
hakac,  
ņicfâcne dânjenjic mutaraocte:

5 “Funfunfâc-nane hetuman-jopa-narenj,  
taha banarehuc nohec zâzâfic embiņ jaje  
hâcne.”

6 Eme sambânzi mumutiņ- ticnere fuņne  
bataniņkekac,  
Anutu e jahac mumutara gie bakacte hâcne.

7 “Kikefun-nane go manahanj noni dân gazape,  
o Israe, noni mutaniņgupe,  
no hâcne Anutu, gore Anutu.

8 No taha bapagere erâ mi hanecgukopac,  
â bâzi ririkege i honehuc jukopac.

9 No fic haegaonec bulimakaoņicne,  
me sapagaonec noniņņicne moc mi ropemu.

10 Kâteo qowi juņgopiej i nore sasawa,  
â tiki sâc wiac jujune jurakac i iņuc jaha.

11 No sawao wipe juņgopiej i manac- jopa-  
fârekopac,  
â sopâcko wiac qiriņ qahuc fokac i nore jaha.

12 “No nânârê hâmorâ muzac go mi gazazapo,  
mârenj sâko mârenj â irec faio wiac fokac i  
rucke-fârekopac i!

13 No bulimakao biucne moc nâekopac?  
Me noniņ socne moc nâekopac?

14 Go Anutu danje âzâcnetec izi taha bâzige  
ezejec,

ehuc Femicne sâko dân mupaŋkecnemeŋ irec  
fârine bâfuazemec.

- 15 Erâ zârâ hârîŋ dameŋko wâsicnuzemec,  
eme bataracgupe muafecnuzemec.”
- 16 Â ñic sindaŋne e ine Anutuzi ziŋuc âzâcnekac:  
“Go mozi mana-gareha sâcmutâc dânnane  
woseekic,  
me micgezi zâzâfic-nanere dân bâuæekic?
- 17 Go bâbâtîŋ qaisockeekomec i!  
Â dânnane râpeckeekic i!
- 18 Go fiuc roro ñic moc honerâ âgo baekic,  
â boe sau ñic jaŋhehec ñec domac eekic.
- 19 “Go michipicgezi gie repicne baocte manacnee-  
kic,  
â namenŋgezi eeatuc gie baekac.
- 20 Go qomâge musoriŋkeekic,  
â hahac qafâcge micko âkec ejareekic.
- 21 Go wiac iŋucne ehuc jutec no dânemâc jupo;  
eme nore mumeŋ, e nore sâc jaha jukac.  
Miŋecgac ine hanecguhuc tutuc  
qagarekopac.
- 22 “Anuture ninikec juenŋgopieŋ ñoŋe dân zi mana-  
hâmonzepieŋ.  
Noni hesuec-ŋopape ñeŋezic basanziŋieŋ ine!
- 23 Moc e daŋge nunumu-ticnezi taha banare-  
ocmu,  
iŋucnezi sâsecnuocmu;  
â moc e hata-ticne bahacmâc juocmu,  
e ine Anuture bâbâpiaŋ jâutupemu.”

## 51

*Sâqocne mumufua*

- 1 O Anutu, go aki anonocgere erâ nore buge  
sâqoreoc,  
buurucge fufusuc fokac irec sâcko kiņ bahac-  
nane bătâmirec.
- 2 Hehesic-nane zure bataniņ enare-fârec,  
â sâqocne-nane bârâriehuc baqâqacnuc.
- 3 No bahac-nane hone tarakopac,  
â sâqocne-nanezi mai enarehuc jukac.
- 4 Sâqocne bahuc go hâcne bugao bapo,  
â wiac epo i goki honetec repirekac.  
Go mumutiņgezi dânfâri eocmu,  
â mumutaragezi qâqacne eocmu.
- 5 Jei, no hehesic maņkonec fuapo,  
â neņgoczi sâqocnehec kiwecnuwec.
- 6 Jei, maņzi siocmâc foocte egareekac;  
maņfâhâņko mamana fârine qazu-narec.
- 7 Sanu rehaczi bataniņnutec qâqackezepac,  
zurecnutec sinoure sâc sirickehuc qañqañ  
fuazepac.
- 8 Žeri bubiaņzi bâfusecnuzemec,  
eme me kike qambaņaņkemeņ i mocwâc  
biankezejec.
- 9 Sâqocne-nanere zâņe maige bâsonkezemec,  
â bahac-nane bătâmire-fârezemec.
- 10 O Anutu, go maņqâqac bâfua-narezemec,  
â mâro qâricne râe-naretac maņkehuc qiņ  
hezepac.

- 11 Zâŋe maigaonec mi sârocnuzemec,  
 â gore Tiri Mâro mi nowac roc.
- 12 Bâbâpiangere aŋac mocwâc heqâre-narec,  
 â micrerenŋe aafec bâfua-narec.
- 13 Eme no qaqatara ŋic hatage qazu-jarepe,  
 â sâqocne bapazi manjenjic gorao  
 bârisienzepeŋ.
- 14 Anutu, bâbâpian-nanere Anutu, go soc rurua  
 fuazacte baficnuc;  
 eme namen-nanezi tiŋnegere mu zeri ezejec.
- 15 O Wofuŋ, go bipic-nane baandaŋnec,  
 eme micnanezi mumutenŋe musokazejec.
- 16 Go taha babagarere mi aŋacguekac;  
 no bâzi rike-garepe manatec mi sâckezac.
- 17 Ŋicmaŋ busâqoczi kidapekicne irec Anutuzi  
 maname  
 taha bâzi fârine eocmu.  
 O Anutu, ŋicmaŋ busâqoczi kidapekicne  
 â bâuruŋkekecne i goki mi suŋginkecnu.
- 18 Aki anonogere sâcko Zion ehâmocnezemec;  
 ehuc Jerusalemte qânâsac heqârezemec.
- 19 Eme taha bâzi jâmbânŋe aŋacguocmu,  
 qowi bâzi â bâzi hâcbuc rikekicne,  
 eme bulimakao ŋicne alatagao rike-garezo.

## 52

*Ŋic moc penaronj sâko ejujec e mu hanec ecne-  
 kicne*

- <sup>1</sup> Ŋic tâpiri wânzân, go mitiŋic wiac gâgâpâcne  
 ecnehuc  
 wemocte penaronj ehuc juekic?

- Go zoaņ zora sisipiric gie mana biric eekic.  
<sup>2</sup> Nameņge resa mictara iņucne,  
 docbapa fuņqizecne go!  
<sup>3</sup> Go biane qaisockehuc sâqocne âgo ecneekic,  
 dâņfâri mumure takicguha burecte  
 aņacguekac.  
<sup>4</sup> Sisipiric bâbâfua irec dâņte egareekac,  
 nameņge eeatuc dâņte hozine.  
<sup>5</sup> Anutuzi bâsirowecgume omaecmu,  
 goruc bozegaonec rocgurâ bârâriecguocmu,  
 jujune jaņere mâreņkonec unucguocmu.  
<sup>6</sup> Ņic tiņne jaņe honerâ hâwic-jopaocmu,  
 erâ gâwiecnehuc ziņuc munijmu:  
<sup>7</sup> “Sowine, Ņic eki hâcne Anuture dapeņko mi  
 soņkehuc,  
 moneņ mafa sâko-ticnao roweckewec,  
 â jahacne mâririre mamanaac juwec.”  
<sup>8</sup> No ine oliwa jâc qâricne iņucne,  
 Anuture ficko domakopac,  
 no Anuture aki anonocete mamanaac  
 juhuc jukopac sanaņ.  
<sup>9</sup> Anutu, goki wiac ekomec,  
 irec dameņ sâc daņge gazahuc jupe.  
 Erâ zâņe biane i mitiņicfâcge  
 jaņere maio musokape.

## 53

*Anutu mickeengopien jaņere dâņ  
 (Mi Mâ 14:1–7)*

- <sup>1</sup> Mutucne jaņe manjeņiczi muenņopien:



“Anutu moc mi jukac.”

Jaņe repicne, hehesic-jeņic mamakâcne,  
moczi moc wiac biaņne mi eekac.

<sup>2</sup> Anutu e sambâņkonec fime wahaekac,  
ehuc mâreņjic ņonder-jeņicko mamanahec  
moc juhuc,  
Anutu wira basac ecneeņgopieņ me mâcne, i  
honeekac.

<sup>3</sup> Jaņe qâsoriekicne sasawa,  
zeņgoma repirembiņ.

Moczi moc wiac biaņne mi eekac,  
arictac jâmbâņ.

<sup>4</sup> Sâqocne bapa, ņicfâc-nane ki sipiric  
ejareeņgopieņ,  
jaņe maņfânâņ tâmiric jufâreņgopieņ me?

Jaņe Anutu noraonec nânâ nâipiehuc,  
sifu no mi wâsicnuęgopieņ.

<sup>5</sup> Jaņe bipic tatara hâhâwicne ejareocmu,  
bipic tatara iņucne moc mi fua warewec.

Anutu e somâ râe-gareņiņmu jaņere me kike hezu  
qazuocmu.

Anutuzi behec- jopawecte goki imac-  
jopacmu.

<sup>6</sup> Zionkonec Israerao bâbâpiaņ fuazac me!

Anutuzi ņicfâcne jaņere juju hata herisieoc-  
muo,

Jakobozi zeri eocmu, â Israezi bubiaņ man-  
aocmu.

## 54

*Râsi fisipie mitiņiczi Wofuņ numucnekac*

- <sup>1</sup> O Anutu, go zânegere erâ baficnuc,  
â tâpirigezi ñezicnuc.
- <sup>2</sup> O Anutu, go nunumu-nane manac,  
micdân-nanere hazec râec.
- <sup>3</sup> Njic pepeheczi nuniñte faharembien,  
ñic qac momoriheczi juju-nane nowac rozo  
muñgopien;  
jañe Anuturao zâñe mi fiengopien.
- <sup>4</sup> Manakic, Anutu e babafic-nane,  
Wofuñ e juju-nanere dope.
- <sup>5</sup> Râsifâc-nane okacne sâqocne risie-jarezejec.  
Wofuñ, go erâ- eesanañgere sâcko  
bâsirowec-jopazemec.
- <sup>6</sup> Eme no mañafec jaha taha bâzi egarepemu,  
ehuc gore zâñe muafeckehuc muzepac,  
go buurucge fekicne.
- <sup>7</sup> Go hâcne zârâ hâriñ sasawaonec bataracnumec,  
eme no zâñezi râsifâc-nane honec-jopahuc  
saoreñ qakopac.

## 55

*Râsi repicne â âgo burecne moc jañere erâ mu  
wâwâsic fuakac*

- <sup>1</sup> O Anutu, go nunumu-nanere hazec râec,  
â wâwâsic dâñnane mi wisecnec.
- <sup>2</sup> Mana-narehuc dâñ okacne bârisie-narec;  
zârâ hâriñ-nanezi siricnukac.
- <sup>3</sup> Râsi owa-jeñicte â sindaññic zika fânâñ-jeñicte  
mañnane hâhâñkekac.
- Jañe zârâ zâpâ faio râecnuñgopien,

- â aaric mana-narehuc qaisocnuŋgopieŋ.  
 4 Maŋnanezi zâic serereŋ manakopac,  
 â hâmocte hâhâwiczi sipiricnukac.  
 5 Qarac qarac qahuc domakopac,  
 bipic-nane tarame gâgâmârâkopac.  
 6 Zinuc mukopac: “Jei, hapâ inucne fakechec  
 ezapo!  
 Ine fururuc qahuc wiserâ raku bianuzac.  
 7 Jei, no taicko jâmbâŋ razapo,  
 erâ mâreŋ tuhuo soŋkezapo.  
 8 No zocnehec raku sâsâoc moc bâfuarâ  
 hoe mânâŋ sâkore ira soŋkerâ ŋezapo.”
- 9 O Wofuŋ, biri- jenic hetâtiehuc dânjenic  
 bâsifuckec.  
 No hae sâkoo qaqaç â rârâsi honekopac;  
 10 ŋafe zoaŋ sâc haesac râreckehuc domaŋgopieŋ,  
 â maŋnao eesifuc â kikisâ fokac.  
 11 Nondenŋao sisipiric fua rakac,  
 â nareŋ gareŋ toma-ticnao fific guguriŋ â  
 eeatuc  
 i moc mi omaekac.
- 12 Mumusoriŋ i râsi moczi mi enarekac,  
 i sâcne desuezapo;  
 pepecne eenare i jabane moczi mi ekac,  
 i sâcne rârierâ soŋkezapo;  
 13 mâcne, i goki enarekic, âgo qomâ-nanezi,  
 mâmâc juhuc hohonec eekopereczi;  
 14 qâqâtec juhuc dân mumac qamanac ejuperec,  
 hombaŋko Anuture ufuŋko mâmâc fejuderec.  
 15 Hâmoczi qeŋfâfâc jaha rocjopazejec,  
 qâricnea hâmoc haeo utuckenzepieŋ,

bipic tatara ejareha zâneruŋ- jeŋicko  
hunzepieŋ.

- 16 No ine Anutu wira wâwâsic ecnekopac;  
eme Wofuŋzi sisipirickonec bataracnuocmu.
- 17 Owâcne mecne, furicte mecne, zoaŋko mecne,  
huacbuc dâŋnane mu huse epemu,  
eme eki dâŋmarac-nane manaocmu.
- 18 Eki bataracnume wamao razipemu,  
eme wiac enarezo murâ quŋkeniŋmu,  
jaŋe ŋic bocjahazi wiac enareniŋte birickem-  
biŋ hâcne.
- 19 Anutuzi mana-narerâ bawahac-jopaocmu,  
e mumutara ŋeŋeo mârâc jaha fuŋkerâ  
ŋeweczi;  
jaŋe maŋjeŋic mi bârisieŋgopieŋte,  
â Anutu araŋ mi bacneŋgopieŋte.
- 20 E qomâ-nanezi âgofâcne jopaocte meticne bafa-  
harewec,  
â jaŋehac zâzâfic-ticne hetâcnewec.
- 21 E michipic-ticne fâsâcne wokemaŋ iŋucne,  
ehame sifu zika maŋkeekac;  
dâŋticne urucne, tokicte sâc,  
izi sifu damu erâ âkec-jopaekac.
- 22 Tagige Wofuŋ qârâriecnec, eki sâcne  
dopecguocmu;  
e ŋic tiŋnezi biric boroc eocte moc mi manac-  
neekac.
- 23 O Anutu, go tuŋjopatec sisipiricte nombâŋko  
huniŋmu,  
soc nânâ â eeatuc ŋic,  
juju-jeŋic nâfocne sawa i wâc mi jutaraniŋmu.

No ine Anutu, gorao roweckekopac.

## 56

### *Râsi mana suac-jopahuc Anuturao rorowecke*

- 1 O Anutu, go nore buge sâqoreoc, ñiczi jâpecnuᅇgopieᅇ;  
zoaᅇ zora zikaᅇiczi guriᅇnuᅇgopieᅇ.
- 2 Râsifâc-nane jaᅇe zoaᅇ zora jâpecnuᅇgopieᅇ,  
bocjahazi saᅇac fefe ehuc râsi enareᅇgopieᅇ.
- 3 Hâhâwiczi fua-nareekac,  
dameᅇ ira gorao roweckeeekopac.
- 4 No Anutuhac juᅇuc dâᅇticne mumbiaᅇkeekopac,  
Anuturao roweckehuc hâwic tâmiric  
juekopac,  
ñiczi wemo enareᅇiᅇmu?
- 5 Dameᅇ sâc hata-nane hesifuckeniᅇte zoᅇac  
eeᅇgopieᅇ,  
mamanasu- jeᅇiczi bâsâqorecnuniᅇte gie  
baeᅇgopieᅇ.
- 6 Jaᅇe heâckerâ ruc banareeᅇgopieᅇ,  
kike hata-nanere hetâc roeᅇgopieᅇ,  
juju-nane omaeocte hejâpeeᅇgopieᅇ.
- 7 Irec sindaᅇ-jeᅇicte okacne jarezemec!  
O Anutu, go kimbeᅇko ñicguru i  
qâfiec-jopazemec!
- 8 Zika kipo i wose-fâremeᅇ,  
zâᅇeuc-nane wose qâreᅇ etec  
papiagao mi fokac me?
- 9 Eme no wirapemu dameᅇ ira râsifâc-nane  
bâsuec-jopazo.

- No manakopac, Anutu e no âgo enarekac.
- <sup>10</sup> Anutu, dâŋticne mumbiankeekopac,  
Wofuŋ, dâŋticne mumbiankeekopac,
- <sup>11</sup> Anutu erao hâcne roweckehuc hâwic tâmiric  
juekopac,  
ŋiczi wemo enareninmu?
- <sup>12</sup> O Anutu, no dâŋ mupaŋkepo i fârine bâfuape,  
no daŋge bâzi taha bagarepe.
- <sup>13</sup> Go juju-nane hâmockonec bataramen,  
â kike- nane biric boroc ezacte  
basanaŋkemen.  
Irec zi Anuture maio, jujure tatamacko ju-  
pemu.

## 57

### *Wâwâsic â mumutenj* *(Mi Mâ 108:1–5)*

- <sup>1</sup> Buuruc enarec, o Anutu, go buuruc enarec,  
no gore dapeŋko soŋkekopac.  
No fakecgere rurumaŋko soŋkerâ ŋehape,  
sisipiricte mâŋâŋzi fotâcnerâ razejec.
- <sup>2</sup> No Anutu, Femicne sâko, e wiracnekopac;  
gie-ticne norao bataraocmu, Anutu e hâcne.
- <sup>3</sup> E sambânkonec okacne bâtikie-narehuc baficn-  
uocmu,  
imacnuŋgopien jaŋe mimi bâfua-jareocmu;  
Anutu e aki anonoc â jauŋ fâri-ticne sore-  
ocmu.
- <sup>4</sup> No laioŋ, ŋic kisucke nâc ejareŋgopien,  
jaŋere ŋondenko fokopac;  
micsiec-jeŋic i damu â tepe,

namenj-jeñic ine sâqe mictara.

- <sup>5</sup> Anutu, go fahare sambân qâhuckerâ fezemec,  
eri tatamacgezi mârenj sâko mârenj  
sâckezejec.
- <sup>6</sup> Jañe kike-nanere bitinj râepie mañnane wa-  
hawec;  
jañe hata-naneo nombân rombinj,  
erâ jañac zâziñkerâ humbinj.
- <sup>7</sup> O Anutu, mañzi qinj herâ domakopac,  
mañzi qinj herâ domakopac, no gae hehuc  
musi bape.
- <sup>8</sup> Mañ qâqâtâc-nane, mana qâqârec,  
kulele â gita, mana qâqârec,  
no furic wiwickepe mana qâqâreoc.
- <sup>9</sup> O Wofuñ, no qâpuc jañere ñondenjo danje  
gazape,  
no ñicguru jañere ñondenjo mumbianjupe.
- <sup>10</sup> Aki anonocgezi feku sambân heuakac,  
jañ fârigezi feku karoracko fisikac.
- <sup>11</sup> Anutu go fahare sambân qâhuckerâ fezemec,  
eri tatamacgezi mârenj sâko mârenj  
sâckezejec.

## 58

*Bâbâsifuc gâgâpâcne irec okacne hâhâwicne  
fuaocmu*

- <sup>1</sup> Nemu ñoñe jâmbomac mumutara gie fârine  
baenjoapien?  
Ñoñe mârenjic dânjenjic tiñnea  
mutaraenjoapien?

- 2 Aricne, mañzi bâbâsifuc mana biric eenḡopieñ,  
 â mâreñko jâjâiñ bâbâzâic kâdoc  
 qajareeḡopieñ.
- 3 Sindaññic jañe neḡoc bumañkonecteaḡ qac  
 qâsoric eenḡopieñ,  
 fuarâ izia qâsoriehuc burecdâñ eenḡopieñ.
- 4 Marasiñ sâqocne homa iñucne kisoñne  
 juenḡopieñ,  
 sopâc homa qeponne ere sâc hâcne.
- 5 E qañḡec bapa dâñmarac-jeñic mi manaekac,  
 qañḡecte fuñne mamanazi emâmâñkeekac.
- 6 O Anutu, goki micsiec-jeñic qanzañec,  
 Wofuñ, go laioñ motec zuñe-jeñic unuckec!
- 7 Ejaretec opâ iñucne ñetâtiehuc omaenzepieñ,  
 qinziñ iñucne qañã ururuc erâ hâmonzebieñ.
- 8 Gâwâc hahaczi ñeñerâ raku hâmo zañ eekac  
 iñucne,  
 me ñokac kiweheczi damenñe mi maickeha  
 kogoc rome,  
 bumâñ-ticnere fârinezi tatamac mi honehuc  
 omaeekac iñucne.
- 9 Kuzi qâricne zoczi mi zasañakeha qâtipepie  
 raekac,  
 irec sâc hetapaic-jopatec ratâmirenzebieñ.
- 10 Tiñne jujuzi okac babazu honerâ zeri eocmu;  
 kike-ticnezi sindaññic ere soc ruaocmu.
- 11 Eme ñic jañe muniñmu,  
 “Jâmbomac, tiñne jujuzi furi bâfuaekac;  
 jâmbomac, Anutu jukac, ehuc mâreñko mu-  
 mutara gie baekac.”



## 59

*Râsi qac momorihec jaņere hâhâwicte nunumu*

- 1 Anutu- nane, go răsifâc-nane jaņeraonec bataracnuc,  
nuniņte fahareņgopieņ jaņe nunziپیņte sabecnuc.
- 2 Sâqocne bapa jaņere meonec bataracnuc,  
â soc nânâ jaņe imacnunziپیņte ņezicnuc.
- 3 Honekic, jaņe juju- nane hetâcneniņte ruc baņgopieņ,  
ņic qac momoriheczi nuniņte roroc eņgopieņ.  
Wofuņ, no qaqatara me sâqocne moc mi ehape eņgopieņ.
- 4 Hehesic- nane moc mi foha quruņ herâ fisi birickenņgopieņ,  
irec fahare ware sacfozic enarehuc honec- jopac.
- 5 Anutu Tâpiri Quņqasaņ Wofuņ, Israere Anutu,  
go mana qâqârerâ qâpuc guru sasawa bâtiņ- jopac;  
doçbapa repicne jaņeraonec moc mi akick- ezemec!
- 6 Hae owâeme sâc risie warerâ qâto iņucne qâņkeeņgopieņ,  
ehuc haemaņko rarac wawarec eeņgopieņ.
- 7 Erâ owa ruruckehuc dâņfânâņ sâko erâ ziņuc muenņgopieņ: “Dâņepene mozi man- aocmu?”
- 8 Wofuņ, go ine gâwie-jarekomec,

- qâpuc guru sasawa mana wahac-jopakomec.  
 9 O tâpiri-nane, no mumumbianj gae hegarepe;  
 o Anutu, go hâcne huec sanaj-nane.
- 10 Anutu- nane e aki anonoc- ticneheczi  
 bâfuacnuocmu,  
 Anutu-nanezi manaha râsifâc-nane honec-  
 jopahuc saorenj qapemu.
- 11 Mi qâhâmoc-jopac, njcfâc-nane janje nikec-  
 jopazacte.  
 Tâpirigezi ejaretec biric boroc enzepienj,  
 erâ herândin-jopazemec, o Wofunj, maro-  
 nânjec.
- 12 Micbipic-jejickonec dânj wahaekac i sindanj  
 hârindanjenj;  
 irec penaronj â sosopec â burecdânj-jejic,  
 izi ufic ejareme ira jowanjepienj.
- 13 Kimbenko bâsirowec-jopakutec omaenzepienj.  
 Eme njc sasawa janje zinuc mananzepienj:  
 Anutu e Jakoborao gurinj bapa gie baekac,  
 gurinj bapa izi raku mârenj qanjenjao tarakac.
- 14 Hae owâeme sâc risie warerâ qâto injucne  
 qânjkeenjgopienj,  
 ehuc haemanjko rarac wawarec eenjgopienj.
- 15 Janje nânâ basahuc ra ju ware ju eenjgopienj,  
 â mi gapec-jopame kio kâronj eenjgopienj.
- 16 No ine tâpirigere mumutenj gae hepemu,  
 furictea aki anonocgere zeri gae  
 hesokapemu.  
 Goki hâcne huec sanaj enaremenj,  
 â zârâ zâpâ fuame dapenj enaremenj.

- 17 O tâpiri-nane, no mumumbian gae  
 hegarepemu.  
 O Anutu, go hâcne huec sanan-nane,  
 Anutu go aki anonocge bâfua-nareekic.

## 60

*Zikao docke pârâc fuazacte gae zi hekiecne  
 (Mi Mâ 108:6–13)*

- 1 Anutu, go beheç- nâpomeñ, ehuc  
 bâtâtiec-nâpomeñ;  
 go kimbeñ qanâremeñ, zi mocwâc  
 hefâroc-nâpoc.
- 2 Goki mâreñ itiriñkecutec fâuckewec;  
 zi suriñkehuc fokacte fâfâuc-ticne hemasec.
- 3 Go gurufâcge zâic ñemâcne bâfua-jaremeñ,  
 go mañsifuc opâ gumec-nâpotec nâmbenñ.
- 4 Arañ bagareñgopieñ jañe filac  
 âkendâñne-jaremeñ,  
 râsire tepe wisecnehuc ira qâzuckerâ do-  
 maniñte.
- 5 Mefâregezi bafic- nâpohuc nunumu- nâñec  
 mañac,  
 eme jorocfâcge jañerao bâbâpianñ fuazejec.
- 6 Anutuzi tiri ufuñ-ticnao ziñuc muwec:  
 “No kiwaehuc Sikem hae bâtâc bapemu,  
 â Sukoti wâneñ kâdoc qapemu.
- 7 Gileade rauckekopac, Manase i wâc nore;  
 Eferaim i momori dunane, Juda i ñicwofuñ  
 gunu-nane.
- 8 Moabi e kike zuzure râqâc-nane,  
 Edomtao kikehuhu-nane wickepemu,

Filisa mârenj saorenj qacnepemu.”

- <sup>9</sup> Mozi hae basanaŋkekicnao bara râecnuocmu?  
Mozi Edomko jowacnu raocmu?
- <sup>10</sup> Anutu, go jâmbomac sunjiŋ-nâpomec me?  
Go momorifâc-nâŋec râpec-jopatec buc  
juenjgopienj.
- <sup>11</sup> Râsi jopanaŋte hone bafic enârec;  
ŋiczi babafic-nâpo i fârimâc.
- <sup>12</sup> Anutuhec sâcne momori wânzâŋ enaŋmu;  
eki râsifâc-nâŋec ro waha âte ejareocmu.

## 61

### *Taicko juhuc ŋicwofuŋte numukicne*

- <sup>1</sup> O Anutu, go wiwira-nane manac,  
nunumu-nanere hazec râec.
- <sup>2</sup> Hâhâwicte hobu-nane taŋtaŋ âeckekac;  
mârenj qaŋeŋnao domahuc wira-garekopac.  
Qânâ zorao, nahac fefenere sâc mi ekac,  
ira jowacnu fezemec.
- <sup>3</sup> Go hâcne sâsâoc-nane,  
râsire maio huec sanaŋ enarekic.
- <sup>4</sup> Damenj sâc gore qoruc bozeo ŋec juc ezapo!  
Fakecgererurumaŋko soŋkerâ juzapo me!
- <sup>5</sup> O Anutu, go mumupaŋ-nane manameŋ,  
ehuc zâŋege araŋ bacneenjgopienj,  
jaŋehac merâfâc qikiŋne-naremeŋ.
- <sup>6</sup> Ŋicwofuŋ juju-ticne bâzorazemec,  
eme jara bocjaha jurahuc juzejec.
- <sup>7</sup> E Anutu gore maio ŋeŋe-ticnao ŋesanaŋkezejec,  
mutecne aki anonoc â jauŋ fârizi hone mainj  
ecnehuc juzejec.

- 8 Eme no mumupaŋ-nanere fârine zoaŋ sâc  
bâfuahuc,  
zâŋege mumumbiaŋ gae hecnehuc jaha  
juzepac.

## 62

### *Anuture maio nininkehuc fuŋne-nâŋec manazo*

- 1 Maŋ qâqâtâc-nanezi Anuturao zâŋe fihuc  
nininkekac,  
eraonec bâbâpiaŋ fisi-nareekac.
- 2 Eki sawa qânâ sanaŋ â babafic-nane ekac,  
erâ huec-nane ekacte qiriŋ boc mi qapemu.
- 3 Nõŋe ŋic moctao quruŋ herâ ra tuŋkezo  
muŋgopieŋ,  
qânâsac hârehuc otewekicne iŋucne waha  
qarâ foocte,  
mâsi i wezimucko beheniŋmu?
- 4 Ine hâcne e zai zoŋzoŋ-ticnehec domakacte  
bawahazo muŋgopieŋ.  
Burecte aŋac sâko-jeŋic fokacte,  
miczi mumbiaŋkehuc maŋzi sopeck-  
eeŋgopieŋ.
- 5 Maŋ qâqâtâc-nane, go Anuturao zâŋe fihuc  
nininkezemec,  
erao mamanaç-nane fokac.
- 6 Eki sawa qânâ sanaŋ â babafic-nane ekac,  
erâ huec-nane ekacte qiriŋ boc mi qapemu.
- 7 Bâbâpiaŋ â zâŋe biŋe-nanere ŋesiŋ i Anutu;  
Anutu e huec sanaŋ â qânâuŋ-nane.
- 8 O qomâfâc-nane, ŋõŋe erao dameŋ sâc  
roweckenzepieŋ,  
maŋŋeŋicte fuŋne e bataniŋkecnenzepieŋ;

Anutu e hâcne qânâuŋ-nâŋec ekac.

- <sup>9</sup> Mâreŋŋic jaŋe nokafe sawa,  
 ŋicbomboŋ jaŋe wâc qârâc qârâcne,  
 ŋemâc bâbâfuare sâcko mâmâc afecke-fâreniŋmu,  
 mâmâc nokafere sâc jaha eniŋmu.
- <sup>10</sup> Jâiŋko wiac hohotâckere mi manasunzepiŋ,  
 fiuckonec wiac bâbâfuare maŋgâc wâc mi  
 enzepiŋ;  
 â moneŋ mafa sawe-ŋareocmuo,  
 ine ira mi mana utuckenzepiŋ.

- <sup>11</sup> Anutuzi dân moc muwec i manape arecne 2  
 ewec:  
 Tâpiri rune i Anutu noni jukopac.
- <sup>12</sup> Erâ Wofuŋ, goki aki anonoc rauckehuc,  
 ŋic eebapa-jeŋicte furine jareekic.

## 63

### *Anuture maŋhâhân juju*

- <sup>1</sup> O Anutu, go nore Anutu, no honecguzo fifisacne  
 fikopac,  
 maŋ qâqâtâc-nanezi gore hâmokac.  
 Sahac biuc-nanezi wâc gore hâhânkecac,  
 i mâreŋ opâ tâmiric, kereŋke hahan ekicne  
 iŋucne.
- <sup>2</sup> Irec tiri ufuŋko gore zâŋe fipo,  
 tâpiri â eri tatamacge honepemurâ.
- <sup>3</sup> Gore aki anonoczi furi sâko ehuc juju sirick-  
 ekacte,  
 micbipic-nanezi mumbiaŋguzepac.
- <sup>4</sup> Eme jufepemu sâc mutenŋuhuc juzepac;  
 menane bafaharehuc zâŋege wâsickezepac.

- 5 Maŋ qâqâtâc-nane gumeqiŋnetec manape,  
siec qârâc â wokemaŋ nâ gapec ekopac eekac.  
Micbipic- nanezi zeri ehuc  
mumbianguekopac.
- 6 Ine ŋafeo fofonaneo damen 3ora  
gore manasuhuc fope iŋuc fua-nareekac.
- 7 Goki hâcne hone bafic enarehuc juekicte,  
fakec rurumaŋgao zeri gae hehuc foekopac.
- 8 Maŋ qâqâtâc-nanezi go hariŋguekac,  
â mefâregezi dope hutuŋ enareekic.
- 9 Â juju-nane sipirickeniŋte zoqac eenqopiŋ,  
jaŋe ine mâren 3hofâhâŋnao zâziŋkeniŋmu.
- 10 Jaŋe zikare micko râec-jopazo,  
â kâte qâto jaŋere nânâ eniŋmu.
- 11 Niçwofuŋ e ine Anutire bubian manaocmu.  
Â Anutire zâneo qetickehuc mumupaŋ dân  
muniŋmu,  
jaŋere zâŋe biŋe fahareocmu;  
â burecŋic ine micjeŋic fitec qazo.

## 64

### *Anutuzi râsi repicne okacne jarekac*

- 1 O Anutu, no mu huachuc epe mana-narec,  
râsizi mu hâhâwic enarekacte juju-nane  
sabeckec.
- 2 Niç sindaŋne jaŋe kamiehuc doc  
bacnuŋqopiŋte,  
â sâqocne bapa jaŋe dân qanarenqopiŋte  
soŋnuc.
- 3 Jaŋe namaŋ-jeŋic zâmukupie sâqe iŋucne eekac,

- dâŋ hâtânezi tepe motec ejareme tikocko  
heengopien.
- 4 Erâ somâckerâ fohuc ŋic bahacmâc  
qâtâcnecneengopien,  
hâwicmâc qeŋfâfâc muruniŋte.
- 5 Wiac repicne eniŋte qaqaŋeŋ eengopien,  
kamiehuc bitin râeniŋte muc manac  
eengopien,  
ehuc muengopien, “Mozi honec-nâpooocmu?  
6 Mozi sindaŋ gie-nâŋecte fuŋne rituocmu?  
Nâŋac hatane soŋsoŋ foocte mana saricke-  
huc zaeckembeneŋ.”  
Ŋic maŋ mamasasu-ticne utuckekicne fokac.
- 7 Ehame Anuture tepe moteczi kicjopaocmu,  
qeŋnea muruc-jopame fâfâreniŋmu.
- 8 Jaŋacne namenzi hehawic-jopame rândiŋkepie  
honec-jopaniŋmuzi mu ruruc ejareniŋmu.
- 9 Eme ŋic sasawa jaŋe hâhâwic mananiŋmu;  
ehuc Anutuzi wiac ekac irec mu binaŋ  
eniŋmu,  
â eebapa-ticnere manatâc qâtâc eniŋmu.
- 10 Ŋic tiŋnezi Wofuŋte bubiaŋ mananzepien,  
â ere dapeŋko soŋkenzepien.  
Maŋsioc tâmiric sasawa jaŋe mu zeri  
enzepien.

## 65

### *Anutu jambuŋ-ticnere danŋe gae*

- 1 Mumutenŋ i go egarezo, Anutu, Zionko;  
mumupaŋte fârine go bâfua-garezo.
- 2 Nunumu manaekicte gorao hâcne



- mâreṅṅic sasawa fisiṅgopienṅ.
- <sup>3</sup> Bahac bâfua fekupene siric-nâpoha  
goki hâcne kinṅ behe-nâreekic.
- <sup>4</sup> Go ṅic moc bâwosâerâ hefâretec,  
fisi ufunṅere hae zoṅao juocmu,  
ere manapene zerine eocmu.  
Ficgere mâriri nâ gapec enzepeneṅ,  
tiri ufunṅere hâcne.
- <sup>5</sup> Go mâsi hâhâwicne bahuctecne,  
nunumu-nâṅec manarâ batarac-nâpoekic,  
bâbâpiaṅ-nâṅecte Anutu go;  
erâ mâreṅ â hâwec qaṅeṅnao juṅgopienṅ,  
jaṅe go jaha woricṅueṅgopienṅ.
- <sup>6</sup> Go tâpiri hetec hume tiki râec-jopameṅ,  
eme qinṅ herâ ṅeṅgopienṅ.
- <sup>7</sup> Go hâwec siri fânânṅ-ticne,  
â ṅicne ṅicne ojowa-jeṅic,  
bâmâteṅketec tinṅbenoṅ fuaekac.
- <sup>8</sup> Eme mâreṅ sâko mâreṅ mecqaṅeṅnao  
juṅgopienṅ,  
jaṅe fuṅne qaqa mâsigere bipic tara-ja-  
reekac;  
go zoaṅ wewefu-ticne â huhu-ticne,  
bubianṅ afusecnetec kiwac qawac eekac.
- <sup>9</sup> Go mâreṅ iqickerâ bâgunuckeekic,  
eme mâriri bianṅ fuaekac,  
Anuture opâ i opâ qârânṅ.  
Go mâreṅ bâmocke bazawiec ekutec,  
nânâ wiac fâri bianṅ fuaekac.
- <sup>10</sup> Go opâwâc-ticnao râehuc tikine heqâreekic,  
hoe mutec heme mâreṅ urueekac,

- eme jambuŋketec wiac fua-hâmoekac.
- 11 Go qa roro damen buafecgezi erickekomec,  
hatage nânâ mâririhec sasawa.
- 12 Sopâc wâneŋne wâneŋne ira rame fusucmarâ  
juŋgopien,  
tikine tikine jaŋe kiwaenŋopien.
- 13 Noniŋ bulimakaozi hae mâreŋ foŋkenŋopien,  
giene giene padi jacgoŋ bârârâŋnekac;  
zeŋgoma zeri epie gae miczonzoŋ faharekac.

## 66

### *Anutuzi wiac ewec â eekac irec danŋe gae*

- 1 Anutu aŋara hecneniŋ,  
mâreŋ ŋecjuçfâcne sasawa ŋoŋe!
- 2 Zâŋe biŋe-ticne bafaharehuc gae hecneniŋ!  
mumumbianŋ gae hesarickerâ heniŋ!
- 3 Anutu ziŋuc âzâcneniŋ: “Eebapage bipinehec.  
Tâpiri sâkogere erâ râsifâcge jaŋe  
dape-gareenŋopien.
- 4 Mâreŋne mâreŋne maigao dunduŋ hunzepien,  
ehuc mumumbianŋ gae hegarenzepien,  
zâŋegere mumumbianŋ gae henzepien.”
- 5 Warerâ Anutuzi wiac ewec i hone manac eniŋ:  
Ŋicŋondenŋko wiac eekac i bipinehec.
- 6 E hâwec hetikieme mâreŋ kereŋne ewec;  
ŋic jaŋe opâ sâko kikezi fotâcnembiŋ;  
irec hâcne bubianŋ manacenzepeneŋ.
- 7 Tâpiri-ticnezi gurinŋ bapa gie tofamâc baekac,  
zâŋe-ticnezi ŋicne ŋicne hone soŋaŋ eja-  
reekac;

irec rângeņne jaņe pepecne ehuc mi fa-  
harenzepieņ.

- 8 Ņicne ņicne, Anutu-nâņec mutenķeniņ,  
mumumbian-țicnere marac fânâņ fuaoc;
- 9 eki bâwâzâņ-nâpome juju guruoa juņgopeneņ,  
kike- nâņec soņaņkeme âte sowarierâ mi  
nâpojec.
- 10 O Anutu, go ba esâic enâremeņ,  
siliwa esâickeenģopieņ irec sâc enâremeņ.
- 11 Go manahaņ uficko jowambeņ;  
go fai-nâņecko tagi ņemâcne râemeņ;
- 12 go ņic mana-jaretec qizec-nâņecko âtembiņ;  
go manahaņ zocko â opâo humbeņ;  
eme sifu baefuc- nâporâ toma sâkoo  
râec-nâpomeņ.
- 13 No ufuņgao qowi bâzi barâ fâpemu,  
mumupaņ-nanere fârine bâfua-garepemu.
- 14 Zârâ hârîņ maņnao juhuc,  
micbipic-nanezi mupaņkepo i hâcne.
- 15 Lama wokemaņņehēc rike-garepemu,  
erâ lama ņicnere âsu mumundoņ;  
noniņ bulimakao wâc bâmocke-garepemu.
- 16 Anutu araņ bacneenģopieņ ņoņe ware-fârerâ  
mananiņ,  
eme no wiac enarewec i binaņ baņarepe.
- 17 Micbipic-nanezi samarierâ wiracnepo,  
â nameņ-nanezi e muafeckewec.
- 18 Maņņanezi wiac hehesicne maņkezac muzac,  
Wofuņzi dâņnanere hazec mi râezac.

- 19 Erâ Anutu e jâmbomac hazec râewec,  
 â nunumu-nane manawec.  
 20 Anutu e mutenkezo,  
 e nunumu-nane mi mana takirewec,  
 â aki anonoc-ticne mi sakare-narewec.

## 67

### *Nânâ bâbâsu gae*

- 1 Anutuzi aki anonoc enârerâ jambuņ-nâpozejec,  
 â zâņe mai-ticnezi tamae-nârezejec.  
 2 Eme mâreņko hatage hohone tara fuazejec,  
 â ņicne ņicne jaņe bâbâpiaņge hone  
 taranzepieņ.  
 3 ņicne ņicne jaņe, Anutu, go mumbiaņgunzepieņ,  
 ņicguru zeņgoma jaņe mumbiaņgunzepieņ.  
 4 ņicne ņicne jaņe bubiaņ manarâ zeri gae  
 henzepieņ,  
 goki ņicguru dâņjenic mutiņnehuc mutarae-  
 kicte,  
 â mâreņko ņicne ņicne jowac-jopaekicte.  
 5 ņicne ņicne jaņe, Anutu, go mumbiaņgunzepieņ,  
 ņicguru zeņgoma jaņe mumbiaņgunzepieņ.  
 6 Mâreņzi babasawe-ticnere fârine tahac-  
 nâpokac,  
 Anutu-nâņec, Anutu eki jambuņ-nâpokac.  
 7 Anutuzi jambuņ-nâpokacte mâreņ qaņeņnao  
 mâmâc sasawa e araņ bacnenzepieņ.

## 68

### *Israere Anutuzi râsifâcne bawahac-jopakac*

- 1 Anutuzi fahareme râsifâcne jaņe tâtieeņgopieņ,  
 e qaisockeeņgopieņzi wisecneeņgopieņ.

- 2 Hosâczi tâtieekac injuc bâtâtiéc-jopaekac,  
wokemanj zoocko zâseñkeekac irec sâc,  
sindañjic jañe Anuture maio  
siroweengopieñ.
- 3 Tiñne jañe ine Anuture maio añac â bubian  
manaengopieñ,  
â zeri bari ehuc kiwaeengopieñ.
- 4 Anutu gae hecneniñ, zâñe-ticne muafeckenieñ,  
karorac faio juekac e gae moc hefuacnenieñ,  
zâñe-ticne Wofuñ, mai-ticnao kiwaeniñ.
- 5 Anutu e tiri hae-ticnao bekâ mamac ejareekac,  
â hozec roroñ sasabec ejareekac.
- 6 Anutuzi qarâ suriñne fic hae bâfua-jareekac,  
niñgiñ- jopakicne firuec- jopame  
juhâmoengopieñ;  
mañrâñgenj jañe ine mâreñ hahanjekicnao  
juniñmu.
- 7 O Anutu, go ñicfâcge bânie-jarehuc,  
mâreñ tuhuo âte âte ramenj,
- 8 damenj ira mâreñ qiqiteckewec â sambânkonec  
hoe wahawec,  
Anutu gore maio.
- Sinai hâcne Anutu gore maio qiqiteckewec,  
Israere Anutu gore maio.
- 9 Anutu, go hoe micsâko hesietec wahawec,  
fuñfuñfâcge betañkepie sâc  
bâgunuc-jopamenj.
- 10 Lama gurufâcge jañe ira ñeñe hae bâfuambiñ,  
Anutu, buurucgere hapetac hone mainj ejare-  
menj.
- 11 Wofuñzi bubian biñedânj mufuwawec;

ņokac hâmbân sâkozi kiņaņ rahuc dân  
bârâwiņkemiņ:

12 “Ņicwofuņ jaņe momorifâc-jeņic jaņehec  
wišeņgopieņ.”

Ņokac haeo ņeņenezi mafa mateņ kâdoc  
qaņgopieņ.

13 Jaņe hapâ fakecne siliwazi qoročekicne  
iņucne,

â mâmân-jeņic i gol sâsârekične ârâņ qâri irec  
sâc.

Ehame wemocte lama sapaoa ņezo  
muņgopieņ?

14 Bapafârezi ņicwofuņ qâtâtiec-jopawecko,  
Zalimoņ tikiu sinou wahawec.

15 O tiki sâko mako, Basaņ tiki,  
o tiki qoņne qoņne, Basaņ tiki!

16 Tiki qoņne qoņne go wemocte Anuture tiki  
iņguuņ ecnekomec?

Tiki ira hâcne Wofuņzi jusanaņkeocte  
bâwosâewec.

17 Anuture zika keretac tauseņne tauseņne boc-  
jaha,

irec faio Wofuņzi Sinai beherâ tirificko fisi-  
wec.

18 Go faic hefâmeņ, niņgiņ-jopakicne jowac-  
jopameņ;

ņic jaņere guruo taha fua-garewec,  
râņgeņne jaņerao mâmâc;

ine go ira Wofuņ Anutu jucmurâ iņuc emeņ.

- 19 Wofuᅇ mutenᅇkezo, e zoaᅇ sâc de âsic  
enâreekac,  
Anutu e bâbâpiaᅇ-nâᅇec.
- 20 Anutu-nâᅇec e bâbâpiaᅇ Anutu;  
Wofuᅇ Anutu e hâmockonec babatarac-nâpo  
irec hata focnekac.
- 21 Anutu e râsifâcne jaᅇere ᅇizec hefâuckeocmu,  
ᅇic moc sindaᅇ hata-ticnao juocmu,  
ere utu mai hefâuckeocmu.
- 22 Wofuᅇzi muwec, “No Basaᅇkonec  
bârisiec-jopapemu,  
no hâwec zâkâᅇkonec bârisiec-jopapemu;  
23 eme kikege sâcne socko zurecmu,  
â ᅇâtofâcge namaᅇ-jeᅇic râsi jaᅇeraonec  
suanzeᅇ fua-jareocmu.”
- 24 O Anutu, zeri hombaᅇgere ᅇic biri zora tiri  
ufuᅇᅇao honec-jopakicne.  
Anutu Wofuᅇ Sâko gore biri zora hâcne.
- 25 Gae hehe jaᅇe micne bambiᅇ, musi bapa jaᅇe  
zâhec rambiᅇ,  
ᅇondeᅇ-jeᅇicko naru ᅇokaczi wonᅇᅇaᅇ ᅇam-  
biᅇ:
- 26 “Tutumanaᅇ sâkoo Anutu mutenᅇkezo,  
Wofuᅇ e Israere opa zâᅇe.”
- 27 Benjaminᅇ guru pitic jaᅇe micne bajarehuc  
raᅇᅇopieᅇ,  
Juda guruonec ᅇicbombaᅇ, guru sâko  
raᅇᅇopieᅇ,  
erâ Sebulonᅇe ᅇicbombaᅇ â Naftalire  
ᅇicbombaᅇ.
- 28 Tâpirigere fuᅇne bataniᅇkec, o Anutu;

go ñezic-nâpohuc tâpiri bâfua-nâremenj i fos-  
 anañkezejec.

29 Jerusalem taha ufunge ñekac irec erâ  
 ñicwofuñ jañe taha bagare fisinzepeñ.

30 Saparac uupicko qowi jungopienj\* jañe hanec-  
 jopazemec,  
 kâte bulimakao guru kâcçene â piticne  
 mâmâc.†

Monente harac engopienj jañe âtenzanj-jopaze-  
 mec,  
 zikare añac-jopakac ñicguru i  
 bâtâtiec-jopazemec.

31 Aigita mârenkonec ñic fekicnezi zocnehec  
 fisinopienj,  
 Etiopia mârenkoneczi mejenjic Anutu sicne-  
 nenngopienj.

32 Mârente ñicguru, Anutu gae hecneniñ,  
 Wofuñ mumumbianj gae hecneniñ.

33 E sambâñte sambâñ, esecne fuawec  
 irec faio rac warec juekac,  
 eme marac fânâñ sâko-ticne râwiñkeme,  
 mârenj sâc manaengopenenj.

34 Anuture tâpiri muafeckeninj,  
 zai zonzonj-ticnezi Israe qorockekac,  
 tâpiri-ticnezi karoracko fuakac.

35 Anutu tirific-ticnao jukac i bipinehec;  
 Israere Anutu eki ñicfâcne tâpiri â sasanaj  
 hejareme huekac. Anutu mutenkenañ!

---

\* **68:30:** Aigita ñic jañere mukicne. † **68:30:** Qâpuc ñic gurune  
 gurune jañere mukicne.



## 69

### *Wira wâwâsic â muac baafec*

- 1 O Anutu, go baficnuc!  
Opâzi biac wefujec upe-naneo qakac.
- 2 No sohoŋko âte utuckehuc ââtesinġ basakopac;  
zâkânġko hupe rumizi qâurucnukac.
- 3 Owackeku marac-nane bieme betanġkekopac,  
Anutu- nanere woŋec juku zâŋe bânininġ  
enarekac.
- 4 Maŋġânġ qaisocnuŋgopienġ jaŋere zare  
i qizec susuc-nane sirickekac.  
Tâpiri-jeŋichec jaŋe burec ehuc sipiricnuzo  
enġgopienġ.  
No wiac moc mi fiuckepo, eha bâtikiepemurâ  
muŋgopienġ.
- 5 O Anutu, no mutuc epo irec fuŋne manakic,  
wiac esifuckepo i kâuc mi bakic.
- 6 Go woricguhuc juenġgopienġ jaŋe nore erâ mi  
qurutuanzepienġ,  
o Anutu, Tâpiri Qunġqasanġ Wofuŋ.  
Israere Anutu, go wira basac egareenġgopienġ,  
jaŋe nore erâ mimi faio mi fenzepienġ.
- 7 Nore faio dâŋ fewec â mimi qaqa enarekicne,  
i gore qâqâinġne fua-narewec hâcne.
- 8 Qomâfâc-nane jaŋe mana- narepie jabane  
ekopac,  
neŋgoc-nanere qâricfâc jaŋe zâŋe  
ruruŋnuŋgopienġ.
- 9 Gore ficte erâ bunane zoc zarâ zâfitacnukac,

- â go musoriņguenġopien jaņere  
mumusoriņzi nore faio fe kac.
- 10 No kiorâ sowa juhuc sa hac-nane bâzâickepo,  
eme jaņe hanecnuhuc musâqorecnumbinġ.
- 11 No busâqocte erâ mateņ qonaņkerâ jupo,  
eme jaņe âke sisic enarehuc jumbinġ.
- 12 Ni c ņokac jaņe hae zoņao turerâ nore mu binanġ  
eenġopien,  
â waiņ opâ nâhuc nore zoraņ gae heenġopien.
- 13 No ine nunumu-nane, Wofuņ gorao sorepe  
hefâekac.  
O Anutu, buurucge fufusuc fokacte  
dameņ ira me ira manatec sâckeha mana-  
narezemec.
- 14 Go jaunġ fârigeheczi baficnutec  
sohoņ dodocko mi âte utuckezepac;  
râsifâc-nane jaņeraonec,  
â opâ zâkâņkonec bataracnuzemec.
- 15 Rumizi mi qâurucnuzejec,  
â zâkâņzi mi qâcnuzejec,  
â nombâņzi mi nâkâcnuzejec.
- 16 O Wofuņ, go mana-narec, aki anonocge aņacne;  
bumâteņ sâkogere erâ norao fohorec.
- 17 Kiņaņņicge no zâņe maige mi bâsoņke-narec,  
no me zacnukacte biac mana-narec.
- 18 Maņfuņ-naneo warerâ firuecnuc,  
râsifâc-nane jaņere erâ rambaņko râecnuc.
- 19 Mimi qaqa enarekicne â musoriņnukicne,  
i goki mana-fârekomec;  
â râsifâc-nane kâuc mi bacjopakic.

- 20 Mimizi ñecnukume bunane herickekac,  
 busâqoc mana-narenin̄te zâñe fipo, erâ bas-  
 apo,  
 bâbâmirin̄ bâfuapemurâ eipiepo.
- 21 Nânâre okacne marasin̄ sâqocne narembin̄,  
 opâre hâmope opâ zazacne gumecnumbin̄.
- 22 Jañacne tebozi wiwitic ejarezejec,  
 â tiwâ bâzi-jen̄iczi bitin̄ ejarezejec.
- 23 Go zâñe-jen̄ic bâhâpotec tin̄tuñ qanzepien̄,  
 hoqañen̄-jen̄iczi qiric qârâc qahuc juzejec.
- 24 Aaricge hon̄ketec fai-jen̄icko fezejec,  
 kimben̄gere zocbârun̄zi qâhâsâc-jopazejec.
- 25 Hae-jen̄ic tuhu fuazejec,  
 ficjen̄icko ñic moc mi juzejec.
- 26 Go ñic qa bâtin̄ ejaremen̄ jañe fific gugurin̄  
 ejaren̄gopien̄,  
 â ñic zâpâ jopamen̄ jañe zâic  
 bâsoka-jaren̄gopien̄.
- 27 Go kin̄zi kin̄ zuhucke-jarezemec,  
 moc mi jowac rotec maigao bahac fâsâc  
 enzeppen̄.
- 28 Juju sanan̄te papiao zâñe-jen̄ic hetâmirezemec,  
 tin̄ne jan̄ere birio mi râec-jopazemec.
- 29 No ine qarâ surin̄ne â zâic hati jukopac;  
 Anutu goki baficnurâ sabecnuzemec.
- 30 No Anutu gae hecnehuc muten̄kepemu,  
 no dañge âzâcnehuc muafeckepemu.
- 31 Wofun̄ e irec mana bian̄keocmu,  
 bulimakao zun̄enehec â sârânehec bâzi rikec-  
 nepe muzac  
 ine maname wawahane ezac.

- 32 Ro waha âte ejarekicne jaņe i honerâ zeri enzepieņ;  
Anutu wira basac ecneņgopieņ ņoņe maņņeņic firiezejec.
- 33 Wofuņ e tac qararacne jaņere dâņ manaekac,  
e fuņfuņfâcne niņgiņko foņgopieņ jaņe mi suņgiņ-jopaekac.
- 34 Sambâņ â mâreņ jahe e mumbiankezepirec,  
hâwec â maņņao wiac qiriņ qaņgopieņ sa-sawa jaņe mâmâc.
- 35 Anutu e Zion sisipirickonec bataraocmu,  
â Juda mâreņko hae sesuc heqâreocmu;  
eme kiņaņņicfâcne jaņe irec rune erâ junzepieņ.
- 36 Kiņaņ qaqafâcne qâricfâc-jeņic jaņe hotâckenzepieņ,  
eme zâņe-ticnere aņac-jopaekaczi maņņao junzepieņ.

## 70

### *Anutuzi bafickeocte numuwec* (Mi Mâ 40:13–17)

- 1 O Anutu, go bataracnućmurâ manatec sâckezejec!  
O Wofuņ, go fâro barâ baficnuc!
- 2 Juju-nane nowac rozo muņgopieņ,  
jaņe mimi faio râec-jopatec weaņkenzeieņ.  
Sisipiric fua-nareocte maņkenņgopieņ,  
jaņe ejaretec qurutuarâ risienzepieņ.
- 3 “Sowine, sowine” munareņgopieņ,  
jaņe mimizi ņemiziec-jopazejec.

- <sup>4</sup> Go wira basac egarengopien sasawa,  
 jaŋe aŋac-jopame bubian mana-  
 garenzepien.  
 Bâbâpiaŋgere ejareekac sasawa,  
 jaŋe dameŋ sâc “Anutu e kâcŋene” mu-  
 garenzepien.
- <sup>5</sup> No ine hapetac â qarâ suriŋne jukopac,  
 o Anutu, go tarec jaha warec!  
 Go babafic-nane â fifirue-nane,  
 o Wofuŋ, ŋeŋec zezepec mi ezemec!

## 71

### *Nicqizec ekopacte mi behecnuzemec*

- <sup>1</sup> O Wofuŋ, no gore dapeŋko soŋkekopac;  
 go mana-naretec mimi faio moc mi fezepac.
- <sup>2</sup> Tiŋnegere sâcko asao rocnuhuc firuecnuc;  
 norao hazec râerâ bâpiaŋnuc.
- <sup>3</sup> Goki qânâuŋ enarehuc sabecnuc,  
 huec sanaŋ enarehuc ŋezicnuc,  
 go hâcne qânâ-nane â huec-nane.
- <sup>4</sup> O Anutu, go sindaŋŋic jaŋere meonec batarac-  
 nuc,  
 ŋic hehesicne â zâic bâbâfuare aŋac mamana  
 jaŋere meonec.
- <sup>5</sup> O Wofuŋ, go hâcne woricgukopac,  
 no qieonecteaŋ Wofuŋ gore mamana jupo.
- <sup>6</sup> Fuapoonecteaŋ gorao roweckehuc jupo,  
 goki hâcne neŋgoc bumaŋkonec baefucnu-  
 meŋ;  
 irec go jaha mutenŋuhuc juekopac.
- <sup>7</sup> Njic bocjahazi nore manapie sowi tinac eekac;  
 ehame goki ine paŋnea sabecnuekic.

- 8 Gore mumutenzi micnaneo fusucmaekac,  
zoaŋ zora muafecguhuc juekopac.
- 9 No ɲicqizec ehape mi mac suŋgiɲuzemec,  
tâpiri-nane betan̄keme mi behecnuzemec.
- 10 Râsifâc-nane jaŋe nore dâŋ muŋgopen̄,  
hâmopemurâ ejarekac jaŋe muc manac  
eŋgopien̄.
- 11 Ehuc muŋgopien̄, “Anutuzi e behewec,  
jâpe raku hâponiŋ me,  
moczi moc mi ɲezickeocmu.”
- 12 O Anutu, go taicko mi junarec,  
Anutu-nane, go fâro barâ ware baficnuc.
- 13 Qoricnuen̄gopien̄ jaŋe mimierâ omaenzepien̄;  
no sisipiric fua-nareocte muen̄gopien̄,  
jaŋere faio mimi qaqa â nifepupu fezejec.
- 14 No ine zuzuhuc woricguhuc jupemu,  
â zâŋe biŋege basawehuc jaha jupemu.
- 15 Micnanezi eebapage tiŋne irec binan̄ bazejec,  
dameŋ sâc bâbâpian̄ giege musokazejec;  
irec zarezi mamana-nane sirickekac.
- 16 Wofuŋ Anutu gore tâpirire biŋe bâron̄  
bafisipemu;  
gore tiŋne gie sawa muafeckepemu.
- 17 O Anutu, go qie-naneonectean̄ wiac qazu-nare-  
huc jumeŋ,  
eme no mâsi bapage mutaniŋkehuc jaha  
juekopac.
- 18 Irec no ɲicran̄qa epe jaŋqâŋ âkecnume,  
Anutu, go sifu mi behecnuzemec.  
Eme no ɲic gaŋne gaŋne fua raniŋmu,  
jaŋe tâpirige mutaniŋke-jarezepac.

- 19 Anutu go tiņnegezi feku sambân heuakac.  
Goki wiac kâcqene sâko eekic;  
mozi Anutu gore sâc jukac?
- 20 Go manahaņ zârâ hârîņ bocjaha  
bâfuac-nâpowec;  
eme zi mocwâc bâfiriec-nâpocmu,  
â mâreņ hukicnaonec mocwâc baefuc-  
nâpocmu.
- 21 Erâ nore zâņe wâc bafaharecmu,  
â bâbâmiriņ bâfua-narecmu.
- 22 O Anutu-nane, no iņuc jaha kârîņqaņ qahuc  
jauņ fârîgere mumbiaņgupemu.  
No gita qahuc muteņ bâteņ egarepemu,  
Israere Tiri rune go.
- 23 Micbipic-nanezi go muteņguhuc zeri ezepac,  
â maņ qâqâtâc-nane firuemeņte e iņuc jaha  
ezejec.
- 24 Â nameņ-nanezi dameņ sâc tiņnege mu-  
taniņkezejec.  
No sipiricnuzo mumbiņ jaņe bawahac-  
jopatec  
mimi fai-jeņicko fewec.

## 72

### *Nicwofuņte bubiaņ dâņ*

- 1 O Anutu, go mumutiņge ņicwofuņ tahackeze-  
mec,  
ņicwofuņte ņokâ tiņne jujuge râcnezemec.
- 2 E ņic ņokac gurufâcge dâņjeņic mutiņnehuc  
muzejec,  
â hapetacfâcge sâcmutâc dâņte sâcko ejareze-  
jec.

- <sup>3</sup> Tiki jaņe mâreņ rune mâriri bâfua-jarenzepieņ,  
â mâreņ facne jaņe iņuc jaha.
- <sup>4</sup> E ine hapetac ņezic-jopahuc dânjenic muzejec,  
qarâ suriņne kime dopec ejarezejec,  
â fejareeņgopieņ ine bâuruņ-jopazejec.
- <sup>5</sup> Juju dameņ-ticne i zoaņ qahuc juocmu irec sâc  
juzejec,  
erâ wâc mosa ņehuc juocmu sâc, dameņne  
dameņne.
- <sup>6</sup> Hoezi qinziņ qakicnao heekac, e irec sâc ezejec,  
â mâreņ kereņne bâgunuckeekac iņucne.
- <sup>7</sup> Juju dameņ-ticnao ņic tiņnezi jusarickenzepieņ,  
â wama fohuc jaha juha mosa hâmozejec.
- <sup>8</sup> Hae mâreņ ruckeocmu i ņifec hâwecko fisizejec,  
â ņifec hâweckoa ratarazejec,  
erâ Eufrata opâ sâkoonec domarâ raku  
mâreņ qaņeņnao mickezejec.
- <sup>9</sup> Râsifâcne jaņe maņfuņnao fodapenzepieņ,  
kisâfâcne rufe muduckenzepieņ.
- <sup>10</sup> Tarasisionec â nucne nucne irec ņicwofuņ  
jaņe taha bacne fisinzepieņ;  
Arabia â Etiopia mâreņkonec micne bapa  
jaņe sahaç taha râcnenzepieņ.
- <sup>11</sup> ņicwofuņ sasawa jaņe dienzi hecnenzepieņ,  
ņicguru zeņgoma kiņaņ qacnenzepieņ.
- <sup>12</sup> E ņic hapetaczi kuku qacneme hone kitaņ  
ecneocmu,  
â qarâ suriņne me hone bafic tâmiric e iņuc  
jaha ecneocmu.
- <sup>13</sup> ņic bebetaneņ â hapetac ere bune sâqoreocmu,  
â tac qararacne juju-jeņic sabeckeocmu.



- 14 Fific guguriñ â bâbâzâic maic-jopaha batarac-jopaocmu,  
 â socjenicte maname furi sâko ekac.
- 15 E damen zora juzejec,  
 â Saba mârenkonec gol tahackenzepien.  
 Ere erâ zuzuhuc numuhuc junzepien,  
 ehame Anuture jambunzi erao wahahuc  
 juzejec.
- 16 Nânâ monzan mazuc mâriri fuazejec,  
 tikine tikine sawe mâririackezejec;  
 jufu mumuc Lebanonje sâc ezejec.  
 Haene haene ñic ñokac fua sawec enzepien,  
 kecqañzi gielo fuaekac inucne.
- 17 Zâñe biñe-ticne fofu sanan forazizejec,  
 zoañzi ñeñe sanan ñeekac irec sâc.  
 Ñiczi ere zâñeo iticnehuc jajambun enzepien,  
 â ñicne ñicne e mutenkenzepien.
- 18 Wofun, Israere Anutu, e mutenkezo,  
 e buc mâsi sâko baekac.
- 19 Tatamac zâñe-ticne mutenkehuc juzo,  
 eri tatamac-ticnezi mâren sâko mâren fuseze-  
 jec.  
 Jâmbomac jâmbân.
- 20 Dawidi, Isaire ñokâ, ere nunumu gae zira  
 tarakac.

## DÂKÂNE NAMBA 3

### 73

*Anuturao roweckerâ juju bian bâfuazo*

- 1 Anutu e ñic siocmâc jâmbomac buuruc eja-  
 reekac,

- manjenic qaqacne foekac jaņe hâcne.  
<sup>2</sup> No ine kike-nane fâfâckezo ejec,  
 no âte sowarierâ nuzo ejec.  
<sup>3</sup> No ñic sindaņne sahackopec juju bian-jeņic  
 honehuc  
 penaroņ-jeņicte erâ maņnane fârorockejec.
- <sup>4</sup> Jaņe zâic serereņ moc mi fojarekac,  
 sahaç-jeņic qiçicne â wokemaņhec.  
<sup>5</sup> Wiac babasa me zârâ zâpâ, ñic gâcne fua-  
 jareekac,  
 izi ñic keci jaņe moc mi rocjopaekac.  
<sup>6</sup> Irec maņfefezi qoçonaņ-jeņic ekac,  
 â pepeczi ñaçi-jeņic eme rojuençopieņ.  
<sup>7</sup> Wokemaņzi zâņe mai-jeņic âke fusucmame we-  
 furâ ñeekac,  
 â bujeņickonec wiac repicne huhuckeme we-  
 fuekac.  
<sup>8</sup> Jaņe âke sisic dâņ hâtâne muençopieņ,  
 â pepec ehuc ñic fejareniņte ejareekac.  
<sup>9</sup> Masu-jeņic bâfeņnerâ sambâņkopec dâņ mupie  
 feekac,  
 erâ namaņ-jeņiczi mâreņko wiac fokac  
 i kosa mu surec eençopieņ.
- <sup>10</sup> Eme ñic jaņe ine mana-jarepie sâckeekac,  
 eme mumbiaņ-jopaençopieņ.  
<sup>11</sup> Ziņuc muençopieņ: “Anutuzi wemocko man-  
 aocmu?  
 Femicne sâko erao mamana fokac me?”  
<sup>12</sup> Kec, manaņçopieņ, sindaņñic fuņne-jeņic iņuc  
 fokac.  
 Erâ wiac mocte mana mezac mi ehuc,  
 monen-jeņic basaweençopieņ.

- 13 Jei, no maŋnane maŋgâŋ soŋaŋkepe qaqačne  
fowec,  
â menane zure qaqačkepe wânâŋ mi bo-  
hotawec.
- 14 Anutu, goki manahaŋtec zoaŋ zora zâic fua-  
nare jujec,  
â hae fureme sâc kâcbiŋ kihuc jupo.
- 15 No ziŋuc muzapo: “Dâŋ muŋgopieŋ ijaha  
mupe,”  
ine fuŋfuŋfâcge maŋzi beheç- jopazapo  
hâcne.
- 16 Irec wiac i mana tarapemurâ mamasasu gie  
bapo;  
erâ manape guŋkeme emâmâŋkepo.
- 17 Izi Anuture dâŋbiri soŋnere maŋnao razirâ,  
miŋecne ŋic sindaŋne jaŋere hata tofane  
hone tarapo.
- 18 Jâmbomac, go mâreŋ sosowaricnao  
râec-jopaekic,  
eme rânđiŋkerâ jopahuc qanzaŋ-jopaekac.
- 19 Jaŋe qeŋfâfâc jaha sipirickeŋgopieŋ,  
bipic tara-jareha omaeŋgopieŋ.
- 20 Guŋ manaku mana qâqârepene arictac eekac,  
iŋuc hâcne hawari-jeŋicte ninikeç fuaocmu.
- 21 Mârâc maŋnanezi mana hâtâwepo,  
â bunane fârorockewec,
- 22 damaŋ ira mutuc matacne epo,  
maigao qowi maŋ tâmiric tinac epo.
- 23 Mâcne, no sifu goheckoaŋ juhuc jupemu;  
goki mefâre-naneo basanaŋnukomeç.
- 24 Go dâŋbirigere sâcko jowacnuekic,  
â zâhec eri tatamacko râecnuzokic.
- 25 Go mocsâkoa sambâŋko junareekic,

- â mâreŋko go basacguhuc wiac mocte mi enarekac.
- 26 Maŋ sahaç jahec-nane docke betañ ezo murâ enic:  
Anutu go ine maŋnanere wâtunġ â boreŋ-nane fofo sanaŋ.
- 27 Jâmbomac, go behecgurâ raniŋmu jaŋe omaeniŋmu;  
go eatuc egareniŋmu jaŋe bâsirowec-jopacmu.
- 28 No ine Anutu gore maŋfunġo jupe aŋacne ekac.  
No Wofunġ Anutu gorao roweckekopac;  
go wiac eekic sasawa i muiŋ musawec epemu.

## 74

### *Tiri ufunġ hetâtiekicknere kikefunġi numuwec*

- 1 O Anutu, go wemocte bebehe sanaŋ behecnâpomenġ?  
Kimbeŋgere hosâczi wemocte sapagere lama guru jâpec-jopahuc jukac?
- 2 Kikefunġâcge esecne rocjopamenġ jaŋere manasuc!  
Funġfunġâcge juniŋte furi-jeŋic bamenġ jaŋe hâcne.  
Erâ Zionġ tiki, ŋeŋe haege sakaremenġ irec wâc manasuc!
- 3 Sesuctac foku fofone ewec i rârâ honec:  
Râsi e tiri ufunġo wiac hetâtie-fârewec.
- 4 Râsifâcge jaŋe tiri hae zoŋagao owa sâko embiŋ,  
jaŋe jaŋacne filac fârepie feha ma âkendânembiŋ.

- 5 Motâc faicpec jâczi hendin bakicne fowec,  
i rârîczi henzan qanzañnembin.
- 6 Erâ jâczi metâ basarickekicne doma rawec,  
i rârîc â hamazi hezu henzan embin.
- 7 Jâne tiri ufunge turunkepie zawec,  
zânegere fic bâsâqore-fârembin.
- 8 Jâne mumbin, “Nânâc omaec-jopanzenen,”  
ehuc hae piicko nunumufic zoczi rike-  
fârembin.
- 9 Tirima- nâñec mocwâc mi doma rame  
honençopenen;
- ñonden-ñânjecko porofete moc mi junârekac;  
eme wiac keczi mo damençko taraocmu i mi  
manançopenen.
- 10 O Anutu, râsi e wezimucko mururuc i be-  
heocmu?  
Kisâ e zânjege musorinçkehuc jaha juocmu me?
- 11 Go fune weniñucte akic-jopakic?  
Mefârege wemocte sakarekic?
- 12 Anutu go mârâc jaha Wofun Sâko-nane jumen,  
ehuc mârençic ñondençko bâbâpiañ gie ba-  
jumec.
- 13 Go tâpirigezi hâwec bâtâcnemen,  
â zâkânçte momori utune hefâuckemen.
- 14 Go oâ qizecne qanzañnemen,  
erâ biucne kâte qowi jaretec nâmbin.
- 15 Go qânâ hefâucketec opâ zânje fuawec,  
â opâ fifisine hezicketec kerençkewec.
- 16 Go zoançte rune jukic â ñafere inç jaha,  
goki hâcne mosa â zoanç râec-jofamenç.
- 17 Mârenç qançençne gokizia basanançke-fâremenç;  
hoemanç â zoanç damenç i goki wâc mutec  
fuawec.

- 18 Wofuŋ, go răsizi mu ruruc ekac irec manasuzemec,  
 ɲicguru hehesicnezi zâŋege musoriŋkeŋgopenɛŋ.
- 19 Ɗicfâcge jaŋe răsi jaŋere meo mi râec-jopazemec;  
 qarâ suriŋnefâcge jaŋere jujure ninikec mi ezemec.
- 20 Zâzâficgere mana mezac ezemec;  
 haesoŋko sindaŋte toma bocjaha forakac.
- 21 Ro waha âte ejarekicne jaŋere faio mimi mi fezejec;  
 hapetac â qarâ suriŋne jaŋe zâŋege mumbiankenzɛpienɛŋ.
- 22 O Anutu, go faharerâ gahacne dâŋ ɲezickec;  
 hehesicne jaŋe zoaŋ zora mu ruruc ega-reŋgopenɛŋ irec manasuc.
- 23 Râsifâcge jaŋere dâŋ ojoware mi nikecguoc.  
 Kisâfâcge jaŋere miczɔŋzɔŋ zuzuhuc hefakac i manac.

## 75

### *Anutu e dâŋ mumutara tiŋne*

- 1 Dange gazaŋgopenɛŋ, o Anutu, nâŋe dange gazaŋgopenɛŋ;  
 zâŋege riwaseckeŋgopenɛŋzi mâsigere binanɛŋ baŋgopenɛŋ.
- 2 “No damenɛŋ bapo i maickeme mumutara gie-nane bâtiŋnehuc bapemu.
- 3 Mârenɛŋ â ɲecjuçfâcne biric boroc ezo murâ eniŋ,  
 noni mârenɛŋ wâtunɛŋ ketenɛkepo.

- 4 No mañfefehec jazapemu, ‘Penaroñ mi eniñ,’  
â ñic sindaņne jazapemu, ‘Pepecne mi eniñ.
- 5 Mañfefehec jaņe penaroñ mi eniņte  
â sahaçfefe jaņe pepecdâņ mi eniņte jaza-  
ekopac.’ ”
- 6 Mumutara gie i zoaņ wewefunaonec me huhu-  
naonec  
me mâreņ tuhuonec mi fuaekac;
- 7 Anutu e buc mumutara gie baekac,  
ehuc ñic moc bawahaekac â moc  
bâfeņneekac.
- 8 Wofuņ e meticnezi râqâc moc badomakac,  
irec maņnao waiņ opâ momori bâmockekicne  
ņekac;  
eme i hâcne goņgiņke-jareme mâreņņic sindaņne  
jaņe nâku fâhâņne hâtâ qiņqiņne wâc  
nâzickeniņmu.
- 9 No ine dameņ sâc zeri bari epemu,  
no Jakobore Anutu mumuteņ gae  
hecnepemu.
- 10 Ñic sindaņne jaņere tâpiri bawaha-fârezo  
ņic tiņne jaņere tâpiri ine bafaharezo.

## 76

### *Anutu mumuteņkere saoreņ*

- 1 Juda mâreņko Anuture fuņne manakicne,  
zâņe-ticne Israe mâreņko bafaharekicne  
fokac.
- 2 Neņe juju-ticne Jerusalem haeo bâfuakicne,  
Zioņ tikio fic hae-ticne ñekac.
- 3 Irec hâcne tepe motec qazu qanzaņ ewec,

erâ wâc sându maro â zikare wiac sasawa.

- 4 O Anutu, go bipinehec jâmbân, qunqasaŋgezi tiki ŋeŋe sanaŋ siric-jopakac.
- 5 Hâbi hâro jaŋe mafa mateŋ jowac rokiçne, jaŋe rândiŋkerâ guŋko utuckembiŋ, zikare ŋicsaric sasawa mejeŋic betanŋewec.
- 6 Jakobore Anutu goki hanec-jopakutec becâsic â keretac qiriŋmâc waha fombiŋ.
- 7 Jâmbomac, go hâhâwicne, kimbeŋgezi fahareme mozi gore maio sâcne domaocmu?
- 8 Mumutara dâŋgezi sambânŋkonec fuame mâreŋ e bipic tatara erâ niniŋkewec.
- 9 I Anutu goki mâreŋŋic ro waha âte ejarekiçne jaŋe bafic-jopacmurâ dâŋ mutarazo faharemeŋ damaŋ ira iŋuc fuawec.
- 10 Zikare nâfocne jaŋe mumbianŋuniŋmu, ŋic kimbeŋ-jeŋiczi ŋerisieme mumuteŋ-jeŋic eocmu.
- 11 Ŋoŋe Wofuŋ Anutu-ŋeŋic taha bacneniŋte mu-panŋenzepieŋ, erâ mumupaŋ-ŋeŋicte fârine bâfuanzepieŋ; ŋic rârec bârârec juranŋopieŋ sasawa ŋoŋe Anutu araŋ babacnene e taha bac-nenzepieŋ.
- 12 Eki miçne bapa maŋfefe juŋgopieŋ jaŋe bawahac-jopaekac; â mâreŋte ŋicwofuŋ juranŋopieŋ jaŋe wiac hâhâwicne ejareekac.



## 77

*Anutu esecne mâsi sâko bawec ere dapeņko  
sonkezo*

- 1 No owa ruruckerâ Anutu wiracnekopac,  
wiracnehuc mukopac, “Wâwâsic-nane  
manac!”
- 2 No zârâ hâriņ damenķo Wofuņ wira basac ec-  
neekopac;  
ņafeo docke betañ tâmiric menane bafaha-  
reekopac,  
maņ qâqâtâc-nanezi bâbâmiriņ qikiņneekac.
- 3 No Anutire manasurâ husehuc foekopac,  
manatâc qâtâc ezo mupe maņnane  
gâckeekac.
- 4 Zâņe-nane tâpâune bârâņgenķetec guņ tâmiric  
foekopac,  
maņnanezi mezackekume dâņezo  
eipieekopac.
- 5 Dameņ esecne juwefukicne i bâjâpehuc  
wiac fuawec i manasu-fâreekopac.
- 6 No ñafeo maņnanezi mana wosâc eekopac  
â mâro-nanezi mana gufuc erâ ziņuc  
wioekopac:
- 7 Wofuņ e bebehe sanaņ beheç-nâpokac me?  
Âgo jauņ mocwâc mi enâreocmu?
- 8 Aki anonoc-ticne zicke sanaņkewec me?  
Mumupaņ-ticnere fârine omatac fuawec me?
- 9 Anutu e buuruc enâreocce nikeckewec?  
Kimbeņ-ticnezi miriņ-ticne fiteç qawec me?
- 10 Eme mupo, “Femicne mefâre-ticne hetikiejeç,  
ireç erâ bunane qâoriņkeçac.”

- 11 Wofuŋ goki mârâc gie bameŋ i manasupe,  
jâmbomac, esecne mâsi bameŋ i honehuc  
ŋepe.
- 12 Giege baekic sasawa i mana biric epe,  
wiac tâpirihec i mana wosâehuc jupe.
- 13 O Anutu, gore hata i tiri moc.  
Anutu sâko-nâŋec go iŋucne moc wena jukac?
- 14 Anutu go hâcne mâsi bapa Anutu,  
ŋicne ŋicne jaŋere ŋondenko tâpirige  
bataniŋkemeŋ.
- 15 Tâpiri megezi ŋicfâcge firuec-jopameŋ,  
Jakobo â Josefe ŋokâfâc-jekic jaŋe hâcne.
- 16 O Anutu, opâ jaŋe go honecgurâ fâfârembiŋ,  
â zâkâŋ jaŋe honecgurâ qarac qarac qambiŋ.
- 17 Karorac jaŋe opâ hoŋkepie wahawec,  
sambânzi quŋ parandaŋ hewec,  
tepe motecgezi ŋifec â ŋifec bâricnehuc wa-  
hambiŋ.
- 18 Mânâŋ zâkiriŋkeme quŋgere fânâŋ fuawec,  
bâbâriczi hae mâreŋ batamaewec,  
mâreŋzi fâfârerâ qiqiteckewec.
- 19 Hatage hâwec fofotâc âte rameŋ,  
kikegezi zâkâŋ sâko fotâcnemeŋ,  
eme sifu kike hatage mi honekicne.
- 20 Ŋicfâcge lama guru iŋucne jowac-jopameŋ,  
Mose â Aroŋ jahere meo hâcne.

## 78

*Wofuŋzi mimiŋne jaŋerao gie bawec irec mi  
nikec-nâpozejec*

- <sup>1</sup> Ŋicbureŋ, mumutâc-nanere hazec râeniŋ,

- micdân-nanezi hazec-ŋeŋicko huoc.  
<sup>2</sup> Qâqindân micnaneonec wahazo ekac,  
 kesaic dân raŋqane mufuazo ekopac.  
<sup>3</sup> Mimiŋe jaŋe binaŋ banârehuc jupie  
 mana maŋ embeŋ, mamana-nâŋecko fokac,  
<sup>4</sup> i hâcne qâricfâc-nâŋec mi hesoŋke-jarehuc,  
 jufeniŋmu jaŋe mufua-jarezo:  
 Wofuŋzi gie sâko bawec, â tâpiri-ticne,  
 â mâsi bawec irec binaŋne hâcne.
- <sup>5</sup> Dâŋsanaŋ Jakobo erao âkendânnewec,  
 Israe guru sâcmutâc biricke-jarewec,  
 i wâc qiefâc-jeŋic jazahuc juniŋte,  
 Wofuŋzi apafâc-nâŋec mupaŋke-jarewec.
- <sup>6</sup> Zâhec-guru hazec-jeŋicko huoc te muwec,  
 qâricfâc-jeŋic, mi fuakicne hâcne.
- <sup>7</sup> Eme jaŋe wâc fahare qiefâc-jeŋic binaŋ ba-  
 jarepie,  
 maŋjeŋic Anuturao siŋkerâ foha,  
 eki wiac ewec irec mi nikec-jopazejec,  
 â mumupaŋ-ticne reŋkehuc junzepieŋ.
- <sup>8</sup> Mimiŋnefâc-jeŋic jaŋere sâc mi junzepieŋ,  
 jaŋe ŋic maŋrâŋgeŋ â qaqaŋharicne jumbiŋ;  
 maŋjeŋic biric borocne fohuc juwec,  
 mâro-jeŋic Anuturao mi qohotawec.
- <sup>9</sup> Eferaimte qâricfâc, tepe babaju,  
 jaŋe zika damaŋko hâwic-jopame wisembiŋ.
- <sup>10</sup> Jaŋe Anuture zâzâfic mi soŋaŋkemiŋ,  
 â sâcmutâc bâjâpezo takic-jopawec.
- <sup>11</sup> Eki juwicnao gie sâko bawec,  
 â mâsi jowatuwec, irec nikec-jopawec.

- 12 Mimiņne jaņere maio wiac bipinehec ewec,  
Aigita mâreņko, Zoaņ wâneņko.
- 13 E hâwec bâfâucke-jareme fotâcnembiņ,  
ņifec â ñifec tufa iņucne domawec.
- 14 Zoaņ domaha karoracko bânie-jarewec,  
â ñafeo zoczi batamae-jarewec.
- 15 E mâreņ tuhuo qânâ hefâucke-jareme  
opâ qârâņnea, zâkâņkonec tinac nâmbiņ.
- 16 Qânâonec opâ fifisine wahawec,  
erâ fusi-ticnehec rahuc domawec.
- 17 Eme sifu zuhuckerâ sâqocne bahuc Anutu  
bunao bambiņ,  
Femicne sâko tuhuo pepecne ecnembiņ.
- 18 Anutu maņjeņiczi esâickehuc  
andac-jeņicte sâcko nânâre mumbiņ.
- 19 Anutu pepec ecnehuc mumbiņ,  
“Tuhuo nânâ sâcne bâmocke-nâreocmu me?”
- 20 E qânâ i jâmbomac qâfâuckeme  
opâ qârâņne wahahuc domawec;  
eme nânâ wâc sâcne tahac-nâpooomu,  
â ñicfâcne qowi bâfua-jareocmu me?”
- 21 Wofuņ e dâņ i manarâ maņne faharewec;  
maņzoc-ticnezi Jakobo bâruņkecnewec,  
kimbeņ-ticnezi Israe fahac fisicnewec,
- 22 jaņe Anutu mi manasiņkemiņte,  
â bafic-ticnere mamananac mi jumbiņte.
- 23 Ehame sifu karorac wira-jareme  
sambâņ motâcne motâcne aņkewec.
- 24 Eme manazi hoe iņucne wahawec,  
nânâ i sambâņkonec jareme nâmbiņ.
- 25 Aņelo nânâ i mâreņiczi nâmbiņ,  
ehuc hata nâsiņ-jeņic mi basambiņ.

- 26 Eme zoaņ wewefunaonec mâniaņ soreme  
rawec,  
ra juwic mârenkonec mâniaņ jâpeme we-  
fuwec.
- 27 Ehuc qowi beheme hoe tinac wahawec,  
sawa wipe qârâņne, hâwec mongeņ injucne.
- 28 Hae toma-jeņicko beheç-jopame  
boze sâc rârec rârec waharâ fombiņ.
- 29 Andac-jeņicte jarewecte afecne mi nâmbiņ,  
nâku nâku gapec-jopawec.
- 30 Eme aņac-jeņic mi taraha,  
â qowi micjeņicko foha,
- 31 Anuture kimbenzi fahare-jarerâ,  
ņicfâc-jeņic tâpiri wânzâņ qâhâmoc-jopawec,  
Israe ñiczeņoņ qiçicne qâfiec-jopawec.
- 32 Eme jaņe sifu zuhuckerâ sâqocne bambiņ,  
mâsi-ticne mana suahuc e mi man-  
asiņkembî.
- 33 Irec mume zoaņ-jeņic nokafe injucne hesack-  
ewec,  
â jara-jeņic zâic fâro maņko bazumbiņ.
- 34 Jopame sâc e wâsickembî,  
ehuc maņ bârisierâ Anutu wira basac ecnem-  
biņ.
- 35 Jaņe Anutuzi qânâ sanaņ-jeņic domawec,  
â Femicne sâko Anutuzi fifirue-jeņic juwec,  
irec mocwâc manasumbî.
- 36 Erâ michipic-jeņiczi âkeac ecnehuc  
nameņ-jeņiczi burecdâņ âzâcnembî.
- 37 Manjeņiczi ine erao sanaņne mi qohotawec,  
â zâzâfic-ticne mi basanaņkembî.

- 38 Eki ine busâqoc mana-jarehuc kinjenic behewec,  
ehuc mi bâsirowec-jopawec.  
E dameņ sâc kimbeņ-ticne bâuruņkewec,  
â aaric-ticne manacneme mi zâseņ-jopawec.
- 39 Jaņe mâreņņic sawa jumbiņ irec manasuweg,  
nokafe injucne, rarâ mi ririsiene.
- 40 Opopo, jaņe dameņne dameņne mâreņ sawao  
pepecne ecnembij,  
â mâreņ tuhuo buzâic bâfuacnembij.
- 41 Jaņe e esâickerâ esâicke ecnehuc jumbiņ,  
ehuc Israere Tiri juju maņbâiņ ecnembij.
- 42 Jaņe tâpiri sanaņ-ticnere mi manasuhuc  
jumbiņ,  
â râsiraonec batarac-jopawec irec nikec-  
jopawec.
- 43 E Aigita mâreņko fuņne-ticne bataniņkewec,  
â Zoan wâneņko mâsi-ticne bâfuawec.
- 44 E opâne opâne bătikie-jareme soc ewec,  
eme nâniņte quņke sâqorembij.
- 45 E nusuc neņgec râe-jareme kicjopambij,  
â qaqec bâfua-jareme imac-jopambij.
- 46 E mâriri-jeņic qokic biņe qajarewec,  
â gie-jeņicte fârine qirikiņ qikiņne-jarewec.
- 47 E waiņ gie-jeņic hoe sanaņzi qanzaņnewec,  
â jâchândâņ-jeņic aisizi sipirickewec.
- 48 E lama bulimakao gurufâc-jeņic  
huc repicne bâfua-jareme hâmo miziec em-  
biņ.
- 49 E kimbeņ-ticnere zocbâruņ tuņke-jarewec,  
aaric, mamana sâqoc, â bâbâzâic,

- â sisipiricte anelo guruhec.  
 50 E ima qaqa-ticne aka mi hecnehuc,  
 â juju-jeñic hâmoc mi sakarecnehuc  
 huc sâqocnere micko râec-jopawec.  
 51 E Aigita ñic mârâc ñokâ-jeñic,  
 Hamte qâricfâc tâpiri-jeñicte hozine,  
 i hae sâc qâhâmoc-jopa-fârewec.  
 52 Erâ ñicfâcne bânie-jareme faharembiñ,  
 eme tuhuo lama guru inucne jowac-jopawec.  
 53 Aimuñ hone mainñ ejareme hâwicmâc jumbiñ,  
 râsifâc-jeñic ine hâweczi qâuruc-jopawec.  
 54 Izi tiri mâreñ-ticnao bacjopa fisiwec,  
 mefâre-ticnezi tiki ruckewec ira hâcne.  
 55 Erâ mai-jeñicko qâpuc guru jâpec-joparâ  
 mâreñ-jeñic kâdoc qahuctecne  
 ñeñetac-jeñicko Israe guru râec-jopawec.  
 56 Jañe ine sifu Anutu Femicne sâko  
 esâickehuc pepec ecnembiñ,  
 â mumutaniñ dâncticne mi bâjâpembñ.  
 57 Jañe mimiñnefâc-jeñic jañere hata âtehuc  
 Anutu râpeckerâ bunao bambñ,  
 ehuc tepe neñgocne hehesicne inucne embñ.  
 58 Jañe tiki sâc alata bahuc mañbâiñ ecnembiñ,  
 â nemuqâñ bajupie bune heârñkewec.  
 59 Anutu e i manarâ mañnao aaric fusucmame  
 Israe guru beheç-jopa sanañkewec.  
 60 E Silo haeo ñeñe juju-ticne râpeckewec,  
 ñicñondenko qoruc boze fârecnekicne i be-  
 hewec.  
 61 E tâpiri-ticnere ma â eri-ticne  
 i qikiñneme râsi jañe rombiñ.  
 62 Ñicfâcne zikare micko râec-jopawec,

- â funfunfâcne kimbenj qajarewec.  
 63 Eme ñicmotecfâc-jeñic zoczi zacjopawec,  
 â naru ñokacfâc-jeñic ñic tâmiric jumbin.  
 64 Taha bapafâc-jeñic zikare nânâ embin,  
 eme hozecfâc-jeñic jañe ki soñgân mi embin.  
 65 Eme Wofun e gunkonec tinac mana qâqârewec,  
 momori moczi wainj nâhuc owackeekac inuç ewec.  
 66 Erâ râsifâcne hetapaic-jopame wisembin,  
 mimi tatara tâmiric bâfua-jarewec.  
 67 Josefere qâricfâc ine qikinj-jopawec,  
 â Eferaimte guru mi rowosâewec.  
 68 Irec okacne Juda guru sakarewec,  
 â Zionj tiki joroc-ticne hâcne.  
 69 Tirific-ticne tiki sananj inuçne heme ñewec,  
 mâreñ sâko ñeñe sananj hewec ñekac irec sâc.  
 70 Erâ kinanj motec-ticne Dawidi  
 e bâwosâerâ lama sapaonec rowec.  
 71 E lama neñgoc motec hone mainj ejarewec,  
 irec okacne Jakobo kikefunj guru soñañ-  
 jopaocte,  
 â Israe funfunfâcne hone kitanj ejareocte,  
 Wofunzi rowosâewec hâcne.  
 72 Eme eki aimunj hone mainj ejarewec,  
 â mepapac jaha jowa qatanj ejarewec.

## 79

### *Jerusalem imackekicne irec busâqoc gae*

- 1 O Anutu, qâpuc jañe haemañgao razimbin,  
 tiri ufunjgao wâwânânj bâfuambin,  
 Jerusalem hae ima bambin.



- 2 Janë kinanņicfâcge fâri ombân-jenĳic  
 sawa wipe janĳere micko râembiņ,  
 tiri ųicfâcge biuc-jenĳic kâte qowi jarembiņ.
- 3 Erâ socjenĳic Jerusalem hae rârec  
 opâ inucne hesiepie rawec;  
 mozi moc ducjopazac!
- 4 Bembenĳko juranĳopienĳ janĳe mecpiroc  
 enâreenĳopienĳ;  
 ųic rârec rârec juranĳopienĳ janĳe  
 mu ruruc enârehuc gâwie-nâreenĳopienĳ.
- 5 O Wofuņ, go kimbenĳ qanâreku mo damenĳko  
 behecmu?  
 Aaricgezi zoc inucne bâruņkeku mo damenĳko  
 qazueocmu?
- 6 Kimbenĳge qâpuc kâuc bacĳunĳopienĳ janĳere faio  
 honĳkec,  
 ųicguru zâņege mi wâsickeenĳopienĳ janĳerao.
- 7 Janĳe hâcne Jakobo ki qâsuc ecnembĳiņ,  
 â hae mârenĳ-ticne imackembĳiņ.
- 8 Mimiņnefâc-nâņec janĳere kinĳte mi mana  
 gâpâre-nârec,  
 buurucgezi biac ware bâfuac-nâpooc;  
 nâņe mâretec docke betanĳ engopenenĳ.
- 9 Go zâņe biņegere erâ bafic-nâpoc,  
 o bâbâpianĳ Anutu-nâņec!  
 Zâņegere erâ batarac-nâpohuc  
 sâqocne-nâņec bâtâmirec.
- 10 Qâpuc janĳe wemocte muniņmu, “Anutu-jenĳic  
 weni?”  
 Kinanņicfâcge socjenĳic honĳkekiecne irec kinĳ  
 qâpuc janĳerao bataratec honenzepenenĳ.

- 11 Niŋgiŋ- jopakicne jaŋere wâwâsiczi  
bâfuacguzejec,  
â hâmoniŋte biŋe qacjopakicne  
jaŋe mesanaŋgezi firuec-jopatec junzepiŋ.
- 12 Râpec-nâpohuc juŋgopiŋzi, Wofuŋ, go mu ru-  
ruc egarembiŋ,  
irec furine arec 7 jaretec sahaç-jeŋicko feze-  
jec.
- 13 Â ŋicfâcge nâŋe, lama guru soŋaŋ-nâpoekic  
hâcne,  
ine daŋge gazahuc junzepeneŋ raŋqa raŋqa;  
â qâricfâc-nâŋec gaŋne gaŋne fua raniŋmu,  
jaŋe zâŋe biŋege mutaniŋke-jarehuc  
junzepeneŋ.

## 80

*Wofuŋ e waiŋ qizec- ticne Israe kikefuŋ  
heqârezejec*

- 1 Israere lama soŋaŋ, hazec râec!  
Josefe guru lama iŋucne soŋaŋ-jopaekic,  
â kerubim jaŋere faicnao ŋeekic, go fua  
tâcnec!
- 2 Eferaim â Benjamin ŋ Manase jaŋere maio  
hâbige hetec hume ware bafic-nâpoc.
- 3 Anutu Tâpiri Quŋqasaŋ Wofuŋ, go  
heqârec-nâpoc;  
zâŋe maigezi tamaeme bian-nâpozejec.
- 4 O Wofuŋ, Anutu Tâpiri Quŋqasaŋ Wofuŋ,  
gurufâcge jaŋe numu-gare-bipiehapie  
kimbeŋ qajareku mo damenjo behecmu?

- 5 Goki mutec zâneuc-jeniczî nânâ-jeniczî ruacneha  
nâeᅅgopieᅅ,  
zâneuczi nânâ opâ-jeniczî eekac.
- 6 Goki mutec ᅅicne ᅅicne rârec-nâpohuc  
juenᅅgopieᅅ  
jaᅅe nifepupu enâreenᅅgopieᅅ,  
râsifâc-nâᅅec jaᅅe mu gâgâwi enâreenᅅgopieᅅ.
- 7 Anutu Tâpiri Qunᅅqasaᅅ Wofuᅅ, go  
heᅅârec-nâpoc;  
zâᅅe maigezi tamaeme biaᅅ-nâpozejec.
- 8 Go Aigita mâreᅅkonec waiᅅ qizec unuckemeᅅ,  
erâ qâpuc guru jâpec-jopaᅅuc saramenᅅ;
- 9 go mâreᅅ bâburockecnemeᅅ,  
eme gâtâ barâ mâreᅅ bârârâᅅnewec.
- 10 Tieᅅnezi tikine tikine mumuc qajarewec,  
â qaᅅeᅅnezi jâmâzâc sâko sâockewec;
- 11 tieᅅne sicneme ᅅifec raku hâwec\* bâfuawec,  
â ᅅifec raku Eufрата opâ sâkoo fisiwec.
- 12 Eme wemocte qânâsac-ticne hetâtiemeᅅ,  
eme sicne fotâc eeᅅgopieᅅ jaᅅe  
fârine batara nâc eeᅅgopieᅅ?
- 13 Kâtebec ᅅicne jaᅅe gâtâne qâfieᅅgopieᅅ,  
â kâte qowi jaᅅe gupiᅅᅅne kitâcne nâc  
eeᅅgopieᅅ.
- 14 O Anutu Tâpiri Qunᅅqasaᅅ Wofuᅅ, mocwâc  
forisiec,  
sambâᅅkonec fitec wahame honec,  
ehuc waiᅅ qizec kecziᅅec moc mana mezac  
ec.
- 15 Go hâcne ukicne mefâregezi saramenᅅ,

---

\* **80:11:** Mâreᅅ ᅅoᅅondeᅅ hâwec irec mukicne.

- go hâcne nuucne jaun̄ketec fua sokac ewec.  
 16 Jañe zoczi rikembiñ erâ wâc hetâcnembiñ;  
 gore kimbeñ zâñezi bâsirowec-jopazejec.  
 17 Mefâregere ñic ine megezi bâsâockezemec,  
 ñicte qâric jaun̄kehañ soka-garewec e sabeck-  
 ezemec.  
 18 Eme nâñe mocwâc mi râpecgunzepeneñ;  
 juju qâri nârec, eme zâñege muafeckenañmu.  
 19 Anutu Tâpiri Qun̄qasañ Wofun̄, go  
 heqârec-nâpoc;  
 zâñe maigēzi tamaeme bian̄-nâpozejec.

## 81

### *Hombañ gae un̄dâñ-ticnehec*

- 1 Anutu tâpiri-nâñec e gae bafehuc hecneniñ,  
 Jakobore Anutu kiwaecneniñ.  
 2 Mumuteñ gae fun̄kehuc won̄gâñ qaniñ,  
 kulele marac fan̄fan̄ â gita fâzen̄iñ.  
 3 Mosa wahaocmuo qeñ dâñezejec,  
 erâ wâc hombañ-nâñecko, toñ heocmuo  
 mâmâc.  
 4 Israe kikefun̄ in̄uc mutâcnecnewec,  
 Jakobore Anutuzi mupañkewec.  
 5 Aigita mâreñ maickehuc faharewecko,  
 Josefe sâcmutâc in̄uc ecnewec.
- Dâñ moc hazec furu-nane manakopac:  
 6 “Qawegao tagi fowec i qatarapo,  
 megao sasac fowec i gowac ropo.  
 7 Zâicmañko wira-naretec baficgupo,  
 qun̄ parandañte haesoñko juhuc mana-  
 garepo,  
 Meriba opâo esâicgupo.

- 8 “Gurufâc-nane, manahapie uŋ ɲazape;  
 Israe guru, dâɲnane mananzapiŋ me!
- 9 Ɲoŋe nemu jabane moc mi bajunzepieŋ,  
 guru moc jaŋere nemu mi dapecnenzepieŋ.
- 10 Wofuŋ noni gore Anutu jukopac,  
 Aigita mârenkonec jowacgu warepo no  
 hâcne;  
 go micge aŋketec bâfuse-garepe.
- 11 “Ɲicfâc-nane jaŋe ine dâɲnanere hazec mi  
 râembiŋ;  
 Israe guru jaŋe micnane mi reŋkembiŋ.
- 12 Eme maŋsanaŋ-jeŋicte faio fehuc mana-jarepe,  
 jaŋacne mamana biri bâjâpemiŋ.
- 13 Jâi, ɲicfâc-nane jaŋe hazec râe-narenzapiŋ!  
 Israe guru jaŋe nore hata âtenzapiŋ me!
- 14 Eme noni râsifâc-jeŋic biac bawahac-jopazapo,  
 â menanezi kisâfâc-jeŋic imac-jopazac.
- 15 Eme Wofuŋte takic-jopaekac jaŋe e mezarec-  
 nenzapiŋ,  
 â zâic damen-jeŋiczi tatarane mi ezac.
- 16 Ɲoŋe ine waizen uucne aŋac baŋacne  
 kâdoc qaŋarezapo,  
 â qânâonec baŋac gumeqiŋ-ɲopazapo.”

## 82

*Nemu fuŋne-jeŋic murituhuc mutarac-jopa-  
 kicne*

- 1 Anutu e nemu tutumaŋko domakac,  
 nemu jaŋerao mumutara gie bakac.
- 2 “Ɲoŋe dâɲ muhasickehuc mumu,

- â ñic sindaņne jaņerao rorowecke, i wez-  
imucko beheniņmu?
- <sup>3</sup> Ñic qerone â bekâne jaņere dâņ dopeckenij,  
qarâ suriņne â hapetac sacfozic ejareniņ.
- <sup>4</sup> Ñic dodocne â tac qararacne sabec-jopahuc  
ñic sindaņne jaņere meonec batarac-  
jopaniņ!”
- <sup>5</sup> Jaņe ine wiac kâuc bahuc moc mi mana  
taraņgopien,  
dapâcko qicquc qahuc juņgopien;  
eme mâreņ ñesiņne ñeņgoroņke-fârekac.
- <sup>6</sup> Noni mupo, ñoņe nemu juņgopien,  
Femicne sâko ere motecfâc sasawa;
- <sup>7</sup> eme sifu ñic iņucne hâmonzepien,  
ñicbomboņ rândiņkeeņgopien irec sâc  
enzepien.
- <sup>8</sup> O Anutu, go faharerâ mâreņko mumutara gie  
bac,  
ñic gurune gurune jaņe gore sasawa.

## 83

### *Israe râsifâcne roroc eņgopien*

- <sup>1</sup> O Anutu, go mi fâsâec,  
Anutu, go niniņkerâ dâņemâc mi juc.
- <sup>2</sup> Honec me, râsifâcge ojowa qaņgopien,  
qaisocgueneņgopien jaņe pepec eņgopien.
- <sup>3</sup> Jaņe ñicfâcge doc bacjopaniņte dâņ  
birickenęopien,  
sabec-jopaekic jaņe wiac ejareniņte meo ro-  
roc eņgopien.
- <sup>4</sup> Muņgopien, “Ajoc, ñicguru i omaec-jopanaņ,

- eme Israe zâņe somarezejec.”
- <sup>5</sup> Jâmbomac, jaņe muc manac eku maņ mocjaha embiņ,  
go râsi egarehuc zâzâfic sanaņ engopieņ;
- <sup>6</sup> Edom ņicguru â Isimaere qâricfâc,  
Moabi ņicguru â Hagiri kikefun;
- <sup>7</sup> Gebale â Amonj â Amaleke ņic,  
Filisa mâreņ â Tiro hae rune;
- <sup>8</sup> eme Asiriazia jaņerao wâc zuhuckekac,  
eki hâcne Lotire qâricfâc neņgoc ņesieņ  
ejarekac.
- <sup>9</sup> Go mârâc Midiaņ wiac ecnemeņ ijaha ejareze-  
mec,  
erâ Sisera â Jabiņ Kisonj opâo ejactemeņ iņuc;
- <sup>10</sup> jaņe Eņdoro hae ņifecnao bâsirowec-jopatec,  
sahac biuc-jeņiczi mâreņ irec guec ewec.
- <sup>11</sup> ņicbomboņ- jeņic Orebe Zebe jahe iņucne  
enzepieņ,  
â micnefâc-jeņic ine Zeba Zalimuna jahere  
sâc.
- <sup>12</sup> Jaņe hâcne mumbiņ, “Anuture gie hata  
sakarepene nâņâcne ezejec.”
- <sup>13</sup> O Anutu-nane, goki mutec rehac hâmocne  
me padi jawa mâņâņzi ficne sueekac iņuc  
enzepieņ.
- <sup>14</sup> Zoczi jâckâte zâsenkeekac,  
â zocbâruiņzi sopâc tiki bârârâņneekac,
- <sup>15</sup> irec sâc bâbâricgezi jâpec-jopazezejec,  
â mâņâņgezi bipic tatara bâfua-jarezejec.
- <sup>16</sup> Mimizi zâņe mai-jeņic bâsonkeme,  
Wofun, gore zâņe wâsickenzepieņ.
- <sup>17</sup> Mimizi fai-jeņicko ferâ fohuc juzejec,

erâ necjopakume omaenzepien.

- <sup>18</sup> 3iņuc mananzepien: Wofuņ zâņe bajukomec,  
goki mocjaha mârențe faio Femicne sâko  
juekic.

## 84

### *Wofuņ fic hae-ticnere zeri bubian*

- <sup>1</sup> O Anutu Tâpiri Qunqasan Wofuņ,  
gore fic hae i anac banacne jâmbân.
- <sup>2</sup> Maņ qâqâtâc-nanezi Wofuņ gore hae zonare  
ecneekac,  
erâ irec hâmhuc juekac.  
Bunanezi â mesahac-nanezi Anutu jujune  
go zeri egarehuc gae hegareekac.
- <sup>3</sup> Qendeczi ficticne bâfuakac,  
sawa hehetâczi hândân motec eocte jawa-  
ticne hekac,  
i gore alatao hâcne, Anutu Tâpiri Qunqasan Wo-  
fuņ,  
Wofuņ Sâko-nane â Anutu-nane.
- <sup>4</sup> Ficgao juhuc mumuten gae hati hega-  
reengopien,  
janere manape zerine ekac.
- <sup>5</sup> Nici Zion hata mana maņ ehuc  
goraonec tâpiri bâfuaengopien,  
janere manape zerine ekac.
- <sup>6</sup> Janē zâņeuc wânen fotâcnepie,  
opâ zâņe fua raekac,  
â furic hoezi bâgunuckeekac.
- <sup>7</sup> Rahuc tâpiri qâricnezi qâricne bâfuaengopien,  
eku Zionko Anutu gohec bâbâfuac eengopien.



- 8 O Wofuŋ, Anutu Tâpiri Qunqasaŋ Wofuŋ,  
go nunumu-nane maŋac,  
Jakobore Anutu, go hazec râec.
- 9 O Anutu, go maro-nâŋec jukomeczi fitec wareoc,  
wokemaŋ ruacnekicnege zâŋe mai- ticne  
honec.
- 10 Gore hae zoŋao zoaŋ mocjaha juju izi fekac,  
hae gâcnao zoaŋ wâŋ tausen jujuzi ine wa-  
hakac;  
Anutu-nanere ficte motâc soŋaŋ dodoma,  
irec manape aŋacne eha,  
ŋic sindaŋne jaŋere ficko jujure takicnukac.
- 11 Wofuŋ Anutu e zoaŋ â maro hâcne,  
e aki anonoc â zâŋe biŋe tahac-nâpoekac.  
Wofuŋ e siocmâc juenŋopieŋ ŋic inucne jaŋe  
wiac bianne moc mi sakare-jareekac.
- 12 O Anutu Tâpiri Qunqasaŋ Wofuŋ,  
ŋic gorao roweckeekac ere manape zerine  
ekac.

## 85

### *Israe kikefuŋ e fific guguriŋko juhuc numuwec*

- 1 Wofuŋ, go mâreŋge aki anonoc ecnemeŋ,  
go Jakobo wiac ŋemâcne fuacnewec i  
hetikiecnemeŋ.
- 2 Go ŋicfâcge hehesic-jeŋicte kiŋ behe-jaremeŋ,  
â sâqocne-jeŋic bâtâmire-jare-fâremeŋ.
- 3 Go kimbeŋge bâuruŋke-fâremeŋ,  
â aaricgere zocbâruŋ bâhâpomeŋ.
- 4 O bâbâpiaŋ- nâŋecte Anutu, mocwâc  
heqârec-nâpoc,  
â mamana sâqoc baju-nâreeki i behec.

- 5 Go mamana sâqoc tatara tâmiric enârehuc jucmu  
me?  
Â aaricge mimiņzi qâric foraocte mukic me?
- 6 Go mocwâc mi heqârec-nâpotec,  
ņicfâcge bubiaņ mana-garenzapiņ me?
- 7 O Wofuņ, go aki anonocge nâwotuc,  
â bâbâpiaņge tahac-nâpoc.
- 8 Wofuņ Anutuzi dâņ muzo ekac i manape,  
e jâmbomac gurufâcne wamadâņ jazazo ekac,  
mitiņicfâc-ticne hâcne;  
mâc mutuc hatao mi risienzepieņ.
- 9 Jâmbomac, e araņ bacneengopieņ jaņe  
bâbâpiaņzi maic-jopakac,  
eme mâreņ-nâņecko eri tatamac fofezejec.
- 10 Buuruc â siocmâc jahe bâbâfuac enicmu,  
tiņne juju â wama jahe mumuduc enicmu.
- 11 Siocmâczi mâreņkonec âkezurâ feocmu,  
tiņne jujuzi sambâņkonec fime wahaocmu.
- 12 Eme Wofuņzi wâc jambuņ tahac-nâpooocmu,  
â mâreņ-nâņeczi mâriri-ticne bâfuaocmu.
- 13 Tiņne jujuzi bâniecneocmu,  
â kike hata-ticne soņaņkeocmu.

## 86

### *Mitiņic moc e zârâ fuacneme numuwec*

- 1 O Wofuņ, go hazec râerâ dâņnane manac,  
no waha qaqane â hapetac.
- 2 No mitihec jukopacte juju-nane soņaņkec,  
kiņaņņicge no gorao roweckekopacte bafic-  
nuc.
- 3 Go Anutu-nanezi aki anonoc enarec;

- o Wofuŋ, no 3oaŋ 3ora wira-garehuc jukopac.
- <sup>4</sup> Kiŋaŋŋicge no bunane bâmiriŋkec,  
maŋnane, Wofuŋ, gorao sâsepe hefakac.
- <sup>5</sup> O Wofuŋ, go buuruc ehuc kiŋ bebehere afeckee-  
kic,  
â wira-gareŋgopieŋ jaŋe aki anonoc boc  
ejareekic.
- <sup>6</sup> O Wofuŋ, go nunumu-nanere hazec râec,  
wira wâwâsic egarekopac i manac.
- <sup>7</sup> Zârâ hâriŋ fua-nareme sâc wâsicguekopac,  
goki hâcne micnaneo roekic.
- <sup>8</sup> O Wofuŋ, nemu jaŋeraonec moczi gore sâc mi  
jukac,  
erâ wâc gie goki bameŋ iŋucne moc mi ba-  
kicne.
- <sup>9</sup> Qâpuç guru bâfuac-jopameŋ jaŋe fisirâ,  
Wofuŋ, gore maio dapeŋiŋmu,  
ehuc gore zâŋe muafeckenŋmu.
- <sup>10</sup> Go hâcne kâcçene jukiczi mâsi baekic,  
go mocjahazi Anutu jukomec.
- <sup>11</sup> O Wofuŋ, go hatage qazu-narec,  
eme dânfârîgere maŋnao juzepac;  
maŋnane qâzucketec zâŋege araŋ  
bacnezepac.
- <sup>12</sup> Wofuŋ Anutu-nane, no maŋ hâcbuc jaha,  
go mutenŋupe,  
erâ zâŋege muafeckehuc juzepac raŋqa  
raŋqa.
- <sup>13</sup> Go aki anonoc fekiecne enarehuc juekic hâcne;  
go juju-nane hâmoc haere zâkâŋkonec bae-  
fumeŋ.

- 14 O Anutu, ñic zaubacnezi imacnuniñte faharem-  
bien; ñic masu wânzânheczi roroc embien,  
juju-nane hetâcnezo muñgopien;  
erâ jañe gorao zânje mi fiñgopien.
- 15 Wofuñ, go ine Anutu mañuruc â aki anonocge-  
hec,  
kimbenje unenje, â mañgao aki anonoc  
â jauñ fâri fusucmawec fokac.
- 16 Noraopec fotikierâ nore buge sâqoreoc;  
kiñaññicge no tâpiri henaretec huoc,  
â kiñañ narugere ñokâ no baficnuc.
- 17 No âgo enarekic irec fuñne bataniñkec;  
eme qaisocnuñgopien jañe ziuñuc  
honenzeñje:  
Wofuñ, go baficnuhuc bâmiriññukomec;  
iñuc honerâ mimienzeñje.

## 87

### *Zion e ñicne ñicne jañere mame sâko hae bian*

- 1 Anutuzi hae wâtunje wickeme huwec,  
i tiri tikio ñekac.
- 2 Wofuñ e Zion sacmotâc-ticnere añac-ticne fokac,  
i Jakobore ñenje hae siricke-fârekac.
- 3 O Anuture hae qizec,  
gore binañ baenñgopien i qen bipinehec.
- 4 Manacnuñgopien i gâcne mucjopape: Aigita â  
Babe;  
erâ wâc Filisa mâren â Tiro â Etiopia.  
Jañe muenñgopien, “Ñic keczi e ira fuawec.”
- 5 Zionte ine ziuñuc mumune:

“Nïcne ñicne ira fuambiñ,”  
 â Femicne sâkozi hume keten ecnekac.

<sup>6</sup> Wofunzi ñicguru qâren-jopahuc zïñuc râeekac:  
 “Nïc keczi e ira fuawec.”

<sup>7</sup> Eme jaje gae wohuc zïñuc heenÿopien:  
 “Bâbâpian-nane i gorao fofârekac.”

## 88

### *Nïc moc hucsâko fohuc mu huacbus ewec*

<sup>1</sup> O Wofun, Anutu- nane, no zoanÿko  
 wâsicguekopac,  
 â ñafeo gore maio owackehuc foekopac.

<sup>2</sup> Nunumu-nanezi fâ bâfuacguzejec,  
 ki owa-nanere hazec râezemec!

<sup>3</sup> Mañ qâqâtâc-nanezi zâic manaku gapeckekac,  
 â juju-nanezi hâmoc hae bâqinÿkekac.

<sup>4</sup> Nïczi nore manapie nombânÿko hukopac ekac,  
 jujure tâpiri-nanezi hesackekac.

<sup>5</sup> Qânqânne jañere ñondenÿko fokopac tinac ekac,  
 qâhâmoc-jopakicne zânÿerunÿko foenÿopien  
 inÿucne tinac;

erâ megaonec batarac-jopakicne,  
 eme mocwâc mi manasuc- jopaekic jaje  
 inÿucne.

<sup>6</sup> Go biac mârenmañko tunÿnutec hukopac,  
 nombânÿ zorao, duñdapâc mañko.

<sup>7</sup> Kimbenÿgezi mâretec ñemacnukac,  
 â sirigezi qâurucnu-fârekac.

<sup>8</sup> Go âgofâc-nane ejaretec bâec banarenÿopien,  
 jaje nore manapie wiac hâhâwicne ekac;  
 motâc henarekicnere qinÿqunÿkehuc fokopac.

- 9 Zâic busâqoczi enarekume zâŋe-nane sisifucne ekac;  
no zoaŋ sâc, Wofuŋ, go wâsicguhuc foekopac,  
me jahec-nane goraopec sicnehuc juekopac.
- 10 Go hâmokicne jaŋerao mâsi moc baekic me?  
Qâqâtâc-jeniczî faharerâ mutenŋuenŋopien  
me?
- 11 Zâŋeruŋko aki anonoc moc mutaniŋkeenŋopien  
me?  
Me hâmoc haeo jaun fârige moc musokazo?
- 12 Dapâcmaŋko mâsigere fuŋne manaenŋopien  
me?  
Â ninikec mârenŋko bâbâpianŋe fua tâcnerâ  
foekac?
- 13 No ine, Wofuŋ, go wira wâwâsic egareekopac,  
uupictea nunumu-nanezi fâ bâfuacguekac.
- 14 O Wofuŋ, go wemocte suŋgiŋnuekic?  
go wemocte zâŋe maige bâsoŋke-nareekic?
- 15 No qieonecteaŋ huc zâichec juhuc hâmoc  
bâqiŋke jupac,  
enaretec bipic tatara juwefuku maŋnane  
omaekac.
- 16 Kimbenŋere zocbârui zi norao fisi fotâcnewec,  
goraonec wiac hâhâwicnezi imacnuwec;
- 17 zoaŋ zora opâ rumi iŋucnezi bârârecnuwec,  
eku qâurucnuwec.
- 18 Âgo qomafâc-nane ejaretec dic banarenŋopien,  
ehame duŋdapâczi ju qâtec enarekac.

## 89

*Dawidi dâŋ mupaŋkecnekicne fârîne weni?*

- 1 O Wofuŋ, no aki anonocgere

- mumumbianḡ gae hati hehuc juzepac;  
 micbipic-nanezi jaunḡ fârige musokape,  
 eme qâric fua raniḡmuzi manahuc junzepieḡ.
- <sup>2</sup> Aki anonocge dodoma sananḡ âkendâḡnemeḡ,  
 jaunḡ fârige i sambânḡ iḡucne fofu sananḡ  
 foomu.
- <sup>3</sup> Go mumeḡ, “ḡicnane bâwosâepo ehec zâzâfic  
 sananḡ epec,  
 ehuc kiḡanḡḡic-nane Dawidi ziḡuc âzâcnepo:
- <sup>4</sup> ‘No qâricfâcge jusananḡkeniḡte mu-  
 paḡke-garekopac,  
 â ḡicwofuḡ ḡeḡeḡe qâric gaḡne gaḡne  
 juḡeniḡmu,  
 jaḡerao ḡesananḡkerâ ḡehuc juzejec.’ ”
- <sup>5</sup> Sambânḡne sambânḡne jaḡe, Wofuḡ, gore mâsi  
 bapa mumbianḡkenzepieḡ,  
 tiriḡic jaḡere tutumanḡzi jaunḡ fârige muafeck-  
 ezejec.
- <sup>6</sup> Sambânḡko mo ḡic mo Wofuḡ gohec sâc hehene?  
 Sambânḡ aḡelo jaḡeraonec mozi Wofuḡ go  
 iḡucne jukac?
- <sup>7</sup> Anutu go hâcne aḡelo micne jaḡe aranḡ бага-  
 reenḡgopieḡ,  
 go rârec bârârec egareenḡgopieḡ,  
 jaḡe siric-jopahuc qeḡ bipinehec juekic.
- <sup>8</sup> O Anutu Tâpiri Qunḡqasaḡ Wofuḡ,  
 go erâ-eesananḡgezi rârecguha,  
 Wofuḡ, go iḡucnea mozi tâpiriheḡ jukac?
- <sup>9</sup> Goki hâwec qac momori-ticnere guriḡ baekic,  
 siri-ticne fahareha goki bâniniḡkeekic.
- <sup>10</sup> Go Aigita mâreḡ qânḡqânḡ iḡucne banzanḡnemeḡ,  
 râsifâcge tâpiri megezi qâtâtieḡ-jopameḡ.

- 11 Sambân i gore wiac, â mâreñ i gorea wâc;  
sambân mâreñ â mañnao wiac fokac i gokizia  
bâfuameñ.
- 12 Mâreñ faic â juwic i goki bâfuac-jofameñ;  
Taboro â Herimoñ jahe zeri ehuc zâñege  
mumbiankeekopirec.
- 13 Meombânge qac momori-ticnehec,  
mege sanañne, mefârege bâfeñnerâ domakic.
- 14 Tiñne juju â bâbâtiñ izi eri ñeñegere hobeteñ,  
aki anonoc â jauñ fâri jahe  
bânie-gareekopirec.
- 15 Hombañte ofac hehe manangopien jañere man-  
ape zerine ekac,  
Wofuñ, zâñe maigere tatamacko juñgopien  
jañere hâcne.
- 16 Jañe zâñegere erâ dameñ sâc kiwaeengopien,  
â tiñnege muafeckeengopien.
- 17 Go hâcne eri tatamac-jeñic â tâpiri-jeñic,  
aki anonocgere erâ tâpiri-nâñeczi fua  
tâcnekac.
- 18 Maro-nâñec i Wofuñzi rauckekac hâcne,  
â ñicwofuñ-nâñecte ru i Israere tiri Wofuñzi  
jukac.
- 19 Mârâc jaha mitiñicge mañko fuac ecnehuc  
ziñuc âzâcnemeñ:  
“No ñicsanañ moc qizecnao eri hendiñ hec-  
nepo,  
ñicguru jañeraonec moc bâwosâerâ fekicne  
âkendâñnepo.
- 20 No kiñaññic-nane Dawidi hâcne bâfuapo,  
erâ tiri wokemañ-nane ruacnepo.



- 21 Menanezi hati jowa qataŋ ecnezejec,  
meombâŋ-nanezi tâpiri hecneme huzejec.
- 22 Râsi moczi e eatuckehuc doc mi bazejec,  
ŋic sindaŋne moczi e mi bawahazejec.
- 23 Kisâfâcne mai-ticnao qanzaŋ-jopapemu,  
â e qaisockeniyŋmu jaŋe qâfiec-jopapemu.
- 24 Jauŋ fâri-nane â aki anonoc-nane jahe e  
qâtehuc juzepirec,  
â nore zâŋeo tâpiri-ticnezi faharerâ domaze-  
jec.
- 25 Noni hâwec meticnere rurumaŋko râepemu,  
â opâ sâko\* râcnepe mefâre-ticnezi  
soŋaŋkezejec.
- 26 Eki ziŋuc nazaocmu: ‘Go mamac-nane,  
Anutu-nane, â bâbâpiaŋ-nanere qânâ sanaŋ.’
- 27 Â noni e mârâc fufua âkendâŋnepemu,  
mâreŋ ŋicwofuŋ jaŋere micne.
- 28 Aki anonoc-nanezi e basanaŋkehuc jowa ju-  
pemu,  
â zâzâfic-nane i paŋnea focnehuc juocmu.
- 29 Motec ŋosa birifâc-ticne tofamâc forahuc juze-  
jec,  
â ŋicwofuŋ ŋeŋe-ticne keteŋkepe sambâŋte  
sâc ezejec.
- 30 “Qâricfâcne jaŋe sâcmutâc dâŋnane behehuc  
mumutâc dâŋnane mi bâjâpeniyŋmuo,  
31 erâ wâc dâŋsanaŋ-nane qambarâŋkehuc  
mumupaŋ-nane qâsuaniŋmuo ine  
32 noni bahac-jenjicte erâ kâcbinzi bâtiŋ-jopa-  
pemu,

---

\* 89:25: Eufрата opâ sâkore mukicne.

- â hehesic-jeŋicte erâ bâzâic-jopapemu.
- 33 E ine aki anonoc-nane mi jâoc ropemu,  
me jaunj fâri-nane mi omaecnepemu.
- 34 No zâzâfic-nane mi bânġoronġkepemu,  
â micnaneonec dâŋ wahawec i mi  
hetikiepemu.
- 35 No tiri juju-naneo qetickehuc mumupaŋ sanaŋ  
mupaŋkepo:  
‘No Dawidi burec moc mi ecnepemu;
- 36 ere qâric biri tofamâc jurahuc junzepieŋ,  
â ŋicwofuŋ ŋeŋe-ticne mai-naneo zoaŋ do-  
makac ere sâc ezejec.
- 37 Mosa râekicne irec sâc ŋehuc juzejec,  
sambânġ foomu sâc ŋesanaŋkezejec.’ ”
- 38 Eme zi ine sifu behemeŋ â sunġiŋkemeŋ,  
wokemaŋ ruacnemeŋ ere erâ kimbenzi  
maŋge fusekac.
- 39 Kiŋaŋŋicgehec zâzâfic epic i hetâtiemeŋ,  
eri hendiŋ- ticne mâreŋko behetec waha  
gâpârewec.
- 40 Go qânâsac-ticne qâropie-fâremeŋ,  
hae sanaŋ-ticne hetâtiemeŋ.
- 41 sicne fotâc eenġopieŋ sasawa  
jaŋe wiac-ticne fiuckeenġopieŋ,  
digurafâcne jaŋe mu ruruc ecneenġopieŋ.
- 42 Râsifâcne mana-jaretec sanaŋkecnembiŋ,  
kisâfâcne mana-jaretec zeri bari embiŋ.
- 43 Jei, sâqe-ticne masune bahasickemeŋ,  
ehuc zikamaŋko dope hutuŋ mi ecnemeŋ.
- 44 Meticnaonec ŋicwofuŋ gunu-ticne bataramenġ,

eri ñeñe-ticne hetuñketec mâreñko qawec  
fokac.

- 45 Qacfiric jujure dameñ-ticne hetâcnehuc  
fai-ticnao mimi busâqoc râemeñ.
- 46 O Wofuñ, go soñkepañkehuc juku mo dameñko  
fuacmu?  
Kimbeñgere      zocbâruñzi      wezimucko  
qazueocmu?
- 47 O Wofuñ, juju dameñ-nâñec bemeñne fokac i  
manac me,  
ñicte      qâric      sasawa      sisirowene  
bâfuac-nâpomeñ irec manasuc.
- 48 Mozi moc jufehuc juku hâmoc geñkecneocmu?  
Mozi juju-ticne hâmoc haere tâpirire sâcne  
ñezickeocmu?
- 49 O Wofuñ, go mârâc jaha aki anonocge  
Dawidi siocmâc mupañkecnemeñ i fârine  
weni?
- 50 O Wofuñ, kiñaññicge nifepupu enareñgopieñ  
irec manasuc me!  
Ñicne ñicne jañere mumusorieñ dâñ  
mañnaneo bajukopac.
- 51 O Wofuñ, dâñ izi hâcne mimi qaqa  
enâreñgopieñ,  
ehuc wokemañ ruacnemeñ e hata jume sâc  
mimi bâfuacneñgopieñ.
- 52 Wofuñ muteñkehuc juzo rañqa rañqa.  
Jâmbomac jâmbâñ.

## DÂKÂNE NAMBA 4

## 90

*Anutu juju sanan̄zi ɲic sisirowene nâɲâcne huec ekac*

- <sup>1</sup> Wofuɲ, goki dameɲne dameɲ sâc  
huec sanan̄ enâre warehuc jumeɲ.
- <sup>2</sup> Tiki jaɲe huhuckerâ mi fehapie,  
â sambân̄ maren̄ mi bâfuac-jofahuc  
goki Anutu jumeɲzi jurâ jurazizokic.
- <sup>3</sup> Goki mutec ɲic jaɲe rufeo risie raengopien̄,  
eha wâc muekic, “Nɔɲe harierâ waren̄iɲ.”
- <sup>4</sup> Jara wân̄ tausen̄ i gore maio  
jac zoan̄ tarajec irec sâc eekac,  
me ɲafe dâkâne sawa irec sâc.
- <sup>5</sup> Go ɲic ofan̄-jopatec raengopien̄;  
juju-jeɲic i guɲ manaengopenen̄ inucne,  
me furicte hofâ qinziɲ wefuekac inucne  
tinac.
- <sup>6</sup> Hofâ qinziɲ e furicte qârerâ han̄ baekac,  
hae owâeme qaɲarâ ururuckeekac.
- <sup>7</sup> Gore kimben̄zi hâcne zâtâmirec-nâpoekac,  
aaricgezi hecnâpokume siroweengopenen̄.
- <sup>8</sup> Go sâqocne-nâɲec zâɲe maigao birickemen̄,  
wiac soɲsoɲko emben̄ i tatamacko fua-ga-  
reekac.
- <sup>9</sup> Jei, zoan̄ gie bapa-nâɲec kimbengere erâ  
beraɲnea wise tâmireengopien̄;  
jara-nâɲec i an̄ baengopenen̄  
irec sâc tinac jutaraengopenen̄.
- <sup>10</sup> Juju-nâɲecte dameɲ i jara 70 eekac,  
â riɲkoa sawa 80 bâfuaekac;  
maɲnao wiac fuaekac i nenen̄ â zâic,  
erâ biac qosackeme ratâmireengopenen̄.

- 11 Mozi aaricgere tâpiri wânzân mana wosâeekac,  
â arañ bagarehuc kimbenjere manasuekac?
- 12 Irec zoañ gie bapa-nâñecte sâc  
qazu-nâretec mañqârâñhec enzepeneñ.
- 13 O Wofuñ, risie- nârec; zâic wezimucko  
taraocmu?  
Kiñañ qaçafâcge nâñere buge sâqoreoc me.
- 14 Furictea aki anonocgezi bâgunuc-nâpoc,  
eme juju damen-nâñec sâc  
zeri ehuc bubian mananzepeneñ.
- 15 Bâzâic-nâpo warehuc jumen, zoañ gie bapa  
irec sâc jaha bubian qanârehuc juzemec;  
â zârâ zâpâ honehuc jukicne jara irec sâc.
- 16 Gie baekic i kiñaññicfâcge fua  
taniñke-jarezejec,  
â qâricfâc-jenñic jañe eri tatamacge  
honenzepeneñ.
- 17 Wofuñ Anutu-nâñecte aki anonoczi fai-nâñecko  
wahazejec,  
eme menâñecte gie goki jam-  
buñke-nârezemec,  
jâmbomac, menâñecte gie jambuñkezemec.

## 91

### *Femicne ere mumucko juju*

- 1 Moc e Femicne sâkore sâsâocko juekac,  
â Bapafâre ere mumucko ñec foc eekac,
- 2 e Wofuñ zîñuc âzâcneocmu: “Qânâuñ-nane â  
huec-nane,  
Anutu-nane, no gorao roweckekopac.”
- 3 Eki wosañeñ bapare bitîñkonec bataracguocmu,

- â huc sâqocnezi rocguzacte ɲezicguocmu.
- 4 E suhuc-ticnezi bâsonguocmu,  
â fakec rurumaɲ-ticnao sâsâoc bâfuaocmu;  
jaun fâri-ticnezi maro maruku egarekac.
- 5 Go ɲafeo sisipiric wiacte mi hâwicguocmu,  
â zoaɲko tepe motec fisiekac irec mi meza-  
cguocmu.
- 6 ɲafere huc hâmocte mi gâgâmârâcmu,  
â zoaɲko ima fuaekac irec manabâc mi ecmu.
- 7 Gâjongao ɲic wâɲ tausen farazo murâ faraniɲ,  
mefâregao teɲ tausen hâmozo murâ  
hâmoniɲ,  
ehame sifu sisipiriczi go mi rocguocmu.
- 8 Go zâɲezi sawa firâ honehaɲtec,  
ɲic sindaɲne jaɲe okacne roninɲu.
- 9 Go Wofunzi huecge eocte bâwosâemeɲte,  
â Femicne sâkozi hae sananɲe eocte sakare-  
meɲte,
- 10 sisipiricte wiac moczi mi bâfuacguocmu,  
â zârâ zâpâ moczi ficbozege mi bâqinkeocmu.
- 11 E aɲelofâc-ticne mutâcne-jareme,  
hata jucmu sâc hone soɲaɲ egareniɲmu.
- 12 Jaɲe mefaio bahucgupie  
qânâzi kikege moc mi hezejec.
- 13 Go laioɲ faio â qotâ faio âtecmu,  
ehuc laioɲ motec â homa âtemac-jofacmu.
- 14 “E norao qohotakacte no e ɲezickepemu;  
e zâɲe-nane manakacte no e sâockepemu.
- 15 E wira-nareme no micnao ropemu,  
zârâ zâpâ fuacneme no e qâtepemu,

â sisipirickonec batarahuc zâņe biņe  
bâfuacnepemu.

16 No juju-ticne bâzoracnepe juku gapeckezejec,  
erâ bâbâpiaņ-nane jâutupe honezejec.”

## 92

*Anutu e tiņnere gie baekac irec mumutenj dân*

1 Wofuņ danģe ââzâcne i wiac furi sâko,  
Femicne sâko zâņege mumumbianģe i  
aņacne.

2 Furicte aki anonocģe mutaniņkezo,  
â ņafeo jaunģ fârige musokazo.

3 Ehuc gita mucne teņzi musi bahuc woņģâņ qazo,  
erâ wâc kulele fâze sarickehuc fâzezo.

4 O Wofuņ, go gie batec honerâ bunane  
bianģekac,  
megere qâreņ honehuc zeri gae heekopac.

5 O Wofuņ, go gie baekic i qeņ bipinehec,  
mamasuge i qame hukicne jâmbâņ!

6 ņic maņ tâmiriczi kâuc baekac,  
mutucnezi sâcne mi mana taraekac.

7 ņic sindaņne jaņe kecqaņ iņucne fua  
qârâņkehuc,

â sâqocne bapa jaņe fua biaņ eipiehuc  
sifu sisipiric sanaņte biņe eeņgopiņģ;

8 ehame, Wofuņ, go ine faic jusanaņkerâ jucmu.

9 Eme jei, Wofuņ, râsifâcģe jaņe siroweniņmu,  
â sâqocne bapa jaņe tâtie-fâreniņmu.

10 Go ine tâpiri-nane kâte bulimakaore iņucne  
râemeņ,  
goki wokemaņ qâricne rua-naremeņ.

- 11 Zâŋe-nanezi râsifâcne-nane waha jopame  
honec-jopakopac;  
â sâqocne bapa qaisocnuengopien  
jaŋe wiac hâhâwicne fua-jareme  
hazec-nanezi biŋene manakopac.
- 12 Tiŋne jaŋe hâmu jâcne iŋucne fua bian  
eenŋopien,  
Lebanonŋ tikire jâmâzâc iŋucne fua sokac  
eenŋopien.
- 13 Jaŋe Wofuŋte ficko sarac-jopakicnere  
Anutu-nâŋecte hae zonŋao fua bian  
eenŋopien.
- 14 Jaŋe ranŋanŋke-bipiehuc fâri bâfuaenŋopien,  
maŋopâ-jeŋic fofo sanaŋ â rehac-jeŋic qac-  
firichec.
- 15 Izi Wofuŋte siocmâc juju mutaniŋkeekac;  
e qânâ sanaŋ-nane, â hehesic moc erao mi  
fokac.

## 93

### *Anuture eri tatamac*

- 1 Wofuŋ e gurinŋ bapa; zai zonzonzi ŋaqi-ticne  
ekac.  
Wofuŋ e ŋaqi heme huwec, erâ tâpiri jo-  
mawec.  
E mârenŋ sâko mârenŋ keteŋkewec ŋekac;  
qirinŋ moc mi qaocmu.
- 2 Eri ŋeŋegere hobeteŋ esecne râekicne;  
go dameŋ tâmiricko juwaremeŋ.
- 3 O Wofuŋ, hâwec zâkânŋ jaŋe fânânŋkembinŋ,  
hâwec zâkânŋ jaŋe fânânŋ sâko embinŋ,



hâwec zâkân jaje fânân hâhâwicne sâko  
eņgopieņ.

- <sup>4</sup> Opâ sârore tâpiri sirickekac,  
hâwec sirire tâpiri sirickekac,  
Wofuņ faic jukac eki tâpiri wânzânheç ekac.
- <sup>5</sup> Goki dân musanaņkemeņ i fofo sanaņ;  
figere maqâreņ i tirimoc;  
o Wofuņ, wiac i tofamâc forazihuc juocmu.

## 94

*Anutu e kikefuņte râsifâc okacne jareoçte mi-  
tiņiczi numuwec*

- <sup>1</sup> O Wofuņ, okac babazu Anutu,  
okac babazu Anutu, go fua tâcnec!
- <sup>2</sup> Mâreņte mumutara go faharec,  
ņic maņfefe eebapa-jeņicte okacne jarec.
- <sup>3</sup> O Wofuņ, ñic sindaņne jaje kiwac qawac eku  
mo damenķo beheniņte mukic?
- <sup>4</sup> Jaje saħac fefe ehuc penaron eęņgopieņ,  
erâ pepecdân muęņgopieņ, sâqocne bapa  
jaje.
- <sup>5</sup> O Wofuņ, jaje gurufâcge ro waha âte eja-  
reęņgopieņ,  
â merâfâcge ba sipiric ejareęņgopieņ.
- <sup>6</sup> Jaje hozec erâ mafa fisikicne qa jâpec eja-  
reęņgopieņ,  
â bekâ ine qâhâmoc-jopaęņgopieņ.
- <sup>7</sup> Ehuc muęņgopieņ, “Wofuņ e mi honekac,  
Jakobore Anutu e mi manakac.”

- 8 Njic mañ tâmiric jâmbân ñoñe mana janjenkeniñ  
me!  
Mutucne ñoñe wezimucko mamanahec  
eniñmu?
- 9 Hazec râewec e dâñ mi manaekac me?  
Zâñe ba akic ewec e wiac mi honeekac me?
- 10 Njicguru bâtiñ-jopaekac e kâcbiñ mi bajukac  
me?  
Eki hâcne njic mamana qazu-jareekac i!
- 11 Wofuñ e njic mañ mamanasu-jenict e kâuc mi  
baekac,  
nokafer e sâc sawa engopien i hâcne man-  
akac.
- 12 Wofuñ, go njic moctao bâbâtiñ gie bacmu,  
me sâcmutâcge qazucnecmu, ere manape  
zerine ekac.
- 13 E hâcne zârâ hâriñ damen taracneme jujumana  
fuacneocmu,  
ehame njic sindañezi nombânko huocmu.
- 14 Wofuñ e gurufâcne mi sunjiñ-jopaocmu,  
â merâfâcfâcne mi beheç-jopaocmu.
- 15 Njic tiñe erao mumutiñ risieocmu hâcne,  
eme siocmâc sasawa jañe bâjâpeniñmu.
- 16 Mozi njic sindañe râsi ejarehuc no  
ñezicnuocmu?  
Mozi sâqocne bapa bâsuec-jopahuc sacfozic  
enareocmu?
- 17 Wofuñzi no mi baficnume muzac,  
qâqâtâc-nanezi biac niniñ siareren mârenko  
juzac.
- 18 “Kike-nanezi âte sowariekac” muhape,

- Wofuŋ, gore aki anonoczi âkesiŋnuwec.
- 19 Maŋnaneo memezac bocjaha fuame,  
gore bâbâmiriŋzi âke qârecnuekac.
- 20 Micne bapa sindaŋne jaŋe sâcne gohec zâzâfic  
eene me?  
Jaŋe hâcne mumupaŋ- jeŋiczi wiac  
bâsâqoreenŋopieŋ.
- 21 Jaŋe ŋic tiŋne ere juju sipirickeniŋte meo roroc  
eenŋopieŋ,  
erâ ŋic bahacmâc hâmocte biŋe qaŋŋopieŋ.
- 22 Wofuŋzi ine hae sanaŋ-nane ewec,  
â Anutu-nanezi qânâuŋ-nane ewec.
- 23 Eki hâcne hehesic-jeŋicte okacne bazu-jare-  
ocmu,  
â sindaŋ-jeŋicte erâ bâsirowec-jopaocmu;  
Wofuŋ Anutu-nâŋeczi bâsirowec-jopaocmu.

## 95

### *Mumuteŋ dâŋ â uŋdâŋ*

- 1 O warepie Wofuŋ gae hecnenanŋ,  
huc sanaŋ â bâbâpiaŋ-nâŋec  
zeri fânâŋ sâko ecnenanŋ.
- 2 Mai-ticnao fuahuc daŋge âzâcnenanŋ,  
mumumbiaŋ gae hecnehuc kiwaecnenanŋ.
- 3 Wofuŋ e hâcne Anutu sâko,  
erâ nemu sasawa jaŋere Femicne sâko.
- 4 Ere meo mâreŋ wâcne wâcne fokac,  
â tikine tikine i ere jaha.
- 5 Hâwec i wâc ere, eki hâcne bawec,  
â mâreŋ kereŋne i menezu ba akic ewec.
- 6 O warepie e sâsehuc dapecnenanŋ,  
Wofuŋ bâbâfua-nâŋec ere maio dieŋzi henanŋ.

- 7 E hâcne Anutu-nâhec, â nâhâc sapa-ticnere  
 ȳicguru,  
 erâ wâc ere mere lamafâc juȳgopeneȳ.  
 Nȳone miȳecgac hâcne dâȳticne mananzapiȳ  
 me!
- 8 Meriba opâo maȳsanaȳ ekicne iȳuc mi  
 enzepieȳ,  
 erâ zoaȳ moc Masao, mâreȳ tuhuo embiȳ.
- 9 Mimiȳnefâc-ȳeȳic jaȳe dameȳ ira esâicnumbiȳ,  
 i wiac bapa-nane hone-bipiehuc embiȳ.
- 10 No jara 40 ȳicguru i jaȳere takicnuhuc juwec,  
 eme mupo, “ȳic i jaȳe maȳjeȳic gac  
 qâsoricne,  
 jaȳe hata-nane moc mi hone manac  
 enȳopieȳ.”
- 11 Iȳucte kimbeȳ qajarehuc mumupaȳ dâȳ ziȳuc  
 mupo:  
 “Jaȳe nore jujumana hae mâreȳko moc mi  
 razinzepieȳ.”

## 96

### *Anutu mumutara gie-ticnere muteȳkezo (Bin I 16:23–33)*

- 1 O ȳicbureȳ, Wofuȳ gae qâricne hecnenieȳ,  
 mâreȳȳic zeȳgoma, Wofuȳ gae hecnenieȳ.
- 2 Wofuȳ gae hecnehuc zâȳe-ticne muteȳkenieȳ,  
 zoaȳne zoaȳne bâbâpiaȳ gie-ticnere binan  
 baniȳ.
- 3 Eri tatamac-ticne i qâpuc mutaniȳke-jareniȳ,  
 gie-ticne wawarecnehec i ȳicne ȳicne jaȳerao  
 muiȳ musawec enieȳ.
- 4 Wofuȳ e kâcqeȳe, irec e fehuc mumbianȳkezo,  
 nemu sasawa siric-jopahuc e araȳ bacnezo.

- 5 Qâpuc nemufâc-jeñic jañe qâñ qâqâtâc,  
Wofuñ e ine sambâñne sambâñne bâfuawec.
- 6 Zâñe biñe â zai zonzon-ticnezi bâniecnekac,  
tiri ufuñ-ticnao tâpiri â eri qâreñ focnekac.
- 7 Njic gurune gurune ñoñe Wofuñ mutenkeniñ,  
Wofuñte tatamac â tâpiri-ticne musokaniñ.
- 8 Wofuñ e zâñe-ticnere sâcko sâseniñ;  
taha bafisirâ hae zonga-ticnao feniñ.
- 9 Tiri eri qonañkerâ Wofuñ dapecneniñ;  
mâreñ sâc mai-ticnao jâjâwâckenin!
- 10 Njicne ñicne ziñuc mufua-jareniñ: “Wofuñ gurin  
bakac.”  
Jâmbomac, e mâreñ qasanañkewec qin herâ  
ñekac;  
e ñic gurune gurune jañere dân sâcjenjicko  
mutaraocmu.
- 11 Sambâñ e bubiañ manaoc â mâreñ e zeri eoc,  
hâwec â mañnao wiac qirin qanğopien jañe  
fânânkeniñ.
- 12 Sopâc â bec qowifâcne jañe kiwaeniñ,  
erâ kâtere jâc sasawa jañe zeri gae heniñ.
- 13 I Wofuñzi warekacte ere maio eniñ;  
e mâreñ sâc mumutara gie baocte warekac.  
E mâreñko mumutara gie- ticne bâtiñnehuc  
baocmu,  
â ñicne ñicne dânjenjic jâmbomacko mu-  
taraocmu.

## 97

### *Anuture gurin bapa gie*

- 1 Wofuñzi gurin bakacte mâreñ e zeri eoc,

- hâwec mâreŋ biri zora jaŋe bubiaŋ mananiŋ!
- <sup>2</sup> Karorac â dunđapâczi e râreckerâ fokac;  
tiŋne â mumutiŋ izi eri ŋeŋe-ticnere hobeteŋ  
ekac.
- <sup>3</sup> Ɔoczi bâruŋkehuc bâniecnekac,  
ehuc râsifâcne rârec rârec zâseŋ-jopakac.
- <sup>4</sup> Bâbâric-ticnezi hae mâreŋ batamaekac;  
mâreŋzi honerâ qarac qarac qakac.
- <sup>5</sup> Tiki jaŋe Wofuŋte maio du âtehuc  
dockeŋgopieŋ,  
mâreŋ sâko mâreŋte Wofuŋ ere maio.
- <sup>6</sup> Sambâŋne sambâŋne jaŋe tiŋne-ticne  
mutaniŋkeŋgopieŋ,  
â ŋicne ŋicne eri tatamac-ticne honeŋgopieŋ.
- <sup>7</sup> Qâŋ qâqâtâc babaju jaŋe mimi faio feŋgopieŋ,  
qâŋjeŋicte penaroŋ eeŋgopieŋ jaŋe hâcne;  
nemu sasawa mai-ticnao dapenŋgopieŋ.
- <sup>8</sup> Zion e manarâ zeri ekac,  
Juda hae sâc jaŋe aŋac-jopakac;  
Anutu gore mumutiŋte iŋuc fuakac.
- <sup>9</sup> Wofuŋ, go mâreŋ sâko mâreŋ irec gurin bapa  
jukic hâcne,  
go nemu sasawa siric-jopahuc fejâmbâŋkerâ  
jukic.
- <sup>10</sup> Wofuŋ e sâqocne qaisockeŋgopieŋ jaŋere ec-  
neekac,  
e tirinċfâc-ticne jaŋere juju soŋaŋkeekac,  
ehuc ŋic sindaŋne jaŋere meonec batarac-  
jopaekac.
- <sup>11</sup> Nċic bahacmâc e tatamaczi uŋ hecneekac,  
â maŋhumuc e bubiaŋ fuacneekac.

12 Bahacmâc ñoñe Wofuñ zeri ecneniñ,  
â tiri zâñe-ticne danje âzâcneniñ.

## 98

### *Anutu mâsi bapa e mutenkezo*

- 1 Njicburenj, Wofuñ gae qâricne hecneniñ,  
e mâsi wawarecnehec bawec!  
E mefâre-ticnezi â tiri meombânj-ticnezi  
râsi sananke-jarewec.
- 2 Zika giere fârine fuawec i Wofuñzi mufuawec,  
e qâpuc janjere maio bâbâtij-ticnere fuñje  
rituwec.
- 3 E Israe kikefuñ aki anonoc â jaunj fâri  
ejare warehuc jukicne, irec manasuwec.  
Mârenj qanjenao junjopienj, janje sasawa  
Anutu-nâñecte bâbâpianj gie honembiñ.
- 4 Mârenjic sasawa, Wofuñ zeri ecnehuc semuja  
heniñ!  
Samarierâ zeri gae hehuc e muafeckenij!
- 5 Wofuñ mumuafec gae hecnehuc gita qaniñ,  
gita qahuctecne musi sâko baniñ.
- 6 Qeñ dâñeha mimi ñokac ficneniñ,  
erâ Wofuñ Sâko Wofuñ semuja hecneniñ.
- 7 Hâweczi fânânkeoc,  
â manjao qirinj qanjopienj janje fânânkeniñ.  
Mârenj e injuc jaha eoc,  
eme fainao junjopienzi bafickenij.
- 8 Opâ rumi janje me qaniñ,  
tiki janje qâturerâ zeri gae henij.
- 9 Wofuñzi warekacte ere maio eniñ,  
e mârenj guriñne baocte warekac.

E mâreŋ dâŋne mutiŋnehuc mutaraocmu,  
 ŋicne ŋicne jaŋere dâŋ sâcŋenicko  
 mutaraocmu.

## 99

### *Tiri Anutu mumbiankezo*

- <sup>1</sup> Wofuŋ e guriŋ bakac; ŋicne ŋicne qarac qarac  
 qaniŋ.  
 E kerubim faicnao ŋekacte mâreŋ e  
 qiqiteckeoc.
- <sup>2</sup> Wofuŋ e Zionko kâcŋene jukac,  
 e ŋicne ŋicne siric-joparâ fekiecne jukac.
- <sup>3</sup> Zâŋege kâcŋene â bipinehec i muafeckeninŋ.  
 E tiri moc!
- <sup>4</sup> Wofuŋ Sâko tâpirigehec, tiŋne rune,  
 go wiac sâckoa foocte qâzuckemeŋ.  
 Goki Jakoborao mumutiŋ â tiŋne juju  
 hatane basanaŋkemeŋ.
- <sup>5</sup> Wofuŋ Anutu-nâŋec muafeckeninŋ,  
 eri ŋeŋe fuŋnao dunduŋ huniŋ.  
 E tiri moc!
- <sup>6</sup> Taha bapa jaŋere guruo  
 Mose â Aroŋ jucnepic.  
 Zâŋe-ticne riwaseckembiŋ jaŋere guruo  
 Samuezi jucnewec.  
 Jaŋe Wofuŋ wâsickembiŋ,  
 eme micŋenicko rowec.
- <sup>7</sup> E karorac qâfoŋnere maŋnao ŋehuc dâŋ jaza-  
 wec;  
 jaŋe mumutaniŋ dâŋticne basanaŋkembiŋ,  
 â sâcmutâc dâŋticne jarewec i reŋkembiŋ.



- <sup>8</sup> O Wofuŋ Anutu-nâŋec, go dâŋ bâtikie-jaremeŋ,  
go kiŋ bebehe Anutu jujaremeŋ,  
erâ wâc hehesic-jenjicte okacne jaremeŋ.  
<sup>9</sup> Wofuŋ Anutu-nâŋec e muafeckeninŋ,  
erâ tiri tiki-ticnao waha fodapeninŋ!  
Wofuŋ Anutu-nâŋec e tiri moc hâcne.

## 100

### *Tiri ufuŋko fehuc Anutu mutenkezo*

- <sup>1</sup> Mâreŋne mâreŋne Wofuŋ semuja hecneninŋ.  
<sup>2</sup> Bubianŋ manahuc Wofuŋ kiŋaŋ qacneninŋ,  
gae hecnehuc mai-ticnao fuaninŋ.  
<sup>3</sup> Wofuŋ e Anutu jukac i mananinŋ.  
Meticnao fuambenŋte eki rauc-nâpokac;  
nâŋâc ŋicfâc-ticne â sapa-ticnere lama guru.  
<sup>4</sup> Dange bacnehuc motâc sâko-ticnao feniŋ,  
mumbianŋkehuc hae zoŋa-ticnao fuaninŋ,  
dange âzâcneninŋ, zâŋe-ticne muafeckeninŋ.  
<sup>5</sup> Wofuŋ e uruc jauŋ-ticnehec jukac,  
aki anonoc-ticne fofu sananŋ foomu,  
â erâ-eesananŋ-ticne mimiŋzi qâric forahuc  
juocmu.

## 101

### *Nicwofuŋzi Anutu dâŋ âzâcnewec*

- <sup>1</sup> No aki anonoc â bâbâtinŋ irec gae hepe,  
ehuc Wofuŋ, go musi bagarepe.  
<sup>2</sup> Erâ bahacmâc jujure hata soŋaŋkepe.  
Jei, go wezimucko norao warecmu?  
No fic hae-nanere maŋko

- manţaniŋ hata âtezo mukopac.  
<sup>3</sup> Erâ eebapa mamakâcne  
 mi hone dendenepemu.  
 Hata kizurâ jujure takicnukac,  
 wiac injucnezi norao bohotazacte.  
<sup>4</sup> Maŋ qaqaŋharicne irec bâec bapemu,  
 sâqocnere kâuc bazepac.  
<sup>5</sup> Moc e âgo-ticne soŋsoŋko musoriŋkeme,  
 no e bâniniŋkepemu.  
 Pepec zâŋehhec â maŋ penaronhec,  
 e manacnepe mi juocmu.  
<sup>6</sup> Mâreŋko ŋic siocmâc juŋgopieŋ jaŋere zâŋe  
 fiŋpemu,  
 injucnezi nohec ŋec juc eene.  
 Moc e bahacmâc hata âtehuc juocmu,  
 injucnezi kiŋaŋ qanarezejec.  
<sup>7</sup> Moc e bâkiri baekac,  
 e nore ficmaŋko mi juzejec.  
 Moc e burecdâŋ eekaczi  
 nore maio mi domaocmu.  
<sup>8</sup> Hae fureocmu sâc no mâreŋko  
 ŋic sindaŋne sasawa bâsirowec-jopapemu.  
 Eme Wofuŋte hae qizecko  
 sâqocne bapazi omaenzepieŋ.

## 102

### *Ŋic qarâ suriŋne moczi Wofuŋ numucnewec*

- <sup>1</sup> O Wofuŋ, go nunumu-nane manac;  
 kinanezi fârâ gorao fisioc.  
<sup>2</sup> Norao hâhâwic dameŋ maickeme,  
 zâŋe maige mi bâsoŋke-narezemec.

Go hazec r e-narec; no wira-garepemu  
 3oan ira micnaneo biac rozemec.

3 3oan gie bapa- nanezi hos ac injucne  
 rat mirengopien;  
 me kike-naneo zocb arun injucne zacnuekac.

4 Bunane kecqan injucne h mo qanac eekac,  
 eme n n  n zore nkecnuekac.

5 No samarier  owackekupe,  
 siec-nanezi biuc-naneo bohotaekac.

6 No m ren  tuhuo pizu pizu injucne ekopac,  
   hae sesuctacko q on wipe injucne.

7 No gunq ari fohuc juekopac,  
 ficbupuo wipe moc bucticne  ehuc kioekac  
 injucne.

8 R sif c-nane janye damen s c mu-  
 sorinuenngopien,  
 nifepupu enarehuc s wecnuengopien.

9 3afezi n n  tinac enareekac,  
   z neuc-nanezi op hec sisifuc eme  
 n ekopac.

10 Aaricgere   kimben gere f rine fuakac h cne.  
 Goki bafaharecnuku mocw c behecnunen.

11 3oan gie bapa- nane i owa ririn te n kumuc  
 fuaekac injucne;  
 no kecqan injucne h mo qanac ekopac.

12 Wofun, go ine eri negegao  esana keekic;  
 z nege q ric janerao fosana keocmu.

13 Goki faharer  Zion bus qoc manacnecmu;  
 e aki anonoc ecnezore damen maickekac,  
 z fo bakicne i fuakac h cne.

14 Kinan nicf cge janye q n -ticnere anac-jopakac,

- â sesuc-ticnere busâqoc manan̄gopien̄.  
15 N̄icne n̄icne jaŋe Wofuŋ gore zâŋe araŋ bac-  
neniŋmu,  
â mâren̄te n̄icwofuŋzi eri tatamacgere  
hâhâwic eniŋmu.
- 16 Wofuŋ e Zioŋ mocwâc heqâreocmu hâcne,  
e eri tatamac-ticnehec fua tâcneocmu.
- 17 E bebekâne jaŋere nunumure hazec râeocmu,  
â wâwâsic-jeŋic mi suŋgiŋkeocmu.
- 18 Dâŋ zi qâric zâhec fuan̄iŋmu jaŋere biŋe  
qâren̄kezo,  
eme kikefuŋ miŋecnea fuaocmuzi Wofuŋ  
mumbian̄kezejec.
- 19 E faic tiri hae-ticnaonec fime wahawec,  
Wofuŋzi sambân̄konec mâren̄ko fime wa-  
hawec.
- 20 Ehuc kâpâcwâru n̄ic huhuse-jeŋic manawec,  
â hâmocte biŋe qacjopakicne jaŋe firuec-  
jopawec.
- 21 Eme n̄iczi Zioŋko Wofuŋte zâŋe mu-  
tan̄iŋkenzepien̄,  
â Jerusalem hae wâc mumbian̄kenzepien̄.
- 22 Ira hâcne n̄icne n̄icne heâckerâ tu-  
maŋne-fâreniŋmu,  
n̄icwofuŋ â gurufâc-jeŋic jaŋe Wofuŋ kiŋaŋ  
qacneniŋmu.
- 23 E hata ombân̄ko tâpiri-nane bâomaekac,  
ehuc juju dameŋ-nane bâmbemben̄kekac.
- 24 Eme wâsicgukopac, “O Anutu-nane,  
go jarage tatara tâmiric fohuc juocmuzi,  
no dameŋ-nane mi taraha mi bârâriecnuc.”

- 25 Go fufuŋkenao mâreŋte hobeteŋne râemeŋ,  
 â sambâŋne sambâŋne jaŋe megere qâreŋ.
- 26 Jaŋe siroweniŋmu, go ine jusanaŋkekic;  
 jaŋe ŋaqi iŋucne raŋqaŋkeniŋmu.  
 Eme ŋaqi heherisie iŋucne herisiec-jopatec,  
 jaŋe hawari moc eniŋmu.
- 27 Go ine jukiczi jurazihuc jucmu,  
 â jarage moc mi taraocmu.
- 28 Kiŋaŋŋicfâcge jaŋere naru moteczi  
 juhâmoniŋmu,  
 â qâricfâc-jeŋic jaŋe gore maio  
 jusanaŋkeniŋmu.

## 103

### *Wofuŋ mutenkezo*

- 1 O maŋ qâqâtâc-nane, go Wofuŋ mutenkec,  
 erâ maŋnaneoc wiac sasawa, go tiri zâŋe-ticne  
 mutenkec.
- 2 O maŋ qâqâtâc-nane, go Wofuŋ mutenkec,  
 â wiac bianŋe egare warehuc juwec irec mi  
 nikecguoc.
- 3 E kiŋ bahacge behe-fâreekac,  
 â huc zâicge bâniniŋke-fâreekac.
- 4 E jujuge sisipirickonec bataraekac,  
 erâ aki anonoc â buuruczi ericguekac.
- 5 E juekic sâc wiac qâmie-gareme ro aŋac eekic,  
 erâ tucwiŋe iŋucne hati firierâ juhâmoekic.
- 6 Wofuŋ e bâbâtiŋ gie baekac,  
 â ro waha âte ejarekicne jaŋe ŋezic-jopa-  
 fâreekac.
- 7 E hata-ticne Mose qazucnewec,

- wiac bapa-ticne Israe ñic jowatuwec.
- 8 Wofuñ e buuruc â aki anonoc-ticnehec,  
kimbeñ-ticne uneñne â miriñ-ticne qârâñne.
- 9 E aaric dâñ hati mi enâreocmu,  
â kimbeñ-ticne tofamâc mi bajuocmu.
- 10 E sâqocne-nâñecte sâc wiac mi enâreekac,  
â hehesic-nâñecte sâc okacne mi bazuekac.
- 11 Sambânzi mâreñ qâhuckehuc fejâmbânkerâ  
ñekac,  
arañ bacneengopien jañe irec sâc aki anonoc  
ejareekac.
- 12 Zoañ wewefune â huhune jahe rârâwiñ jâmbân  
fokopirec,  
irec sâc kiñ bahac-nâñec nâwoc rorâ taicko  
bawiseekac.
- 13 Mamac moc e qiefâcne jañere bune sâqoreekac,  
irec sâc Wofuñ e arañ bacneengopien jañe  
busâqoc mana-jareekac.
- 14 Nâñâc wemo wiaczi bacnâpokicne i kâuc mi  
baekac i.  
Gâc wândockonec fuamben i manasuekac.
- 15 Ñic e juju damen-ticne kecqañte fua hâmoc  
iñucne,  
erâ e zariñ ârire sâc fua bian eekac.
- 16 Ehame mânâñzi ficne sueme omatac fuaekac,  
â ñeñetac-ticnezi e kâuc baekac.
- 17 Wofuñte aki anonoc ine damen tâmiricko fua-  
kicnezi,  
damen tâmiric jaha forahuc juzokac,  
arañ bacneengopien jañerao hâcne.
- Â tiñne-ticnezi naru motec apa ñosa  
jañerao forahuc juzokac.

- 18 Ine ehac zâzâfic ekicne i basanaŋkerâ baju-  
niŋmu,  
ehuc sâcmutâc dâncticne reŋkeniŋmu jaŋerao  
hâcne.
- 19 Wofuŋ e eri ŋeŋe-ticne sambânko hewec ŋekac,  
â guriŋ bapa- ticnezi wiac zeŋgoma  
qâhâckekac.
- 20 O aŋelofâcne, tâpiri wânzân-ŋeŋichec,  
marac- ticnere hazec râehuc micticne  
reŋkeŋgopieŋ,  
ŋoŋe hâcne Wofuŋ mutenkeniŋ.
- 21 O momorifâc-ticne sasawa,  
kiŋaŋ qaqaŋi mamana- ticnere sâcko gie  
baeŋgopieŋ,  
ŋoŋe hâcne Wofuŋ mutenkeniŋ.
- 22 O meqâreŋfâcne sasawa,  
uucmaŋ-ticnao ira me ira juraŋgopieŋ,  
ŋoŋe hâcne Wofuŋ mutenkeniŋ.
- O maŋ qâqâtâc-nane, go Wofuŋ mutenkec.

## 104

*Anutu sambân mâreŋ bâbâfua eri tatamac-  
ticnere gae*

- 1 Maŋ qâqâtâc-nane, go Wofuŋ mutenkec.  
O Wofuŋ Anutu-nane, go kâcqeŋe sâko  
eri tatamac â zai zonzoŋge hetec hume  
jukomec.
- 2 Go tatamaczi qoruc egareme rufarâ juekic,  
go sambân i selific inucne fâremeŋ ŋegarekac.
- 3 Go erificgere woke qâtâc opâ faio râemeŋ,  
karorac âzâcnetec keretac egarewec,  
mânânŋte fakec faio rac warec eekic.

- 4 Mânâņ sorec-jopatec dâņge baraņgopieņ,  
zocbârūņ mujaretec kiņāņ qagareņgopieņ.
- 5 Go mâreņ i hobeteņ-ticnao basanaņkerâ râemeņ,  
eme qiņ herâ ņekac, qiriņ moc mi qaocmu.
- 6 Go rumi sâko qoruc iņucnezi mâreņ qofacke-  
meņ,  
eme opâ jaņe tiki qâuruckembiņ.
- 7 Erâ hanec-jopatec tâtiembiņ,  
ehuc parandaņgere fânâņte wisembiņ.
- 8 Tiki jaņe faharembiņ â wâc jaņe humbiņ,  
ehuc mupaņke-jaremeņko sanaņkerâ  
ņembiņ.
- 9 Ma bajaremeņ i mocwâc mi jâuruniņmu,  
â mâreņ mocwâc mi qofackeniņmu.
- 10 Mâreņ wâwâcnao opâ zâņe bâfuameņ,  
eme opâzi tiki ņondeņko rahuc foekac.
- 11 Qowine qowine nâruac-jeņic fuawec,  
kâte doņgi jaņe opâre hâmorâ  
nâqiņneēgopieņ.
- 12 Opâ mecnao sawa wipe jaņe ņec juc eēgopieņ,  
jâctieņko ņehuc gae-jeņic heēgopieņ.
- 13 Go faic ņehuc tiki gumecqiņ-jopaekic,  
mâreņzi giegere fârine nâ gapec eekac.
- 14 Go mutec bulimakao sopâc kecqāņ fua-ja-  
reekac,  
â nânâ monzaņ, ine ņiczi he sarac eocte.  
E giene bakume mâreņkonec nânâ fuaekac.
- 15 Erâ waiņ bâfuacneme nâhuc aņac manaekac.  
Tokic bâfuame ruarâ zâņe maine sâsâreekac,



- erâ wâc poroŋ bâfuame ŋicmaŋ qacfiric  
eekac.
- 16 Wofuŋzi jâckâte-ticne opâzi bâgunuckeekac,  
Lebanon tikio jâmâzâc sarawec i hâcne.
- 17 Jacmaŋko wipe jaŋe sareŋ-jeŋic baengopieŋ,  
qezo e bizojâcko fic hae eekac.
- 18 Tiki zora i kâte noniŋ jaŋere ŋeŋe juju,  
qânâuŋko mâreŋpecne jaŋe soŋkerâ  
foeŋgopieŋ.
- 19 Go dameŋ qâtâc-ticne fuaocte mosa râemeŋ,  
â zoaŋ e huhu-ticnere dameŋ manaekac.
- 20 Goki dapâc bâfuatec hae ŋafeekac,  
eme kâte qowi jaŋe qiriŋ qafâreengopieŋ.
- 21 Laioŋ motec jaŋe qowi- jeŋicte owack-  
eengopieŋ,  
ehuc Anuturaonec nânâ basa raengopieŋ.
- 22 Zoaŋ wefume fâre suruckeengopieŋ,  
ehuc jawa-jeŋicko soŋkerâ foeŋgopieŋ.
- 23 Ŋiczi ine gie-ticnao fahare raekac,  
erâ he sarac ehuc juha hae ŋafeekac.
- 24 O Wofuŋ, go wiac bâfuameŋ zarene fekiecne!  
Mana sarickehuc bâfua-fâremeŋ,  
mâreŋ i meqâreŋgezi fusucmawec fokac.
- 25 Hâwec fokac ocni, qaratiekiecne sâko,  
maŋnao wiac zare tâmiric gerec gerec bahuc  
fokac,  
wiac jujune kâcqene â piticne.
- 26 Ira wokezi rac warec ehuc juengopieŋ,  
gazu gazu wâc râemeŋ, hâwec masirickeocte.
- 27 Goki dameŋ mukicnao nânâ jarecmurâ,

- gorao zen̄goma zâne fiengopien̄.
- 28 Goki jaretec ro nuse een̄gopien̄,  
mege baratietec wiac bian̄ nâ gapec  
een̄gopien̄.
- 29 Zâne maige bâson̄ketec bipic tara-jareekac,  
nokafe-jen̄ic jowac rotec hâmoengopien̄,  
ehuc gâc wândocko risie raengopien̄.
- 30 Micrombân̄ge ficne- jaretec harierâ  
fuaengopien̄,  
eme mâren̄ zâne maine mocwâc qacfiric  
eekac.
- 31 Wofun̄te zâne bin̄e forahuc jaha juzejec,  
Wofun̄ e meqâren̄-ticne hone an̄ac ezejec.
- 32 Mâren̄ko firâ râqâreme mâren̄ qiqiteckeocmu,  
tiki bâuac-jopame hosâc qan̄im̄u.
- 33 Jupemu sâc Wofun̄ gae hecnepemu,  
juju fonareocmu sâc Anutu- nane  
muten̄kepemu.
- 34 Mamanasu gie bakopac i mac maname  
sâckezejec,  
no Wofun̄ mana an̄ac ecnehuc jupemu.
- 35 N̄ic hehesicne mâren̄ko omaenzapin̄ me,  
sindañne jañe hâcne arictac enzapin̄.  
Mañ qâqâtâc-nane, go Wofun̄ muten̄kec.  
Wofun̄ mumbian̄kenin̄.

## 105

*Anutuzi Israe ñic jañerao bâbâpian̄ gie bawec  
(Bin I 16:7–22)*

- 1 Wofun̄ dan̄ge âzâcnenin̄, erâ zâne-ticne  
wâsickenin̄;

- wiac bapa-ticne ɲicne ɲicne mufua-jareniɲ.
- <sup>2</sup> Gae hecneniɲ, mumumbianɲ gae hecneniɲ,  
mâsi sâko-ticne mutaniɲke-fâreniɲ.
- <sup>3</sup> Tiri zâɲe-ticne mu zeri ecneniɲ,  
Wofuɲ wira basac ecneɲgopienzi bubian  
mananzepienɲ.
- <sup>4</sup> Wofuɲte â tâpiri-ticnere fifisacne finzepienɲ,  
zâɲe maine honeniɲte zuzuhuc jaha  
henziriɲnenzepienɲ.
- <sup>5</sup> E wiac bipinehec ewec irec manasuniɲ,  
mâsi bawec â mumutara dâɲ muwec,
- <sup>6</sup> kiɲaɲɲic-ticne Abraham qâricfâcne ɲoɲe hâcne,  
Jakobore ɲokâfâc, bâwosâecfâc-ticne ɲoɲe!
- <sup>7</sup> Wofuɲ e hâcne Anutu-nâɲec,  
bâbâtiɲ gie-ticne mârenɲ sâc fua raekac.
- <sup>8</sup> Zâzâfic-ticnere manasu rahuc juzokac,  
dâɲ mupaɲkewec i raɲqa raɲqa maɲke ju-  
zokac,  
qâric biri gaɲne 1000 irec sâc.
- <sup>9</sup> Zâzâfic i Abraham ehac epic,  
erâ mujomirehuc Isaka mupaɲkecnewec.
- <sup>10</sup> Izi Jakobo sâcmutâc râcnehuc basanaɲkewec,  
Israehec zâzâfic fofu sanaɲ ewec.
- <sup>11</sup> Ziɲuc muhuc: “Go Kanaanɲ mârenɲ garepemu,  
merâfâcge rauckecmurâ biɲe qagarepo i  
hâcne.”
- <sup>12</sup> Damerɲ ira afecne mac jumbiɲ,  
jahec maczi mârenɲ ira jaba jumbiɲ.
- <sup>13</sup> ɲicguru mockonec mocko ɲe qatara rambiɲ,  
ɲicwofuɲ mocte uucmaɲkonec ra guru mocko  
zuhuckembiɲ.

- 14 Moczi ro waha âte ejarezacte aka hewec,  
â janjere erâ ñicwofuñ bâtiñ-jopawec.
- 15 Ehuc muwec, “Rowosâec-jopakicnefâc-nane mi  
bâuac-jopazo,  
porofetefâc-nane mi bâzâic-jopazo.”
- 16 Eme mâreñ ira roroc fuaocte,  
â hobure dope qatara-fâreocte muhuc
- 17 ine qanañ ñic moc soreme bânie-jarewec:  
Josefe hâcne doc bapie kiñañ qaqa ewec.
- 18 Kike-ticne jâc fiftacko râembiñ,  
aenjo basanañkepie fowec.
- 19 Ekume findañdâñ-ticne fârio qawec,  
â Wofuñte dâñzi fuñne-ticne rituwec.
- 20 Eme ñicwofuñzi kiñañ soreme firuembiñ,  
ñicne ñicne janjere guriñ bapazi rambañko  
râewec;
- 21 erâ ficticnere micne sâko âkendâñnewec,  
â wiac-ticne hone soñañ efâreocte muc-  
newec.
- 22 Eme ñicbombonfâcne giedâñ jazawec,  
â kiafâcne mañqârâñ dâñ qazu-jarewec.
- 23 Ekume Israezi Aigita mâreñko rawec,  
Jakobozi Hamte mâreñko jaba juwec.
- 24 Â Wofuñzi ine ñicfâcne jambuñ-jopame,  
janje saweku râsifâc-jeñic siric-jopambiñ.
- 25 Erâ ejareme mañjeñic risieme ñicfâcne qaisoc-  
jopambiñ,  
â kiñañ qaqa fâcne wiac gâgâpâcne ejarem-  
biñ.
- 26 Eme kiñaññic-ticne Mose sorewec,  
erâ wâc bâwosâec-ticne Aroñ.

- 27 Jahe ñonden-jeñicko fuñne qaqa mâsi-ticne  
bapic,  
Hamte mâreñko wiac bipinehec bâfuapic.
- 28 Eki mume mâreñ dapâc efârewec;  
jañe ine dâncticne mana suambin.
- 29 E opâ-jeñic hetikieme soc efârewec,  
ehuc opâ qowi-jeñic qâhâmoc-jopawec.
- 30 Qaqec fisi mâreñ sâc gerec gerec bambin,  
ehuc ñicwofuñfâc-jeñic jañere ficmañko wâc  
fembin.
- 31 Eki mume neñgec qâñhec qâñhec fisimbın,  
â nusuczi mâreñ sâckerâ fombın.
- 32 Hoere okacne aisi hândân jarewec,  
â bâbâriczi hae mâreñ imackewec.
- 33 Wain-jeñic â jâmbö-jeñic qanzañnewec,  
â mâreñ-jeñicte jâcwiac qazuwec.
- 34 Ere micte qirikin fisimbın,  
â qirikin motecne zare tâmiric.
- 35 I jañe mâreñ irec jâcrehac nâfârembin,  
â gïeo nânâ monzañ omaembın.
- 36 Erâ mârâc fufuafâc-jeñic qâhâmoc-jopa-  
fârewec,  
ñic tâpiri-jeñicte fârinere hata qaqasune  
hâcne.
- 37 Erâ mana-jareme siliwa â gol ameckerâ ram-  
bin,  
â gurufâc-jeñic jañeraonec ñic moczi moc  
kikene mi fâfâckewec.
- 38 Rapie Aigita ñic jañe añac-jopawec.  
Wemocte? Hâhâwic bajarembınte.
- 39 Eki ine karoraczi mumuc ejareocte qaratie-  
jarewec,  
â ñafeo zoc râeme tamae-jarewec.

- 40 Jaņe âzâcnepie sirikic bâfua-jarewec,  
 â sambânkonec poroņ mâririhec tahac-  
 jopawec.
- 41 E qânâ bâmârâņkeme opâ sâronehec wahawec,  
 erâ mâreņ sawao fusinehec rahuc fowec.
- 42 E tiri mumupaņ-ticne manasuwecte iņuc ewec,  
 erâ kiņaņņic-ticne Abraham ere  
 manasuwecte.
- 43 Iņuc ehuc ņicfâc-ticne zerimaņko jowac-  
 jopawec;  
 bâwosâecfâc-ticne jaņe gae hehuc  
 bâjâpembij.
- 44 Eme qâpuc jaņere mâreņ tahac-jopawec;  
 ņicne ņicne jaņe wiac hure hemârec embij,  
 i hâcne tahac-jopame rauckembij.
- 45 Irec fârine ziņuc fuaocte:  
 Jaņe mumupaņ- ticne basanaņkerâ  
 bajunzepieņ,  
 â sâcmutâc dâņticne reņkenzepieņ.  
 Wofuņ mumbiaņkeniņ!

## 106

*Wofuņzi Israe ņic uruc jauņ ejare-bipieha  
 maņsanaņ ejumbieņ*

- <sup>1</sup> Wofuņ mumbiaņkeniņ!  
 Wofuņ daņge âzâcneniņ, e uruc jauņ-ticne-  
 hec,  
 â aki anonoc-ticne fofo sanaņ foocmu.
- <sup>2</sup> Mozi Wofuņte eebapa tâpirinehec i sâcne mu-  
 taniņkeocmu,  
 me zâņe biņe-ticne mutaniņkeme sâckeocmu?

- 3 Tinjere hata âteenjopien jaņere manape zerine ekac,  
dameņ sâc wiac etinnehuc eenjopien jaņere hâcne.
- 4 O Wofuņ, go njicfâcge âgo ejarecmuo nore man-  
asuzemec,  
jaņe batarac-jopacmuo no wâc baficnuze-  
mec.
- 5 Eme no bâwosâecfâcge mâriri-jeņic hone aņac  
ezepac,  
ehuc njicfâcge bubiaņ manapie zeri ezepac,  
â merâfâcfâcge jaņehc mu zeri ezepac.
- 6 Mimiņnefâc-nâņec jaņe sâqocne bambiņ nâņe  
ijaha embeņ,  
nâņe bahac bâfuambeņ, erâ wâc sindaņ em-  
beņ.
- 7 Mimiņnefâc-nâņec jaņe Aigita mâreņko jumbiņ,  
ira Anuture mâsi bapa hone qâoma embiņ,  
â fehuc ehâmo-jarewec irec mi manasumbiņ,  
erâ Hâwec Bâbâroņko Femicne sâko pepec  
ecnembiņ.
- 8 Eme e sifu zâņe biņe-ticnere erâ bafic-jopawec,  
ehuc tâpiri sâko-ticnere fuņne bataniņkewec.
- 9 E Hâwec Bâbâroņ haneckeme kereņkewec,  
eme zâkâņko, mâreņ burocnao tinac jowac-  
jopawec.
- 10 Iņuc ehuc râsi jaņere ņezic-jopawec,  
â kisâfâc-jeņic jaņere meonec batarac-  
jopawec.
- 11 Eme hâweczi râsifâc-jeņic qofac-jopawec,  
jaņeraonec moczi tiwâne mi juwec.

- 12 Inuc fuame dânticne mana zakiembiņ,  
â mumumbian gae hecnembiņ.
- 13 Erâ ine gie bawec irec biac nkec-jopawec,  
â mumutâc dânticnere woņec mi jumbiņ.
- 14 Jaņe mâreņ tuhuo andac sâko ehuc,  
Anutu mâreņ sawao esâickembiņ.
- 15 Eme wiac numucnembiņ i jarewec,  
erâ ine huc ima-ticnehec mume fisi jopawec.
- 16 Eme guru-jeņickonec gâcnezi Mose iinguaņ  
ecnepie,  
â Wofuņte tirinĭc Aroņ mana sâqorecnepie,
- 17 mâreņzi micne aņkerâ Dataņ qâckewec,  
erâ wâc Abiram qâjâpecfâcne hemac-  
jopawec.
- 18 Erâ zoczi ņonden-jeņicko bâruņkerâ,  
ņic sindaņ hârindaņne zâseņ-jopawec.
- 19 Jaņe Horebe tikifuņko bulimakao motec barâ,  
qâņ qâqâtâc mai-ticnao dundaņ humbiņ;
- 20 jaņe Anuture eri tatamac qikiņnehuc,  
bulimakao kecqaņ nânâ ere hawari  
sâsembiņ.
- 21 Jaņe Anutu bâbâpiaņ-jeņicte nkec-jopawec,  
e Aigita mâreņko gie sâko bawec irec man-  
apie wahawec;
- 22 e Hamte mâreņko â Hâwec Bâbâroņko,  
mâsi bipinehec bawec i mana suambiņ.
- 23 Eme bâsirowec-jopaocte mume,  
Mose, bâwosâec-ticne,  
eki sacfozic ejarerâ oso bahuc,  
kimbeņ-ticne bâmâteņkeme furu jumbiņ.



- 24 Eme jaņe mâreņ bian i qikiņnemiņ,  
ehuc mumupaņ dâņticne mi mana  
zakiemiņ;
- 25 qoruc boze-jeņicko kâroņ qahuc fomiņ,  
â Wofuņte marac fânâņte hazec mi râemiņ.
- 26 Eme mâreņ tuhuo sipiric-jopaocte,  
mene bâfeņnehuc mupaņke-jarewec.
- 27 Ehuc qâricfâc-jeņic qâpuc ņondenko  
bâtâtiēc-jopahuc,  
mâreņne mâreņne râec-jopa raocte muwec.
- 28 Eme jaņe Baali Peoro nemu erao qohotamiņ,  
â hâmokicne tiwâ bâzi ejarekicne i nâhuc  
jumiņ.
- 29 Iņuc ehuc Wofuņ maņticne bâiņnemiņ;  
eme ņonden-jeņicko hucukic sâqocne moc  
fuawec.
- 30 Eme Pinehasizi fahare sacfozic ejareme,  
huc hâmoc qazue wahawec.
- 31 E iņuc ewecte mimiņzi qâric,  
tatara tâmiric manacnemie biankewec.
- 32 Izi Meriba opâo kimbeņ-ticne bâiņnemie,  
jaņere erâ Mosezi wiac eme sâqorewec.
- 33 Jaņe Mâro-ticne râņgeņkecnemiņte,  
Mosezi dâņ fâfâcnehec muwec.
- 34 Jaņe Wofuņte mumutâc dâņ qatarahuc,  
qâpuc guru mi bâsirowec-jopamiņ.
- 35 Mâcne, jaņe jaņehēc sisifuc epie,  
eebapa-jeņic qazu-jarepie ijaha emiņ.
- 36 Ehuc nemuqâņfâc-jeņic kiņaņ qajaremiņ;  
eme izi bitiņ ejarewec.

- 37 Jaņe otâ ņokâfâc-jeņic  
demonŭ bâzi rike-jarembiņ.
- 38 Iņuc ehuc soc bahacmâc hoņkembiiņ,  
otâ ņokâfâc-jeņic jaņere soc hâcne.  
I Kanaaņ mâreņte nemu bâzi rike-jarembiiņ,  
eme irec socte kiņzi mâreņ sâweckewec.
- 39 Wiac i ehuc wâwânâņ sâko bâfuambiņ,  
â zâzâfic ekicne i hetâcnemiņ.
- 40 Eme Wofuņte kimbeņzi ņicfâcne  
bâruņke-jarewec,  
â fuņfuņfâcne jaņere mamakâckewec.
- 41 Irec qâpuc jaņere meo râec-jopame,  
qaisoc-jopambiņzi ņicwofuņ ejarembiiņ.
- 42 Râsifâc-jeņic jaņe hâcne ro waha âte  
ejarekupie,  
rurumaņ-jeņicko huacbucne erâ jumbiiņ.
- 43 Eki gâbâ batarac-jopa jujec;  
ehame jaņe ine pepec ecne jumbieņ;  
ekupie hehesic-jeņiczi qa bâutuc ejarewec.
- 44 Eme kio owa-jeņiczi ra bâfuame sâc,  
sifu fific guguriņkonec hone bafic ejare jujec.
- 45 E jaņere erâ zâzâfic-ticnere manasu jujec,  
â buuruc sâko-ticnere sâcko busâqoc mana-  
jare jujec.
- 46 Ehuc niņgiņko bacjopa jumbiiņ jaņe ejareme,  
iņuc jaha busâqoc mana-jare jumbieņ.
- 47 O Wofuņ Anutu-nâņec, go bafic-nâpoc,  
â qâpuc jaņeraonec henusuc-nâpoc;  
eme nâņe tiri zâņege daņge âzâcnenzepeneņ,  
â mumbiaņguhuc mu zeri enzepeneņ.

48 Wofuņ, Israere Anutu, e mutenkezo.  
 Dameņ tâmirickonec ewarekicne,  
 i foraku dameņ tâmirickoa tarazejec.  
 Njic zengoma munzepieņ, “Jâmbomac.”  
 Wofuņ mumbiankeniņ!

## DÂKÂNE NAMBA 5

### 107

*Anutu zârâ zâpâonec batarac- nâpoekacte  
 mutenkezo*

- 1 Wofuņ danġe âzâcneniņ, e uruc jauņ-ticnehec;  
 â aki anonoc-ticne fofu sanaņ foomu.
- 2 Wofuņzi firuec-jopawec jaņe iņuc munzepieņ,  
 zârâ hâriņkonec batarac-jopawec jaņe hâcne.
- 3 E mâreņne mâreņne irec henusuc-jopawec,  
 zoaņ wewefunaonec â huhunaonec,  
 mâreņ faickonec â juwickonec.
- 4 Gâcne jaņe mâreņ tuhuo qac qâsoric erâ jumbiņ,  
 ehuc ņichae wiac irec hata moc mi  
 bâfuambiņ.
- 5 Nânâ opâre hâmohuc,  
 maņjeņic omaezo ewec.
- 6 Eme harac eku Wofuņ wira wâwâsic ecnepie,  
 zârâ zâpâonec batarac-jopawec.
- 7 E hata dândâņnao jowac-jopame,  
 hae ņeņene mocko fisimbiņ.
- 8 Irec Wofuņ uruc jauņ- ticnere danġe  
 âzâcnenzepieņ,  
 e ņic nâņâcnao mâsi sâko baekacte.
- 9 E opâre hâmoeņgopieņ jaņe bâgunuc-jopaekac,  
 â nânâre sâqoreņgopieņ jaņe wiac bianġe

jareme nâ gapec eenḡopieḡ.

- 10 Gâcne jaḡe dapâcko qinḡunḡkehuc ḡembiḡ,  
niḡḡiḡ-jopahuc aenḡi basanaḡ-jopakicnere  
huacbuc embiḡ;
- 11 ine Anuture dâḡ pepec sisiric ecnembinte,  
â Femicne sâkore unḡdâḡ mana suambiḡte.
- 12 Eme jaḡe zâic gie baku maḡḡeḡic wahawec,  
qarâ suriḡne erâ babafic basambiḡ.
- 13 Eme harac eku Wofuḡ wira wâwâsic ecnemie,  
zârâ zâpâonec batarac-jopawec.
- 14 E aenḡ niḡḡiḡ-jeḡic hetâcnehuc,  
dapâcko qinḡunḡkehuc jumbiḡkonec baefuc-  
jopawec.
- 15 Irec Wofuḡ uruc jaunḡ- ticnere danḡe  
âzâcnenzepieḡ,  
e ḡic nâḡâcnao mâsi sâko baekacte.
- 16 E motâc sanaḡ heropieekac,  
â aenḡ aka qazuekac.
- 17 Gâcne jaḡe sindaḡ eku huc bacjopawec,  
â hehesic-jeḡicte erâ zâic fua-jarewec.
- 18 Jaḡe nânâ sasawa qikiḡne-fârembiḡ,  
â hâmocte motâc bâqinḡkemiḡ.
- 19 Eme harac eku Wofuḡ wira wâwâsic ecnemie,  
zârâ zâpâonec batarac-jopawec.
- 20 E dâḡticne soreme fisi bâpiaḡ-jopawec,  
ehuc zâḡerunḡkonec baefuc-jopawec.
- 21 Irec Wofuḡ uruc jaunḡ- ticnere danḡe  
âzâcnenzepieḡ,  
e ḡic nâḡâcnao mâsi sâko baekacte.
- 22 Erâ danḡe tahare wiac bacne fisinḡepieḡ,

â zeri gae hecnehuc wiac bapa-ticne musokanzepien.

- 23 Gâcne jaje mongenko hurâ wokeo fembiñ,  
hâwec sâko fotâcnehuc âbârâ gie baniñte.
- 24 Jaje Wofun̄te wiac bapa honembiñ,  
zâkân̄ faio mâsi baekac i hâcne.
- 25 Ere micdân̄te mân̄ân̄ qicwân̄zân̄ fisirâ,  
hâwec siri zocnehec bafaharewec.
- 26 Sambân̄kopec fembiñ, hârâckopec humbiñ,  
ehuc ñic hâbi-jeñic goron̄kewec.
- 27 Zân̄e-jeñic bân̄iniñkeme,  
biric boroc ehuc man̄jeñic omaewec.
- 28 Eme harac eku Wofun̄ wira wâwâsic ecnepie,  
zârâ zâpâonec batarac-jopawec.
- 29 E mân̄ân̄ ecneme qazuewec,  
â hâwec siri ninin̄kewec.
- 30 Ninin̄ siarereñ fuame añac-jopawec,  
eme siluñ hejâpembin̄ko rafisimbiñ.
- 31 Irec Wofun̄ uruc jauñ- ticnere dan̄ge  
âzâcnenzepien,  
e ñic nân̄âcnao mâsi sâko baekacte.
- 32 Jaje ñic ñokac tutumañko Wofun̄  
muafecten̄zepien,  
â soñan̄ tutumañko mumbian̄ken̄zepien.
- 33 E opâ sâko hetikieme mon̄gen̄ kereñne fuaekac,  
opâ zân̄ezi mâreñ hahan̄kekiecne eekac.
- 34 Me mâreñ guac bian̄zi hâfu roroc eekac,  
i runezi sindan̄ gie bapie in̄uc fuaekac.
- 35 Erâ wâc mâreñ burocnao riqic bâfuaekac,  
kereñnao opâ zân̄e mume wefuekac.

- 36 Erâ ira ñic tac qararacne râec-jopame,  
fic hae bâfuarâ juenḡopienḡ.
- 37 Jaḡe gie he sarac ehuc waiḡ wâc saraenḡopienḡ,  
eku mazuc mâriri sâkohec eenḡopienḡ.
- 38 Jambuḡ-jopame jaḡacne wâc fua sawec  
eenḡopienḡ,  
â hae qowifâc-jenḡic afecne mi saweenḡopienḡ.
- 39 Moczi moc ro waha âte ejarekupie,  
zârâ hâriḡ â memezac fua-jareocmu,  
me zare- jenḡic wahame busâqoc  
mananiḡmuo,
- 40 ine ñicbomboḡ mimi qaqa ejareocmu,  
â tuhuo râec-jopame qac qâsorice eniḡmu.
- 41 Bebekâne ine zârâ hâriḡkonec batarac-  
jopaocmu,  
â qâricfâc-jenḡic bec qowi inucne saweniḡmu.
- 42 Ñic siocmâc jaḡe i honerâ bubianḡ mananiḡmu,  
â ñic sindaḡne sasawa jaḡe dâḡ  
fâsâe-jareocmu.
- 43 Moc e maḡqârâḡ jukaczi wiac i hone-  
hâmozejec,  
â ñicne ñicne Wofuḡ uruc jaḡḡ-ticnere fuḡne  
mana-hâmonzepienḡ.

## 108

*Mumumbianḡ dâḡ â nunumu*

*(Mi Mâ 57:7–11; 60:5–12)*

- 1 Maḡnane zawiekac, o Anutu, maḡnane  
zawiekac;  
no gae hepemu; no mumumbianḡ gae hep-  
emu;

- manj qâqâtâc-nane go mana qâqârec.
- <sup>2</sup> Gita kulele ñohe mana qâqârenic,  
furic wiwickepe mana qâqâreoc.
- <sup>3</sup> O Wofuñ, no qâpuc jañere ñondenko danje  
gazape,  
no ñicguru jañere ñondenko juhuc  
mumbianjupe.
- <sup>4</sup> Buurucezi feku sambâñ heuakac,  
jaun fârigezi feku karoracko fisikac.
- <sup>5</sup> Anutu, go fahare sambâñ qâhuckerâ fezemec,  
eri tatamacgezi mâreñ sâko mâreñ  
sâcke-fârezejec.
- <sup>6</sup> Mefâregezi bafic- nâpohuc nunumu- nâñec  
manac,  
eme jorocfâcge nâñerao bâbâpianj fuazejec.
- <sup>7</sup> Anutuzi tiri ufuñ-ticnao zinuc muwec:  
“No kiwaehuc Sikem hae bâtâc bapemu,  
â Sukoti wâneñ kâdoc qapemu.
- <sup>8</sup> Gileade rauckekopac, Manase i wâc nore;  
Eferaim e momori dunane, Juda e ñicwofuñ  
gunu-nane.
- <sup>9</sup> Moabi e kike zuzure râqâc-nane;  
Edomtao kikehuhu-nane wickecnepemu;  
Filisa mâreñ saoreñ qacnepemu.”
- <sup>10</sup> Mozi hae basanañkekicnao barâ râecnuocmu?  
Mozi Edomko jowacnu raocmu?
- <sup>11</sup> Anutu, go jâmbomac suñginj-nâpomec me?  
Go momorifâc-nâñec râpec-jopatec buc  
juenjgopienj.
- <sup>12</sup> Râsi jopanante hone bafic enârec;  
ñiczi babafic-nâpo i fârimâc.

- 13 Anutuhec sâcne momori wânzân enaŋmu;  
eki râsifâc-nâŋec ro waha âte ejareocmu.

## 109

### *Râsi sâqocne jaŋere sâwecdân*

- 1 Mumumbian Anutu-nane, go dâŋemâc mi juc.  
2 Țic sindaŋne â burecne jaŋe micaaŋ maic-  
numbiŋ,  
ehuc nameŋ-jeŋiczi siocdân nazambiŋ.  
3 Jaŋe qaqaŋsoc dâŋ wicke-narembiŋ,  
â maŋgân râsi enarembiŋ.  
4 No jaun bacjopahape qoricnuengopien,  
jaŋere erâ numuhape iŋuc enareengopien.  
5 Ine hâcne biaŋnere okacne sâqocne  
nareengopien,  
manjaunte okacne qaisocnuengopien.  
6 Țic sindaŋne moc ecnetec dâŋticne muzejec,  
repicne moczi dâŋko râezejec.  
7 Mumutara Țic eki dâŋticne mugâpârezejec,  
nunumu-ticnere maname bahac jaha ezejec.  
8 Juju dameŋ-ticne qosackezejec,  
mafa-ticne i furunezi rauckezejec.  
9 Naru motecfâcne bekâ enzezien,  
â ŋonân-ticne hozec ezejec.  
10 Qâricfâcne jaŋe mamacte ficsesuc râpeckerâ,  
qafec qawahac juhuc nânâre numunzezien.  
11 Moneŋ jaba râcnewec Țic eki mafa-ticne  
sakareme,  
omane jaŋe gie-ticnere fârine bajunzezien.  
12 Moczi moc âgo jaun mi ecnezejec,



- erâ moczi moc bekâfâcne jaņere busâqoc mi manazejec.
- 13 Qâricfâcne omae-fârenzepieņ,  
biri-jeņic ņosa jaņerao tarazejec.
- 14 Mamacfâcne hehesic-jeņicte Wofuņzi mana-  
suzejec,  
â neņgoc-ticnere sâqocne mi bătâmirezejec.
- 15 I Wofuņte maio fome honehuc juzejec;  
eme mâreņko ine ņic ere ninikec sanaņ fuaze-  
jec.
- 16 Wemocte? E jauņ gie baocte mi mamasasu,  
qarâ suriņne â hapetac fific bacjopawec,  
â buheheric bâfua-jarekicne jaņe hâmocko  
râec-jopawec.
- 17 E sâwecte ecnewecte sâweczi qazejec,  
jambuņte takickewecte jambuņ basazejec.
- 18 E sâwecdâņ i ņaqi iņucne heme huwec,  
irec sâweczi saħac biucko â siec wamboņ-  
ticnao huzejec.
- 19 Erâ hoe ņaqi tinac ecneħame rufazejec,  
â umbika tinac ecneħame joma juzejec.
- 20 Wofuņtaonec gie furi izi kisâfâc-nane fua-  
jarezejec,  
musâqorecnuhuc jueņgopieņ jaņe hâcne.
- 21 O Wofuņ Anutu-nane, goki ine  
zâņe biņegere erâ sacfozic enarec!  
Aki anonoc furi sâko fogarekacte bataracnu!
- 22 No qarâ suriņne â hapetac jukopac,  
eħame bu zazamaņ-nane fâuckekac.
- 23 Hae owâeme nâkumuczi omaeekac irec sâc  
ekopac,

- â mângânzi bisirec bawiseekac irec sâc.  
 24 Sowa juku dien-nane qiric qârâc eme,  
 sahad kekeren̄ epo jukopac.  
 25 Kisâfâc-nane mu ruruc enarengopien̄,  
 jaŋe honecnurâ qizec fofotaric eengopien̄.  
 26 O Wofuŋ Anutu-nane, go baficnuc,  
 aki anonogere sâcko bataracnuc.  
 27 Megere qâren̄ fuakac i jowatutec honenin̄;  
 Wofuŋ, goki hâcne wiac zi emen̄.  
 28 Jaŋe sâwecdân̄ muzo murâ munin̄,  
 ehame goki jambuŋge bâfuac!  
 Kisâfâc-nane jaŋe qurutuanzeppen̄;  
 ehame kin̄aŋŋicgezi bubian̄ manazejec.  
 29 Qoricnuengopien̄ jaŋe mimizi ŋecjopazejec,  
 mimi-jeŋiczi bilan̄ke in̄ucne erâ fonjopazejec.  
 30 Micnanezi Wofuŋ dan̄ge musokahuc  
 âzâcnezepac,  
 ŋicguru sâkoo e mumbian̄kezepac.  
 31 Eki ŋic tac qararacne mefâre-ticnao domaekac  
 hâcne,  
 ehuc hâmoocce mutaracneengopien̄  
 jaŋere meonec bataraekac.

## 110

### *Anutuzi taha bapa ŋicwofuŋ dân̄ âzâcnewec*

- 1 Wofuŋzi nore Wofuŋ zin̄uc âzâcnewec:  
 “Ware fâre-naneo ŋehan̄tec  
 râsifâcge guruc-jopape  
 kikegere ââtesin̄ enzepien̄.”  
 2 Wofuŋzi Zion̄konec ŋicwofuŋ gunuge

- tâpiri sâkonehec i sicnekac.  
 Râsifâcge jaņere ņondenĵko gurinĵ bapa gie  
 bac!
- <sup>3</sup> Njicfâcge jaņe maņafec jaha fisi-garepie  
 goki momori gurufâcge tiri tikio jowac-jopa  
 racmu.  
 Nafe furec hehe-jekicko  
 titikuc fuaekac,  
 irec sâc socqâricfâcge fisi-gareniņmu.
- <sup>4</sup> Wofuņ e dâņ ziņuc mupaņkewec,  
 i maņne risieme mi beheocmu:  
 “Goki Melikisede ere sâcko  
 taha bapa jurazihuc jucmu sanaņ.”
- <sup>5</sup> Wofuņ e mefâregao domakac;  
 e kimbeņ dameņ-ticnao ņicwofuņ qanzaņ-  
 jopaocmu.
- <sup>6</sup> Njic gurune gurune jaņerao okac babazu gie  
 bame,  
 qâņqâņ guru fufusuc fuaniņmu,  
 qizec qanzaņne-jareme mâreņ sâckerâ  
 foraniņmu.
- <sup>7</sup> E hatamecko opâ fia nâc eocmu,  
 ehuc qacboç-ticnehec domaocmu.

## 111

*Anutu e sahackopec â maņkopec jambuņ-  
 nâpoekac*

- <sup>1</sup> Wofuņ mumbianĵeniņ!  
 No Wofuņ maņ hâcbuc jaha danĵe âzâcnepe,  
 ņic siocmâc jaņere ņondenĵko â kikefuņ guruo.
- <sup>2</sup> Wofuņte meqâreņ i bipinehec,  
 irec aņac fojareekac jaņe mana  
 wosâeeņgopieņ.

- 3 Wiac bapa-ticne i zâŋe biŋe â zai zonzonheç,  
â tiŋne-ticne tofamâc fohuc juocmu.
- 4 E mâsi sâko-ticne manasuhuc junaŋte ma moc  
bâfuawec;  
Wofuŋ e aki anonoc â buuruchec.
- 5 E araŋ bacneŋgopieŋ jaŋe nânâ bâfua-jareekac;  
e zâzâfic-ticnere manasuhuc jaha juekac.
- 6 E ŋicne ŋicne jaŋere mâreŋ i ŋicfâc-ticne jare-  
huc,  
wiac tâpiriheç eekac irec fuŋne jowatuwec.
- 7 Meticnezi gie baekac i siocmâc â tiŋne;  
sâcmutâc-ticne i eeatuc tâmiric,
- 8 izi fofo sanaŋ fooçte keteŋke-hâmowec,  
ŋiczi siocmâc â maŋhumuc juhuc reŋkeniŋte.
- 9 E kikefuŋfâc-ticne firuec-jopawec,  
ehuc zâzâfic-ticne fofo sanaŋ fooçte mu-  
paŋkewec.  
Zâŋe-ticne tiri moc â bipineheç.
- 10 Wofuŋ araŋ babacne izi maŋqârâŋte hata fu-  
fuŋkene ekac;  
irec giene baniŋmuzi wiac mana utuck-  
eniŋmu.  
Ere zâŋe biŋe forazihuc jaha juocmu.

## 112

### *Mitiheç jaŋe sâcne juhâmoniŋmu*

- 1 Wofuŋ mumbiaŋkeniŋ!  
Moc e Wofuŋ araŋ bacnehuc,  
sâcmutâc-ticnere bubiaŋ sâko manaekac,  
ere manape zerine ekac.
- 2 Qâricfâcne jaŋe mâreŋko tâpiriheç juniŋmu,  
tiŋne jaŋere guruzi jambuŋheç eniŋmu.

- <sup>3</sup> Ficticnao wiac sasawa mazuc mâriri foomu,  
â tiņne-ticnezi forazihuc juocmu.
- <sup>4</sup> Siocmâc jaņe dapâcko tatamac fua-jareocmu;  
ņic tiņnezi aki anonoc â buuruchec juekac.
- <sup>5</sup> Moc e buafec erâ ñic wiac jaba jareekac e sâcne  
juhâmooocmu;  
â dâņgieo râepie dâņticne sâcne mume  
biankeocmu.
- <sup>6</sup> Ñic tiņnezi ra ioc ware ioc moc mi eocmu,  
irec ñiczi ere raņqa manasuhuc juniņmu.
- <sup>7</sup> E biņedâņ sâqocnere boc mi mezackeocmu,  
maņnezi Wofuņtao roweckehuc qiņ herâ do-  
maocmu.
- <sup>8</sup> E hâbi heme hume hâhâwic tâmiric jufeku  
râsifâcne sanaņke-jarerâ saoreņ qaekac.
- <sup>9</sup> E boki bahuc hapetac wiac tahac-jopaekac;  
tiņne juju-ticnezi forazihuc juocmu;  
eme ñiczi sâsekupie zâņe biņe-ticnezi feocmu.
- <sup>10</sup> Ñic sindaņnezi e honerâ aarickeekac,  
erâ mic kikiaric kiku omaeekac;  
sindaņnezi wiac fuaocte muekac i fârimâc  
eekac.

## 113

### *Anutu qeņ bipinehec e muteņkezo*

- <sup>1</sup> Wofuņ mumbiankeņiņ!  
Wofuņte kiņaņ qaqa ñoņe e mumbiankeņiņ,  
Wofuņ zâņe-ticne mumbiankeņiņ.
- <sup>2</sup> Wofuņte zâņe i ziņuczia muteņkerâ,  
dameņ tâmiric muteņke rahuc juzo.
- <sup>3</sup> Zoaņ wewefunaonec domarâ raku huhunao,  
i Wofuņte zâņe jaha mumbiankehuc juzo.
- <sup>4</sup> Wofuņ e ñicne ñicne jowarurâ fewec jukac,

eri tatamac-ticnezi sambânj sirickerâ fekac.

- <sup>5</sup> Mozi Wofuñ Anutu-nâñec ere sâc jukac?  
E faic eri ñeñe-ticnao ñekac.
- <sup>6</sup> Ehuc fime juwic wahame,  
sambânj â mâreñ honenzañ-jofaekac.
- <sup>7</sup> E qarâ suriñne wândockonec bâfeñneekac,  
â hapetac jawa guruonec bafahareekac.
- <sup>8</sup> Erâ râeme micne bapare gâjoñko ñeekac,  
ehuc ñicfâcne jañere micne bapa qâteekac.
- <sup>9</sup> E ñokac hufiñne bafickeme ficte eri eekac,  
ehuc mume qâricfâcne fuapie bubiañ man-  
aekac.  
Wofuñ mumbiañkeniñ!

## 114

### *Wofuñ e ñicfâcne jowac-jopahuc mâsi bawec*

- <sup>1</sup> Israezi Aigita mâreñkonec faharewecko,  
â Jakobore kikefuñzi ñicguru dânmarac-jeñic  
furune  
jañe beheç-jopawecko,
- <sup>2</sup> Judazi Wofuñte tiri ufuñ ewec,  
â Israezi uucmañ-ticne ewec.
- <sup>3</sup> Eme hâweczi honerâ wisewec,  
â Jordanzi fotikierâ rawec.
- <sup>4</sup> Tiki jañe lama ñicne tinac tarambiñ,  
â mâreñ facne jañe lama motec tinac ki-  
waembiñ.
- <sup>5</sup> Hâwec, go wemoczi bâzâicgume wisekic?  
Jordan, go wemocte fotikierâ rakomec?
- <sup>6</sup> Tiki, ñoñe wemocte lama ñicne tinac  
tarañgopien?

Mâreŋ facne, ɲoŋe wemocte lama motec  
tinac kiwaenɣopien?

<sup>7</sup> O mâreŋ, go Wofunɣe maio qiqiteckec,  
Jakobore Anutu ere maio.

<sup>8</sup> Eki hâcne qânâ hetikieme opâ zâkân ekac,  
erâ buse hetikieme opâ zâŋe fuakac.

## 115

### *Anutu jujune e mocjaha sâsezo*

<sup>1</sup> Nâŋe mâcne, Wofunɣ, nâŋe mâcne,  
gahacne zâŋe ine eri qarawenɣ bâfuacnec,  
aki anonocge â jauŋ fârigere erâ.

<sup>2</sup> ɲicne ɲicne jaŋe wemocte zinuc muninmu:  
“Anutu-jeŋic weni?”

<sup>3</sup> Anutu-nâŋec e sambânko jukac,  
ehuc wiac mana biankeekac sâc bâfuaekac.

<sup>4</sup> Jaŋere nemuqân ine siliwa â gol,  
ɲicmezi ba akic ekicne.

<sup>5</sup> Mic fojareha dâŋ mi muenɣopien;  
zâŋe fojareha wiac mi honeenɣopien.

<sup>6</sup> Hazec fojareha sifu dâŋ mi manaenɣopien;  
sâke-jeŋic fokac, â âsu ine mi manaenɣopien.

<sup>7</sup> Me fojareha wiac ba bâuac mi eenɣopien;  
jaŋe kike-jeŋichec, hata ine mi juenɣopien;  
erâ marac-jeŋiczi dâŋfânân mi eenɣopien.

<sup>8</sup> Qân bâfuaenɣopien jaŋe wâc qân inucne tinac,  
erâ qânɣte mamananac juenɣopien jaŋe qânɣte  
sâc jaha.

<sup>9</sup> O Israe, Wofunɣtao roweckec!

Eki babafic-ŋeŋic â maro-ŋeŋic jukac.

<sup>10</sup> O Aronɣe kikefunɣ, Wofunɣtao roweckeninɣ!

- Eki babafic-ņeņic â maro-ņeņic jukac.
- 11 Wofuņ araņ bacneņgopieņ, ņoņe Wofuņtao  
roweckenieņ!  
Eki babafic-ņeņic â maro-ņeņic jukac.
- 12 Wofuņzi manasuc-nâpohuc juwec,  
eki jambuņ-nâpooomu,  
eki Israe kikefuņ jambuņkeocmu,  
eki Aron kikefuņ jambuņkeocmu.
- 13 E Wofuņ araņ bacneņgopieņ jaņe jambuņ-  
jopaocmu,  
piticne mecne kâcqene mecne jambuņ-  
jopaocmu.
- 14 Wofuņ e basawec- ņopazejec, ņoņe â  
qâricfâc-ņeņic.
- 15 Wofuņ sambâņ â mâreņ bâfuac-jofawec eki  
jambuņ-ņopazejec.
- 16 Sambâņ i Wofuņte sambâņ,  
mâreņ ine ņic nâņâc nârewec.
- 17 Hâmokicne jaņe Wofuņ mi  
mumbianķeņgopieņ,  
niniņ siarereņ haeo raeņgopieņ jaņe mâcne,
- 18 nâņâc ine Wofuņ mutenķenzepeneņ,  
ziņuczia fuņķerâ dameņ tâmiric erahuc  
junzepeneņ.  
Wofuņ mumbianķenieņ!

## 116

*Ņic moc zârâ zâpâonec batarakicne ere danģe  
gae*

<sup>1</sup> Wofuņzi wira wâwâsic-nane manaekacte



- no e mañzi jaunkekopac.
- <sup>2</sup> Oc, e hazec râe-nareekac,  
irec no jupemu sâc wâsickehuc juzepac.
- <sup>3</sup> Hâmocte bitinzi rocnuwec, hâmoc haere ufcizi  
orâñnuwec,  
eme hâhâwic â bipic tatara fua-narewec.
- <sup>4</sup> Eme no Wofunțe zâñe wâsickepo:  
“O Wofun, juju-nane asao roc!”
- <sup>5</sup> Wofun e aki anonochech â tinje,  
Anutu-nâñec e buuruchec.
- <sup>6</sup> Wofun e ñic mañhumuc hone mainj ejareekac,  
no betankehape eki baficnuwec.
- <sup>7</sup> Mañ qâqâtâc-nane, go jujumanagao risiec,  
Wofunzi ehâmo-garekac.
- <sup>8</sup> Go mañ qâqâtâc-nane hâmockonec bataramen,  
zâñeuc-nane bâkereñkemen,  
kike-nane fâfâckeacte sabeckemen.
- <sup>9</sup> Eme zi Wofunțe maio,  
jujune jañere guruo jukopac.
- <sup>10</sup> “No mâretec sâqorekopac,” inuc mupo,  
erâ sifu manasinkepo.
- <sup>11</sup> No mañnane gâckeme mupo,  
“Ñic jañe burechec sasawa.”
- <sup>12</sup> Wofunzi wiac sesic qegeri tahacnuwec,  
irec okacne wemo râcnepemu?
- <sup>13</sup> No wainzi taha bâzi bâfeñnehuc  
Wofunțe zâñe riwaseckepe.
- <sup>14</sup> No ñic ñokacfâcne sasawa jañere maio,

Wofuŋ dâŋ mupaŋkecnepo irec fârine  
bâfuape.

- 15 Mitinjcâc-ticne jaŋere hâmoczi  
Wofuŋte maio furi sâko ekac.
- 16 O Wofuŋ, no gore kiŋaŋŋic jukopac;  
kiŋaŋŋicge no kiŋaŋ narugere ŋokâ.  
Goki kâpâcwâru-nane firuemenj.
- 17 No danjere taha bafisi-garehuc,  
Wofuŋ gore zâŋe riwaseckepe.
- 18 Ŋic ŋokacfâcne sasawa jaŋere maio,  
Wofuŋ dâŋ mupaŋkecnepo irec fârine  
bâfuape.
- 19 I Wofuŋ ufuŋ-ticnere hae zoŋao epemu,  
Jerusalem rune, ŋoŋere ŋondenjko.  
Wofuŋ mumbiankeniŋ!

## 117

### *Ŋicne ŋicne Wofuŋ mumbiankenzepiŋ*

- 1 Ŋicne ŋicne, ŋoŋe Wofuŋ mumbiankeniŋ;  
ŋicguru zenjgoma, ŋoŋe e muafeckenj!
- 2 Aki anonoc-ticnezi nâŋâcnao tâpirihac fuakac,  
Wofuŋte jaŋu fârizi fofo sanaŋ fokac.  
Wofuŋ mumbiankeniŋ!

## 118

### *Râsi sanaŋke-jarerâ mumutenj gae hekiŋe*

- 1 Wofuŋ danje âzâcneniŋ, e uruc jaŋu-ticnehec;  
oc, aki anonoc-ticne fofo sanaŋ fokac.
- 2 Eme Israezi muzejec:  
“Oc, aki anonoc-ticne fofo sanaŋ fokac.”
- 3 Eme Aronje kikefuŋzi muzejec:

“Oc, aki anonoc-ticne fofu sanaj fokac.”

4 Eme Wofuñ arañ bacneenġopien jañe munzepien:

“Oc, aki anonoc-ticne fofu sanaj fokac.”

5 Zâic busâqoc faio juhuc Wofuñ wâsickepo,  
eme Wofuñzi mana- narerâ rambañko  
râecnuwec.

6 Wofuñzi no siñnukacte mi hâwicnukac,  
ñic jañe wemo enareninmu?

7 Wofuñzi no baficnuocte siñnukac,  
irec no sanañkehuc râsifâc-nane saoren ġa-  
jarepemu.

8 Wofuñte dapeñko sosoñke izi fekac,  
ehame ñicko rorowecke izi wahakac.

9 Wofuñte dapeñko sosoñke izi fekac,  
ehame ñicbomboñko rorowecke izi wahakac.

10 Ñicne ñicne jañe zeñgoma somâcnumbin,  
eme Wofuñte zâñeo ġanzañ-jopapo.

11 Jañe orâñnuhuc somâcnumbin,  
eme Wofuñte zâñeo ġanzañ-jopapo.

12 Jañe bañac neñġoc inġucne bârârâñnumbin,  
hârijâc rehacnezi bâruñkeekac inġuc enarem-  
bin,  
eme Wofuñte zâñeo ġanzañ-jopapo.

13 Hâhâwicne decnukupie farazo epo,  
eme Wofuñzi ine baficnuwec.

14 Wofuñ e tâpiri-nane â mumuten-nane;  
e sisipirickonec babatara-nane ewec.

15 A, tinne guru jañere ġoruc bozeo  
saoren â zeri gae fuakac:

- “Wofuŋ mefârenezi gie qicwânzâŋ bakac,  
 16 Wofuŋ mefârenezi faharekac,  
 Wofuŋ mefârenezi gie qicwânzâŋ bakac.”
- 17 No mi hâmpemu, qâricne jupemu,  
 ehuc Wofuŋ wiac bapa- ticne mu-  
 taninkepemu.
- 18 Wofuŋ e zocnehec bâtiŋnuwec,  
 erâ hâmocte meo ine mi râecnuwec.
- 19 Taha ufuŋte motâc ronarenin,  
 eme no ira razirâ Wofuŋ daŋge âzâcnepe.
- 20 Wofuŋte sacmotâc zine hâcne,  
 tiŋne jaŋe ira raziniŋmu.
- 21 Go micnaneo romenŋte daŋge gazakopac,  
 micnaneo rorâ sisipirickonec bataracnumen.
- 22 Ficbapa ŋic jaŋe wâtuŋ surehuc behembiŋ,  
 wâtuŋ izi mi jâmâ wâtuŋ ezejec i!
- 23 Wiac i Wofuŋte michte inuc fuame,  
 ŋiczi honepene mâsi furune ekac.
- 24 Dameŋ zi hâcne Wofuŋzi bâfuawec,  
 irec maŋnao zeri ehuc bubian mananaŋ.
- 25 O Wofuŋ, go bafic-nâpoc!  
 O Wofuŋ, fâri bian fua-nârezejec!
- 26 Wofuŋte michte warekac e mumbiankenan;  
 Wofuŋte fickoneczi jambuŋ-ŋopaŋgopenen.
- 27 Wofuŋ e Anutu, eki tatamac nârewec.  
 Zunzuŋko reso bânđenne rakupie alata  
 zuŋenaoc fisizejec.
- 28 Go Anutu-nane, go hâcne daŋge gazape.  
 Go Anutu-nane, go hâcne muafecgupe.
- 29 Wofuŋ daŋge âzâcnenin, e uruc jauŋ-ticnehec;  
 oc, aki anonoc-ticne fofoc sanan fokac.

# 119

## *Sâcmutâc dâŋte zeri mumuten*

- 1 Hata bahacmâc juenġopien, jaŋere manape  
zerine ekac,  
Wofunġe sâcmutâc hata âteenġopien jaŋe  
hâcne.
- 2 Mumutaninġ dâŋticne bâwâzânġeenġopien,  
jaŋere manape zerine ekac,  
maŋ hâcbuc jaha wira basac ecneenġopien  
jaŋe hâcne,
- 3 wiac hehesicne moc mi ehuc,  
ere kike hata bâjâpeenġopien jaŋe.
- 4 Go mumutâcġe aijakic jaha  
reŋkenanġe mupaŋkemenġ.
- 5 Jei, no dâŋsanaŋge reŋkehuctecne,  
hata paŋnea âtehuc juzapo me!
- 6 Mumupaŋ dâŋge hone dendenġehuc jupemu,  
mimizi nore faio mi feocmu.
- 7 No mumutâc dâŋge tiŋne i mana maŋ eku  
maŋ hâcbuc jaha daŋge gazapemu.
- 8 No dâŋsanaŋge reŋkezo mukopac;  
go mi behecnu sanaŋkezemec!
- 9 Niġ socqâri moczi weninġucko sâcne maŋqaqac  
juocmu?  
E dâŋgere sâcko hata-ticne soŋanġehuc sâcne  
eocmu.
- 10 No maŋ hâcbuc jaha wira basac egareekopac;  
go qataŋnuhanġ mumupaŋge mi qâsuazepac.
- 11 No sâqocne bahuc bugao bazipore,  
dâŋge maŋnaneo qâzuckepe foekac.
- 12 O Wofunġ, no mutenġukopac,  
go dâŋsanaŋge qazu-narezemec.

- 13 Micgere mumutâc dâŋ sasawa,  
i micbipic-nanezi mufuaekopac.
- 14 Mumutaniŋ hatagere aŋacnukac,  
i moneŋ mafare aŋac mamana irec sâc.
- 15 Mumutâc dâŋgere manatâc qâtâc epemu,  
â hatage hone dendeŋnehuc jupemu.
- 16 Dâŋsanaŋge mana ziziwepemu,  
â dâŋgere ninikec mi jupemu.
- 17 Kiŋaŋŋicge ehâmo-narezemec,  
eme jufehuc dâŋge reŋkezepac.
- 18 Zâŋe-nane bătâcnetec sâcmutâc dâŋgere  
qâreŋ bian hone jaŋgeŋkezepac.
- 19 No mâreŋko jaba jukopacte,  
mumupaŋ dâŋge mi bâsoŋke-narezemec.
- 20 Maŋ qâqâtâc-nanezi mumutâc dâŋgere  
dameŋ sâc hâmoŋhuc juekac.
- 21 Njic pepecne â sâwehec jaŋe hanec-jopaekic,  
jaŋe hâcne mumupaŋ dâŋge  
râpeckeŋgopieŋ.
- 22 Mimi busâqoc fua-narekac i nowac roc,  
no mumutaniŋ dâŋge bajuekopac.
- 23 Njic micne jaŋe dâŋ qanarehuc juhapie,  
kiŋaŋŋicge no sifu dâŋsanaŋge manatâc  
qâtâc eekopac.
- 24 Mumutaniŋ dâŋgezi aŋac bâfua-nareekac,  
ehuc uŋ sawaŋ-nane eekac.
- 25 Maŋ qâqâtâc-nanezi gâc wândocko bohotakac;  
irec dâŋgere sâcko mocwâc bâfiriecnu.
- 26 Juju-nanere fuŋne gazape mana-naremeŋ;  
irec dâŋsanaŋge qazu-narec.

- 27 Mumutâcgere hata nowatu-hâmoc,  
eme no mâsi biangere manatâc qâtât epe.
- 28 Buzâiczi maņnane bârokawekacte,  
dângere sâcko basanaņnuc.
- 29 Burecte hata bârârietec taic raha,  
sâcmutâc dâņge qâmie-narec.
- 30 Siocmâc jujure hata ro sakac epo,  
irec mumutâc dâņge mai fonarekac.
- 31 Mumutaniņ dâņgao qohotaekopac;  
o Wofuņ, go manahaņ mi qurutuazepac.
- 32 Go maņnane bânqârâņkekicte,  
sâcmutâc dâņgere hatao âte rapemu.
- 33 O Wofuņ, go dâņsanaņgere hata qazu-narec,  
eme no mi kikizu raku tofanao fisizepac.
- 34 Mamana tahacnutec sâcmutâc dâņge bajuhuc,  
maņ hâcbuc jaha reņkezepac.
- 35 Sâcmutâc dâņgere hatao jowacnuzemec;  
no irec aņac-nane fokac.
- 36 Maņnane fâretec monerņ huhurere andac  
râpeckehuc,  
mumutaniņ dâņgao qohotazejec.
- 37 Zâņe-nane bâtikietec wiac sisirowenao mi  
fizepac;  
ehuc hatagao juju bâfua-narec.
- 38 Araņ bagareņgopierņ jaņe wiac jarezo mu-  
paņkemen,  
wiac irec fârine kiņaņņicge norao  
bâfuazemec.
- 39 Mimihec jujure hâwicnukacte manahaņ  
nowaruzejec;  
gore mumutâc dâņ ine bianne.

- 40 Jâmbomac, no mumutâc dângere mañhâhâñ  
enarekac,  
irec tiñnegezi juju bâfua-narec.
- 41 O Wofuñ, aki anonocgere fârine norao fuazejec,  
â mumupañgere sâcko baficnuzemec.
- 42 Eme mu ruruc enareñgopieñ jañe dâñ sâcne  
bâtikie-jarepemu,  
no gore dâñko hâcne roweckeekopac.
- 43 No dameñ sâc dâñfâri mupemurâ tâpiri mi  
nowac rozemec,  
no mumutiñ dângere mamanac jukopac  
hâcne.
- 44 No sâcmutâc dâñge zuzuhuc bajupemu,  
ehuc moc mi behepemu.
- 45 No mumutâc dângere mu wioc epo,  
irec rambañko sâcne rac warec jupemu.
- 46 Erâ no mimi gañgañ tâmiric ñicwofuñ maio,  
mumutaniñ dângere mu binañ epemu.
- 47 No sâcmutâc dângere añacnuekacte,  
irec dâñ muhuc mana ziziweekopac.
- 48 Erâ sâcmutâc dângere manape fejâmbâñkeekac,  
ehuc dâñsanañgere manatâc qâtâc eekopac.
- 49 Kiñaññicge no dâñ nazameñ irec fârine bâfuaç,  
go enaretec irec woñec juekopac hâcne.
- 50 Mumupañ dâñgezi bâgunucnuwec,  
izi zârâ hâriñko bâmiriñnuekac.
- 51 Ñic sindañne jañe mâretéc mu ruruc ena-  
reñgopieñ,  
eme no ine sâcmutâc dâñge mi  
râpeckeekopac.



- 52 O Wofuŋ, go mumutâc dâŋge esecne mu-  
fuameŋ,  
no irec manasupe bâmiriŋnuekac.
- 53 Njic sindaŋne jaŋe sâcmutâc dâŋge  
râpeckeŋgopieŋ,  
irec mâretec aaricnuekac.
- 54 Jaba mâreŋ-naneo zi jukopacko,  
dâŋsanŋgezi zeri gae-nane eekac.
- 55 O Wofuŋ, no ŋafeo zâŋegere manasuhuc  
foekopac,  
ehuc sâcmutâc dâŋge basanaŋkeekopac.
- 56 Mumutâc dâŋge bajukuhape,  
wiac fâri biaŋ i fua-narewec.
- 57 Wofuŋ, go kâdoc biaŋ-nane;  
irec no dâŋge bajuzo mupaŋkeekopac.
- 58 No maŋ hâcbuc jaha numu-garekopac:  
“Mumupaŋgere sâcko aki anonoc enarec.”
- 59 Go wiac eekic no irec manasurâ,  
mumutaniŋ dâŋge mana maŋ ezo enarekac.
- 60 No ŋeŋec zezepec mi ehuc fâro barâ  
sâcmutâc dâŋge reŋkeekopac.
- 61 Njic sindaŋne jaŋere ufiŋzi orâŋnume,  
sifu sâcmutâc dâŋgere mi nikecnuekac.
- 62 No ŋafe zâzâŋiŋko faharerâ,  
mumutâc dâŋge tiŋne irec  
mumbiaŋguekopac.
- 63 Araŋ bagarehuc mumutâc dâŋge  
reŋkeŋgopieŋ  
jaŋe âgo ejare-fâreekopac.
- 64 O Wofuŋ, aki anonocgezi mâreŋ fusucmawec;  
irec go dâŋsanŋge qazu-narezemec.

- 65 O Wofuŋ, go mumupaŋ dâŋgere sâcko  
kiŋaŋŋicge no ehâmo-naremeŋ.
- 66 No sâcmutâc dâŋge mana zakiekopacte  
maŋqârâŋ â mamana tara qazu-narezemec.
- 67 Go mi bawahacnuhaŋ qac qâsoric ehuc juŋo;  
ziŋuczia ine dâŋge bâjâpekopac.
- 68 Go uruc jaunŋeheczi eehâmo gie baekic,  
irec dâŋsanaŋge qazu-narezemec.
- 69 Pepec-jeŋicheczi micko âkec enarembiŋ,  
no ine mumutâc dâŋge maŋ hâcbuc jaha  
honehuc juekopac.
- 70 Maŋjeŋic râŋgeŋkerâ mumuŋ jâc sahaç iŋucne  
ewec;  
no ine sâcmutâc dâŋgere bubiaŋ fonarekac.
- 71 Goki sowine bawahacnumeŋ;  
iŋuc etecne dâŋsanaŋgere fuŋne manapo.
- 72 Gol â siliwa guru sâkore manape wahaha  
micgere sâcmutâc dâŋte manape fekac.
- 73 Megezi sahaç-nane bâfuarâ ba akic emeŋ;  
zi ine mamana tahacnutec sâcmutâc dâŋge  
manazepac.
- 74 Araŋ bagareeŋgopieŋzi honecnurâ  
aŋaç-jopaocmu,  
noni dâŋge worickehuc juŋo hâcne.
- 75 O Wofuŋ, no manakopac, okac babazuge tiŋne,  
go jauŋ fârigere erâ bawahacnumeŋ.
- 76 Aki anonocgezi bâmiriŋnuzejec,  
kiŋaŋŋicge no mupaŋke-naremeŋ irec sâcko.
- 77 Buurucgezi fisi iqicnume juzepac;  
sâcmutâc dâŋge mana ziziweekopac i.
- 78 Pepecnehec jaŋe maŋgâŋ ro waha âte enarem-  
biŋte,

- goki mimi qaqa ejarezemec;  
no ine mumutâc dânge manasuhuc jupemu.
- 79 Araņ bagareņgopieņ â mumutaniņ dânge  
maņkeņgopieņ,  
jaņe ejaretec norao zuhuckenzepieņ.
- 80 Maņnanezi dâņsanangao paņzâic qohotazejec,  
eme moc mi qurutuazepac.
- 81 Maņ qâqâtâc-nanezi bâbâpiaņgere hâmohuc  
jukac,  
dâņgezi fâri fideteņ eocte woņec juekopac.
- 82 Zâņe-nanezi mumupaņgere fârine honeocte  
fiņpieku betaņkekac,  
ehuc wiokac: “Mo dameņko  
bâmiriņnuocmu?”
- 83 No zopo zuo foku hahaņkeekac iņucne epo,  
erâ sifu dâņsanangere mi nikecnuwec.
- 84 Kiņaņņicge nore ņafe zoaņ wezimuc fokac?  
Fific guguriņ enareņgopieņ jaņere dâņ  
mo dameņko mutaracmu?
- 85 Niç pepecne jaņe wiwitic râe-narembieņ,  
sâcmutâcgere sâcko mi juēgopieņ jaņe  
hâcne.
- 86 Sâcmutâc dâņge i dâņ fârine sasawa;  
jaņe ine bureczi nu jâpec eēgopieņte bafic-  
nuc!
- 87 Jaņe mâreņko juju-nane hetâcnezo embieņ,  
eme sifu mumutâc dâņge mi behekopac.
- 88 Go aki anonocgere erâ juju-nane akickec;  
eme no micgere mumutaniņ dâņ reņkezepac.
- 89 O Wofuņ, gore dâņ i sambâņko  
sanaņe keteņkekiecne fokac.

- 90 Jaun fârige mimiņzi qâric fosanaņkekac;  
 â mâreņ ine hobeteņne râemeņte  
 ņesanaņkekac.
- 91 Gore micdâņte miņecgac ņekac jaha  
 â wiac sasawa jaņe go kiņaņ qagareņgopieņ.
- 92 Sâcmutâc dâņgezi bubiaņ mi qanarezacko  
 ine maņzâiczi sipiricnume omaezapo.
- 93 Mumutâc dâņgere moc mi nikecnuzokac,  
 izi hâcne bâgunucnutec juekopac.
- 94 Go runane jukomecte baficnuc,  
 no mumutâc dâņgere wiohuc juekopac.
- 95 Ņic sindaņne jaņe nuniņte somâ barâ  
 foeņgopieņ,  
 no ine mumutaniņ dâņge maņkehuc  
 juekopac.
- 96 Wiac qarâ biaņ sasawa i sifu babahacne fuame  
 honeekopac,  
 gore sâcmutâc dâņzi ine roma roma bakicne.
- 97 Sâcmutâc dâņgere aņacnuekac i fuņmoc  
 jâmbâņ!  
 Zoaņ zora mana utuckehuc juekopac.
- 98 Sâcmutâc dâņgezi maņqârâņ bâfua-narekume,  
 râsifâc-nane siric-jopaekopac;  
 no tofamâc maņke juekopac hâcne.
- 99 Mamanahec ehuc qaqazufâc-nane  
 qâhuc-jopaekopac,  
 mumutaniņ dâņge mana utuckeekopac irec  
 hâcne.
- 100 Wiac mana wosâehuc ņicraņqa siric-  
 jopaekopac,  
 mumutâc dâņge hone jaņgeņkekopac irec  
 hâcne.

- 101 Kike-nanezi hata sâqocne i me i âtezacte aka  
hecneekopac,  
i dânge reŋkepemurâ iŋuc eekopac.
- 102 Go mumutâc dânge qazu-naremeŋte,  
no moc mi râpeckeekopac.
- 103 Dânge manape aŋac zizine eekac,  
izi baŋacte aŋac sirickekac i!
- 104 Gore mumutâc dâŋzi mamana tara  
bâfuɑ-nareekac;  
irec hata hehesicne geŋke-fâreekopac.
- 105 Dângezi kike-nane lambe ecneekac,  
â hata-naneo tatamac bâfuɑekac.
- 106 No mumutâc dânge tiŋne i bâjâpepemurâ,  
Anutu gore maio mupaŋkehuc mujomirepo.
- 107 No ro waha âte enarekicne;  
o Wofuŋ, go dâŋgere sâcko bâgunucnuc.
- 108 O Wofuŋ, no afeckehuc miczi taha bagarepe  
manatec sâckezejec,  
eme mumutâc dânge qazu-narezemec.
- 109 No dameŋ sâc hâmoczi maicnuekac,  
ehame sâcmutâc dânge mi nikecnuekac.
- 110 Niç sindaŋne jaŋe bitiŋ râe-narembienŋ,  
no ine mumutâc dânge mi râpeckeekopac.
- 111 Mumutaniŋ dângezi merâfâc fofo sanaŋ-nane  
ekac;  
ŋicburenŋ, i buhândâŋ-nane ekac.
- 112 No dâŋsanaŋge reŋkepere maŋnane  
qafeŋkekopac,  
i dameŋ sâc eraku etarapemu.
- 113 Niç maŋ sosohoc jaŋere takicnuekac,  
sâcmutâc dâŋgere ine aŋacnuekac.

- 114 Go dapeņ-nane â maro-nane,  
no dâņge maņzi worickekopac.
- 115 Sâqocne bapa, ņoņe behecnu raniņ,  
eme Anutu-nanere sâcmutâc dâņ reņkepe.
- 116 Mumupaņgere sâcko dopecnutec juzepac,  
eme mamana-nanezi fârimâc eme mi quru-  
tuazepac.
- 117 Basanaņnutec bâbâpiaņ bâfuazepac,  
erâ dâņsanange zuzuhuc jaha bajuzepac.
- 118 Qâsoriehuc dâņsanange râpeckeņgopieņ jaņe  
behec-jopaekic;  
jei, eeatuc gie-jeņic fârimâc eekac.
- 119 Mâreņko ņic sindaņne sasawa jaņere manatec  
jawa eekac;  
irec mumutaniņ dâņgere aņacnuekac.
- 120 Go araņ bagarehuc saħac-nane gâgâmârâekac,  
â mumutara dâņgere mezacnuekac.
- 121 Wiac tiņne â biaņne ewarehuc jupo;  
irec bawahacnueņgopieņ jaņerao mi  
qikiņnuc.
- 122 Kiņaņņicge no sacfozic enarec,  
ehuc penaronheç jaņe mana- jaretec mi  
bawahacnunzepieņ.
- 123 Mumupaņge tiņne irec fârine fuaocte  
zâņe-nanezi fiņpieku betaņkekac.
- 124 Kiņaņņicge no aki anonocgere sâcko wiac  
enarec,  
ehuc dâņsanange qazu-narec.
- 125 No kiņaņņicge jukopacte mamana tara tahac-  
nuc,  
eme mumutaniņ dâņge mana jaņgeņkezepac.
- 126 ņic jaņe sâcmutâc dâņge huckembieņ;

- irec Wofuŋ goki okacne bazu-jarecmurâ  
dameŋne maickekac.
- 127 Irec no sâcmutâc dâŋgere fehuc aŋacnukac,  
gol â gol ematauckekicne irec aŋac-nane wa-  
hakac.
- 128 Erâ no mumutâc dâŋgere sâcko hata tiŋne  
juekopac,  
burec hatane hatane irec takicnuekac.
- 129 Mumutaniŋ dâŋge i eri-ticnehec;  
irec maŋnanezi ira qohotaekac.
- 130 Dâŋgere fuŋne ritupie tatamac fuaekac,  
eme ŋic maŋhumuc jaŋe wiac mana  
jaŋgeŋkeŋgopieŋ.
- 131 No sâcmutâc dâŋgere boc enareekacte  
maŋhâhâŋ ehuc micaaŋ jukopac.
- 132 Norao fotikierâ aki anonoc enarec;  
zâŋegere aŋac-jopaekac jaŋe iŋuc hâcne eja-  
reekic.
- 133 Dâŋgere sâcko hata âte zakierâ juzepac,  
eme wiac hehesicne moczi ŋicbomboŋ mi  
enarezejec.
- 134 Ŋic jaŋe bawahacnunzipiŋte jaŋeraonec  
bataracnuzemec,  
eme no mumutâc dâŋge bâjâpezepac.
- 135 Zâŋe maigezi kiŋaŋŋicge no tamae-narezejec,  
ehame dâŋsanâŋge qazu-narezemec.
- 136 Ŋic jaŋe sâcmutâc dâŋge mi reŋkeŋgopieŋte  
zâŋeuc-nane fusinehec wahahuc foekac.
- 137 O Wofuŋ, go tiŋne rune,  
â okac babazuge sâckoa fuaekac.

- 138 Go mumutaniņ dâņge sâcticne manahuc  
basanaņkemenġ,  
jauņ fârigere sâcko jâmbâņ.
- 139 Kisâfâc-nane jaņe dâņgere nikec-jopakacte  
no bunane bâruņkekac.
- 140 Mumupaņ dâņge i esâicke tarakicne,  
irec kiņaņņicge noni maņzi jauņkekopac.
- 141 No ŋic omane â qarâ suriņne,  
erâ sifu mumutâc dâņge irec mi nikecnuekac.
- 142 Tiņnege i tiņne fofo sanaņ,  
â sâcmutâc dâņge i dâņ fâri qizecne.
- 143 Zâic â zârâ hâriņ bâfuacnuekacko  
sâcmutâc dâņgezi bubiaņ bâfua-nareekac.
- 144 Gore mumutaniņ dâņ i tiņne fohuc juzokac,  
irec mamana tara bâfua-narec, eme sâcne  
jupemu.
- 145 No maņ hâcbuc jaha wira-garekopac: Wofuņ,  
go mana-narec.  
No dâņsanaņge reņkehuc jupemu.
- 146 No wâsicgukopac: Go baficnuc;  
eme no mumutaniņ dâņge soņaņkepe.
- 147 No hae mi fureha fahare wira-gareekopac;  
erâ dâņgere woņec juekopac.
- 148 Nafe zora qâricne fohuc juekopac,  
ehuc mumupaņ dâņgere manatâc qâtâc  
eekopac.
- 149 Aki anonocgere erâ marac fânâņ-nane manac;  
o Wofuņ, mumutiņgere sâcko juju-nane hone  
maiņ ezemec.
- 150 Dâņ qanareņgopieņ ŋic i jaņe  
bâjâpecnuņgopieņ;



- sâcmutâc dânge ine râpeckerâ juengopien.
- 151 Wofuŋ, go ine bâqiŋnurâ jukomec.  
â sâcmutâc dânge i fârinehec sasawa.
- 152 Mumutaniŋ dângezi mârâc jaha mufuame  
manapo;  
Gore dâŋ i fofu sanan foote râemen.
- 153 Zârâ hâriŋ-nane honerâ bataracnuc,  
no sâcmutâc dângere mi nikecnuekac.
- 154 Dâŋnane muku firuecnuzemec,  
erâ mumupaŋgere sâcko juju qâricne tahac-  
nuzemec.
- 155 Niç sindaŋne jaŋe bâbâpianzi mi bâqiŋ-  
jopaekac,  
jaŋe dâŋsanange qâoma ecneengopien.
- 156 O Wofuŋ, go buurucge qârâŋne,  
irec mumutiŋgere sâcko juju tahacnuzemec.
- 157 Bocjahazi fific guguriŋ â râsi enarengopien,  
eme no ine mumutaniŋ dânge mi  
beheekopac.
- 158 No nâme nikecne honec- joparâ  
mamakâcnuekac,  
jaŋe sâcmutâc dânge mi reŋkeengopiente.
- 159 Fitec wareme honec, no mumutâc dânge âgo  
ecnekopac.  
Wofuŋ, go aki anonocgere sâcko juju qâri  
bâfua-narezemec.
- 160 Dânge sasawa qâhâckerâ zâŋene dâŋfâri muzo,  
â mumutâc dânge tiŋne i fofu sanan  
fofâreocmu.
- 161 Niç fekicne jaŋe maŋgâŋ fific guguriŋ ena-  
rengopien,

- nore maŋzi ine dângere maname bipinehec  
eekac.
- 162 No mumupaŋ dângere bubiaŋ manaekopac,  
i mafa sâko bâfuaŋhuc bubiaŋ manaenŋopien  
irec sâc.
- 163 No burecdânte takicnuekac â ma-  
makâcnuekac,  
sâcmutâc dângere ine aŋac manaekopac.
- 164 Gore mumutâc dâŋ tiŋne irec erâ  
zoaŋ sâc arec 7 mumbiaŋguekopac.
- 165 Sâcmutâc gere aŋac-jopaekac jaŋe juju bian  
bâfuaenŋopien,  
hata jupie wiac moczi mi fâfâc-jopaekac.
- 166 No Wofuŋ gore bâbâpiaŋte mamananac jukopac,  
ehuc sâcmutâc dâŋge reŋkehuc juekopac.
- 167 Maŋnanezi mumutaniŋ dâŋge bâjâpeekac,  
irec hâcne mâretec aŋacnuekac.
- 168 No mumutâc â mumutaniŋ dâŋge  
reŋkeekopac,  
go hata-nane i kâuc moc mi baekic.
- 169 O Wofuŋ, mu wâwâsic-nanezi fâ  
bâfuacguzejec;  
eme dângere sâcko mamana tara tahacnuze-  
mec.
- 170 Nunumu-nanezi maigao fisizejec;  
mumupaŋgere sâcko bâpiaŋnuzemec.
- 171 Michipic-naneonec mumuteŋ sâronehec wa-  
hazejec;  
goki dâŋsanaŋge qazu-nareekicte.
- 172 Nameŋ-nanezi dângere zeri gae hezejec,  
sâcmutâc dâŋge tiŋne sasawa fokacte.
- 173 Megezi baficnuocte zawiehuc juzejec,

- no mumutâc dâņge sakarepore.
- 174 O Wofuņ, no bâpâpiaņgere maņhâhâņ ena-  
reekac,  
â sâcmutâc dâņgere bubiaņ manaekopac.
- 175 Mana- naretec juzepac, ehuc  
mumbiaņguzepac,  
â mumutâcgezi baficnuzejec.
- 176 No lama sifuckekicne iņucne qâsoriepore  
go kiņaçicge no basacnuzemec;  
no sâcmutâc dâņgere mi nikecnuekac.

## 120

### *Burec â zika fuame Wofuņ wâsickekicne*

- 1 No zârâ hâriņko juhuc, Wofuņ ziņuc  
wâsickekopac,  
i mana-narezejec:
- 2 “O Wofuņ, ņic michipic-jeņic burecnehec  
â namaņ-jeņic siocnehec,  
jaņeraonec bataracnuzemec.”
- 3 Eeatuc ņic ņoņe Anutuzi wemo eņareocmu?  
Erâ wemo okacne bâfua-ņareocmu?
- 4 Žikare tepe motec mictara,  
erâ tepe motec zockisoņ i!
- 5 Jei, no wemocte Meseke mâreņko jaba jukopac!  
No wemocte Kedera mâreņte qoruc bozeo  
jukopac!
- 6 No damaņ zora, wamare takic-jopaekac,  
ņic iņucne jaņerao juekopac.
- 7 No ņic wamane; erâ dâņ muipiehape  
jaņe zika bâmockeeņgopieņ.

## 121

### *Wofunji bafic-nâpohuc sabec-nâpoekac*

- 1 Tiki mârenkopec qâhânerâ fikopac.  
Babafic-nane wenirec moc wareocmu?
- 2 I Wofuntaonec warekac,  
sambân mârenj bâfuawec eraonec hâcne.
- 3 Eki manaha kikege qirinj mi qaocmu,  
kitaŋge guŋzi mi qâmâckeocmu.
- 4 Manakic, Israe hone kitaŋ ecneekac,  
e guŋ tâmiriczi qâricne hati juekac.
- 5 Wofun e kitaŋge, Wofun e mumucge,  
fâregao domakac hâcne.
- 6 Irec zoaŋko zoaŋzi qa bâzâic mi egareocmu,  
â ŋafeo mosazi wâc mi sipiricguocmu.
- 7 Wofun e sisipiric sasaware sabecguekac,  
e hâcne jujuge sabeckeekac.
- 8 Fahare racmuo â fisi focmuo Wofunji  
sabecguekac,  
dameŋ zi eekaczi erahuc juzokac sanaŋ.

## 122

### *Jerusalem haere bubianj gae*

- 1 Ziŋuc nazapie bubianj manapo:  
“Wofunje ufunjo fenaŋ!”
- 2 Joe Jerusalem, kike-nâŋeczi  
gore sacmaŋko âterâ domambenj.
- 3 Joe Jerusalem, hae sâko heqârerâ bakicne,  
saczi râreckeme qâzuc jaha qin herâ ŋekac.
- 4 Eme kikefunj birine birine feŋgopienj,  
Wofunje kikefunj biri,  
Israe musanaŋkecnekiecne irec sâko,

- Wofunțe zâne danțe mumuten ecnenițe.
- <sup>5</sup> Ira hâcne dângiere eri nețe Țerakac,  
Dawidire kikefun jaņere eri nețe.
- <sup>6</sup> Jerusalem haeo wama foote numuniņ:  
“Gore ejareekac jaņe juhâmonzepiņ.
- <sup>7</sup> Sacmaņgao wama fohuc juzejec;  
ficmaņgao jujuhâmo fozejec.”
- <sup>8</sup> Âgo qomâfâc-nane jaņere erâ  
ziņuc mukopac: “Sacmaņgao wama fozejec.”
- <sup>9</sup> Wofun Anutu-nâņec ufun-ticnere erâ  
jujuhâmo fua-gareocte numukopac.

## 123

### *Anuturao zâne fizo*

- <sup>1</sup> Sambâņ eri neņegao Țekomec;  
gorao qâhâņnerâ fipe hefakac.
- <sup>2</sup> Manakic, kiņaņ motec jaņe bombon-jeņicte  
meo zâne fiņgopiņ,  
â kiņaņ naru jaņe Țokac bombon-jeņicte  
meo zâne fiņgopiņ,  
iņuc hâcne Wofun Anutu-nâņectao,  
buuruc enâreocte zâne fiņuc juēņgopenēņ.
- <sup>3</sup> Buuruc enârec, o Wofun, buuruc enârec!  
Țiczi suņgiņ-nâpokupie gapec-nâpokac.
- <sup>4</sup> Țic zoraņne jaņere âke sisicte  
â Țic maņfefe jaņere mururuc dâņte  
mâretēc gapepec-nâpokac.

## 124

### *Anutu e neņezic-nâņec*

- 1 “Wofuņ e sacfozic mi enâreme muzac  
weniņuc fua-nârezac?”  
Israe, go muc!
- 2 “Ņic jaņe wiac enâreniņte faharembiņko  
Wofuņ e sacfozic mi enâreme muzac,  
3 ine aaric-jeņicte zoc bâruņkewecko,  
qâricne jaha qâcnâponzapiņ hâcne.  
4 Erâ rumizi âke tarac-nâpozac,  
â opâ sâronezi âke utuc-nâpozac.  
5 Erâ opâ sâko jaņe  
qâuruc-nâpo-fârenzapiņ.”
- 6 Wofuņ e micsiec-jeņicko mi râec-nâpowecte  
muten bâteņ ecnezo!
- 7 Wipezi wosaņeņ bapa wisecneekac, iņuc wise-  
jaremben.  
Wiwitic tâcnewec, rambaņko juņgopenen.
- 8 Babafic-nâņec i Wofuņzi jukac,  
sambân â mâreņ bâfuac-jofawec eki hâcne.

## 125

### *Anutuzi Israe ņicfâcne sabec-jopaekac*

- 1 Wofuņtao roweckeenġopien jaņe Zion tiki  
iņucne;  
Zion e qirin mi qahuc qin herâ ņesanaņkekac.
- 2 Tikizi Jerusalem hae orâņkerâ ņeraņġopien,  
Wofuņ e iņuc hâcne ņicfâcne orâņ-jopaekac;  
ziņuczia ekaczi eraziņuc juocmu sanaņ.
- 3 Tiņne juju ņic mâreņ kâdoc qajarekicne i  
ņic sindaņne jaņere ņicwofuņ ġunuzi  
mi soņaņkehuc juzejec.

Wemocte? Ine tiņne juju ņic jaņe wâc eebapa  
sindaņne  
ba bâuac enzipiņte.

<sup>4</sup> O Wofuņ, go ņic bianņe uruc jaun ejarezemec,  
manņeņicko siocmâc fokac jaņe hâcne.

<sup>5</sup> Â qâsorihuc hata hehesicne âteenņopieņ,  
ine Wofuņ goki sâqocne bapa jaņehec  
bârâriec-jopazemec.  
Israe kikefuņko wama fozejec!

## 126

### *Wofuņzi juju hata herisieme bâbâmiriņ fuaekac*

<sup>1</sup> Wofuņzi Zionte kâpâcwâru ņic  
bârisiec-jopaocmuo  
manapene guņ manañgopeneņ tinac eocmu.

<sup>2</sup> Dameņ ira gâgâwizi micnâņec fusucmaocmu,  
â zeridâņzi nameņ-nâņec sakareocmu.

Dameņ ira qâpuc jaņe muniņmu:  
“Wofuņzi wiac fekicne ejarekac.”

<sup>3</sup> Wofuņzi wiac fekicne enârewec,  
irec bubiaņ manañgopeneņ.

<sup>4</sup> O Wofuņ, go juju hata-nâņec herisiec,  
Ĵoaņ Mâreņko opâ hata herisieekic iņuc.

<sup>5</sup> Kiohuc hândâņ tieeņgopieņ,  
jaņe zeri ehuc fârine qa roro eniņmu.

<sup>6</sup> Kikione ejareha wiac ukicne amecke  
raeņgopieņ,  
jaņe zâhec fârine defisihuc zeri bari  
eeņgopieņ.

## 127

### *Anuture jambuŋzi fâri bâbâfua*

- 1 Wofuŋzi fic mi baocmuo,  
     fic bapa ŋic jaŋe gie bâipieninmu;  
 Wofuŋzi hae mi soŋaŋkeocmuo,  
     ruc bapa ŋic e maŋgâŋ guŋqâri juocmu.
- 2 Nŋe maŋgâŋ furicte faharerâ,  
     gie baŋafeku guŋdameŋ jâuruenŋopien,  
 erâ zâic gie bahuc nânâ nâenŋopien.  
     Jorocfâcne jaŋe baku guŋ fohapie jareekac.
- 3 Oi, ŋokâ guru sâko i Wofuŋte taha bian,  
     â bifuŋkonec fuakicne jaŋe wiac furi sâko.
- 4 Socqâri juhuc ŋokâ bâfuac-jopakicne,  
     i zikaŋic tepe motec focnekac irec sâc.
- 5 Moc e i mi basaocmuzi sâcne juhâmoocmu,  
     â râsifâcne jaŋehac tomao dâŋgie bahuc mi  
     qurutuaocmu.

## 128

### *Anutu araŋ bacnehuc sâcne juhâmozo*

- 1 Wofuŋ araŋ bacneenŋopien jaŋere manape  
     zerine ekac,  
     ere hata âtehuc juniŋmu jaŋe hâcne.
- 2 Megezi gie bacmu irec fârine fuame nâcmu,  
     erâ bubian manahuc sâcne juhâmocmu.
- 3 Nonângezi ficmaŋgao domaocmu,  
     i wain jâcne fâri rarau inucne.  
 Qiefâcge jaŋe oliwa gitecne inucne  
     teboge râreckerâ ŋeraniŋmu.
- 4 Manakic, ŋic moc Wofuŋ araŋ bacneocmu,  
     erao jambuŋ inuc hâcne fuaocmu.



- <sup>5</sup> Wofuŋ e Zionko juhuc jambuŋguzejec!  
 Jerusalem haere mazuc mâriri  
 i jufecmu sâc zoaŋne zoaŋne honezemec!  
<sup>6</sup> Nosaŋâcge fuapie honec-jopazemec!  
 Israe kikefuŋko wama fozejec!

## 129

*Râsi jaŋe Israe kikefuŋ fific guguriŋ ecne-bip-  
 iembij*

- <sup>1</sup> Israe e ziŋuc muzejec:  
 “Jaŋe qieonecteaŋ fific guguriŋ enarembij,  
<sup>2</sup> jambomac, jaŋe qieonecteaŋ fific guguriŋ  
 enarembij,  
 erâ sifu mi bawahacnumbij.  
<sup>3</sup> Jaŋe râpe-naneo mâreŋ bâbâfâuc gie bahuc  
 wâczora bâfua rambij.”  
<sup>4</sup> Eme Wofuŋ e ine tiŋne jukacte  
 ŋic sindaŋne repa-jeŋic hetâcnewec.  
<sup>5</sup> Zion qaisockeŋgopien jaŋe sasawa  
 qurutuarâ risie ranzepien.  
<sup>6</sup> Jaŋe ficbupuo qinziŋ fua fuahuc  
 hâmo qaŋac eekac irec sâc enzepien.  
<sup>7</sup> Qinziŋ i moczi moc mi qaŋgopien,  
 me bara bulimakao mi gumec-jopaŋgopien.  
<sup>8</sup> Â sicne fotâc eeŋgopienzi ziŋuc mi muŋgopien:  
 “Wofuŋte jambuŋzi faigao feoc,  
 Wofuŋte zâŋeo jambuŋgunŋopenen.”

## 130

*Kiŋ bebehere nunumu*

- <sup>1</sup> O Wofuŋ, no nombâŋ fâhâŋnao juhuc,  
 go wira-garekopac.

- <sup>2</sup> Wofuŋ, go marac fânâŋ-nane manac,  
owackehuc wâsicgukopac irec hazec râec!
- <sup>3</sup> O Wofuŋ, go kiŋtofa bajunzaŋ muzac,  
mozi moc sanaŋkerâ domazac?
- <sup>4</sup> Erâ gorao ine kiŋ bebehe fokac,  
i ŋic nâŋe go araŋ bagarenaŋte.
- <sup>5</sup> No Wofuŋ woŋeckekopac, maŋnanezi  
woŋeckekac,  
erâ mumupaŋ dânțicne worickekopac.
- <sup>6</sup> Maŋnanezi Wofuŋ woŋeckekac,  
ine ŋafe soŋaŋ jaŋe zoaŋ hejâpeengopieŋ  
i sirickehuc hejâpekopac, i sirickehuc  
hejâpekopac.
- <sup>7</sup> Israe kikefuŋ, go Wofuŋ worickek.  
Wofuŋtao hâcne aki anonoc fokac,  
erao kiwiric roro qârâŋnea fokac.
- <sup>8</sup> Eme e Israe kikefuŋte kiwiric rome  
kiŋțicne tara-fâreocmu.

## 131

### *Niniŋkerâ juju*

- <sup>1</sup> O Wofuŋ, no maŋfefe mi juekopac,  
â pepec zâŋe mi fiekopac.  
No dân wiac game hukicne, nore sâc jâurukac,  
i mu bâuac mi eekopac.
- <sup>2</sup> Mâcne, no maŋnane bâmâteŋkehuc bâniniŋkepo.  
Kogoc moŋ nâ gapec eku neŋgocte qicko  
foekac,  
maŋnanezi irec sâc niniŋkerâ fokac.
- <sup>3</sup> Israe kikefuŋ, Wofuŋ worickezemec,  
ziŋuczia erâ tofamâc erahuc juzemec.

# 132

## *Zioŋ tikire nunumu gae*

- 1 O Wofuŋ, Dawidizi nenenŋ qâqârenŋ ehuc juwec,  
irec manasuzemec.
- 2 Ehuc Wofuŋ, Jakobore Tâpiri wânzânŋ go hâcne,  
mujomire-garehuc ziŋuc muwec:
- 3 “No qoruc boze-naneo biac mi fepemu,  
â fofo-naneo biac mi waha fopemu;
- 4 no sifu mana takirehuc,  
zâŋe-nane guŋ sakarecnepemu;
- 5 ehuc qanaŋ Wofuŋ gore ŋeŋe hae bâfuapemu,  
Jakobore Tâpiri wânzânŋ go hâcne fic moc  
bagarepemu.”
- 6 Oc, nâŋe Efarata haeo,  
qorac tapa katapare biŋe manambenŋ,  
erâ Jara wânenŋko fârine bâfuambenŋ.
- 7 Ajoc, warepie ficticnao razinaŋ,  
kike-ticnere ââtesinŋko dunduŋ hunanŋ.
- 8 O Wofuŋ, go fahare ŋeŋemana haegao rac,  
go â tâpiri qorac tapa katapage.
- 9 Taha bapafâcge jaŋe tiŋne juju hepîe huzejec,  
â mitiŋicfâcge jaŋe zeri bari enzepienŋ.
- 10 Kiŋaŋŋicge Dawidire erâ,  
wokemaŋ ruacnemenŋ e mi sunŋiŋkezemec.
- 11 Wofuŋzi Dawidi dân moc mujomirecnewec,  
dân fârine, moc mi bebehene:  
“Gore bifuŋkonec fuaninŋmu jaŋeraonec moc  
eri ŋeŋegao hepe ŋeocmu.
- 12 Nokâfâcge jaŋe zâzâfic â sâcmutâc dânnane  
qazu-jarepemu i baju sanaŋkeninŋmuo  
ine ŋokâfâc-jeŋic jaŋe inŋuc jaha,

eri ñeñegao tatara tâmiric ñehuc junzepien.”

- 13 Jâmbomac Wofuñzi Zion rowosâewec,  
ehuc ira ñeñe juju eocte zîñuc muhuc  
sakarewec:
- 14 “Ñeñemana hae sanañ-nane zine hâcne,  
irec enarekacte zira ñec juc epemu.
- 15 No nânâ rowañ-ticne fehuc jambuñkepemu,  
hapetacfâcne gumec- jopape nâ gapec  
eniñmu.
- 16 Taha bapafâcne tiñne juju hejarepe huocmu,  
â mitiñicfâc-ticne jañe zeri bari eniñmu.
- 17 Ira hâcne Dawidi tâpiri-ticne mupe fahare-  
ocmu,  
ñicwofuñ wokemañ ruacnehuc tatamac  
bâmockecnepo.
- 18 Râsifâcne mimi qaqa hejarepe huocmu;  
ere qizecko ine eridu sâsârehuc ñeocmu.”

## 133

### *Qoqomâzi qâturerâ juju*

- 1 Honeniñ, qoqomâzi qâturerâ ñec juc eniñmu,  
izi wiac añaçne â bubiañnehec i!
- 2 I wokemañ furi sâko qizecko honñepie,  
irecnec qâniniperâ waha meczâwâ mâmâc  
ruacneekac iñucne;
- Aronçe meczâwâo wahawec hâcne, erâ irecnec  
fotâcnerâ,  
waha ñaqi-ticne mecqañeñne mâmâc ruac-  
newec.
- 3 Erâ wâc Herimonñ tikire titikuc iñucne,  
izi waharâ Zion tiki mâreñ bâgunuckeekac.

Ira hâcne Wofuŋzi jambuŋ fârine jareocte  
muwec,  
juju fofu sanaŋ hâcne.

## 134

*Nafe soŋaŋ jaŋere mumuteŋ gae*

- 1 Ajoc, Wofuŋte kiŋaŋŋic sasawa ŋoŋe Wofuŋ  
mutedŋkeniŋ,  
ŋafeo Wofuŋte ufuŋko domaŋgopieŋ ŋoŋe  
hâcne.
- 2 Meŋeŋic tiri ufuŋkopec bâfeŋneniŋ,  
ehuc Wofuŋ mutedŋkeniŋ.
- 3 Wofuŋ e Zionko juhuc jambuŋguzejec,  
sambân â mâreŋ bâfuac-jofawec eki hâcne.

## 135

*Anutu fârine mocjaha e mutedŋkezo*

- 1 Wofuŋ mumbianŋkeniŋ! Wofuŋte zâŋe  
mumbianŋkeniŋ,  
Wofuŋte kiŋaŋŋicfâc, ŋoŋe mumbianŋkeniŋ.
- 2 Wofuŋte ufuŋko domaŋgopieŋ ŋoŋe,  
Anutu-nâŋec ufuŋ-ticnere hae zoŋao do-  
maŋgopieŋ ŋoŋe!
- 3 Wofuŋ mumbianŋkeniŋ, Wofuŋ e uruc jaŋŋhec.  
Zâŋe-ticne gae hecneniŋ, e miriŋ bianŋhec.
- 4 Wofuŋ e Jakobo sakarewec hâcne,  
Israezi ere eocte bâwosâewec.
- 5 No manakopac, Wofuŋ e kâcŋene;  
Wofuŋ-nâŋeczi nemu sasawa siric-jopakac.
- 6 Wofuŋ e wiac maname sâckeme sâc eekac,  
sambânko â mâreŋko, hâwecko â zâkân zoŋao.

- 7 Eki hâcne mâreṅ qaṅeṅnaonec karorac ejareme  
fahareṅgopieṅ,  
erâ hoere qun bâbâric bâfuaekac,  
â rowaṅ-ticnaonec mânṅân soreme wareekac.
- 8 Eki hâcne Aigita ṅic mârâc fufuafâc-jenṅic  
jopawec,  
ṅic mecne, qowi mecne.
- 9 E Aigita mâreṅ gorao mâsi qâreṅ bâfuaḥuc  
Farao â ṅicfâcne imac-jopawec.
- 10 E ṅicguru bocjaha qâtâtiec-jopawec,  
â ṅicwofuṅ tâpirihec qâhâmoc-jopawec:
- 11 Sihon, Amori ṅic jaṅere ṅicwofuṅ,  
Ogo, Basaṅ mâreṅte ṅicwofuṅ,  
â Kanaaṅ mâreṅte ṅicne ṅicne.
- 12 Erâ mâreṅ-jenṅic merâfâc muḥuc  
Israe ṅicfâcne jarewec.
- 13 O Wofuṅ, gore zâṅe tofamâc foraziocmu,  
Wofuṅ, go zâṅe biṅege mimiṅzi qâric  
foocmu.
- 14 Wofuṅ e ṅicfâcne jaṅere dân dopeckeocmu,  
â kiṅaṅ qaqaḥâcne busâqoc mana-jareocmu.
- 15 ṅicne ṅicne jaṅere nemuqân i siliwa â gol,  
ṅicmezi ba akic ekicne.
- 16 Mic fojareha dân mi muṅgopieṅ;  
zâṅe fojareha wiac moc mi honeṅgopieṅ.
- 17 Hazec fojareha sifu dân mi manaṅgopieṅ;  
erâ micjenṅicko nokafe moc mi fokac.
- 18 Qân bâfuaṅgopieṅ jaṅe qân iṅucne enzepieṅ!  
Erâ qânṅte-mamanac juṅgopieṅ jaṅe wâc  
iṅuc jaha.

- 19 Israe kikefuñ, ñoñe Wofuñ mutenkeniñ!  
 Aron̄te kikefuñ, ñoñe Wofuñ mutenkeniñ!
- 20 Lewi kikefuñ, ñoñe Wofuñ mutenkeniñ!  
 Wofuñ aran̄ bacneengopien, ñoñe Wofuñ  
 mutenkeniñ!
- 21 Zion̄koneczi Wofuñ mutenkezo!  
 Jerusalem haeo juekac e hâcne mutenkezo!  
 Wofuñ mumbian̄keniñ!

## 136

### *Anutu wiac bapa-ticnere dan̄ge âzâcnezo*

- 1 Wofuñ dan̄ge âzâcneniñ, e uruc jauñ-ticnehec;  
 oc, aki anonoc-ticne fofu sanan̄ fokac.
- 2 Nemu jowarurâ Anutu jukac e dan̄ge âzâcneniñ;  
 oc, aki anonoc-ticne fofu sanan̄ fokac.
- 3 Ñicbombon̄ jowarurâ Wofuñ jukac e dan̄ge  
 âzâcneniñ;  
 oc, aki anonoc-ticne fofu sanan̄ fokac.
- 4 Buc mâsi sâko baekac e dan̄ge âzâcneniñ;  
 oc, aki anonoc-ticne fofu sanan̄ fokac.
- 5 Mamanaheczi sambân̄ bâfuawec e dan̄ge  
 âzâcneniñ;  
 oc, aki anonoc-ticne fofu sanan̄ fokac.
- 6 Opâ faio mâren̄ qaratiwec e dan̄ge âzâcneniñ;  
 oc, aki anonoc-ticne fofu sanan̄ fokac.
- 7 Tatamac kâcçene bâfuawec e dan̄ge âzâcneniñ;  
 oc, aki anonoc-ticne fofu sanan̄ fokac.
- 8 Hae fureha guriñne baoc̄te zoan̄ bâfuawec e  
 dan̄ge âzâcneniñ;  
 oc, aki anonoc-ticne fofu sanan̄ fokac.

- 9 Hae ɲafeha gurinɛ baninɛ mosa bâpin  
bâfuac-jopawec e danɛ âzâcneninɛ;  
oc, aki anonoc-ticne fofu sananɛ fokac.
- 10 Aigita mârenko mârâc fufuafâc-jenic jopawec e  
danɛ âzâcneninɛ;  
oc, aki anonoc-ticne fofu sananɛ fokac.
- 11 Nɔnden- jenickonec Israe kikefunɛ baefuc-  
jopawec e danɛ âzâcneninɛ;  
oc, aki anonoc-ticne fofu sananɛ fokac.
- 12 Mesananɛ-ticne bâfennerâ inɛc ejarewec e  
danɛ âzâcneninɛ;  
oc, aki anonoc-ticne fofu sananɛ fokac.
- 13 Hâwec Bâbâronɛ bâfâuckeme jajahec epic e  
danɛ âzâcneninɛ;  
oc, aki anonoc-ticne fofu sananɛ fokac.
- 14 Israe guru ejareme zâzâninɛ jaha fotâcneminɛ e  
danɛ âzâcneninɛ;  
oc, aki anonoc-ticne fofu sananɛ fokac.
- 15 Farao â ɲicfâcne Hâwec Bâbâronko  
sâroc-jopame humbinɛ e danɛ âzâcneninɛ;  
oc, aki anonoc-ticne fofu sananɛ fokac.
- 16 Nɛicfâcne mârenɛ tuhuo jowac-jopame rambinɛ e  
danɛ âzâcneninɛ;  
oc, aki anonoc-ticne fofu sananɛ fokac.
- 17 Nɛicwofunɛ kâcɛene jopa jâpec ejarewecte danɛ  
âzâcneninɛ;  
oc, aki anonoc-ticne fofu sananɛ fokac.
- 18 Nɛicwofunɛ zânɛ binɛhec qâhâmoc-jopawecte  
danɛ âzâcneninɛ;  
oc, aki anonoc-ticne fofu sananɛ fokac.



- 19 Amori ñic jañere ñicwofuñ Sihon qawecte danje âzâcneniñ;  
oc, aki anonoc-ticne fofu sanañ fokac.
- 20 Basañ mârenñte ñicwofuñ Ogo qawecte danje âzâcneniñ;  
oc, aki anonoc-ticne fofu sanañ fokac.
- 21 Erâ mârenñ-jeñic merâfâc muhuc ñicfâcne jarewecte danje âzâcneniñ;  
oc, aki anonoc-ticne fofu sanañ fokac.
- 22 Kiñaññic-ticne Israe mârenñ merâfâc râcnawecte danje âzâcneniñ;  
oc, aki anonoc-ticne fofu sanañ fokac.
- 23 Eki hâcne qarâ suriñne juhapene manasuc-nâpowec;  
oc, aki anonoc-ticne fofu sanañ fokac.
- 24 Erâ râsifâc-nâñec jañere meonec batarac-nâpowec;  
oc, aki anonoc-ticne fofu sanañ fokac.
- 25 Eki hâcne wiac jujune sasawa nânâ gumec-jopaekac;  
oc, aki anonoc-ticne fofu sanañ fokac.
- 26 Sambâñte Anutu danje âzâcneniñ;  
oc, aki anonoc-ticne fofu sanañ fokac.

## 137

### *Judañic Babilonñ mârenñko juhuc makuc gae hem-biñ*

- <sup>1</sup> Babe mârenñte opâ meçnao,  
Zionñte manasuhuc kiohuc ñembenñ.
- <sup>2</sup> Ehuc kakikic jâc tieñnao,  
gita-nâñec qetickepene domawec.

3 Ocna rucnâpombiņ jaņe gae henante  
munârembiņ,  
bâbâzâicfâc-nâņec jaņe zeri enante ziņuc  
nâzâmbiņ:  
“Zionte gae-ņeņic moc hepīe mananaņ.”

4 Nâņe weniņuc Wofuņte gae moc  
mâreņ jabao juhuc henaņmu?

5 Jerusalem, gore nīkecnuocmuo īne  
mefâre-nane hâmo qaņac ezejec.

6 Go mi maņguhuc jupemuo,  
me Jerusalem haere manape  
aņacte micne sâko mi eocmuo īne  
namen- nanezi ņaņarac-naneo bohotazejec.

7 Wofuņ, go Jerusalem hae imackembiņ  
dameņ ira Edomte qâricfâc jaņe  
wīac embiņ, ī manasu-jarezemec.  
Ziņuc wirambiņ: “Qâropieniņ, qâropieniņ,  
wâtuņne herisie-fâreniņ!”

8 Babe rune, īma qaqa!  
Moczi nâņe enâremēņ ijaha egareocmu  
e juhâc qâhâmozejec!

9 Moczi kogocfâcge qânâo hefâuc-jopaocmu  
e juhâc qâhâmozejec!

## 138

### *Anutu buuruc-ticnere danġe gae*

1 Wofuņ, no maņ hâcbuc jaha danġe gazape,  
nemu jaņere maio mumumbiāņ gae  
heġarepe.

2 Tiri ufuņġaopec dunduņ hupe,

- ehuc aki anonoc â jauņ fârigere erâ,  
zâņege mumbianķepe.  
Go zâņege â mumupaņ dâņge bafaharetec,  
wiac sasawa qâhuckerâ fewec.
- <sup>3</sup> No wira-garepo damaņ ira micnaneo romeņ,  
â maņte tâpiri bâsoka-naremeņ.
- <sup>4</sup> Mâreņte ņicwofuņ sasawa jaņe micdâņge man-  
ambiņte,  
Wofuņ, go mumbianķunzepieņ.
- <sup>5</sup> Jaņe Wofuņ wiac bapa-ticnere gae henzepieņ;  
Wofuņte eri tatamac i fekiecne sâko hâcne.
- <sup>6</sup> Wofuņ e fekiecnezi wahakicne hone maiņ eja-  
reekac,  
maņfefe ine taicko hone tarac-jopaekac.
- <sup>7</sup> No zârâ hârîņ maņko juhape,  
go juju-nane hone kitaņ eekic;  
râsifâc-nane imañ gomaņ-jeņicte,  
mege sicnehuc aka hejareekic;  
mefâregezi baficnuekac.
- <sup>8</sup> Wofuņ, go bâbâpiaņ giege norao bataracmu.  
O Wofuņ, aki anonocge fofu sanaņ foekac;  
go megere gie mi behezemec.

## 139

### *Wofuņ e mamana-fâre â jujufâre*

- <sup>1</sup> O Wofuņ, go gufu koparic enareekic  
â mana jaņgeņnuekic.
- <sup>2</sup> No waha ņeekopac me fahare domaekopac i  
manaekic,  
â mamasasu-nane taicko juhuc hone tarae-  
kic.

- <sup>3</sup> Hata juju-nane â fofomana-nane ba esâic ecneekic,  
 â wiac eenanere kâuc moc mi baekic.  
<sup>4</sup> Â dân moc namen-naneo mi fua tâcneha,  
 Wofuñ, goki biac pañzâic jaha mana  
 jañgeñkeekic.  
<sup>5</sup> Go râpe-naneo â mai-naneo somâcneukic,  
 â mege nore faio râeekic.  
<sup>6</sup> Wiac irec fuñne game hukicne ehuc siricnukac,  
 â fekicne jâmbân ekacte manapemurâ  
 qatatañnekopac.  
<sup>7</sup> No Mârôge beherâ wena moc razapo?  
 Me zâñe maige wisecnehuc wena moc  
 soñkezapo?  
<sup>8</sup> Sambânko fezapoo go ira maicnunzan;  
 hâmoc haeo hu fozapoo go bâfuacnunzan  
 wâc.  
<sup>9</sup> Furic qânikiñte fakec faio raku,  
 hâwec qañeñnao fisi ñezapoo,  
<sup>10</sup> ine ira wâc gore mezia jowa qatañ enarezac,  
 â mefâregezi bâwâzâñnuzac jaha.  
<sup>11</sup> No zîñuc muzapo: “Duñdapâczi bârârâñnuoc,  
 â tatamac forakac i ñafe-fâreoc,”  
<sup>12</sup> eme sifu dapâczi gore maio dapâc mi ezac,  
 â ñafe i honetec zoañ jaha ezac;  
 dapâczi gorao tatamac hawari eekac hâcne.  
<sup>13</sup> Goki hâcne râpe hândân-nane ba akic emen,  
 neñgoc bumañko go gahac fuñkerâ  
 qâhâcnumen.  
<sup>14</sup> Go mâsi qâreñge qeñ bipinehecte danje gaza-  
 kopac,

- wiac bapage qame hukicne!  
 Mañ qâqâtâc-nane wâc hone jañgeñkeekic.
- 15 Me kike-nanere fuñnere kâuc mi baekic;  
 no soñsoñko bâfuacnukicne,  
 neñgocte bumañko basaricnukicne.
- 16 Zâñgegezi juju-nanere bâpâñ honemen,  
 â gore papiao mârenko juju-nanere  
 3oan gie bapa damen  
 i qanan birickekicne fowec.
- 17 O Anutu, mamasugere manape furi sâko  
 ekac!  
 Zare-ticne i qeñ bipinehec!
- 18 Wemocko wosezapo, moñgeñ sirickekac!  
 No mana qâqârerâ gohec jaha jupemu.
- 19 O Anutu, go ñic sindañne jopanzañ me,  
 â socnânâ jañe behecnu ranzapiñ me!
- 20 Jañe hâcne zaubac egarengopien,  
 jañe sâqocne mañkehuc pepec ega-  
 reengopien.
- 21 O Wofuñ, gore takic-jopaekic i jañere mi takic-  
 nukac me?  
 Â go musuacguengopien jañere mi ma-  
 makâcnukac me?
- 22 Jañere mamana sâqoc fârine bajukopac,  
 mana-jarepe râsifâc-nane engopien.
- 23 O Anutu, ba esâic enarerâ mañnanere fuñne  
 manac,  
 esâicnurâ mamasasu-nane mana jañgeñkec.
- 24 No hata hehesicnao juzipore hone wosâc ec,  
 erâ juju sanante hatao jowacnuc.

## 140

*Wofuŋji kisâ sâqocne jaŋere ŋezic-nâpozejec*

- 1 O Wofuŋ, go ŋic sâqocne jaŋeraonec bataracnuc,  
ŋic qac momorihec zika-jeŋicte ŋezicnuc.
- 2 Jaŋe manjeŋiczi dâŋ repicne birickeŋgopieŋ,  
ehuc zika zuzuhuc bâiŋneŋgopieŋ.
- 3 Jaŋe namen-jeŋic qâteckepie homare zune  
iŋucne eekac,  
â bipic-jeŋicte maŋnao qotâre micopâ fokac.
- 4 O Wofuŋ, go ŋic sindaŋne mejeŋicte sabecnuc,  
ŋic qac momorihec zika-jeŋicte ŋezicnuc;  
jaŋe kike-nane qataraniŋte manasuŋgopieŋ.
- 5 Ŋic maŋfefeheczi bitiŋ râe-narembiŋ,  
uficko jowapemurâ fâre-narembiŋ,  
â hatamecko nombâŋ ronarembiŋ.
- 6 No Wofuŋ âzâcnekopac: Go Anutu-nane;  
o Wofuŋ, go wira wâwâsic-nanere hazec  
râec!
- 7 O Wofuŋ, nore Wofuŋ, babafic sanaŋ-nane,  
go zika damenko sabecnumeŋ.
- 8 O Wofuŋ, ŋic sindaŋne aŋac-ticnere fârine mi  
fuazejec,  
wiac sâqocne maŋkekac i fâri fideteŋ mi eze-  
jec.
- 9 Râsi jaŋe orâŋnuhuc pepec erâ mi bawahac-  
nunze pieŋ,  
micdâŋ-jeŋic hehesicne izi ŋerisierâ rune  
imac-jopazejec.
- 10 Mutec zoc kinezi waha qofac-jopazejec;  
tunjopatec nombâŋko hurâ mocwâc mi fa-  
harenze pieŋ.

- 11 Mumusoriņ ņic moczi mâreņko sananķerâ mi domazejec;  
 ņic qac momorihec e zârâ zâpâzi qeņfâfâc jaha  
 dope-ticne qatarame waha qarâ fozejec.
- 12 No manakopac, Wofuņzi ņic qarâ suriņne dâņticne dopeckeocmu,  
 â ņic hapetac ņezickehuc dâņticne mutiņkeocmu.
- 13 Jâmbomac, ņic tiņne juju jaņe gore zâņe danģe âzâcneniņmu,  
 â ņic siocmâc jaņe maigao ņec juc eniņmu.

## 141

### *Wofuņ e sâqocnaonec bâhoc-nâpozejec*

- 1 O Wofuņ, no wâsicgukopac, fâro jaha ware baficnuc;  
 wira-garepe marac fânâņ-nane manac.
- 2 Nunumu-nanere manatec hosâc âsu bianģ ezejec,  
 me bâbâfeņke-nanezi ņafere taha bâzi egarezejec.
- 3 O Wofuņ, go micnane rucbapa râecnezemec,  
 bipic-nanere motâc soņanģehuc juzemec.
- 4 Maņnanezi wiac sâqocne mi worickezejec;  
 eebapa sindaņne ba bâuac mi ezepac;  
 gie hehesicne baenģopienģ jaņehec ââgo ehuc  
 jaņeraonec wiac aņacne ro nâc ezore takic-  
 nuzejec.
- 5 Ņic tiņne juekaczi urucko qa bâtiņ me mu bâtiņ enarezejec,

ņic sindaņnezi ine qizec-nane tokic mi ruac-  
nezejec.

Nunumu-nanezi eebapa-ticne sindaņne  
zuzuhuc jaha râsi ecneekac hâcne.

<sup>6</sup> Eme dâņ mumutara jaņere meo râec-jopapie  
ziņuc mananiņmu: Wofuņte dâņ i fârine.

<sup>7</sup> Qânâ hefâuckerâ dâkâne behepie iriņ tierâ  
foraekac,  
siec-jeņic iņuc behepie hâmoc haere motâcko  
foocmu.

<sup>8</sup> No ine zâņe gorao fihuc jukopac, o Wofuņ Anutu;  
dapenġao soņkekopac, juju-nane hâmoc mi  
behecneec.

<sup>9</sup> Sâqocne bapa jaņe nombâņ bitiņ enareņgopien,  
irec sabecnuzemec.

<sup>10</sup> No furu juhape,  
ņic sindaņne jaņe jaņacne bitiņzi kicjopaze-  
jec.

## 142

### *Râsimanġko juhuc Wofuņ wâsickekicne*

<sup>1</sup> Hahaņne bahuc Wofuņ dâņ âzâcnekopac,  
erâ wâc hahaņne bahuc Wofuņ  
wâsickekopac.

<sup>2</sup> No mu huacbuc-nane guruckecnekopac,  
ehuc zârâ hâriņ-nane mufuacnekopac.

<sup>3</sup> No maņnane ġâckehame goki ine fuņne-nane  
manakic;  
no hatagâņ juekopacko jaņe kamierâ bitiņ  
râe-narembiņ.

<sup>4</sup> No fâreopec fihuc ruc bakopac,  
eme moczi hone zâņitac mi enarekac;



sâsâoc moc bâfuapemurâ basakopac;  
 moczi hone jaun mi enarekac.

<sup>5</sup> O Wofuŋ, no wâsicgukopac, ehuc mukopac:  
 “Huec-nane go, juju mârenŋe kâdoc-nane go.”

<sup>6</sup> No betanŋekopacte wâwâsic-nane manac.  
 Jâpecnuenŋopien jaŋere meonec bataracnuc;  
 jaŋe sananŋehuc siricnuŋopienŋ.

<sup>7</sup> Kâpâcwâruec firuecnu, c  
 eme zâŋege muafeckepemu.

Goki ehâmo-narecmuo ine  
 tiŋne jaŋe fisi orâŋnuniŋmu.

## 143

*Wofuŋ e sahacko â maŋko bafic-nâpoocte nu-  
 mucnezo*

<sup>1</sup> O Wofuŋ, go nunumu-nane manac,  
 wâwâsic-nanere hazec râec!  
 Jaun fârigere sâcko micnaneo roc,  
 erâ tiŋnegere sâcko.

<sup>2</sup> Kiŋanŋicge nohec dâŋgie mi bac,  
 ŋic jujune moczi maigao bahacmâc mi jukac.

<sup>3</sup> Jei, râsizi maŋ qâqâtât-nanere wosaŋeŋ bakac,  
 juju-nane qâfieme mârenŋko waha qakac,  
 dapâcko râecnume esecne hâmombiŋ jaŋere  
 sâc ekopac.

<sup>4</sup> Irec maŋnane gâckeme  
 bu zazamaŋ-nane fâuckezo ekac.

<sup>5</sup> No dameŋ ranŋanere manasukopac,  
 gie bameŋ i maŋzi honehuc ŋekopac,  
 wiac ebac emeŋ irec manatâc qâtât ekopac.

<sup>6</sup> No menane goraopac sicnekopac,

maᅇ qâqâtâc-nanezi gore ecnekac,  
i mâreᅇ hahanᅇkekiyezi opâre hâmoekac irec  
sâc.

- <sup>7</sup> O Wofuᅇ, go micnaneo biac rozemec,  
maᅇnane omaekac!  
Zâᅇ maige mi bâsonᅇke-narec,  
nombânᅇko huenᅇgopieᅇ jaᅇ inᅇucne ezipore.
- <sup>8</sup> No gorao roweckekopacte  
furictea aki anonocge nowatuzemec.  
Hata jupemurâ mukic i qazu-narezemec;  
maᅇnane gorao sâsepe hefakac.
- <sup>9</sup> O Wofuᅇ, râsifâc-nane jaᅇere meonec batarac-  
nuc;  
no gore dapeᅇko sonᅇkekopac.
- <sup>10</sup> Go nore Anutu jukicte gore micrereᅇ qazu-  
narec;  
Mâro bianᅇgezi hata wâwânᅇᅇko jowacnuze-  
jec.
- <sup>11</sup> O Wofuᅇ, go zâᅇgere erâ juju-nane hone kitanᅇ  
ecnezemec!  
Tiᅇgere sâcko zârâ hârîᅇkonec baefucnuc.
- <sup>12</sup> Erâ uruc jaᅇgere sâcko râsifâc-nane  
bâsirowec-jopazemec,  
â fific bacnuenᅇgopieᅇ jaᅇ omaec- jopa-  
fârezemec,  
noni gore kiᅇaᅇ qaqa jukopacte.

## 144

### *Mumuteᅇ â nunumu gae*

- <sup>1</sup> Wofuᅇ qânâ sanaᅇ-nane e mutenᅇkezo;

- e menane juju giere baafeckewec,  
 â memotec-nane zika qazucnewec.
- <sup>2</sup> E tâpiri-nane â huec-nane,  
 e hae sanaņ-nane â babafic-nane,  
 maro-nane â rorowec-nane;  
 e ŋicne ŋicne rurumaņ-naneo râec-jopawec.
- <sup>3</sup> O Wofuņ, go ŋic e wemo macticnere manasuc-  
 nehuc,  
 hone maiņ ecneekic?
- <sup>4</sup> Ŋic e nokafe iņucne sawa mac,  
 â juju damaņ-ticnezi nâkumuc fotâcneekac  
 irec sâc.
- <sup>5</sup> Wofuņ, go sambâņ bârâriehuc tara wahac;  
 tiki bâuac-jopatec hosâc qaniņ.
- <sup>6</sup> Râsifâcge bâbâric wicke-jarehuc bâtâtiēc-jopac,  
 tepe motecge qâtâcne-jaretec siņsaņ qaniņ.
- <sup>7</sup> Faicnec mege sicnerâ ro baefucnuc,  
 rumi sâkoonec fâre surucnuc,  
 ŋic jabane jaņere meonec bataracnuc.
- <sup>8</sup> Jaņe micbipic-jeņiczi gibioc dâņ muęgopieņ,  
 â mefâre-jeņiczi eeatuc gie baęgopieņ.
- <sup>9</sup> O Anutu, no gae qâricne moc hefua-garepe,  
 gita mucne teņ izi musi bagarepe.
- <sup>10</sup> Goki ŋicwofuņ zikao sasanaņ tahac-jopaekic,  
 go kiņaņŋicge Dawidi zikao ŋezickeekic.
- <sup>11</sup> Go hâmoc bâbâfua zika irec ŋezicnuzemec,  
 â ŋic jabane jaņere meonec bataracnuzemec;  
 jaņe micbipic-jeņiczi gibioc dâņ muęgopieņ,  
 â mefâre-jeņiczi eeatuc gie baęgopieņ.
- <sup>12</sup> Ŋokâfâc-nâņec jaņe socqâri juhuc

- zarenşuc inşucne soka fienezepien,  
 â otâfâc-nâñec jañe erific tuturuñnao  
 metâ qârenş heengopien, inşucne fuanzepien.
- <sup>13</sup> Rowañfic-nâñecko nânâ mâriri fusucmame  
 dameñne dameñne nâhuc junzepenenş.  
 Lamafâc-nâñec jañe sawe mâririackerâ,  
 tausenş â teñ tausenş fuanzepienş.
- <sup>14</sup> Bulimakaofâc-nâñec jañe kiwechec erâ,  
 motec saħac furu bianşne rohuc junzepienş;  
 hae zoññ-nâñecko ki uu moc mi fuazejec.
- <sup>15</sup> Niçguru wiac inşuc fua-jareme juhâmoniñmu,  
 Wofuñzi Anutu jujareha juhâmoniñmu hâcne.

## 145

*Anutu sambânş mârenş soñññ- jofaekac e  
 muafeckezo*

- <sup>1</sup> Anutu-nanezi Wofuñ Şâko jukic, go muafecgupe,  
 ehuc zâñeşge tatara tâmiric mumbianşkepe.
- <sup>2</sup> No zoañne zoañne mugac bagarehuc jupe,  
 ehuc zâñeşge tatara tâmiric mutenşkepe.
- <sup>3</sup> Wofuñ e kâcşene, e mutenş bâtenş ecnezo,  
 sosoka-ticnere sâc mi mamana tarane.
- <sup>4</sup> Mimiñne jañe qâric guru wiac bapage  
 musoka-jare rahuc junzepienş,  
 â mâsi sâkoge mutaniñke-jarenzepienş.
- <sup>5</sup> Şai zoñzoñşgere eri tatamac bianşte,  
 â mâsi bapagere manatâc qâtâc ehuc  
 juzepac.
- <sup>6</sup> Niçzi gie qeñ bipinehec baekic irec muc manac  
 enzepienş,

- â noni kâcçene sâko jukic irec dân binan epemu.
- 7 Janê uruc jaunje guru fufusuc irec binê munzepien,  
â tiñnegere zeri gae henzepien.
- 8 Wofun e aki anonoc â buuruchec,  
kimbenj biac mi qaekac â manjaun-ticne fe-  
kicne.
- 9 Uruc jaun-ticnezi mâmâc sâko rocjopaekac,  
â meqârenfâcne busâqoc mana- jare-  
fâreekac.
- 10 Wofun, go meqârenfâcge janê zengoma danje gazanzepien,  
â mitiñicfâcge sasawa janê mutengunzepien.
- 11 Gurin bapagere eri tatamac muafeckenzepien,  
â tâpirige musokanzepien.
- 12 Eme gie tâpiriheç baekic izi mârenñic hazec-  
jenjicko huzejec,  
â gurin bapagere eri tatamacte kâuc mi banzepien.
- 13 Gore uucmanj i uucmanj fofu sanan,  
â gurin bapage i mimiñzi qâric fohuc juocmu.
- Wofun e dânticne siocmâc sasawa,  
â wiac bapa-ticne sasawa i qârenj bianj.
- 14 Wofun e rânđinkezo eengopien janê dopec-  
jopaekac,  
â badapec- jopakicne janê bafaharec-  
jopaekac.
- 15 Zengoma gorao zânje fiengopien,  
goki damen mukicnao nânâ jarecmurâ.
- 16 Go mege baratieekic,

- eme wiac jujune sasawa jaņe  
nâ aņac eku gapec-jopaekac.
- 17 Wofuņ e tiņne juhuc wiac-ticne ebac efâreekac,  
e uruc jaunheç juhuc gie-ticne bafâreekac.
- 18 Wofuņ e mu wâwâsic ecneenġopieņ,  
jaņe sasawa fisi qâtec-jopaekac,  
siocmâc mu wâwâsic ecneenġopieņ jaņe  
hâcne.
- 19 Araņ bacneenġopieņ sasawa jaņe wiac  
muenġopieņ i jareekac,  
wiwira-jeņic manarâ bafic-jopaekac.
- 20 Wofuņ e maņzi jaunkeenġopieņ jaņe  
sasawa hone maiņ ejareekac,  
ņic sindaņne jaņe ine bâsirowec-jopaekac.
- 21 No micnanezi Wofuņte zâņe biņe  
mutaniņkezepac,  
â mâreņņic sasawa jaņe tiri zâņe-ticne  
tatara tâmiric mutenkehuc junzepieņ.

## 146

### *Wofuņtao roweckezo*

- 1 Wofuņ mutenkeņiņ!  
Maņ qâqâtâc-nane go Wofuņ mutenkeç!
- 2 No jufehuc jupemu sâc Wofuņ mutenkezepac,  
juju fonareocmu sâc Anutu-nane zeri gae  
hecnezepac.
- 3 Nõņe ñicbombõņ jaņerao mi roweckenzepieņ,  
mâreņņic jaņe bafic-nâponiņte tâpiri mi fo-  
jarekac.
- 4 Nokafe-jeņic qândâņkeme wândocko risieniņmu,  
eme zoaņ ijaha dâņ birickembiņ i omaeocmu.

- 5 Moc e Jakobore Anutuzi babafic-ticne ekac,  
â Wofuñ Anutu-ticne worickehuc juekac,  
ñic inuçnezi sâcne juhâmooomu.
- 6 Wofuñ eki hâcne sambâñ mâreñ bâfuac-jofawec,  
erâ hâwecmañko wiac fokac i bâfua-fârewec,  
erâ hec hetikic tâmiric siocmâc juekac.
- 7 Eki ro waha âte ejarekicne ñezic-jopaekac,  
â tac qararacne nânâ bâfua-jareekac;  
Wofuñzi niñgiñ-jopakicne firuec-jopaekac.
- 8 Wofuñ e zâñe tiñtuñ zâñe fifi bacjopaekac,  
Wofuñ e badapec- jopakicne bafaharec-  
jopaekac,  
Wofuñ e tiñne juju mañjauñ ejareekac.
- 9 Wofuñ e ñic jabane hone soñañ ejareekac,  
â hozec bekâ dope hutuñ ejareekac;  
ñic sindañne mamana biri-jeñic ine hesifuck-  
eekac.
- 10 Wofuñ e guriñ bapa gie bahuc juocmu sanañ;  
Zioñ gore Anutu e mimiñzi qâric inuç erahuc  
juocmu.  
Wofuñ mutenkeniñ!

## 147

*Anutu bapafâre ere uruc jauñ â mañqârâñ  
muafeckezo*

- 1 Wofuñ mutenkeniñ! Anutu-nâñec gae hecnezo i  
añacne;  
mumuten gae hezo i biankekec â  
sâcke-hâmokac.
- 2 Wofuñ e Jerusalem hae sesuc heqârekec,

- e Israe ñic bătătiec-jopakicne i  
 qânusuc-jopakac;  
<sup>3</sup> bu heheric ejarekicne jañe bâmunañ-jopakac,  
 ehuc wicjenic foñke-jarekac.  
<sup>4</sup> E bâpiñ zare-jenic musanañkeekac,  
 ehuc zâñe-jenic mufâreekac.  
<sup>5</sup> Wofuñ-nâñec e kâcçene, â tâpiri sâko-ticnehec,  
 erâ mamana tara-ticne sâc tâmiric.  
<sup>6</sup> Wofuñ e bawahac-jopakicne dope hutuñ eja-  
 reekac;  
 ñic sindañne ine qâfiec-jopame mâreñko  
 waha foengopien.
- <sup>7</sup> Wofuñ danje gae bâteñnerâ hecneniñ,  
 Anutu-nâñec gitazi musi bacneniñ!  
<sup>8</sup> E karoraczi sambâñ bêsâockeekac,  
 ehuc mâreñte biñe hoe bâuuaekac,  
 â tikio qinziñ mume wefuekac.  
<sup>9</sup> E qowi nânâ bâuua-jareekac,  
 kâec kâec motecne jañe wiracnepie inuc jaha  
 ejareekac.  
<sup>10</sup> E becâsic tâpiri-ticnere añac mi manaekac,  
 â ñicte tâpiri wânzâñ hone añac mi eekac;  
<sup>11</sup> e arañ bacneengopien â aki anonoc-ticnere  
 mamanac juengopien,  
 jañere ine añackeekac.
- <sup>12</sup> Jerusalem, go Wofuñ mumbiankec,  
 Zion, go Anutuge zeri gae hecneç!  
<sup>13</sup> E haesacgere motâc basanañkewec,  
 â haemañgao ñokâfâcge jambuñ-jopawec.  
<sup>14</sup> E mârengere mao wama bâuawec,  
 â nânâ fâri hândâñne gumeqinquekac.



- 15 E mumutâc dâñticne mâreñko soreekac,  
eme micdâñ-ticnezi zocnehec gasackeekac.
- 16 E sinou soreme kateñ injucne wahaekac,  
erâ wâc aisi uucne zafe tinac tieekac.
- 17 E aisi hândâñne qânâ hândâñ tinac wickeekac,  
eme mâmâteñ fuame mozi sanañkerâ do-  
maocmu?
- 18 Erâ ekizia mupañkeme aisi hândâñzi opâ eekac,  
â mânâñ-ticne soreme opâ fusinehec fisiekac.
- 19 E dâñticne Jakobo mufuacnewec,  
Israezi dâñsanañ â mumutâc dâñticne man-  
awec.
- 20 Njicguru gâcne jañgerao injuc moc mi ewec,  
irec jañe mumutâc dâñticnere kâuc  
baeñgopieñ.  
Wofuñ mutenkeniñ!

## 148

### *Wofuñte meqâreñfâc sasawazi e mutenkeniñ*

- 1 Wofuñ mutenkeniñ!  
Sambâñkonec Wofuñ mutenkeniñ,  
faic irec, ñoñe mutenkeniñ.
- 2 Anjelofâcne sasawa, ñoñe mutenkeniñ,  
momori gurufâcne, ñoñe mutenkeniñ.
- 3 Mosa zoañ, ñohe mutenkeniñ,  
bâpiñ tamaeñgopieñ sasawa, ñoñe  
mutenkeniñ.
- 4 Sambâñte sambâñ, go mutenkec,  
sawao opâ fokic, go mutenkec.
- 5 Jañe Wofuñte zâñe mutenkeniñ,  
eki hâcne mume fuambin.
- 6 Eki hâcne ñeñe sanañ ñeniñte râec-jopawec;

eki aka hejarewec i mi huhuckene.

- 7 Mârenkonec ñoñe Wofuñ mutenkeniñ;  
 Hâwecte oâ sâko â hâwec zâkân sasawa ñoñe;  
 8 zoc â aisi hândân, sinou â hâweñ,  
 erâ mânân micticne renkeekic go;  
 9 tiki â mâreñ facne sasawa,  
 jâc hândânnehec â jâmâzâc sasawa;  
 10 qowi sasawa, kâteo â haeo,  
 homa gisic â wipe fakec-ñeñichec;  
 11 mâreñte ñicwofuñ â ñic gurune gurune,  
 ñicbomboñ â mâreñte mumutara ñic sasawa;  
 12 ñiczeñoñ â ñokac zeñoñ,  
 ñic ñokac qizec â naru motec!
- 13 Jañe zeñgoma Wofuñte zâne mutenkeniñ;  
 ere zâne mocjaha fekicne sâko,  
 eri tatamac- ticnezi mâreñ â sambân  
 qâhuckekac.
- 14 E kikefuñfâc-ticne zâne biñe-jenic  
 bafaharewec;  
 izi mitiñicfâcne zeri mumuten bâfua-jarekac,  
 Israe ñic bufuñfâcne jañe hâcne.  
 Wofuñ mutenkeniñ!

## 149

### *Wofuñ mutenkehuc zikare zawiembin*

- 1 Wofuñ mutenkeniñ!  
 Wofuñ gae qâricne moc hecneniñ,  
 mitiñic jañere tutumañko mumuten gae hec-  
 neniñ.
- 2 Israezi bâbâfua-ticne bubian manacneoc,

- Zionte ñokâfâc Wofuñ Sâko-jeñic zeri ec-  
neniñ!
- <sup>3</sup> Gae wohuc zâñe-ticne mumbiankeniñ,  
woñgân qahuc gitazi musi bacneniñ.
- <sup>4</sup> Wofuñ e ñicfâcne mana-jareme biankekac,  
ere maio rumerâ juñgopien jañe sasananji  
eric-jopakac.
- <sup>5</sup> Mitihec jañe zeri ehuc kiwaeniñ,  
fofo-jeñicko fohuc mumutenj gae heniñ.
- <sup>6</sup> Micjenicko Anuture mumumbianji fooc,  
â mejeniczi sâqe bune râpene mictara i baniñ.
- <sup>7</sup> Ehame ñicne ñicne jañerao kin babatara,  
â ñic gurune gurune jañerao okac babazu  
fuazejec.
- <sup>8</sup> Â ñicwofuñfâc-jeñic kâpâcwâru bacjopazo,  
fekicnefâc-jeñic aenji basanan-jopazo.
- <sup>9</sup> Jañerao mumutara dân qanan qârenkekicne irec  
fârine bâfuazo.  
Izi mitiñicfâcne sasawa jañere eri qoqonan  
eocmu.  
Wofuñ mutenkeniñ!

## 150

### *Nokafehec jañe zenjoma Wofuñ mutenkeniñ*

- <sup>1</sup> Wofuñ mutenkeniñ!  
Anutu tiri ufuñ-ticnao mutenkeniñ!  
Sambân sanan-ticnao mutenkeniñ!
- <sup>2</sup> Wiac bapa-ticne tâpirihec irec mutenkeniñ!  
Zai zonzon- ticne qeñ bipinehec irec  
mutenkeniñ!
- <sup>3</sup> Qeñ qacnehuc mutenkeniñ!

Kulele â gitazi musi bacnehuc mutenkeniŋ!

<sup>4</sup> Gae wonŋâŋ ecnehuc mutenkeniŋ!

Qironŋ mimi ŋokac ficnehuc mutenkeniŋ!

<sup>5</sup> Kaŋkuc qa fânâŋ ehuc mutenkeniŋ!

Kaŋkuc fânâŋ sâko qahuc mutenkeniŋ!

<sup>6</sup> Nokafe hehuc juŋgopienŋ sasawa, ŋoŋe Wofuŋ  
mutenkeniŋ!

Wofuŋ mutenkeniŋ!

**Kâte Bible**  
**The Holy Bible in the Kâte language of Papua New Guinea**  
**Buk Baibel long tokples Kate long Niugini**

copyright © 1978 The Bible Society of Papua New Guinea

Language: Kâte (Kate)

Translation by: Bible Society of Papua New Guinea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-11-22

---

PDF generated using Haiola and XeLaTeX on 11 Nov 2022 from source files dated 30 Nov 2021

76869875-8293-5126-8b67-c576c145ac3c